

中國方志叢書·華中地方·第一二五號

據

清·周承弼等修王慰等纂
清·同治十三年修
民國二十六年重印本

影印

湖北省


公安縣志

(二)

成文出版社有限公司印行



10098310



中國方志叢書·華中地方·第一二五號

據

清·周承弼等修王慰等纂
清·同治十三年修
民國二十六年重印本

影印

湖北省

公安縣志

(三)

成文出版社有限公司印行



10098311

中華民國五十九年 四月壹一版

公安縣志

全三冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三七〇一三二號

印刷者：東南印製廠有限公司

和平西路二段70巷83弄29號

內政部登記證內服台業字第一一四七號

驗明條詳隨經署篆縣丞吳元祉審驗二次又經繼任
知縣趙希階審驗二次俱詳報 上憲而竊踞黨衆盜
憎主人又復上控李龔二生奔走質成 本府捕糧廳
李六澄知府魏勳審斷覆擬通詳而案始定復經捕衙
趙福署長陽知縣朱登俊履丈規畝造冊賫報轉報
院 司 學道各衙門構訟七載正署縣及捕官勘丈
凡七次廢堤零星遼遠往返動經六七日李龔二生始
終之而同志經營則又有李生盛勳汪生新鼎朱生方
升周生克勤及武舉毛獻文王彪陸地除荒並柴湖有
糧若干又經聲明 藩憲同入民賦不致另立款項忽

二十五年魯一里八甲重立儒學單名載米六斗七升
零麥三升八合李龔二生又以墮糧呈明 本府署縣
朱公責懲改撥而學田之案始結顏公刻有學田紀略
朝廷設立學田所以贍給寒生恩至渥而考成極嚴公學
無田而有田不知幾費經營任勞任怨利之所在果能
使寒士實受其福則善矣

一原歸學田濱江廢堤脚下砂漬漬灘陸形共壹百貳拾
畝伍分柒毫

第一形叁拾畝壹分坐落申伏鋪地方其實堪承種大
麥下下則地僅貳畝柒分叁釐貳毫每年計收大麥陸

斗捌升叁合

第二形柒畝玖分叁釐坐落青丈老地方其實堪承種大麥下下則地僅壹畝每年計收大麥貳斗伍升

第三形貳拾畝壹分坐落民安驛其實堪承種大麥下下則地僅貳畝每年計收大麥伍斗

第四形玖畝壹毫坐落大河灣地方其實堪承種大麥下下則地僅陸分每年計收大麥壹斗伍升

第五形伍畝伍分坐落放馬湖地方其實堪承種大麥下下則地僅壹畝叁分陸釐陸毫每年計收大麥陸斗

捌升叁合

第六形肆拾柒畝捌分柒釐陸毫坐落椒梅二園其實
堪承種大麥下下則地僅壹拾壹畝陸分壹釐每年計
收大麥伍石捌斗伍合

一原歸學內地叁形共壹百陸拾捌畝坐落放馬湖地方
第一形陸拾畝多屬不毛其實生茅草山地僅肆拾壹
畝陸分每年計收茅草壹千餘束

第二形叁拾伍畝伍分與前形勢無異其實生茅草山
地僅壹拾陸畝每年計收茅草叁肆百束

第三形柒拾貳畝伍分與前形勢無異其實生茅草山
地僅陸拾畝每年計收茅草壹千肆伍百束

以上共收大麥捌石柒升壹合計糶銀叁兩伍錢陸分 又共收茅草貳千數百束計變銀壹拾肆兩柒錢二共變銀壹拾捌兩貳錢陸分

完納條餉支銀叁兩伍錢

完納南糟支銀一兩伍錢貳分

支給貧生七名共銀捌兩陸錢捌分伍釐陸毫

支給社師四名共銀叁兩柒錢陸分

二共總扣減平銀柒錢玖分肆釐肆毫封固批解慰

按學田一案自康熙二十六年迄今近二百載其間不知幾經水患而地形不可復識已慰履任於咸豐庚申

年五月偕西齋自備資斧詣斗湖堤官山一帶查勘請同該處紳耆丈得地一百九十餘畝甫經立冊備案不數日大堤潰決水冲砂壓仍復不能成熟自是水患頻仍復於同治庚午年兩處潰口其地遂於江合長年積水實屬不堪成種雖經出示招佃卒無人承任此官山一帶學地荒廢之情形也又同治四年訪聞得斗湖堤舊縣學宮廢基廣闊久被居民佔踞雖經清丈得地四十畝然歷年來絲毫無獲緣此地濱江月堤外一臨水汎盡行淹沒現據佃戶呈請退佃承種無人以後難望有收僅存基址未失此自行清理舊縣學地荒廢之

情形也至廢堤及民安驛一帶學地向闢不下數百畝
未諗自何年代被奸人竊據失業經前同事於咸豐戊
午年三月獨詣該處清查聞有私給頂租數十串之說
故未勘丈僅議租二十八串後因此地坐落均係濱江
佃戶等總以水大無收藉口不但租課不繳而且抗不
報災已有業不由主之勢雖有田如無田又何貴乎田
爲惟冀當路諸君子留心民瘼修固堤防永慶安瀾俾
獲連年豐稔庶任職司者有所藉而後蒙賑恤者有所
霑耳

南平書院 附田

邑書院仿自宋代竹林書院者宋荆湖制置使孟公珙建以處四方流寓士也培風書院者邑侯楊公之駢建以培植士類者也鳳公書院者邑侯鳳公翔捐俸置產創興膏火邑人思其德因以名之志不忘也後因公有專祠改爲南平書院建於北門內而公之德固歷久而愈新也然邑數苦水屢修屢圯道光三十年復買宅於學宮之旁其地爽塏其宅閑閑可以肄業可以課士公請 縣主聘鄰邑之賢有文者主講席以杜挾制貢緣之弊所置產亦以次加廣擇邑生廉正三人以時司其

出入而給其膏火優者獎之劣者黜之獎之則加勸黜之則加勉亦既多歷年所矣今移建新城將使蘇湖弟子絃誦一堂庶棟楠杞梓遇匠氏而鳳樓重修駮駟驪騮逢伯樂而驥足大展則書院之有造於士林也匪淺鮮已

首士龍納言牟治瀛雷業先於同治辛未冬買李繪臣等田叁石捌斗有印契爲憑查以前印契均失誠恐他人侵佔且驗課年分難保莊戶不移步換形特於壬申冬踏看坵段抵節登載書院印簿庶輪管者永昭信守

一陶家岡田拾肆石叁斗柒拾叁坵私堰捌口堰田伍坵
陸地六塊屋基等項全

一陶家岡田叁石叁斗拾捌坵私堰壹口屋基等項全

一陶家岡田肆石貳拾肆坵私堰壹口陸地肆塊草山壹

形屋基等項全

一橫板橋田伍石貳拾捌坵私堰貳口陸地壹塊草山壹
塊屋基等項全

一橫板橋田叁石捌斗貳拾陸坵公堰叁口私堰壹口相
連濠溝壹圍內零星田貳斗由李姓田過水無阻陸地
約計貳畝公草山貳段屋基等項全

一園角土地田肆石貳拾坵私堰肆口陸地壹塊堰田壹坵屋基等項全

一魚棚嘴田貳石公堰二口陸地叁塊屋基壹處

一蘇渡熟地貳拾畝基地壹處相連荒地候開熟丈量計畝

一胡尾渡田伍石肆斗伍升內屋基壹處

一王家廠田壹石玖斗肆升伍坵公堰一口

一雷家坪田柒石二斗叁拾坵私堰肆口私溝一條內有田叁斗由張姓溝過水無阻屋基等項全

一劉家嘴田拾石零玖斗公堰肆口私墻一個陸地二塊

糧基壹處

一 鄴家嘴柴山壹形

一 督口柴山壹形約計肆拾捌畝

一 申津渡基地壹處

一 北關外田肆石陸斗

一 北關外寇公祠田肆斗

一 西關外寇公祠田貳石貳斗

一 北書院考棚南至北長壹百貳拾貳弓北南寬貳拾柒玖弓

扣地拾壹畝叁分公溝壹條

一 南平書院釀長五六拾七弓北南各寬貳拾肆弓扣地四畝玖

分貳釐內包節孝祠基地並私溝壹條

又田壹坵南北長貳拾肆弓東西橫拾叁弓扣田壹畝
零肆釐

一南考棚東西長叁拾陸弓南北橫貳拾叁弓扣地貳畝
柒分陸釐內私堰壹口

以上六處均係祝家岡舊城

考棚

考棚爲士子登雲之地曩者邑童試均在縣署負桌攜
凳不勝其勞非所以嚴關防肅試典也道光六年邑侯
關公西園捐廉協衆倡修遂使數百年未興之盛舉不
二載而告竣士林頌焉後以基近北城爲水所圯同治
五年邑侯袁公金和集衆議提公費更建於南平書院
之右庚午癸酉復圯於水今移置新城凡爲號舍三十
二間每間桌凳若干件內而至公堂閱卷房廚房外而
龍門報亭頭門以及東西柵欄照牆咸具雖規模草創
而高爽軒豁居然邑中大觀已

附前修考棚序

毛家槐

自古勝地名區恆藉士林以生色其山川之靈秀風俗之敦龐固足以鍾毓而醞釀之亦由官斯地者培植文風尊崇試典而後豪傑蔚起處則爲正士出則爲良臣邦家之光愈增閭里之榮此槐於邑侯關西園先生之作號舍所由深感其意美法良爲能欽承

聖天子育才愛士之深恩以錫福於邑人士也公安古南平郡漢唐宋元代有聞人泊乎前明登鄉科成進士者百數十人或入直詞垣或歷階保傅或盡職臺衡或掌銓政而清潔矢操或作諫官而直言不諱文章事業史志

彰彰至於望樹明經選膺拔萃志篤忠貞行敦節義者
難更僕數迄我

朝雅化作人崇熙累洽經明行修之彥鵲起蟬聯雖槐之
不敏亦由庶常而官學博吾邑文風蒸蒸日上盛矣夫文
風既盛則應童子試者必多應試者多則典試者必鄭
重而慎行之而考棚號舍之作乃歷百餘年來議之屢
屢輒畏其繁重而不果於行也歲在甲申西園明府以
粵西名魁來宰斯土溫慈惠和與民休息復於試士之
日親見夫就解署而應試者之不勝其勞擾也因與同
寅諸公再三籌畫集邑紳倡捐廉俸而議修之一時聞

風鼓舞慷慨樂捐者有人踴躍從公者有人公乃度地於南平書院之前庀材鳩工自乙酉秋季經始至丁亥夏仲告厥成功廣廈萬間士盡歡顏矣夫易渙者人心難集者公事是役也重大紛紜告竣誠非易易幸良有司開誠布公程功集事以肅試典卽以勵文風繼自今名聯淡墨帖報泥金學士賦日而不迷太史奏雲而共覩所謂英豪蔚起處則爲正士出則爲良臣者必遠勝於往日焉孰非西園公之有以肇其始而兆其祥哉槐匊繫夔陵未能從諸君子後共襄其任而聞此盛舉竊不禁佩公之渥施而喜爲吾邑之文人墨士

道也於是乎書諸石

賓興附田

周禮大司徒以鄉三物教萬民而賓興之三年大比則書其賢者能者獻之於王王拜受之登諸天府其典棊隆三代以來取士之法不同而賓興之禮未之或廢宋宗室彥俊知紹興府復鹿鳴禮置興賢莊寒士悉得所飲助士自束髮受書雞窗雪案暨大比之年將以備天家賢能之選事未有急於此者也邑在前明登巍科膺顯仕者史不絕書

清朝一科獲雋者或七八人或四五人猶不失爲望邑近則科目迴遜於前大都因水旱災祲無力上進以致槐

黃虛擲深堪扼腕道光十八年宋國保捐田壹百零貳畝四釐著落北觀音寺以充賓興咸豐元年舉人李洪已訓導杜宜詩等因先年邑侯李公紫藩勸捐育嬰存費稟請前徐公文灼改作賓興始置腴田伍拾貳石柒斗伍升此吾邑賓興所由昉也嗣又得江陵訓導鄧承謙向在城內及沱市典舖因水患歇業將兩處房屋捐入賓興歲獲租數十金所謂有其舉之不可廢也第前捐之田沙漬無用後捐之屋在沱市者火燬無存在城內者移建新治所望官斯地者念切樹人諭飭董事精白乃心無稍侵蝕無許挪借有志之士以公廉爲繼

述有力之家以樂捐爲擴充使此項善舉垂之永久斯
邑人士所尸祝者耳

東鄉田

共叁拾柒
石零伍升

一杉木橋牛穿巷田拾柒石肆斗伍升壹百零壹坵私公堰
肆口草山貳段陸地貳塊松園壹個屋基等項全

一高家樓田玖石壹斗伍升肆拾柒坵私公堰肆口私坑壹
個陸地肆塊屋基等項全

一章田寺羅唐山田肆石貳斗拾肆坵私公堰壹口屋基等
項全

一陶家岡田肆石貳拾坵私堰壹口私坑壹個陸地貳塊

草山壹段屋基等項全

一報慈寺東田貳石貳斗伍升拾坵私堰壹口私坑壹個
屋基等項全

西鄉田共拾伍石柒斗

一蕭家岡田柒石貳斗叁拾玖坵私堰肆口私濠溝壹圍
公溝肆條屋基等項全

一道鎮菴田伍石陸斗貳拾叁坵私堰貳口公溝壹節陸
地伍塊草山壹段屋基等項全

一道鎮菴田一石一斗伍坵公堰一口地一塊

一曹家溝田一石捌斗六坵私堰一口公溝一條

一祝家岡舊城賓興館東西各長五十九弓南寬三十二
弓北寬二十九弓扣地三畝零九釐東抵杜基南抵街
心西抵馬基並公溝北抵公溝溝東上包杜地

子午卯酉

三二

十一

補載前育嬰堂樂輸姓名錢數

總千 司馬威桂捐捌百串 監生 雷貢荆捐一百肆拾串

鄒三義典以上 恆宜典以上 朱初採以上

履升典各捐 袁憲採錢捌拾串 劉承焯各捐

萃升典一錢 馬德普以上 傅長生錢伍

凝瑞典百串 高秀山錢四拾串 唐肇選拾串

貢鄒趙讓捐錢伍拾串 職員 晏光炳捐錢伍拾捌串

監生 陳萬春捐錢肆拾伍串 監生 袁勤貴捐錢二拾六串

生員 宋炳燿捐錢貳拾串 封員 劉作翰捐錢一拾伍串

同州齊大富以 廖億大以 總千馬德照以 晏明謙各

總千劉東來上 王協豐上 監龍巨源上 廖掄秀捐

貢毛業精各 監鄒能中各 李香山各 桂臨豐十

生晏明椿捐 員生毛鶴齡捐 馬學德捐 劉德光串

監李志鵬錢 貢毛家麟錢 易珩光錢 余培九串

王家元叁 毛楚占貳 生余道選 貢袁時曜伍

陳必照十 吳居義十 劉紹邦十 吳萬應串

趙恆豐串 馬紀寬串 韋殿邦串

劉大士十 馬方太正 馬百川正 統共二千五百柴十一串

鄉飲酒禮

順治初令各府州縣每歲正月十五日十月初一日舉行鄉飲酒禮二次雍正元年

上諭鄉飲酒禮乃敬老尊賢之古制近聞年久視爲具文所備宴筵亦甚不堪應加舉行乾隆十九年會典館奏定各省舉行鄉飲令各省督撫轉飭所屬府州縣每歲遵照定例舉行二次先訪紳士之年高德邵者一人爲大賓次爲介賓又次爲衆賓皆由州縣詳報府尹督撫覈定舉行其本地有仕至顯宦偶居鄉里願來觀禮者是爲僎賓依古禮坐於東北無則闕之仍將所舉賓介造

具姓名籍貫清冊送 部存案倘鄉飲後有過犯按所
 犯輕重詳報斥革咨 部除名並將原舉之官議處

鄉飲儀注

正印官為主人

如無正官 佐貳代

位於東南以教職為司正以老

成生員為贊禮前一日司正率執事習禮

於明倫堂依次 圍陳設坐次

日黎明宰牲具饌主官率僚屬出迎於庠門揖入三讓

三揖而後升堂

將入門揖至中 門揖堂階下揖

賓西主東相向立拜各就

坐

贊唱

司正揚觶司正至堂中北面立賓主皆立共揖

執者酌酒於觥 事以授司正

司正舉酒命眾

曰恭維 教舉行鄉

朝廷率由舊章敦崇禮 飲非為飲食凡我長幼

各相勸勉為臣盡忠為子盡孝長幼有序兄友 弟恭內睦宗族外和鄉里無或廢墜以忝所生

畢司正舉觶自飲

觴授執事者司正北面揖賓主皆揖司正復位賓主皆

坐

贊唱

讀律令

執事者舉律令案於堂下

讀律令生由西階升詣案前

北面立賓主皆立讀曰

大誥鄉飲酒禮序長幼別奸頑異罪人其坐席間年高有德者居上高年純篤

者並之以次序齒而列其有曾違條犯法者不許干預良善之席主者若不分別致使貴賤混淆罪以違制論奸頑紊亂止席者移出化外喧嘩失禮者司正責之

讀畢北面揖賓主皆揖讀者退賓主皆坐

供饌案

執事者舉案至賓前及主前以次舉訖唱

獻賓

主出席北面立執事酌酒以授主 主受爵詣

賓席置於席稍退兩賓答拜訖主退復位

唱

賓酬酒

席執事斟酒授賓

賓詣主前置於席稍退拜答如儀各就位坐介

衆賓以次斟酒於席訖

唱

飲酒

酒二行唱

奏樂工升歌周

詩鹿鳴之章卒歌笙奏

御製補南陔詩閒歌周詩魚麗之章笙奏

御製補由庚詩乃合樂歌周詩關雎之章卒歌工告備出執

事者行酒主賓以下飲無算爵訖

唱

徹饌

候徹案

訖唱

賓主行禮東西相向兩拜訖唱送賓賓介衆賓主人分

東西行出屏門一揖升輿而退監禮者出主人送禮畢

乃皆退恭錄

製補笙詩

南陔三章

二章章六句
一章八句

我逝南陔言陟其岵昔我行役瞻望有父欲養無由風

木何補

我逝南陔言陟其岷今我行役瞻望有母母也倚廬歸
則甯止

南陔有笱籜實勺之孱孱孩提孰噢咻之慎爾溫清潔
爾旨肴今爾不養日月其慆

由庚四章

王庚便便東西朔南六符調燮八風節宜
王庚容容朔南西東惟敬與勤百王道同
王庚廓廓東西南朔先憂而憂後樂而樂
王庚恢恢南朔東西皇極孰建惟德之依
鄉飲禮嘉慶十二年舉行

知縣任公郿祐

鄉飲大賓王杜志珩

公安縣志卷之四

民政下

塘汛

塘之義取諸防汛之旨歸於信此卽古畫郊圻慎封守
謹關梁完要塞之道邑爲南北通衢險隘所關則守望
綦嚴城汛外陸路有八水程有四各設兵譏察則內外
交飭臂指相聯姦宄無能竊發已

縣城汛

把總一員駐防 外員 一員協防

一守城兵五名 四門守兵各一名 監卡守兵一名

一陸路入塘名設塘兵五名駐防管轄

郭大口即屬陵驛 紀湖堤

馬長港

孫黃驛

塔屈舖

郝鄔舖

章莊舖

黃鐘舖

一水路四塘各設塘兵五名外委把總管轄

黃金口

港關

雙店

泗水口

通共守沈兵伍拾柒名

驛站馬政附

古者軍行日三十里吉行日五十里故僕無况瘁而馬力不竭後世轉馳迅速而僕馬始交受其困邑屬皇華大道勘合之往來羽書之旁午最爲衝繁康熙甲子奉革里役夫馬錢糧本縣坐支要之工料之支給以時則芻豆得以預收而斯馬斯臧畜牧之阜蕃悉由之矣

一額設孱陵孫黃二驛孱陵驛北行江陵渡荆江至荆南驛計程柒拾里孱陵南至孫黃驛計程陸十里自孫黃驛至湖南澧州順林驛計程捌拾里孱陵驛西至松滋縣涇市驛計程陸拾里孱陵基金舍原在孱陵廠廠口橋

邊舊有馬場一處道光十二年江陵堤潰驛舍漂流道
路衝淤詳移江陵屬上李家口孫黃驛原有基舍河東
有牧馬草場壹處

一孫孱二驛額設馬壹百捌拾匹馬夫玖拾名排摺夫貳
百貳拾名獸醫二名雍正六年奉

部裁馬貳拾匹馬夫拾名扣解工食工料等銀肆百伍
拾貳兩又乾隆二十四年奉

部裁馬貳拾匹馬夫拾名扣解工食工料等銀肆百伍
拾貳兩今孫孱二站各設馬柒拾匹馬夫
各叁拾伍名摺夫各壹百壹拾名

一孫孱二驛原額驛站正銀柒千伍百壹拾壹兩捌錢伍

分內除由縣每年坐支夫馬工料支應倒馬等項共銀伍千伍百玖拾柒兩叁錢小建扣解閏月加增餘銀解赴

藩庫至壹叁柒分耗羨銀兩統入地丁耗羨銀內開消
一原額驛站銀伍千陸百捌拾壹兩柒錢叁分玖釐九毫除荒銀叁千貳百貳拾肆兩肆錢柒分壹釐又除豁免運夫丁銀肆拾兩貳錢陸毫壹絲壹忽捌微伍塵實徵銀貳千肆百壹拾柒兩陸分叁釐叁絲叁微伍塵陸纖陸渺九漠伍茫伍沙

一原編江濟水夫正損改協驛站銀壹千陸拾壹兩捌錢

捌分伍釐柒毫叁絲伍忽除荒銀陸百伍兩肆錢貳分肆釐實徵銀肆百伍拾陸兩肆錢陸分貳釐因驛站夫馬錢糧不敷於康熙二十年十二月二十日欽奉

恩詔專案內動支本邑民賦銀肆千陸百叁拾捌兩三錢壹分玖釐柒毫肆絲伍微陸塵

以上共實徵銀柒千伍百壹拾壹兩捌錢伍分肆絲零

- 一 孫孱二驛額設倒馬價銀伍百捌拾捌兩
- 一 起解二驛鹽糧儲道驛站項下新增丁墾銀玖百伍拾捌兩陸錢玖分玖釐捌毫伍絲捌忽陸微

實存銀伍千捌百陸拾捌兩肆錢支給孫孱二驛夫馬
工食工料支應藥餌及排夫工食

一孫孱二驛額設排損夫每年應支銀柒兩叁錢貳分共
應支銀壹千陸百壹拾兩肆錢

一驛馬每壹匹日支豆伍倉升每升價銀捌釐該價銀肆
分日支草貳束每束價銀伍釐該價銀壹分日支銀伍
分二驛年共支銀貳千伍百貳拾兩每馬壹匹年支藥
餌銀壹兩二驛共支銀壹百肆拾兩又每驛各設獸醫
一名每名年支銀柒兩貳錢二驛共支銀壹拾肆兩肆
錢

一二驛馬夫每名支工食銀柒兩貳錢二驛年共支銀伍百肆兩

一孫孱二驛各設支應廩糧並修理號舍鞍屨等銀壹百壹拾兩貳錢伍分二驛年共支銀貳百貳拾兩伍錢

以上二驛夫馬工食工料及排夫工食支應藥餌並買馬價銀俱在正項實徵銀內按月支給一驛分給各項

以上係康熙六十年舊志原文

以下係奉修新志查照同治三年詳案驛站定額

一原額驛站銀伍千陸百捌拾壹兩柒錢肆分內除荒銀

叁千壹百陸拾肆兩捌錢捌分陸釐又除豁免故夫丁
銀肆拾兩貳錢壹釐並除驛站增墾抵補重丁充餉銀
貳拾貳兩捌錢玖釐歸入起運項下造報外實徵銀貳
千肆百伍拾叁兩捌錢肆分肆釐

一原編江濟水夫正損改協驛站銀壹千陸拾壹兩捌錢
捌分陸釐內除荒銀陸百叁拾捌兩貳錢玖分玖釐又
除江濟增墾抵補重丁充餉銀叁兩玖錢壹釐歸入起
運項下造報外實徵銀肆百壹拾玖兩陸錢捌分陸釐
一照依協濟徒多轉折等事案內徑支本縣民賦銀肆千
陸百叁拾捌兩叁錢貳分

以上三項共貫徵銀柒千伍百壹拾壹兩捌錢伍分
一 孫孱二站各設排夫加增夫壹百壹拾名每名日支工
食銀貳分叁毫叁絲叁忽年支銀柒兩叁錢貳分額支
銀各捌百伍兩貳錢

一二站各設馬柒拾匹日支草料銀伍分年支銀拾捌兩
額支銀各壹千貳百陸拾兩每馬壹匹日支藥餌銀貳
釐柒毫柒絲柒忽柒微年支銀各貳百伍拾貳兩

一二站各設馬夫叁拾伍名每名日支工食銀貳分年支
銀柒兩貳錢額支銀各貳百伍拾貳兩

一二站各設獸醫壹名年各支銀柒兩貳銀不扣建加

一二站每年各准倒馬貳拾壹匹隨斃隨補在坐支項下各准銷馬價銀貳百玖拾肆兩

一二站各設支應廩糧修理號舍製備鞍屨籠繮鞦轡槽鑿什物等項銀各壹百壹拾兩貳錢伍分

以上每站每年應支銀貳千柒百玖拾捌兩陸錢伍分除小建六日扣銀柒拾玖兩伍錢柒分捌釐兩站

實共支銀伍千伍百壹拾柒兩柒錢貳分陸釐

係坐支

餘銀如數運解外應解倒馬皮張變價銀肆拾貳兩

一起運驛站及坐支夫馬等款正銀壹千玖百玖拾肆兩

壹錢貳分肆釐

每年無開月者準此

如遇閏月大小建加支驛站銀叁百捌拾肆兩陸錢肆釐俱在

此項銀兩動支

一起運驛站及坐支夫馬等款耗銀捌百貳拾陸兩叁錢

叁釐內有坐支巡典養廉銀壹百貳拾兩批解

附錄康熙十一年公安縣申 院詳文

為違

旨虐鄰邀請通詳以甦民命事十一年七月初三日據闔邑

紳衿里老赴縣詞稱政莫重於郵傳法莫嚴於違

禁未有以先經道府之公議 各縣之會題奉

欽定之驛政而欲紛更於十有八年之後者也查荆屬公松

二邑均爲七省孔道羽檄

皇華絡繹不絕古道在公安因滄桑變更道路成河遂以
虎渡小路權作官道奈江湖水漲不時屢阻郵傳至順
治十三年阿將軍渰死禁旅官參民逃慘難圖繪幸蒙
前任督部堂祖撫院林暨道府會議公安松滋各有二驛每縣
脚馬壹百匹排夫壹百伍拾名夏秋水漲俱歸松滋冬
春水涸俱歸公安按季應差會題請

旨兩縣無互諉者十有八年豈松滋去任屈縣官聽積棍奸
胥之言於九年九月內捏詳申上推卸驛站獨累公安
幸各院深慮郵政重務俱蒙 憲批定例已久難以遽

公生集卷之三
元之二
十一
更本府回詳亦稱事久例定難以遽更應請飭行兩縣
照舊分季在案詎遭松滋勢棍歛費通縣百計脫卸遂
於六月二十二日 本府李同兩縣父母不驗松邑之
高阜而獨勘公邑之焦旱反令驛併公安勒令修葺虎
渡一路切虎渡一路水滸之區約共五十里自縣城孫
黃驛塔岡廟一帶又計二十餘里其形勢低窪天雨水
沒通長入十里且有沿途橋梁九處久經傾頽不特修
葺甚艱卽竭盡民力必旋修旋壞此有目者所共見而
府縣不念郵傳重務止聽奸計左袒勒取允服印結不
但 老父臺心念民瘼勢不敢從而闔邑士民甯死不

甘竊兩縣分季之差松尚稱苦而獨苦公安是何公道
况現在之陸地不行而議修水鄉爲路豈法令必勞民
傷財而後快乎滄死禁旅往事可鑒無故紛更害將胡
底伏乞俯電輿情通詳各憲等情該知縣何國棟看得
公安形勢低窪但遇水漲不特路道成河而居民房舍
田禾半付澤國官民受害不知凡幾矣所有驛站一項
自順治十三年滄死阿將軍禁旅之後蒙前任各憲公
議均撥兩驛夫馬按季輪管會題在案誠不易之良法
而驛路無虞官民荷生成之福者十八年於茲矣今松
滋忽於頓翻有歸併公安之請雖冒蒙府憲按臨公安

踏看不過因本年旱魃爲虐溼土皆焦遂有修築之議
但公安路道水漲滄沒者通長八十里又有橋梁傾頽
者九處工程浩大實爲繁難不特闔邑不服卑職亦何
敢輕遵即使卑職有不得不從之勢而各憲會議具題
倘蒙 大部覆核今日之歸併與當年之改遷前後互
異駁覆不常實煩 憲臺之盛心豈非卑職輕諾之咎
乎况闔邑衆口不服卑職實難勒從今據前由合爲申
請伏乞 憲臺敕行驛憲會同巡憲親臨踏勘核查事
久例定之

欽案不致紛更於一旦亦使水國窮民免使修築八十里之

長途照舊分差均沾苦藥庶驛路各有攸歸而吏民永戴生成矣本月二十日蒙

督憲部院董批公松歸併驛路務期兩驛允服今據公安詳稱闔邑士民嘒嘒不已非永久之策仰糧驛道再行會同巡上荆南道從長酌妥據實通報驛巡兩道親臨公安勘驗是時大水決堤巨浸稽天又與前六月之焦旱者不同凡來勘者面見水勢亦無異詞及兩道過松驗路驗馬松令故不迎見以示無私但以羸馬數十匹呈驗遂謂公邑馬尚可支而松邑馬瘦人疲不堪走遞併歸而公安松邑又復匿名四布欲羅織公安爲首糧

里以箝其口其計尤險矣十二月幸又奉

上駁不准則此弊已如觀火但事關闔邑利害民間曉曉
實未遽默然也

舊志明設三驛 清朝民安驛裁止有孫孱二驛一

孱陵驛故道上自江公接壤之普化觀南行十里至孱
陵驛自孱陵十二里至紀湖堤八里至觀音寺二十里
至馬長港過河遶大扁湖五里至嚴畚坡又十里由縣
城西門外至孫黃驛道光十二年後江松二邑堤屢失
防帶淹縣屬驛舍漂流道路衝淤詳請改遷江陵屬上
李家口由本邑下李家口南行二十里至觀音寺又二

十里至馬長港又二十里遶城至孫黃驛計程六十里
水泛均設船渡

一孫黃驛在縣城南五里自驛渡孫黃河即山河越堤逾陳

家湖十里今十里至塔岡鋪原係護道坑近因江陵毛楊二尖停修夏秋水泛波濤洶湧必須船隻又

地勢由北而西往來值石尤風最為凶險即冬春水涸亦有趨公橋土橋灣二處設船渡送自塔岡鋪十里至

郝鄔鋪十里至章莊鋪內有姚家煙舖水泛設船十里至黃鍾鋪內有積玉

橋新建驛二處水泛設船五里至界溪橋水泛設船橋南屬湖南澧州查澧州接有關

山鋪沙林鋪順林驛與孫黃驛遞送公文自孫黃驛至

湖南順林驛計程八十里

一縣屬東南北三路額設貳拾壹鋪半共鋪司兵貳百柒

名東路沙堤鋪起與石首新開鋪交界南路黃鐘鋪起與湖南澧州關山鋪交界工食額銀共肆百玖拾伍兩柒錢肆分柒釐內除荒故丁並抵算重丁充餉銀貳百陸拾陸兩柒錢貳分玖釐已奉 文赴省請撥外由縣實徵坐支銀貳百貳拾玖兩壹分捌釐咸豐四年奉山

西巡撫恒

奏請通行各就地方情形裁減鋪遞奉本省

撫憲胡 奏請將湖北鋪遞一并裁汰公文有驛歸驛無驛專差遞送將額設工食銀兩酌留二成給差馬工食工料之用

鋪遞

一東由申伏鋪十里至井子鋪十一里至積善鋪十里至梁家

鋪十里至芭芒鋪十一里至民安鋪十里至沙堤鋪十里至

新開鋪石首界

一南由孫黃驛十五里至塔岡鋪十里至郝鄔鋪十里至章莊

鋪十里至黃鐘鋪十一里至澧州關山鋪

一北由罐子鋪十里至范林鋪十里至二穴鋪十里至桑潭鋪

十里至板橋鋪十里至孱陵鋪十里至窰頭鋪十里至下灌

洋鋪十里至上灌洋鋪十里至江陵下賽鋪昔設鋪司壹百叁拾玖名係承

充鋪兵陸拾捌名係係編咸豐四年領奉裁汰

以上驛道鋪遞俱仍舊志 按縣屬二十一鋪俱有
鋪基田畝向係各鋪兵住種今奉裁汰東北路鋪地
被水衝淤查考似難南路半在高阜理合歸公俟查

紀兵

自古帝王制置天下曷嘗一日去兵哉天下方亂賴熊
虎之將韜鈴之佐翦除禍難蕩一海宇及大亂既平偃
伯靈臺習射澤宮一張一弛固文武之道爾周之盛時
以井田出車則人皆爲兵敵王所愾非處處而守之村
村而防之也故或歸馬放牛而天下晏然或宿兵於無
用之地而亂卒莫支則自守之與天下守之之異也邑
在兩漢輻輳廣袤兼該數縣計不廢武備之修嗣後世
變多故昭烈始據油口翩然荆蜀遂振雲龍之勢孟珙
屯兵公安北伐中原乃樹鷹揚之略陸抗堅壘於樂鄉

桓冲退守於江南中歷五季屢爲戰地則以居南北之衝介大江之險進取退守恆必由之蓋其地彌要則其爭彌力而民生其閒乃益苦勢使然也明末寇賊繼踵兵戎絡繹數十年閒彼勝此負水去陸來貫嬰剝孕飲頭脯肝之慘不啻牢搜而陸獵焉加以鳥黠懷異在在蠱起始猶保聚以自衛繼遂屠裂以相雄善良化爲鯨鯢婚姻變爲豺蟒燒餉緡兵斬芟如草天下無王逝將誰告

清朝大定以來海內久脫干戈各州縣輪兵設守所以綢繆防衛者所在必遍則安民保治亦勤勤無遺慮矣

舊志

漢

章帝建初三年冬淩中蠻覃兒健反攻燒零陽作唐孱陵

數縣四年發荊州七郡汝穎弛刑徒吏士五千餘人拒

守募充中五里精夫不叛者四千人討之五年春兒健

請降不許戰於宏下大破之斬兒健餘黨悉平此公安被

舊志永定九谿等衛所桑植茅岡各司隘皆漢婁中地而永順容美為大容美尤能文而好禮明末士大夫避兵多往依之接零陽充縣漢置

今慈利永定地容美今鶴峯州地覃兒健舊志誤為覃兒健攻燒零陽誤作零陵又以斬覃兒絕句皆失考

獻帝建安十三年曹操敗於赤壁先主遂取江南武陵長

沙零陵桂陽四郡舊志

十四年先主領荊州牧屯公安三國吳志舊志先主領荊州牧周瑜據江陵分南岸地以給先主

立營油口即此劉表故士從北軍多叛來投先主先主以所給

地少不足以安民後從權借荊州數郡江表傳周瑜卒魯

肅勸瑜以荊州借先主通鑑權遣奮威將軍孫瑜率水

軍欲上取蜀先主使關某屯兵江陵自住公安不聽瑜

兵西上權不得已召瑜還舊志

二十年先主既得益州權求荊州不得怒遣呂蒙襲取桂

陽長沙零陵三郡先主自至公安遣關某爭之聞曹操

將攻漢中遂與權和分荊州以湘水為界長沙江夏桂

陽以東屬權南郡零陵武陵以西屬備通鑑

二十四年關某攻曹仁於樊時孫權攻合肥諸州兵戍淮

南某使南郡太守糜芳守江南將軍傅士仁守公安九

月權遣呂蒙襲南郡傅士仁降之

通鑑

關某討樊留兵

將備公安南郡呂蒙遂稱病篤權乃露檄召蒙陰與圖
計蒙至潯陽盡伏其精兵艤中使白衣搖櫓作商賈
人服晝夜兼行某所置江邊屯堠盡收縛之某不聞知
遂到南郡蒙令故騎都尉虞翻爲書說傅士仁爲陳成
敗士仁得書流涕而降糜芳城守蒙以士仁示之芳亦
開門出降

吳志呂蒙傳

權至公安置酒謂吳郡全掾曰卿前

陳此計孤恐機泄故隱而不答今日之捷亦卿之力也

封棕爲華陽亭侯以呂蒙爲南郡太守封孱陵侯

舊志

周瑜子允以兵千人屯公安舊志

三國吳

建衡二年拜陸抗都督信陵西陵夷道樂鄉公安諸軍事

三國吳志陸抗傳按信陵故城在歸州東吳置縣西陵即夷陵今東鄉縣夷道今宜都縣

晉

太康元年正月王濬伐吳攻孱陵之樂鄉舊志樂鄉有二一在秭歸即巴東縣

也一在孱陵即陸抗所築與羊祜對壘處 晉書濬發自成都二月庚申克吳

西陵壬戌克夷道乙丑克樂鄉城舊志此孱陵之樂鄉也與水經合按綱目正誤樂鄉

今安樂鄉春秋郡國之地其城吳陸抗所築在松滋東一統志一在松滋縣東七十里一在荊門州晉安帝時置一在巴東縣治東據此

則樂鄉城有二而舊志止註有二失考

懷帝永嘉五年巴蜀流民爲土民所侵苦蜀人李驥聚衆
據樂鄉反南平太守應詹擊破之

桓冲督荊州值符堅強盛乃上疏曰自中興以來荊州所
鎮隨宜回轉事與時遷勢無常定宜全重江南輕戍江
北且孱陵樂鄉北枕大江西接三峽若狂狡送死則舊
郢以北堅壁不戰遠乘其疲撲剪爲易臣司閩外隨宜
處分於是移鎮上明使將軍劉波守江陵諮議參軍楊
亮守江夏

房治

亮守江夏

舊志上明有二一在江陵界北一在松滋縣西水經江水又東逕上明城北是也其地夷敞北踞大江晉刺史桓冲

安帝隆安三年十二月桓元襲江陵南蠻校尉楊佺期與

兄廣共擊元元畏其銳退軍馬頭義熙元年春正月劉

毅次於馬頭桓振以帝屯於江津

晉書安帝紀

毅等既戰勝

以為大事已定不急追躡時桓謙匿於沮中揚武將軍

桓振匿於華容浦桓元故將王稚徽成巴陵振聚黨得

三百人謙聚眾應之復陷江陵劉毅至巴陵誅王稚徽

何無忌劉道規進攻桓謙於馬頭桓蔚於龍泉皆破之

通鑑

前五代

劉宋兵事無考舊志載宋齊以來有軍主齊南平鎮軍主

周敷

舊志

齊高帝建元三年義陽剗帥張羣亡命爲賊殘破義陽武
陵天門南平四郡沈攸之進討不能擒豫章王暉遣虞
欣祖爲義陽太守誘納之使降於是斬其首惡其黨數
百人皆散四郡獲安

參禮志

梁武帝太清二年秋八月侯景反荊州刺史湘東王繹移
檄諸王入援又遣司馬吳巖同天門太守樊文皎將兵
發江陵繼遣世子方等將步騎一萬人援發公安
陳臨海王光大元年九月吳明徹破華皎乘勝攻梁
郡今松滋拔之二年二月進攻江陵梁主出屯紀南以避
之周總管田宏從梁副總管高琳與梁僕射王操守江

陵晝夜拒戰十旬擊明徹敗之明徹退保公安通鑑明

徹征北大將軍太建官五年封南平郡公

宇文周天和初巴峽諸蠻為亂連結涪陽蠻為聲援府志

隋

高主開皇八年陳主遣其信州刺史顧覺鎮安蜀城荊州

刺史陳紀鎮公安皆懼而退走於是巴東以東無敢守

者通鑑安蜀城在東湖縣西北周書趙熙傳時於江南岸置安蜀城以禦陳

唐

僖宗中和二年冬十二月武陵蠻雷滿澧州詔授滿朗州

兵馬留後歲率三四引兵焚掠荆南通鑑

後五代

梁太祖開平元年武貞軍節度使雷彥恭會楚兵攻江陵

荆南節度使高季昌引兵屯公安絕其糧道彥恭敗楚

兵亦走九月彥恭攻涇陽公安季昌擊敗之通鑑

涇陽鎮在公安澧界二年淮南遣兵寇石首又遣將李厚將水軍萬

五千趨荆南高季昌逆戰敗之於馬頭四年楚王馬殷

遣將侵荆南軍於油口在公安高季昌擊破之斬首五千

級澧志舉要馬殷字霸圖許州鄆陵人自唐僖宗中和二年為秦宗權將孫儒麾下裨將乾寧二年拜潭州刺史武安軍節度使據澧朗

岳衡二十三州及朱溫篡唐殷遣使修貢溫封為楚王周顯德時武陵人周行逢竊據鼎澧十州日事殺戮荆南自梁時有峽州人高季興據

荆歸峽三州朱溫以為荆南節度使後唐同光二年封南平王國江陵傳其子從誨孫保融保勛及子繼冲五十餘年大江南北生民之禍亟

矣

宋

徽宗時羣盜至公安邑令程千秋帥民禦之荆鄂鼎澧悉

賴以安

舊志

高宗建炎四年七月程昌寓權湖北帥事以杜湛權馬步

副總管時公安石首松滋諸縣皆為賊所據賊首李合

戎屯松滋之尹店市寓遣杜湛渡江擊之遂擒合戎八

月湛克復公安等縣

建炎以來繫年要錄

九月湖賊夏誠遣將李全

功犯公安軍解潛遣統制林閏等擊斬之

通志

理宗端平二年孟珙制置荆襄於公安措置屯田稱孟撫

莊舊志

元

阿里海牙以荆湖行樞密院事廉希憲以行省荆南俱分

兵防守公安舊志

明

莊烈帝崇禎十五年冬李自成陷荊州癸未三月賊將孟

長庚率衆下岳陽湖南巡按御史劉熙祚大破之冬十

一月張獻忠圍澧州湖南右參議陳瓊來援戰敗與守

道周鳳岐皆不屈死之賊遂南寇常德府掘楊嗣昌祖

墓還過順林驛屠殺慘甚十二月擁衆自湖南來據荆

州城自稱西王

參漕志

清朝

世祖章皇帝順治元年甲申夏五月

大軍定京師時南北未通寇氛甚熾上臺飭各屬遴士民
之幹者給劄付爲團練官或因爲奸利出門肩輿張蓋
鳴鑼吹角民稍拂意卽沉殺之沒其地田妻子爲己有
又各爭長相戰殺人苦之甚於賊

漕志舉要

乙酉二年夏五月

王師定江南李自成聞英王南討走通城縣九宮山被居民
誅死其兄子錦與自成妻高氏第一功僭僞將袁宗第

劉二虎塌天保馬缺子羅汝侯劉小田等與一隻虎自
瀏陽反兵北渡駐松滋草市坪十月十五日寇澧州衆
三十萬南北千餘里燒殺殆盡公安賊陳政乘閒竊發
殘毒鄰境明副將楊朝棟來旋去副將甄芳再來皆未
能誅賊也

參澧志

癸丑康熙十二年冬吳三桂反於雲南明年甲寅正月自
辰州白馬渡遣僞前鋒吳國寶馬三保北寇岳常道遲
日豫遣吏曰梅標往探標降賊三月初八日賊陷澧州
知州張聖宏急拏眷北渡岷江赴荊州府蔡綏遠將軍
營麾下泣求辦事置寬典逆以標爲僞知州逆壻胡魏

夏等衆十餘萬屯城內外分營順林驛依山掘壕縱刦掠遊哨徧山村湖垸俘繫男女民急挾小舸走避蘆汀沙洲多溺死者三桂至澧居道署造銃礮馬仗立鐵木各局步騎四出催糧草夫役稍不遂意輒炮烙刦擄慘同闖獻二賊時公安松滋枝江等縣相繼失守十六年丁巳三桂聞征南將軍穆圖長沙急由常德至長沙督僞將與

大兵連戰大敗十七年戊午春三桂死於衡州十八年己未僞將軍吳應期在岳州城中食盡潰圍宵遁

大兵乘勝追討貝勒王提督桑某等自岳至澧州順承王

綏遠將軍蔡自荊州至澧僞官遁逃於是大江以南戍壘盡撤我民始得還定安集以長享億萬年

昇平之福已

參澧志

按公邑地稱澤國遇有兵警亦藉水防東自呂江口

江陵界

至新開鋪

石首界

長江天塹南則泗水口

接澧州界

兩

岸皆湖中耶虎渡分流與西南之界溪礮牛浪湖出水相通北爲江陵屬太平口至李家口爲公安界面水屯軍皆可自守咸豐四年夏五月粵逆由宜昌竄擾虎渡口舟行至縣境知縣喬守中率士民沿河皆張旗幟野樹多燃火炬賊擬轉港口至城團練倚西

岸唐家岡礮擊賊船賊遂順流南竄

鹽政

公邑地屬偏僻並不與川省毗連從無私販入境每年額銷淮鹽三千二百二十引應銷子鹽一十四萬二千六十九包官有督銷考核俱係鋪戶水販赴漢運售迨道光二十八年奉

兩江督鹽都堂陸公 奏奉

旨改章每引加增鹽六百六十觔將各岸費資裁汰南北通行咸豐二年粵逆竄擾省垣江路梗塞淮鹽不通各屬乏食本省督部堂 奏准借銷川鹽民便焉

風俗

王制天子巡狩命太史陳詩以觀民風周禮大司徒以本俗六安萬民是知風俗雖不同而采風問俗於以化民者無不同公安古南國地二南之風猶有存者良有司因時利導使邑之人交相勸勉日遷善而不知則俗敦仁厚風息囂陵行將蒸蒸日上

邑俗好鬼神尙勁悍知恥負氣

府志

士重經學喜讀古文辭爲文多自出機杼不事釘釘詩懲有明嘉隆間習氣務爲新警制舉業多宗尙先輩仕進者以貧相高以進退相勸以求田間舍爲恥故往

往有名登仕版而家無擔石者殊不怪也民尙恥負氣雖親故筮仕多不輕往否則鄰里笑其炎涼其人聞而漸恚若大穢不可解或因事構釁族黨雖貴有力亦不相聞甯負而受科不仰面也

布種最早花朝後卽行耕作穀之先實者曰凍粘五月杪卽可嘗新農家以新之早晚爲睚負焉鄉村以三四月爲農忙之月三更後呼集同輩各採秧百餘束黎明下田分插每人約田斗半日中竣事插時折腰俯首若揖若拜退行泥水中頗極困頓別有二人吹喇叭擊賁鼓競唱村歌爆竹之聲聞於四野諸插者殊以爲樂想

見康衢擊壤景象

邑多湖民有湖業者秋冬閒招諸漁戶捕魚舡賓既集
網罟齊張玉尺銀刀飛躍水面好事者攜酒具輕舫尾
而觀之亦快事也

婦女勤紡績布衣無華飾雖縉紳家主婦亦然布以寬
一尺而經至六百縷者爲極細亦有躬蠶者桑瘦而蠶
細絲亦生硬僅可織爲土絹其敗繭仍收作線而織之
名撚綢

立春前一日邑大夫而下俱簪花盛服迎春於東郊民
閒扮演故事遊行城鄉手執春條謂之迎春至邑大夫

率僚屬祀芒神畢擊土牛碎之卽出土牛以送寒氣之遺也

元日寫神

仲音

荼

舒音

鬱

律音

壘四字貼門上按東海度朔山

有神一神荼二鬱壘領衆鬼之惡害者執以韋索而用

食虎

舊志

正月十五日夜剪紙爲燈飾以五彩城市人家跨街爲棚彼此競勝士女縱觀花燈徹曙各鄉村燃炬火以照田蠶聲徹遠近謂之趕毛狗食湯圓曰元宵

社日賽土神燕飲以爲樂秋亦如之鄉村每數十家出資作一小廟內奉翁媪二像並金甲神像翁社神媪蠶

神金甲穀神也

清明祭墓通貴賤皆然剪紙爲錢插於墓上牲肴酒醴稱家有無長幼俱往不忘先人之首邱也亦有城市流寓之家攜壺榼郊外席地而飲謂之踏青

端午採艾插戶上取菝葉裹糯米爲角黍相餽遺置雄黃於酒中飲之婦女兒童佩艾符小民競渡龍舟荆楚歲時記曰此靈均沉汨羅日也人哀其死艤舟楫拯之相沿爲俗

七月十五日爲中元節卽釋迦盂蘭會也俗傳是日亡者當返其家初旬日即治具相迎謂之接亡每日奠酒

以祭又以紙作袱包楮錢若干分題先人姓諱至十日
外治酒以餞向夕焚袱包於門外送亡

臘月廿四家家掃塵會飲名團小年夜命男丁祀灶預
以米麵食物相餽遺

三十日以牲醴祀神換桃符寫春帖向晚祭墓擘蘆作
梔子燈插於先墓野田荒塚恍若燈市爆竹之聲遠近
交應通宵不寢謂之守歲元旦黎明舉家盛服祀先擇
吉時開門迎喜神謂之出行八男女遂拜尊長男子出
拜族黨謂賀新年

婚姻納聘古禮也邑男女在襁褓中卽有戚友爲之議

婚從不索聘議定以單紅帖書女庚章付媒妁送男家
其婚即定一諾千金綽有古風焉

喪用文公家禮及

大清會典凡小斂大斂成服虞祭埋誌立石諸事皆如古富
者更於墓近置祭田以爲香燭酒醴之費近或冥福之
說有作佛事以代祭奠者然士紳家仍遵古制也祭禮
冠婚祭於堂祥禫祭於寢清明戶長率族衆祭於廟入
學鄉會試選官則旗蓋鼓吹祭於墓均羊豕酒醴雜時
物而陳設之

按邑舊俗類皆質直廉退稱善俗焉其長者畏謹避

事自託於無聞知其子弟多結社以文藝相角故一時文風甲於荆楚學使者每試輒榜其文以勵各屬而科第亦蟬聯不絕近因水旱瘠臻邑里荒涼流風半無存已所望守茲土者教養兼施寬猛相濟移風易俗以臻於郅治無難焉

物產

周公以土會之法辨五地之物生山林川澤均有常產
天生以養民而資民用者各因其土之宜也公安土地
平衍百穀諸鱗皆其所出不必侈談山海珍奇以開靡
靡之風武陵相楊超曾過公安詩麥栽湖一半柳割縣
平分其大較也守是土食是毛誠休養之無忘自生息
之有加

百穀類

稻凡數十種有梗有糯其一名香稻置少許饅中清香撲鼻

麥有大麥小麥米麥數種

蕎 莖紅花白有甜苦
之別春秋皆可種

粟 有稜有端凡數十種形如魚子邑宋文學參軍張
景對仁宗曰新粟米炊魚子飯嫩冬瓜煮鼈裙美

黍 有赤黃黑
白數種

高粱 有赤黑二色稜糯二種米白穗如帚可飯
可糞可釀酒俗或以為六谷之梁者誤

稷 有稜有糯凡數
十種皆可釀酒

棉花 有紫白二種織為布紫者
用本色白者五色皆可染

紅花 原有此里後失同治
八年長安村便種

青靛 凡數種低田種麥
靛高鄉種廣靛

豆 凡數十種有名美人豆者
每粒眉眼皆具亦一奇也

其餘六畜蟲鳥如夏小正所載燕睇蝮鳴鼠化獺祭隨

在多有無庸瑣紀

祥異

聖世不言祥瑞而天災流行事所恆有我

朝事天以實弗尚禎符水毀木饑隨宜補救蠲卹一篇詳
哉言之矣然稽之前代茲地之見於諸書所紀父老所
傳固不容略也

宋

大中祥符二年庚戌春二月公安民田穫稽生稻四百

斛

文通
辭考

元

至元九年七月公安大水 通志

泰定二年五月公安水 元史五
行志

四年八月地震 舊志

至正九年七月中興路公安大水 元史五
行志

十一年八月地震 舊志

大德七年竹林港大堤決自是堤不時決

十一年八月丁丑中興路公安松滋枝江三縣地

震 元史五
行志

明

洪武十年大水衝塌城樓民田陷沒無算 舊志

成化五年施家淵決舊通志

宏治十年狹堤淵決通志是年府屬皆被水災公安尤甚

正德四年冬城樓災

十一年郭家淵決通志

十二年公安城樓災通志

嘉靖十一年江池湖決通志

三十三年公安大水通志

三十五年新淵堤決通志

三十九年沙堤鋪決

四十四年大湖淵及雷勝明灣決

四十五年傾洗竹林寺

隆慶元年傾洗二聖寺

二年艾家堰決以上俱通志

萬曆二年七月公安大水補廣通志

十六年大旱舊志

十九年辛卯六月己未公安大水有巨蛇如牛首

赤身黑修二丈餘所至堤潰明史五行志

天啟元年旱饑舊志

崇禎元年戊辰七月公安火燬

文廟延燒五千餘家明史五行志羣鳥含物入茅屋上以翼鼓

之火發人無避處舊志

十六年旱蝗日無光舊志

清朝順治九年旱斗米銀五錢舊志

十五年七月大水舊志

康熙二年八月松滋堤決水灌城垣民漂溺無算舊志

十年辛亥公安旱通志

十一年壬子旱舊志

十八年己未公安旱通志

二十四年水通志

二十九年公安旱饑湖廣通志

四十六年公安水大疫通志水湧舊志

四十七年戊子大疫舊志

五十六年春大風伐屋舊志

夏五月地震有聲湖廣通志

五十八年己亥春公安有龍見於西城通志

長安里鄒姓掘城得一獸形如犬子龔生學著謂

卽土怪羴羊也舊志

六十一年壬寅正月十八夜有鬼燐自公安過澧

州遍野熒熒若有人馬之聲澧州志

雍正五年丁未公安大水湖廣通志

乾隆四十三年公安旱

通志
冊檔

五十年乙巳公安旱

通志

五十三年戊申公安水

嘉靖七年壬戌公安水衙署民房城垣倉廩均有倒塌

人口無損

通志

十七年壬申雙石碑決

冊檔

道光八年戊子麥穗兩歧

九年己丑許劉周堤決

十年庚寅大河灣決

十一年辛卯呂江口窰頭準決

十二年壬辰春夏疫大水江陵江堤白廟子松滋
江堤朱家埠同決秋八月十九至二十一日晝夜
風拔樹伐屋人民溺死無算坟墓多衝損斗米價
錢五百餘文人相食

十三年癸巳長安里民唐姓鄧姓田產瑞麥莖二
歧三歧五歧不等夏五月大水江陵白廟子復決
松滋澧市決

十四年甲午大水江陵九節工決

十五年乙未大旱蝗蝻蔽天害稼殆盡瓜蒂復結
實如貫珠

十九年己亥大水江陵五節工蕭二坑五通廟同
決

二十年庚子水江陵八節工決

二十一年辛丑水江陵八節工決

二十二年壬寅水江陵張家工決

二十三年癸卯旱

二十四年甲辰大水松邑江堤瀰市決

二十五年乙巳水西支文龍習決

二十六年丙午水何家潭決

二十七年雲翹門外張姓乳白燕二九月長安里

雷姓產一女手足各四二目而口有齒

二十八年戊申大水松滋江堤鞋板窩決

二十九年己酉大水松滋江堤陶家埠決江陵支
堤向家榨決春夏霪雨連綿斗米錢八百餘文人
相食屍骸枕籍

三十年庚戌春三月二十八日戌時地震夏大水
江陵江堤龍王廟決

咸豐元年辛亥春三月地震夏大水江陵江堤小江埠
決

二年壬子大水江陵二節工決停修六載民不聊

生

文廟災時六月初二水浸城夜半雷雨大作城內平地水深數尺火從頂起作碧綠色西北牆角裂尺許官紳救護奔走水中民李仲芳踏燬檣逕上神座負

聖牌出如履平地身無微傷

冬十二月斤鹽銀二錢

三年癸丑二月地震

四年甲寅夏四月章田寺張仁義家貓鼠同食五月十三日夜天鼓鳴隆隆有聲時粵匪犯境士民起團練堵之自宜昌由虎渡而入冬月初五日水湧六年丙辰

秋大光里民杜敬洛田植棉花似牡丹者數十本

是年大旱湖港淤墊溝洫不通禾無收

十年庚申大水江陵江堤毛楊二尖狹邑水高於城二尺許知縣慶明穿屋而出民棲屋脊者數晝夜

冬十二月雨木冰

十一年辛酉大水江陵鏡二尖工決毛楊二尖停修

秋八月朔日月合璧五星聯珠

城西閩賈吳姓牝犬孽一物色黑修不盈尺牛首豕身一角向外曲或以為角端

同治元年壬戌大水春二月府憲唐籌修毛楊二尖旋以江漲停修邑大水東支黑狗墻漫潰

二年癸亥大水籌修毛楊二尖費盡工停旋潰

夏四月大風屋瓦皆飛樹多拔斗米六錢

三年甲子大水江陵毛楊二尖停修斗米六錢終
年皆然民逃亡秋大疫

四年乙丑春二月雨豆色黑有孔拾而種之莖葉
似槐孟家溪麥穗兩歧

五月大水江陵毛楊二尖停修高鄉旱自先年冬
至本年夏不雨陂塘龜坼秧俱生節閒有帶泥插
者後得微雨穫亦強半斗米七錢民食日匱知縣
袁鳴珂詳請上憲檄弛湖南遏糴之禁人心乃定
五年丙寅大水冬地震

六年丁卯春三月望地震大水

七年戊辰大水

八年己巳春夏霪雨二麥無收

九年庚午大水異常斛湖堤決二處是年蛟水盛漲江松二邑江堤俱決岡巒宛在水中水漫城垣數尺衙署廟宇民房倒塌殆盡數百年未有之奇災也

十年辛未大水江松堤俱停修 是年八月黃山

雲霄宮桃樹華

十一年壬申水是年江松堤仍停修江水雖未盛漲而民力拮据荒蕪如前

十二年癸酉大水夏五月大旱

十三年甲戌春旱夏五月大水 是年平樂里生

員田硯地麥穗兩歧

公安縣志卷之五

職官志

自秦漢剗革五等而縣之義取其懸於郡二千石而下
最爲親民分而爲師儒爲僚屬皆有專職然一庭備六
官之政一身繫萬民之命責惟大尹昔何最願爲劇縣
不願爲臺閣以其惠易及民也地方得一良有司不惟
所至民樂抑且所去民思雖至年遠代湮追述往事猶
相與稱道其姓氏而不衰

清朝官制一倣有明舊志已載者照舊志編入餘就父老
所傳聞及近時所目覩者次第錄之著於篇以俟後人

之論定

周曰縣正

周書作雒篇曰千里為縣縣有四郡

楚曰公曰尹

即縣大夫也春秋時列國相滅各以其地為縣故縣大而郡小

漢曰令長丞尉

其人皆闕紀載

漢末先主以左將軍領荊州牧治公安

舊志靈帝中平五年改刺史置牧牧之名始重

今舊縣有劉先主營即故治所

時諸葛亮殷觀龐統法正等皆以軍師別駕等從先主

入蜀命將軍傅士仁守公安

吳得荊州以呂蒙為南郡太守封孱陵侯會蒙卒以諸葛

瑾代遷左將軍督公安假節封宛陵侯繼瑾為督者瑾

子融及孫遵鍾離牧時周瑜子允亦以兵千人屯公安

督者督諸軍也晉職官志使持節次之假節為下吳書陸抗傳抗令公安督孫遵巡南岸

晉立南平郡以太守治之置江安舊志作孱陵等令接晉分

江安縣孱陵仍有縣舊志載郡守內史曰應詹夏侯承王矩陶稱桓石虔郭金謝純王裕之車育共九人今遵府志錄

江安縣令二人

王 偃 江夏人見晉書張昌傳

鄧 襄 見晉書桓元傳元不克遇害

孱陵縣令 晉屬南平郡齊移治於作唐

劉 坦 建元初任

劉宋內史曰王景文桓範之竺超民宋藏令朱道珍繆士

通 宋書武帝永初元年徙南平內史治作唐後移治於江安故王景文以下四人照舊志載入

齊令

通志南齊移郡治屬陵齊志載內史有袁素張欣泰柳忱軍主曰周敷

庾黔婁

水元初任有傳

劉

坦再見

梁

舊志載內史王褒贊革

陳置荊州於公安以刺史來鎮者曰陸子隆吳明徹孫瑒

樊毅樊猛陳慧紀陳叔堅守曰陸子才

舊志太建四年孫瑒都督荊州刺史出鎮

公安增浚城池懷服邊遠為隣境所憚居職六年

隋置公安令唐仍之隋唐以來邑令多闕紀載

唐邑令

王

籍舊志宋內史有王籍邑名宦祀唐令

周

通見宋參政馮楫二聖靈蹟記

顏□□

名佚大歷初官公安尉見少陵集

封希魯

主簿見張說謝官表

宋 知縣 舊志宋監五代藩鎮之弊州縣守令多帶中朝執事官外補終宋之時令可考者得三人

謝 炎 嘉興人端拱間任

張 戩 天祺長安人熙寧間任有傳

程千秋 徽宗時任有傳

補 向友正 淳熙八年攝公安縣舊志佚

簿 舊志宋京朝幕官則為知縣有戍兵則兼兵馬都監人二萬戶以上置丞一員千戶以上置簿

盧 雍 端平初任盧多遜子見附志

黃 注 舊志載注府志佚

黃夢升 金華人徙分寧舉進士任興國軍永興主簿調公安主簿見歐陽文集舊志佚

紹興中歸峽荆門公安軍安撫使

王 彥 上黨人紹興五年知荆南府充安撫使因荆南曠土措置屯田自蜀買牛千七百頭授官兵耕營田八百五十頃分給將

士有差宋史本傳

解 潛 紹興初荆南鎮撫使

孟 珙 嘉興中荆南鎮撫使

元置尹增監縣

監縣達魯花赤也元制中縣秩正七品不置丞有簿尉各一典史二

時邑中儒者輻輳詔置荆湖北道提舉司於公安其人

可考者有文子璋

監曰秃忽赤

只兒哈耶

哈耶兼勸農事善屬文正謹堂其所建立也皆大德人

尹

薛友諒

見劉坦萊公祠記

毛好義

成宗時尹文學典贍政事廉明令行禁止

張元愷

元統中尹為政清簡不事浮靡崇尚風教民樂其業後為膠州太守

朱顯文

恪守清節文章政事為時所重後罹兵變鐵鏜一家淪喪殆盡而顯文潔身守義終不以利祿動心

盧

名佚元季尹見韓莖蔭松堂瑞芝記

簿

劉讓

鄧觀邑陵人元
統中進士

尉

典史

宋廷瑞

楊文炳

儒學諭

汪公望

明設知縣一人掌一縣之政令教養其民秩正七縣丞一

人理河渠軍政秩正八主簿一人徵稅糧秩正九典史

一人司譏察分領縣條縣學官教諭一人訓導二人主

訓飭生徒

洪武知縣

許德元年任凡學校公廡一一修舉

趙友應續修公署

賈大用里居未詳

永樂

鮑綸舒城人

楊華丹陽人舊志佚

正統

俞雍武進監生一年任有傳

劉恕宣城監生十四年任

景泰

劉敏侯官舉人二年任續修署解

天順

俞縉華亭監生元年任

成化

黃紹宏 宜黃監生 元年任

陳鏞 長洲監生 九年任

馬良玉 成都進士

王寅 巴縣舉人

正德

繆洙 饒縣舉人 元年任

彭昉 蘇州進士 七年任

王綱 全州舉人 十四年任

嘉靖

吳奎 新淦監生 八年任

魏奇 宣城舉人 十四年任 修公署

陳潤 泗水進士

金深 光山舉人 舊志佚 以上四人俱成化間任 年分未詳

周鉞 宿州進士 十五年任 築土為城

劉璉 吉安監生 十四年任

江燧 歙縣人

周

臣

雲南進士元年任始修磚城建門樓

熊

運

富順進士七年任

王

魯

莆田舉人九年任

吳

旺

莆田舉人十二年任

劉三省

簡州舉人十四年任

沈

祐

餘千歲貢十九年任

龍

雲

臨桂舉人十二年任

周

鑛

貴陽人

張

美

長子舉人

毛

自修

涪州舉人

聶汝孝

機為舉人

包世節

沈邱舉人

蔣仲梧

全州舉人

南

東

清江衛歲貢以上俱嘉靖間任年分未詳

隆慶

補錢

匡之

會稽舉人元年任

張朝東

璧山舉人四年任

李桂開

榮縣舉人六年任

萬歷

王

熾 慈谿舉人
三年任

楊雲才

臨桂舉人
四年任有傳

莊

重 長州舉人
十四年任

張

默 金谿恩貢
十四年任

方一正

龍谿舉人
十四年任

陳夢斗

順德舉人
十七年任

胡宜標

首再舉人
十七年任

李士宏

內江舉人
十二年任

李中立

上海進士
十五年任

劉思忠

成都舉人
十九年任

錢允選

慈谿舉人
三十二年任
為政仁愛邑中祀之

孔宏頤

吉水進士
年分未詳

李聞詩

雲南進士
十五年任

段

欽 蘭州舉人
年分佚

天啓

張國用 貴州定番舉人二年任

高鳳翔 金壇進士十七年任有傳

崇禎

劉承堯 貴州舉人五年任

朱希萊 晉江進士十六年任有傳

羅兆階 江寧舉人八年任

張大韶 樂昌舉人九年任遷邑於祝家岡

趙繼鼎 武進進士十二年任有傳

清朝知縣

順治

許奇遇 二年任

王百男 山東萊州拔貢四年任

衡戴天 遼東貢八年任

李長庚 正白旗杏山人

董祖洪 大興貢十四年任

楚煜 宜陽貢十六年任

康熙

劉文箴

河南貢士
二年任

何國棟

四川梓潼舉
人七年任

楊春星

睢州進士十九
年任愛禮士子

張亮玉

江西舉人二
十四年任

魏莊

滑縣舉人三
十二年任

許磐

華亭貢生二十
七年任有傳

沈寅

泰州教習五
十一年任

宦
傳有

袁傑

江西都昌拔
貢五年任

梁勳

陝西武舉十八
年任始安民

陳瑄

河南舉人二
十二年任

沈爾燦

烏程進士一
十八年任

趙希階

南豐舉人三十
二年任有傳

陸守塚

吳縣貢生河南籍
四十二年任有傳

楊之駢

宿松貢生由太平論陞公
安知縣五十五年任詳名

于漢

漢軍鑲黃旗舉
人六十一年任

雍正

孫鴻 元年任 詳名宦 傳有

石 韶 早縣舉人 五年任

高 鋼 漢軍廩貢 六年任

楊德長 安邑貢生 七年任

洪二元 儀徵監生 九年任

方純儒 固始進士 十一年任

乾隆

補周世緒 祥符人

張 冲 太康進士 六年任

王 笙 南城進士 七年任

曹 運 固安舉人 八年任

袁 琮 龍田舉人 九年任

李 嵩 翼城舉人 十二年任

李 淳 漢軍正紅旗廕生 十四年任

吳虎炳 山陽舉人 十五年任

陳 銓 大興舉人 十九年任

鳳 翔 長白人 有傳

孫 泰 宛平人

劉尙勤 廬陵人

鈕秉忠 漢軍鑲白旗

黃卓南城拔貢

章階仁大興人

譚夔南豐拔貢

梁允林介休人

董其素

顧憲周蕭山人

吳翼行

張芳桂

嘉慶

施朝幹
張統緒浙江進士

任郟祐山東章邱人
十二年任有傳

李若璋山西聞喜進士

秦樹松廣西陽朔解元

劉廷謨貴筑拔貢
有傳

張開雲直隸南皮舉人

道光

盛濂江蘇元任

陸炯浙江平湖翰林
振拔寒士
愛民如子
四年任有傳

關維紀 廣西臨桂舉人 六年任有傳

焦家麟 山東章邱人 九年任

姒朝瑄 四川嘉定經 元十二年任

昇 太 鐵嶺舉人 十四年任

蘇在中

德爾森 滿州人

張爾璧 江西太和人

吳 璪 安徽全椒 拔貢有傳

俞昌烈 大興人

李 棟 安徽宣城人 二十七年任 後陞道銜禦賊死節有傳

咸豐

海順 滿州人

徐文灼 直隸天津人

喬守中 山西聞喜生員督 辦團練鋤暴安良

孫安燾 直隸舉人

徐步雲 廣西臨桂進士

陳文灼 四川華陽人

慶 明 蒲州人

同治

李際春 直隸蔚州舉人二年任
重名輕利愛士課農

袁鳴珂 浙江山陰人移建
考 黜續修縣志

張樹猷 四川三
台解元

周承弼 江蘇揚州府江都縣原籍
鎮江府丹徒縣人有傳

教諭

明正統

房 陵 南昌舉人善屬文初修
邑乘歷官翰林院檢討

阮 禮 山陰人

景泰

楊

敬

江津人

天順

王

縉

渠縣人

成化

梁

善

臨川舉人有文藻取房志增修之

俞大經

南昌舉人

宏治

吳

燧

江都舉人

李

英

咸寧舉人

蔡

壇

南雄舉人

正德

艾 琥 金壇人

張 瀾 丹徒人

隆慶

余 楷 青神舉人

白 紘 臨桂舉人

吳可久 臨桂舉人

潘 球 大冶人

周 謨 巴縣人

歐陽泉 太和人

滕 璜 臨桂人

陸九達 臨桂舉人

向 上 彭山人

劉 綺 成都人

萬歷

周 完 上堯人

楊際熙 容縣舉人

蔣遵烈 全州舉人

蕭繼祥 南昌舉人

趙廷信 隨州人

賀嘉士 淑浦人

鍾 詔 海鹽人

劉思明 成都舉人

劉 勉 衡州人

劉 毅 寧州人

史甯野 溧陽人

鍾 鼎 四川舉人

劉以昱 安福舉人

張一德 桃源人

馬必遂 廣西容縣舉人

俞有詔 浙江貢

孫景家 南京青陽貢

天啓

熊應魁 襄陽貢

崇禎

藍尙彩 鄖縣貢

王家臣 恩貢

羅名臣 桃源舉人

熊穎捷 當陽舉人

周啟寅 黃州舉人

清朝

順治

師覺先 武昌舉人

李宙臯 嘉魚貢

田之玉 澧州貢

彭一卿 嘉禾歲貢

梅聯甲 武陵舉人

汪沅 黃岡甲午舉人 辛丑進士

康熙

袁向諫 潛江舉人

趙捷 京山歲貢 手植雙桂

楊昌言 安陸歲貢

王相 漢川舉人意氣坦白勤舉會課人爭磨厲

顏翼祖 復聖裔沔陽舉人盛德謙和課舉業盡心裁有傳

魏士俊 衡陽舉人克盡教職陞靜海知縣

汪基美 黃岡舉人經學精選人多敬之先時論桃源粵東聘

取分闈稱得人云

高承欽 江夏貢生師道自重

夏策謙 孝感舉人恬靜自愛潛會理學首舉會課講

御製訓飭上子文下車協恭司訓修葺同登辛丑進士並入翰林仲廉庠有聲家學積累一時榮之公泊如也

雍正

雷雲聲 字漢舒澧州優生禮志作聲榮

華濱 通城舉人

陳繼先 甌貢

李承興 漢川貢生

吳念茲 雲夢舉人

潘伊琪 蘄水舉人

嘉慶

鄭蘭 舉人

王見炯 江夏舉人

道光

徐翼亭 蘄水舉人

陳準 蘄州舉人 人品高 學粹 課士 情殷

嚴啓棠 黃岡舉人 人品學 精粹 士爭師之

咸豐

魏士隆 應城舉人

乾隆時歷任無考

方恬 舉人

吳炳文 江夏舉人

吳長庚 漢陽舉人 陞武昌府 學寧 匪潰 城死之

蔡煜 蘄水舉人

羅有文興國舉人

王慰德安府安陸舉人咸豐八年到任有傳

訓導

明正統

徐鐸金谿人

于銓雲南舉人

王文英長壽人

梁允平南人

景泰

鍾會高安舉人

侯宏五河人

天順

楊孜彭山人

胡永秀內江舉人

成化

王璉 涪州舉人

劉寬 嘉定人

周尙元 永州人

王翼 太倉人

唐瑾 浮梁人

劉遜 巢縣人

宏治

劉濟望 安福舉人

章越 癸丑舉人

黃啟 確山人

朱銘 衢州人

嘉靖

蘇世暉 晉江人

王球 高安人

蔣燧 平樂人

劉邦輝 信豐人

康進 新野人

高魁 內江人

李文卿 建昌人

韓元 金縣人

李崇德 晉寧人

徐正言 資縣人

隆慶

趙承恩 成都人

冉德甯 東鄉人

萬歷

連梧 禹州人

莊誠 成都舉人

王伯爵

朱邦賓 大足人

楊錦 崇仁人

徐式 開縣人

黃流 邛州人

谷乾 臨穎人

傅賓 郫縣人

孫瑞 漢陽人

李大明 青軍衛人

高柏 黃岡人

陳廷評 郴州人

陳咸 湘鄉人

劉起嶠 巴縣人

仰宏宇 德安人

彭之年 衡陽人

曹國用 臨武人

支可久 潯州衛人

天啓

孫可敬 嘉魚貢

范文奎 衡陽貢

喬冲霄 河南貢

周尙文 京山貢

呂儀鳳 安南貢

郭時卓 郴州貢

賈文鳴 襄陽貢

高應甲 河南貢

周應祥 南漳貢

趙居仁 長沙貢

崇禎

宋一本 陝西貢

易具堯 華容貢

崔連貴 河南人

朱之瑚 潛江貢

孫述曾 貴州貢

蔣毓德 遼東蓋州衛貢

曹之棟 黃岡貢經史淹博具人倫之鑒無慚師表寇破荆逼以爲官攜篆逃會城層逆屠會城以其老而免之少子大武死難子

大夏大漢皆能文與邑人結社推爲三益

胡永賓 永州人

清朝

順治

歐陽任 黃州貢

楊另闢 鍾祥貢

孫錫蕃 黃岡貢
有傳

汪大潤 大冶貢

鄧之燦 辰州貢

吉聯芳 鍾祥貢

鄧致和 武昌貢

楊兆儒 江夏貢
博學工詩古文詞
書法道媚臨摩古法帖數

十種夜讀書必至雞鳴詳修學宮敬書標額
舉業古文書法受益者多俸滿陞巴陵教諭

何其父 襄陽貢
坦易謙抑古道照人函丈之間應接無虛
日學內外士皆坐春風中是蓋希聖而得和者與

雍正

陳俊 房縣
歲貢

牛天宿 當陽
歲貢

朱性 蘄州
歲貢

乾隆

左高鵬

江之永 天門歲貢

段珖 江夏歲貢

張錫潤 京山歲貢

嘉慶

郭宏本 舉人

葉本立 隨州人

徐聞光 蘄水舉人

道光

曾芝柎 竹谿優貢

覃旭和 來鳳歲貢

周德裕 遠安歲貢

咸豐

李廷簧 黃安附貢八年任維持士類平易近人古所謂冬日之日也同治十年陸鄭西論

同治

陳宗岱 咸寧舉人

李國賓 漢陽附生

縣丞

明洪武

彭泰 吉水進士

崔庸 開濬廣德楊石二塘民享其利

正統

江遠 浮梁人

天順

江愷 祈門人

成化

李孜 河南人

陳愷 會稽監生

馮富 榮昌人

柴真 鄭縣人

宏治

汪淵

王金 高郵人

于鑾 陝州人

正德

段成 六安州人

喬鼎 南紹人

尹縉 秦和人

嘉靖

朱辰 雲南人

吳允 淮陽人

王應武 建水人

魏潔然 四川人

汪錦 重慶人

曹邦盛 四川人

懷銓 華亭人

任相 代州人

廖仕明 梧州人

吳鵬 鄱陽人

彭繡 萍鄉人

繆文 山陰人

隆慶

何選 閬中人

周塤 鎮遠人

熊衮 蓬縣人

萬歷

夏尙賓 仁壽人

雍學詩 關中人

時良 江西人

曹以試 四川人

朱家梗 石阡所人

蒲道 無錫人

胡國學 宣城人

孫繼京 奉化人

周陞 會稽人

崇禎

呂望周

丁安仁

清朝

順治

方士俊 四年任

章士榮 石埭人

趙攀勝 柏鄉人 選貢 陞 兗州府同知

聶琰 富順人 拔貢 陞 祥符知縣

康熙

胡應瑞

江西新喻人三年任

楊千仞

福建人七年任

臧國士

保定新安人九年任

張育才

滄州人十年任

張碩抱

山東貢一十年任

李

瑛

順天人二十四年任

吳元祉

閩縣貢一十七年任才優幹濟署縣篆一介不取院司重其操陞滑縣知縣

陳果新

北直人四十年任

李尙公

大興洋生由鳴臚寺鳴贊四十二年任有傳

楊守緒

武進貢生寬惠儒素五十五年任旋丁內艱哀毀節粥居喪有禮邑人化之

韓大沛

正紅旗例監由中牟丞調公安五十八年任才氣超越而家侍封君太守公屏息終日伺色而動遇事敏捷政治有聲

雍正

洪元聲

儀徵監生

顧憲周

蕭山監生

孫泰 宛平監生

陳光

來鳳翔 府志佚

劉尙勲 廬陵監生

鈕秉忠 漢軍鑲白旗例監

乾隆

黃卓 南城拔貢

章培仁 大興監生

譚夔 南豐拔貢

梁允甯 介休監生

桂正順

嘉慶

左熙世

道光

劉雲卿

牛壽增

孔繼濂

三十年縣丞裁

主簿

明正統

張瑾 鄱陽人

天順

鄭善 臨川人

成化

唐堅 定遠人

李班 扶溝人

宏治

高永

正德

范守仁 宜賓人

王欽 沔縣人

嘉靖

魏月枝 梓潼人

陳蘭 永安人

李九疇 掖縣人

劉顏 巴縣人

趙慶

張漢 新寧人

薛志魁 東安人

陳常 連州人

謝文朝 羅城人

安廷章

劉和陽 榮經人

何 孺 貴縣人

張 幹 柏鄉人

萬歷

馮 蘭 浙江人

楊師和 建昌人

林仁淑

徐希孝 成都人

董 璜 丹徒人

張桂林 岑溪人

沈尙賓

顧 鏜

鄧東藩

劉一桂 浙江人

蔣 鏞 祁門人

王之鶚 廣元人

王文爝 會稽人

陳士憲 晉江人

清朝主簿裁

巡檢 府志巡檢二員

孫黃驛

陸履位

王日璋 通州人

陳天德 大興人

均見府志雍正八年裁

孱陵驛

張紹第

劉士鳳

袁爾成 大興人

徐道昌

吳翰章 鎮塘人

邱永茂 大興人

趙羽全 會稽人

均見府志

陳天德 雍正

李超元

黃叢桂 道光

馬校良 順天大興人
道光時任

陳若杜 浙江山陰人
咸豐同治間任

典史

明景泰

吳暹 吳江人

成化

史通 蒲州人

李庸 會稽人

向銘 涪水人

宏治

黃仁傑 資陽人

陳政 陝西人

趙大源 四川人

正德

曹良 餘千人

嘉慶

王章 霍邱人

周天祥 莆田人

鄧仲勳 廬州人

鄒章 當塗人

王廷用 閩縣人

甘相 豐城人

張 鈺 丹徒人

隆慶

施道正 臨淮人

王 綱 南昌人

萬歷

戴 山 浙江人

區 奇 江西人

蕭 敕 贛縣人

蔡華芳 四川人

李三元 四川人

張 岫 直隸人

何大森

鄧存學 四川人

余甯隆 豐城人

汪尙海 江津人

何汝孝 萬縣人

清朝

順治

黃鶴鳴 山陰人

潘良臣 華州人

田文元 耀州人

康熙

楊偉 樂清人三年任勤慎能詩

王之臣 北直人舊志佚

吳正賓 江南人二年任

劉承宗 陝西人二年任

侯王輔 陝西人三年任

趙福 山東人三年任

王宣 滄州史員四十六年任樸實宜人贊理劇務不辭勞苦在職十餘年上下相安

雍正

丁久沐 浙江會稽人五年任

閔思恭 靜海人

夏正位 如皋人

徐浩

梁國寶 蕭甯人

乾隆

陳光耀 大興人

戴士閔 旌德人捐義塚有碑記

嘉慶

汪明福

楊英

道光

羅承恩 直隸人

甘孝先 直隸人

咸豐

丁興枚 長興人

同治

周文徽 商城人 善詩畫

把總 乾隆以前歷任 姓氏無考

乾隆

楊勳 陝西漢中府武舉

嘉慶

劉殿元 江陵人

道光

孫應才 江陵人

王桂芬 介休人

熊兆渭 遠安人 歷任二十餘年

同治

曾芳貴 江夏人

外委

亢應魁

曾德升

李鳳翔 江陵武生

王國棟 江陵武生

心身學示

卷二二一

二〇

宦績列傳

生也名冠天下受天下重賞能使人稱道不絕尸而祝之可不爲賢已乎亦有當時無赫赫名去後能令人思三代斯民直道具在東里之猛也卒爲遺愛寢邱之封也遲之負薪傳曰名者德之興有是德有是名無是名無是德已

庾黔婁字子貞易之子其先新野人幼好學性至孝不失色於人仕蕭齊爲孱陵令有異績縣境多猛獸皆徙去未幾易在家遘疾黔婁忽心驚流汗卽日棄官歸醫云欲知差劇當嘗糞甜苦黔婁輒取嘗之每夕稽顙北辰

求以身代俄聞空中若有聲謂徵君命盡居喪過禮廬於塚側鄧元起為益州刺史徵為長史成都珍寶山積元起悉分與僚佐黔婁一無所取元起惡其異眾請經書數篋尋除南郡太守在職清素百姓便之元起死黔婁身親殯殮攜柩歸葬以參軍侍太子讀書甚見知重

按鄧元起傳元起當陽人梁天監初為益州刺史以鄉人復黔婁為錄事參軍又得將光濟並厚待之任以州事黔婁峻潔光濟善謀相須為善其克劉季連不私貨財勤恤人事後惑於讒遂疎黔婁等不用由此政迹遂損

張戩宋神宗初以御史出知公安誠心愛眾清簡自持為御史時常陳堯舜三代之事舉劾無所避論王安石變法曾公亮陳升之依違不能救正呂惠卿附會疏十數

上又詣中書爭之公亮俛首不答安石以扇掩面笑戲
曰公亮枉直不分宜爲參政所笑天下笑參政者復奈
何

程千秋宋徽宗時知公安縣時羣盜至千秋帥民禦之岳
鄂鼎澧皆賴以安民間多繪像祀之尋命通判荆南

俞雍武進人由監生於正統中任公安令清介有志節性
簡易自奉甚約徭賦刑獄貢獻之類區畫詳盡拳拳以
民事爲心便於民者無不爲重建縣署邑中橋梁津渡
雖窮鄉僻塢皆經指畫修築邑人至今思之

楊雲才廣西臨桂人萬歷四年以舉人授公安令才敏識

達有所興舉規制方略皆爲數百年計久之終如所期
其於民事大小聽斷若神一出於至誠惻怛獄訟不用
勾攝質民於庭數言立決凡差役皆給以米不許擾民
間一飯當九年丈量田糧單騎行鄉野履畝定稅著爲
條編徵賦隨民所有雖線縷布絮衣襪針箸之屬皆評
價付市易值以充賦庭置釜數十具村民之入城輸賦
者不覓主就釜炊食已卽返不忍費民間一錢一粟也
故民詣縣如歸家見公如見父母歡然親愛不爲煩文
常言曰公安百年必爲江圯不得已議遷其椒園乎次
則祝家岡可因修孟公堤及中堤以達於西村曰此可

保數十年後遷邑一一如公言任九年陞荆郡同知善政甚多荆郡適有修拓北城之役計工量有定額擇日起工矣忽直指檄加城二尺一時議者請改期增費紛紛不定公曰是何難因索甃模驗視密展數分及城畢已增二尺不加費不勞民而大工告成尺寸不爽公之才敏率如此至今邑人思慕不衰舊有傳失去撮其所聞大概以俟續考焉舊有楊公祠在舊縣北門堤上碑亭屹然今淪入江

高鳳翔字心逸金壇人天啓中由進士任公安令丰儀清逸性慈愛不事嚴厲而庶事咸理獎拔士類評隲文藝經其陶冶者皆成佳士值邑有遷城役百費騷然公鎮

之以靜持之以平不爲一切苛急未幾而城垣學宮寺舍堤防犁然就功後邑治改遷成功復毀官府數易而督責煩瑣益思公之恩厚爲不可及也公在邑與某忤幾爲所齟齬侍御毛公因邑中公論力與辯救貽書於公曰父母如此而猶有違心媒孽者宜其遭回祿之變也是時邑大火故云後陞戶部主事以知府終於家公之子珩舉於鄉

朱希萊字念祖福建晉江人少能文屢就督學試竟不得補弟子員崇禎庚午以白衣叩閩闈獲售辛未成進士授公安縣令公少年丰姿玉立及蒞任練達乃如耆宿

興利剔弊卓有風力公邑一里十排而勢豪之家立爲十一排脫免雜徭公立革除與編氓均勞逸民庶感悅邑居水陸之衝夫馬駱驛晨夕不得休息馬以大耗公曰驛繁而丞困工料不預發之故也稱貸舉償一馬費數馬之資矣於是先爲支給丞省子母之費馬以不斃課試諸生甄拔英異皆於沈淪中特加獎勵後之舉於鄉者多出公所賞識調襄陽值寇訶琴鶴隨身不廢弧矢未幾陞兵部主事甫離任而襄陽陷崇禎末京師疫大作有疙瘩瘟中之卽死公亦中適公邑門人高重望公車至親爲調視藥餌及卒復爲經理棺斂哭而送之

趙繼鼎號止菴武進人由崇禎庚辰進士授公安令初邑舊治圯於江邑金吾鄒之有疏請改遷祝家岡城池難就而民情憚徙公履任後卽遷新邑披草萊毆狐鼯躬立風雨荆棘中凡堂署廊廡學宮倉獄諸務皆罰鍰爲之不動帑金一銖他人棘手己獨游刃他人瑟縮己獨贏餘故新治之遷卒獲子來之效方宜興復相乃更砥礪鋒鏑無所鯁避勢家大姓蒼頭有犯嚴加笞撻不少貸邑多積蠹舞文錢糧收除高下其手爲剔弊除蠹吏之爲奸利者皆束手不敢前釐錢糧飛詭窮簷下戶無偏累之苦是時司農以州邑賦稞爲殷最而兵興民困

亦有刁頑逋賦者乃廉民之饒而黠者令代輸族里之賦否則取獄中囚銀錙其項而繫之於其蹕使飲食臥起不得離故賦趣完而考無負然獎拔士類有人倫鑒如舉人陳鼎中李友松皆其所識拔會入覲荆亂遂歸里吳中亦亂生逢多難舌耕資生少子申喬康熙庚戌進士蓋庭訓也

趙希階字二徐南豐人以舉人任公安邃於經學廉介自矢城內火朝服拜禱風遂反江水驟漲漫堤面夜履危涇操文以祭水果退每公閒命駕入市見異服少年呼之前察其言貌狡黠者薄懲之游民自此屏跡衣一補

綴羊裘自謂鄉舉時房師贈以禦寒者寢處蒲席敝氈
雖隆冬無因褥適有徵發不能如指自笑謂我江右人
性執拗耳豈有他哉遂致仕歸

許磐字漸宇華亭貢生由萬載縣令調任公安外溫而
內剛明簡於言每聽訟兩造盡其詞徐出一言折之雖
甚奸佞亦塞默不能對獄遂決淑建 學宮盡心計畫
任得其人纔期月大殿巋然太守魏勳深嘉之南撫軍
趙申喬爲之記城外開通便河借用烟戶人力衆樂赴
未匝月而工就樵風往來萬世利賴至今稱許公河貌
素癯不勝勞苦然每年江堤必履勘費三以故力役無

溢數無折乾無漏卮偪江善崩之處則預築月堤以備
之民安事簡幾於花落訟庭在任七年卒於郡之行署
所積倉庫年久缺原額八百石有奇邑士民願爲捐補
其得民可知矣

陸守塚字濟成吳縣人肯堂殿元同懷弟也出繼叔叔仕
中州郡貳爲娶李相國女以故寓藉商邱由明經訓葉
縣陞任公安才氣高邁簿書過目便了猾胥無所售其
奸遣役自給費不許擾民間一飯以土著互相保結倣
古比長相愛相及之意徵收銀米設平戩制斛令花戶
得自秤量兩屆編審人丁不取冊費料理涎舐者皆失

望嘗築堤於江之險要豐石作基而多設木椿以禦洶
浪邑恃以爲固又詳免役堤夫一年民爲勒石有願以
黃金鑄甘棠之句訟詞多批駁不准間有受理者逆發
其詐莫不驚服嘆爲神明焉

李尙公字姜甫由大興諸生考授鴻臚寺序班遷鳴贊外
補得公安丞一意治堤士民信愛之適閣部席奉

旨往定容美土司爭事李趨謁遽呼曰此

殿上鳴贊李郎也何時官此令與俱南土司欲得其父櫬
歸首邱壽公二百金公不受力請歸之後土司以他事
訟經湖南北文武會鞫匿所掠要犯不出質分臬參戎

冠蓋來告最後駐石門往復數四願得李君一言以爲
信公先後委署遠安宜都彝陵各州縣事凡訟涉土田
者往往聽斷於野三屬俱在萬山中日崎嶇百餘里不
惜也在公邑時值康熙甲午夏久雨水漲江聲如雷沿
堤蟻穴穿蕭家灣各處公風雨中親犯洪濤率衆以絮
兜土塞其罅外護以草薦木板歷兩晝夜寢食俱廢堤
賴以完貌素豐皙至是黧且癯見者莫不感嘆歷任四
屬皆有豐碑志思旋膺卓薦陞福清邑人士設具祖餞
不忍別跡所行皆古人僅事外渾厚而內慎密誠以獲
上觀察李以循良字額贈允哉

孫錫蕃字斐臣號復菴黃岡人順治戊戌由歲貢司訓公安時太平未久絃誦寥寥集邑紳議修

學宮及東西廡始以陶瓦易茅茨規撫略具教士子編學規十二條皆謹身切己之學書法顏魯公都人士往來者多劫後遺逸得以訪求山川土田人物風俗而舉人高拙菴袁夢溪及諸生何粹中輩復贊之以所識前言往行於是纂修公安志略雖未盡雅馴然片言隻字俱費苦心其功不可沒也

顏翼祖字敬只別號厚風沔陽州人復聖七十一代孫唐文忠公眞卿四十代孫也康熙戊午領鄉薦授公安教

諭時大亂後

文廟略具規模而祠廡卑陋公設法改修東西廡及名宦
福德各祠值太守魏以盤查下縣率諸生面陳倡議捐
修狀魏嘉之於是

大成殿櫺星門各工以次告竣喜培植士林創設學田勞費
至數年事載學田紀略每月設具課諸生多所成就生
平善氣迎人然雖燕見亦必衣冠相對言論必以文行
交勗督學使者岳甚重之稱爲璞玉渾金會己卯仲子
星舉於鄉與同上公車以疾卒於京邸櫬歸沔公邑士
爲位而奠莫不飲泣長子晟舉於壬午鄉試季子晴暘

並食廩餼

楊之駢宿松人知公安七年治尙寬簡嘗捐俸創建書院

延師課誦士風聿興

孫鴻淦興縣人進士雍正初知縣事沈厚精敏案無留牘
五年邑被水民多流亡自輸米五百石賑之又勸富民
出粟勸事由是流移皆復

鳳翔字桐園長白人乾隆間以荊州理事府攝縣篆政務
寬仁推誠御物培植士類捐俸置產以作諸生膏火之
資邑人立專祠於南平書院

任郟祐山東章邱翰林嘉慶十二年改授知縣事學術粹

精能以文章飭吏治居官清廉尤篤師生之誼在任民樂去任民思後擢陞安陸知府

劉廷模字觀亭貴州貴筑縣拔貢嘉慶間任精明練達百廢俱興嘗書其楹聯云不要錢固是好官若只合一邑之賦稅差徭善科歛善送迎做出些能幹事情何曾克濟於公克稱其職知愛民方爲良吏還須使四鄉之父子兄弟知愛親知敬長化成了淳美風俗庶幾無負所學無愧厥心公之治行概可見已後陞安陸知府

陸炯字遂邨平湖翰林道光初年散館改授公安知縣性清介留心風化與諸生講論經義晨夕不倦文藝輒加

刪改割俸激賞縣試自初覆至蒞事俱捐設盛筵隨場擬作以爲程式一切民詞過目即了了訊斷以誠時舉古人敦睦之義勸諭牘不留而民不欺論者謂其有邊貢風秩滿調黃岡囊橐蕭然猶攜所取士數人至黃署訓迪不倦至今稱實心教養者必首陸云

關維紀字西園臨桂舉人道光六年涖任政尙寬恕慎重堤防江支各工必履勘搏計不假胥吏手暇則集士於庭訓課如塾師輒分鶴俸獎勵創修考棚三越寒暑荆南書院捐膏火銀四百兩九年隄許劉周決請發撫賑卮無漏滴民霑實惠並代輸逋賦千餘金而焚其券後

引年告歸士民灑淚餞送至今三十二里猶傳歌頌聲
李楨字紫藩安徽宣城監生道光廿七年蒞任勤儉慈惠
尤注意於堤防江水漲時著犢鼻靴往來泥濘中晝夜
無倦每退食飯一盂蔬菜二三肴而已逾歲上游堤決
請帑設賑事必身親並收養遺嬰數十百口全活甚衆
尋置育嬰堂率邑紳捐錢二千餘串生息今改作賓興
其遺澤也折獄多平反隨控隨判不以羈滯累吾民至
於培植士類穎異者列之門牆貧乏者資以膏火任滿
去賦留別詩六章多感激泣下後任鍾祥縣加道銜勦
賊田家鎮戰沒邑舉人鄒崇漢悲田鎮詩曰男兒死不

甘牖下熱血一腔平原灑生作神宰死鬼雄天下健者
乃有公去歲大吏死城守重兵坐擁自濯咎今年小官
死野戰徒手奮呼增浩歎吁嗟乎守亦死戰亦死死守
死戰等死耳一死捐生一偷生泰山鴻毛誰重輕

王慰字星綺安陸縣舉人咸豐八年履任賦性清介不苟
資財嘗作八字聯自銘云守身似璧疾惡如仇以故與
時齟齬所入多不合然遇敦品績學之士每喜接見而
成就之四子三列膠庠皆翩翩佳公子殆天所以報之
也邑新志告成多所手定云

周承弼字壽農揚州江都人同治十一年冬奉檄來攝縣

篆縣故澤國甫下車見井里蕭條解舍傾圮慨然曰是
文獻藪也胡荒廢若斯卽毅然以補救爲己任始進邑
人議築上游尋知其無益且民力拮据不忍以旣竭之
脂膏盡委之洪濤因中止嘗念其 先尊人侍御公

乙未典試楚北拔取多知名士深懼官箴偶玷貽

先大夫羞其素所自矢有趙清獻焚香告天之遺焉賦
性廉明積讞多所平反俗多告訐風自製榜文遍諭鄉
村語語從肺腑流出以是訟簡刑清峻鬪積習剔抉殆
盡自奉儉約而性喜識拔單寒每書院課士備花紅以
示鼓勵癸酉水圯城二次閒有一二高阜亦荒旱秋賦

申詳從緩民深感之鄉闈捐備士子試卷雖囊橐蕭然
弗惜也當巨浸稽天之日官民失所思非遷徙不爲功
爰稟請 上憲棄舊城移治於邑之唐家岡規畫區處
凡踰數月城垣官廨

文聖宮以及書院考棚規模甫定莫不踴躍從事非 上
官知 公之深不能悉如所請非 公誠心愛民不能
咸欣然樂赴也邑乘自前縣 袁興修延擱數載公捐
俸籌費尅期告成蓋履任甫年餘而政通人和百廢俱
興其是爲二百年僅見之事其功卽爲數百世不朽之
功矣

吳璪字璞生全椒人道光時以拔萃宰公邑愛人以德判
事如流會江水暴漲西湖廟堤不沒者尺餘公乘危履
險令善水者塞其罅漏督圩甲實力用礮務插錐不入
自朝至暮無時休息蓋保堤卽以保城不敢稍事姑息
以邑地窪下故也曩時已有適樂郊之思矣去歲周公
以遷城申請 臺司吳公從子鹽運使候補府覲臣保
儀公奉委來相宅定基址計高厚量地程功備極經畫
復以借款過廉爲邑人憂其惓惓愛人之心後先同揆
見覲公益令人思璞公於不置也

久五身六

冬之ニコ

ニコノ

選舉志

周制以鄉三物教萬民而賓興之大樂正論造士之秀者升諸司馬曰進士卽今之甲乙科也邑在前明如王襄簡鄒莊簡文德武功炳耀丹青其時官風憲擢中丞任方伯者不一其人隆萬以後袁伯修兄弟出而文起歷代之衰力矯七子之弊天下翕然從風迨

清朝而一科或四五人或七八人猶不失爲名區茲於舊志之臚列者錄之以寓趨步先民之意於新志之增入者詳之以示鼓舞後進之思科目之設今何必不如古哉亦視有志者之能自振拔耳

薦辟

晉

車允南平人父育為本郡功曹少時篤學不倦家貧不常得油夏月囊螢照讀及長甚有鄉譽桓溫在荊州引為主簿太原中領國子博士遷吏部尚書王國寶謔會稽王道子諷八座奏以道子為丞相加殊禮允言不可忤道子意乃稱疾不出舊志

宋

王邦直侍郎

張景字晦之少從河東柳開遊開悉出家書畀之嗜學

益力時富春孫僅沛國朱巖成紀李庶景相與麗益聲
華日振真宗詔有司計偕天下士景居首列調館陶簿
坐累謫全州尋爲房襄二州文學參軍陳堯咨知其才
薦爲寶應簿後通理真州事天禧二年卒所著有洪範
王霸論數十篇楚紀仁宗嘗召見問曰卿在江陵地有
何勝景景對曰兩岸綠楊遮虎渡一灣芳草護龍洲又
問所食何物曰新粟米炊魚子飯嫩冬瓜煮醬裙羹韻
捷如此而風景土俗瞭然矣舊志

元

普元禮

一作理進士見忠義又見僑寓

杜

敏

著作郎見僑寓歐陽元贊其像今佚

毛仲材 諫議大夫
見僑寓

何廷蘭 臺省見
僑寓

明

田文質 主事

田 籽 洪武五年舉賢
良任江陰知縣

崔 英

馬 德 知縣

李德新 舊志作明新官推官府
志作知縣今遵府志

沈良佐 縣丞

熊 達 同知

劉朝宗 主事

祝 暹 知府以
人才薦

張 哲 同知

郭 榮 推官

杜宗貴 主簿

楊 遠

清朝

田士玉

廩生清初薦舉任廣西天河知縣調北流知縣陞平太府通判

科第

進士

明

洪武

李本

李

鳳

俱舊志科分未詳通志無

永樂二年甲申科曹

繁榜

王必甯

知縣

永樂十年壬辰科馬

鐸榜

韋國正

北大理寺評事府志通志鄉榜俱遺

永樂十六年戊戌科李 騏榜

張 斌 福建道御史

永樂十九年辛丑科曾鶴齡榜

王仲實 評事

宣德五年庚戌科林 震榜 初名振以同中官名改名震

王 恂 祭酒有傳

方雄才 舊志祭酒科分未詳

天順元年丁丑科黎 醇榜

周易同 知府

天順八年甲申科彭 教榜

王 軾 兵部尙書有傳

李 芳 御史有傳

陝 茂 參政
有傳

成化二十三年丁未科費 宏榜

朱 輔 浙江嘉湖道
有傳見志義

宏治六年癸丑科毛 澄榜

鄒文盛 戶部尚
書有傳

何 珊 布政
有傳

嘉靖十七年戊戌科茅 瓚榜

卿文瑞 御史 李和芳 御史舊志
作秀芳

嘉靖二十年辛丑科沈 坤榜

李 臺 知府
有傳

嘉靖三十五年丙辰科諸大綬榜

龔大器 布政有傳

嘉靖四十四年乙丑科范應期榜

周良臣 戶部給事中舊傳失今錄蘇州府志傳

隆慶二年戊辰科羅萬化榜

李長春 尚書載府志舊志通志鄉榜俱遺

隆慶五年辛未科張元怵榜

劉珠 主事

萬歷五年丁丑科沈懋學榜

李守約 太常寺少卿有傳

萬歷八年庚辰科張懋修榜

龔仲慶御史有傳

萬歷十四年丙戌科唐文獻榜

袁宗道會元有傳

萬歷二十年壬辰科翁正春榜

袁宏道主事有傳

萬歷三十五年丁未科黃士俊榜

蕭毅中巡撫有傳

喻守初參政

劉惟忠太僕寺卿

萬歷四十一年癸丑科周延儒榜

熊膏巡撫有傳

龔世法主事有傳

萬曆四十四年丙辰科錢士昇榜

袁中道郎中
有傳

天啓二年壬戌科文震夢榜

毛羽健御史
有傳

崇禎四年辛未科陳於泰榜

侯偉時主事
有傳

崇禎七年甲戌科劉理順榜

袁彭年給事
有傳

崇禎十五年壬午科賜特用出身袁生芝

清朝

順治十五年戊戌科孫承恩榜

鄒養赤知縣有傳

尚正儀推官有傳

關以華以江陵入籍知縣有傳府志傳載江陵科目載公安

順治十六年己亥 恩科徐元文榜

馬芝知縣有傳

康熙三十六年丁丑科李蟠榜

陳文燦知縣有傳 馬龍騾知縣有傳

乾隆十年乙丑科錢維城榜

洪鐘安化知縣

乾隆二十二年丁丑科蔡以臺榜

龔孔傳 襄陽府教授

乾隆二十六年辛巳科王杰榜

毛業溥 傳臚有傳

嘉慶二十二年丁丑科吳其濬榜

毛家槐 翰林有傳

附趙之經 嘉慶四年己未科恩賜進士翰林

龔夢龍 嘉慶十年乙丑科恩賜進士翰林

舉人

明

洪武十七年甲子科解元素進

何永壽 蒲圻教諭

洪武二十三年庚午科解元賀守貞

林思義 縣丞

洪武二十六年癸酉科解元楊繼本

易紹宗 鹽運使

洪武二十九年丙子科解元張璧

張禮 知縣

林敬直 教諭

建文元年己卯科解元盧文政

卿壽 通判

郭繼宗 僉事

馮文魁 學正

匡一定 教授

徐子奇

建文四年壬午科解元劉文斌

徐士奇 教諭

陳如川 教諭

王必甯 見進士

永樂二年乙酉科解元熊傑

陳元亨

永樂六年戊子科解元李子春

宋友謙 御史

胡文宗

楊懋

永樂十二年甲午科解元賀獻

王壽

永樂十五年丁酉科解元程 旆

張 斌 見進士

張敏學 主簿

永樂十八年庚子科解元高 信

王仲實 見進士

永樂二十一年癸卯科解元婁 升

張 輝 教諭

龔 富

宣德四年己酉科解元王彥誠

祝 榮 教諭

王 恂 見進士

宣德七年壬子科解元馬嗣宗

劉子欽 知縣

景泰四年癸酉科解元劉餘慶

陶惟恭教諭

謝鑽知縣有傳

何暉知縣有傳

文魁知府有傳

陳和

景泰七年丙子科解元賀勳

周易同見進士舊志佚

李茂

朱廉知縣

王吉

天順三年己卯科解元余本政

劉昭

蔡衡同知

天順六年壬午科解元田倫

王 軾見進士

李 芳見進士

陝 茂見進士

成化元年乙酉科解元汪 洪

王 洎

成化四年戊子科解元樊 經

王 準舊志遺

成化七年辛卯科解元辛 鑑

王 祥

成化十年甲午科解元李邦憲

周 敬監丞

成化十三年丁酉科解元張才

李英知縣

成化十九年癸卯科解元林貴

朱輔見進士

成化二十二年丙午科解元華巒

何瑢衡州府教授

鄒文盛見進士

宏治五年壬子科解元楊禔

何珊見進士

宏治八年乙卯科解元陶寶

王贊知縣

李堅通判

宏治十一年戊午科解元張鏈靈

楊廷傑 知州

王貢 知縣

高校 有傳

毛廷爵

正德八年癸酉科解元阮朝宗

毛志忠 江西安遠知縣

李大本 新城知縣

朱諫 通判府志作棟見朱輔忠義傳

正德十年丙子科解元羅星

王頤

正德十四年己卯科解元唐愈賢

李友仁 原籍襄陽入公安中式舊志遺

嘉靖四年乙酉科解元陳吉言

李

臺舊志作台
見進士

李文芳知縣

李

璋知縣

嘉靖七年戊子科解元曠宗舜

高文光

知縣
有傳

嘉靖十年辛卯科解元傅 頤

卿文瑞

見進士

嘉靖十三年甲午科解元汪宗伊

李和芳

見進士

嘉靖十六年丁酉科解元姚 璋

劉珠見進士

嘉靖三十四年乙卯科解元劉伯燮

周良臣見進士

龔大器見進士

王格知府有傳

嘉靖四十三年甲子科解元劉守泰

熊萬卷

隆慶元年丁卯科解元李廷楫

李守約見進士

彭師古司務

萬歷元年癸酉科解元李登

龔仲敏嘉祥太原知縣有惠政

萬歷七年己卯科解元黃國

龔仲慶見進士

袁宗道見進士

萬歷十年壬午科解元陳良心

王承先

龔世薦家居教授著有方湖講學集

萬歷十二年乙酉科解元汪起雲

侯一定知縣有傳

萬歷十六年戊子科解元吳化

袁宏道見進士

龔世瀚歷任西華南鄭建始知縣三邑俱有生祠

高文美

高邦永二高府志科目有舊志佚俱有傳

萬曆二十二年甲午科解元秦繼宗

曹邦臺

喻守初見進士舊志佚

萬曆二十五年丁酉科解元熊廷弼

鄒昌魯戶部郎中

萬曆二十八年庚子科解元趙嗣芳

李學元推官有傳

崔子瑛同知通志府志俱佚

袁履道

原名宗中石浦先生在講筵題改才名超出有文集行世

袁致道

原名宗鄧亦石浦先生題改有傳

李允祥

以富順籍中

李再白

山東沂州知州兄三白官鴻臚

萬曆三十一年癸卯科解元劉士望

袁中道見進士

陝嗣宗南京御史有傳

蕭毅中見進士

萬歷三十四年丙午科解元張希哲

熊膏見進士

龔世法見進士

田于野北直定州知州

羅遇旦

崔采中書歷任至海南道子善生殉難

劉惟忠見進士府志載舊志佚

萬歷三十七年己酉科解元王時化

鄒得魯知府有傳

周世顯

萬歷四十年壬子科解元易文明

文希俊江蘇績溪知縣

萬歷四十二年乙卯科解元何守約

龔家啓

萬歷四十六年戊午科解元陳君寵

李進御

天啟元年辛酉科解元邱萬合

毛羽健見進士

李開美知州有傳

王嗣美推官舊志作同知豁爽軒昂有名士風

天啟四年甲子科解元劉近臣

毛羽宸有傳

袁彭年見進士

袁祈年順天中式有傳

天啟七年丁卯科解元譚元春

戴名世 舊志佚

崇禎三年庚午科解元王文南

侯偉時 見進士

張問明 有傳

王錦心

崇禎九年丙子科解元周壽明

王彥之

崇禎十二年己卯科解元曹應昌

袁俊年 經魁

袁嵩年

張正乾

鄒國儀 有傳

蕭子達

崇禎十五年壬午科解元沈會霖

高重望 有傳

毛炳文 烏程知縣

陳鼎中 知縣有傳

馬芝 見進士

清朝

順治五年戊子科解元胡在恪

龍之繩 新會知縣

順治八年辛卯科解元李奇星

鄒養赤 見進士

順治十一年甲午科解元陳飛星

李友松 有傳

高正儀 見進士

順治十四年丁酉科解元楊輝斗

關以華 見進士

康熙二年癸卯科解元黃士瑛

陳士連

康熙八年己酉科解元簡 玫

徐應采 江陵入籍

康熙二十六年丁卯科解元李如閻

陳文燦 見進士

康熙二十九年庚午科解元陳大華

馬龍騾經元見進士

康熙三十二年癸酉科解元欽士佃

馬應烜銓授鎮遠縣知縣溫文爾雅但以儒素傳家

康熙三十八年己卯科解元彭源

顏星復聖七十代裔

康熙四十一年壬午科解元朱和均

周應運襄城知縣新政有聲

康熙四十七年戊子科解元李澍

汪佐誥經元通城教諭

康熙五十年辛卯科解元李天柱

毛廷申

康熙五十二年癸巳 恩科解元金相

李也白

康熙五十三年甲午科解元韓王錫

李應鷺

周 昭

康熙五十六年丁酉科解元秦惟煥

沈俊掄

鄒敬謨有傳

雍正二年甲辰補行癸卯科解元侯執信以後分闈

侯執信白水知縣有傳

雍正四年丙午科解元郭孫俊

劉生炳 河南舞陽知縣陞雲南賓川知州

雍正七年己酉科解元宋楚望

杜志瑛 直隸秦強豐潤知縣陞越支廳鹽務同知有傳

陳銘戒

雍正十年壬子科解元張鰲

袁敘亨 建始教諭

雍正十三年乙卯科解元李兆鈺

洪鐘 第四見進士 蘇璐

李著 性方正力學砥行琉球教習 李明 潛江教諭

乾隆二年戊午科解元郭維本

卷之三十一 三十一

伍端培

乾隆六年辛酉科解元張夢揚

劉克寬

楚雄知縣

鄧允光

登壬戌會試明通榜

乾隆九年甲子科解元向來雨

楊德化

乾隆十二年丁卯科解元吳沂

龔孔傳

見進士

乾隆二十四年己卯科解元蕭芝

李有光

興國州學政

乾隆二十五年庚辰 恩科解元梁景陽

羅宏漳 雲南迤東道有傳

毛業溥 見進士

冉紹詩

乾隆三十年乙酉科解元李 潢

李嗣燔

朱克恆

魯家慶 歷任鄖西教諭與國州均州學正德安府教授分發四川羅山知縣晚退歸除驛道夫徭積弊人多德之

袁廷翹 知縣有傳

乾隆四十二年丁酉科解元彭念祖

羅宏龍

乾隆四十五年庚子科解元萬 岳

蕭信誥 揀選知縣

乾隆四十八年癸卯科解元鄭永江

羅宏珏天門教諭

乾隆五十七年壬子科解元蕭林

田國文孝感教諭有傳

乾隆六十年乙卯恩科解元李之勳

田業寬監生改名業煒
進竹谿教諭

嘉慶三年戊午科解元黃道衷

袁潤

嘉慶十二年丁卯科解元劉學霽

蔡輝琳

嘉慶二十一年丙子科解元褚于杜

毛家槐見進士

道光五年乙酉科解元萬時喆

蔡訓紳

道光二十四年甲辰 恩科解元孫玉田

李洪已棟漢知縣

道光二十六年丙午科解元鄒崇漢

鄒崇漢有傳

咸豐元年辛亥 恩科解元周禾田

張澤銑侯鑾知縣有傳

譚光斗棟漢知縣

同治元年壬戌 恩科並補行辛酉科解元王賡颺

鄒毓楨

附

恩賜舉人

趙之經 嘉慶三年戊午科見進士

龔夢龍 嘉慶九年甲子科見進士

袁遵源 原生嘉慶十二年丁卯科

武進士

清朝

康熙三十九年庚辰科

王彪 子兆賴號龍山仕懷來鎮守備膂力過人并領保安

康熙四十五年丙戌科

高鵬南

才兼文武選廣東督標前營中軍守備

康熙四十八年己丑科

冉祚瑞

字輯五才技優長選授山西天成衛屯政守備

嘉慶十三年戊辰科

司馬茂魁

守備任京省提塘

武舉

康熙二十九年庚子科

王

彪見進士

王夢熊

字東山便捷善騎射事嫡母極孝兄弟和愛

毛獻文

字來章善詠諧有意氣王彪卒於保安旅觀不得歸文首捐二十金遂釀得百八十金歸首邱焉

康熙三十二年癸酉科

毛維煥

字嘉貞

康熙四十一年壬午科

高鵬南

見進士

康熙四十四年乙酉科

唐應封

字帝錫才氣高爽

康熙四十七年戊子科

冉祚瑞

見進士

王蘭

周士慎

康熙五十二年癸巳 恩科

曹璋

康熙五十六年丁酉科

杜志瑚

雍正七年己酉科

戴必勝

乾隆三年戊午科

樊廷炎

乾隆十八年癸酉科

鄭逢泰

侯光國

乾隆二十一年丙子科

周世泰

侯百里

乾隆二十四年己卯科

司馬俊

亞元

雷一清

金國治

乾隆五十一年丙午科

羅元銘

乾隆五十九年甲寅科

趙夢元

嘉慶三年戊午科

廖萬春 運糧千總

嘉慶六年辛酉科

司馬安國

嘉慶十二年丁卯科

司馬茂魁 見進士

趙開玉

嘉慶十五年庚午科

樊廷護

道光二年壬午科

鄧忠仁

道光五年乙酉科

之 三 身 示 各 之 二 五

劉國泰

道光八年戊子科

章明德

道光十四年甲午科

章傳甲興山把總

咸豐元年辛亥 恩科

邱甲邑火耗券錢飽釐者弊呈請前憲海順革除

同治六年丁卯科

章家桂亞元

貢生

明

洪武

牟長庚

評事舊志佚

牟敬祖

山東棲霞縣主簿舊志件見外籍

徐勝先

通判通志作讓先

陳順昌

知事

李德榮

縣丞

侯坦

知州

楊原玉

曾繼參

縣丞

陳鎧

縣丞

余勉

永樂

桑復禮

曾貴

張籍

周文質

杜謙

劉友諒

馬德知縣

易震

張智

易恭

楊濟府志作濟

許必勝

宣德

蔡吉寺丞主事

羅文用

楊宗哲照磨

田時

李德新津江縣丞

楊文質

傅郁

何俊津江知縣

正統

曹子徽 漢中知府有傳

王賢 知縣

鄒洵 知縣府志作郝

杜宗賢 主簿

姚良佐 縣丞

胡文敬 知州

馮澄 經歷

胡禎 經歷

卿繡

周志中 主簿

張必達

何愷 河南沈邱知縣

景泰

王忠

劉傑

祝安道

楊遜 訓導

何淵 拔清江縣丞

譚弼 縣丞

卷之三十一
年二二二
五十九

王英

王質

郭榮

張鳳

天順

李

清訓導有傳

李

秀縣丞

吳遜

毛錦

王永隆

陳溥縣丞

田苗

成化

張遇教諭

陳繡

杜美

王偉

趙原吉

林思恭巡檢

桑林

薛決訓導

李完

王鉞訓導

宏治

袁環中

張瑾

許鑾主簿

韋存仁

康益

廖儼知縣

杜衡知縣

冉興

崔子城福州丞

嚴甯

馬友信

郭醇

正德

傅訓

師寅

曹文繡訓導

陳伯福

陝佐

王蓋

伍廷佐

陳章

蔡武

嘉靖

劉定

曹文道

曹文才

李營

謝文煥

何怡石隸知縣

李遇春 壁山知縣

陝民望 徐州同知

文材 主簿

董朱 佐學正

文相 主簿

李世喬 知縣有詩名中郎先生曾稱之

王廷賢

高文美 教諭

陳王 官教諭

曹納

陳九春 知縣

元大用 縣丞

曹廷相 藩州知州府志州判

鄒封魯 衡州教授舊志佚

張應璧

鄒塘 重慶經歷舊志佚

李仲春 教諭

劉寶 訓導

蕭墳 縣丞

曹文會 縣丞

曹文芳

高文昌

隆慶

周伯顯 教諭

崔仲沂 黃岡教諭

陝部 教諭

李守乾 封奉直大夫

萬曆

韋廷表

李世文 通志作仲文恩教諭

田璧 拔任贛州府通判

張定

王和 縣丞

李詩 訓導

田垣 河南獲嘉縣訓導陞江西安遠知縣有惠政丁艱去官民思之為立祠致祝見孝義

高邦永 舊志府志作訓導傳作知縣

董三輔

崔世忠 蒲圻教諭遷河南泌陽知縣

沈大相 訓導

鄒國偉 墳縣知縣

鄒著之 青遠知縣

王輅 通判見逸士

侯一賢 由教諭陞江西白水知縣轉任湖口縣以上四人舊志佚

天啟

周祚豐

毛懿 恩翁源知縣陞南甯同知

祝莊臨

沈承恩 教授知縣舊志作承思

龐瑜 知縣舊志佚有傳府志載

萬夫望 考授訓導府志作通判父名華號二西袁氏父子兄弟皆從之遊

龔仲元 選入南雍十年移北雍又十年盡讀中秘書任雅州府通判

毛苞 善化教諭有傳

毛荃 甲子副舊志佚

毛炳繡 府志作秉秀己卯拔

胡詩 知縣有傳

崇禎

羅遇奇 訓導有詩名

王龍光 平江教諭

袁元吉 當陽教諭

王來聘

馬遜 宜城教諭轉雅州府通判陞雷州知府舊志作訓導

高養重

袁安仁

沈承志 湘陰教諭

李學光 孝友力學

沈承宣

李澹 訓導

毛壽登 乙亥拔天津道有傳

李學亮 邵陽訓導

曾一唯

李開雲石門訓導

周曰旦

田九苞壬午副

牟治世

歷任浙江永康山東濟東縣丞陞任濟南府齋山衛經歷後遷宛平知縣

牟光世

直隸通判見耆德

蔡伏音湘潭訓導

張正斗

以上五人舊志佚

清朝

順治

陳信中

己丑知縣有傳

李友松

辛卯副舊志佚

田鍾雨

辛卯拔由教習任衢州府通判轉廉州府同知陞知府門人大中丞金璽為著有海浦遺愛編

周克友

乙未拔知州有傳

田夢張

龍陽教諭

龔學洵

由蘄州訓導陞漢川光化教諭
論旆州衛學正著有詩集

龔家齊

侯選訓導

袁世維

辛丑恩侯選州判

周于文

由選拔教習授和順縣知縣邑古首陽地塞外苦寒不產五穀教民種麻蔬民賴以生上官傲取麻稅力爭得免日進士

子於庭教之為時文論策故士多興於舉且有舉於鄉者薪俸所入俱散之親黨性至孝以母老不能之官乞休致至號泣以請古之循

良篤敬人也

龔家仁

通山訓導克盡其職紳士德之及遷濟南府經歷為之勒石所著有雙田文集詩四卷

鄒國鼎

侯選訓導刻厲讀書設教嚴而誠及門多成名者

何屢乾

湘潭訓導與弟履旋俱推名宿

牟璋宗

直隸盧龍知縣見鄉官外籍

竺泓

王伸

袁世紹

廣西昭平知縣

袁世經

廣西宣化縣教諭

田澆映以上六人
舊志佚

康熙

馬應煥平江
訓導

李完成化特亦
有李完

李際盛麻城訓導製禮樂器公安
子廩生玉樹自府學墓來者今被水毀

王家官一作寬癸酉拔安陸縣訓導轉永豐縣丞修
署永篆去思有碑有詩文行世年八十七卒子銓楚與入庠

魯瓊

馬應門通城
訓導

鄧序陞文行
兼優

何又新己卯優通城
訓導有傳

高端儀黃州府
訓導

冉祚繩恩

馬昌祚

袁昌麒工詩古
文辭

王道隆拔保康
教諭

龍士術

沈光斗

父喪廬墓著有性理五聲詩亭文集

譚又春

丁酉副

冉遴士

洪

範 庚子副勤以攻文靜以養品

鄒莊仕

澧州訓導詳請分岳州考以岳屬之石門慈利安鄉及九谿永定兩衛於澧州瓶設廠院士子免洞庭之險

張雲龍

保康訓導

陳楚材

朱方升

馬必遇

歸州學正

袁惇治

袁惇稷

高周南

由歸州入籍

鄒養潔

候選訓導

馬霽之

考選教習

徐第

胡文宏

馬霽之

候選訓導

蔣

鉞

通志作趙鉞

馬維捷 德安府訓導

馬翹之 候選訓導

王士璋

張鵬

胡良玉

文軾

高士元

文箴

陳德 廣東肇慶府同知

羅宏謨

艾必遇 拔光化教諭

高牲筠 以上十人舊志佚

雍正

趙文炳

毛廷樞

嚴星聚 恩

李著 拔

龍澤漳

高圖南

甘調飴

楊公之駢建義館延為義學師

馬之煒

黃安訓導

高姓篆

己酉副

冉之桂

乙卯副

嚴文謨

乙卯拔歷任福建大田武平沙縣知縣署漳州府通判著有宦闕紀事集行世

乾隆

崔以恪

馬應烺

慈利訓導

王朝銓

陳覲

王天祐

杜詩

侯 儼

壬戌

甘必湛

乾隆二年舉鄉飲大寶長陽縣訓導

汪佐政

通城教諭

鄒毅達

高文獻

乙丑

朱傑

龔傳聲丁卯

沈光遇

戴天因

張作相

陳于庭

楊士炳恩

曹遵洙拔

鄒毅迴

蕭山

王平圩

鄒敬詔

胡瞻誥

趙士燦丙子

毛懌先恩

陳士道庚辰 學優 士林 欽重 恩 岳 端

劉應輒恩

田遇時恩

王庭椿壬午 副

胡毓琳乙酉 副

李珩戊子 副

蘇作旬 辛卯

蕭知德 壬辰 有傳 恩

張嗣翰 壬辰

蕭信誥 甲午 副

龔經琳 丙申

邱友白 庚子 精堪輿明數學

雷文達 庚子 遠安訓導

陳士壘 壬寅

陝尙舉 癸卯

李玉成 拔

王家桂 癸卯 副

陳士鏹 己酉 拔

陳興洪 武昌府教

龔經楚

徐開植 辛亥

陳士英

嚴嗣陵

王德霖

侯文觀

胡銘國

徐士昌

范心洗

謝盛兆

毛有光

來鳳訓導來本容美善地光至不特誘掖文風遂振卒之日門下執紼送者出郭門外十里許哭失聲來人士至今稱道不置

嚴

灝 乙卯

鄒恭讓 鄭陽教諭

李霽南

李光甲

嘉慶

胡東旭

己未

高同鐘

庚申

嚴學定

庚申

李應燮

辛酉恩

蔡輝瑾

辛酉雲夢訓導

毛家槐

辛酉拔

陳顯庠

甲子副

易顯符

戊辰恩

陝尙焜 辛未

陳樸光 癸酉

周旭東 戊寅
羅光斗

李廷璧 著 曉齋樓詩集

簡學謙

汪維來 恩候 撰 復設教諭

道光

李廷塾 壬午 吳崇陽 訓導

雷尙震 癸未

李澤濤 乙酉 拔 有傳

陝尙寬 丁亥

郭正邦 戊子

毛業峻 己丑

田應山 壬辰

袁清 丙申 有傳

侯家光 丙申 恩 著 有 假 蓋 山 房 賦

嚴有仁 丁酉

陳洪仁 丁酉 拔

張敦恆 戊戌

蔡訓經 辛丑 恩

徐子成 辛丑

陳祖羣 乙巳 恩

田家崧 乙巳 候 選訓導 署安陸府教

龍節 丁未

蕭炳忠 己酉 拔 更名汝霖 山西靈邱知縣

徐芳 己酉

易光杰 庚戌

李輝鐘 庚戌 恩

咸豐

邱大陽

易斗光 候 選訓導 有傳

袁瑛 恩

陳祖壽

劉子鳴 恩 候 選州判

曹凌雲 以上六貢兵燹 後丙辰並出

易秉璋 己未 候 選訓導

蕭敦忠己未 恩科副更名 銘壽湖南會同知縣

李楚鳳辛酉 拔

張敦暉辛酉

同治

沈賜鈞壬戌 候 獎訓導

易道卿壬戌 恩候 直隸州州判

劉鼎新癸亥

鄧楚金乙丑 恩

陳玉田乙丑 試 用訓導

范廷瑄丁卯 候 獎訓導

晏曙鑾己巳 候 獎訓導

劉元杰辛未

程紹伊癸酉 恩

王受福癸酉 候 獎訓導

張坤誠癸酉 拔

附例選

陸稼書曰漢張釋之黃霸皆以賢進赫赫千秋儒者之
論始進似稍隘矣然必如張黃而後可耳載稽史冊勳
績爛然誠能趨步前賢卓然樹立何遂不可以光鐘鼎
而煥旂常資格之說其不足以限奇傑也久矣有為者
亦若是斯言良不誣云

鄒毅煦

知州有傳

鄒振讓

稟貢選黃梅訓導

羅才標

貴州正安知州南籠苗變奉大將軍福敏調協辦軍務總理糧臺著有平苗紀略

樊

標

一名廷榮廩生就縣丞遷都勻知縣後陞羅湖州知州

王之傑

古北口殺虎林司政蹟卓異

劉世第

宛平縣丞陞玉田知縣

羅光炳 安徽泗州州判

李洗初 山西常州吏目

侯家璋 知縣有傳

劉承寅 湖南岳州府經歷改河南知縣

袁憲健 湖南沅陵巡檢

劉承巒 安徽通判

劉聯甲 廩生分發湖南縣丞

晏承烈 廩貢崇陽訓導與修崇陽縣志

易祥光 廩貢歷署巴東嘉魚教諭當陽訓導

蕭以忠 江西永豐沙溪巡檢

雷壽春 署湖南華容縣黃穴巡檢

劉仲勳 湖南湘鄉縣丞陞知縣

陳忠煥 生員分發湖南知縣

劉範遠 生員湖南通判

袁 照 生員江蘇同知

鄒崇澍 湖南縣丞加鹽提舉攝安鄉縣

蕭孝穀 安徽縣丞

袁 煦 常德府經歷

蕭孝徽 湖南通判

童萬青 湖南巡檢

易秉壘 廩貢試
用訓導

陳輔仁 江西
縣丞

附保薦

牟作貴 縣丞見
孝義

嚴 堃 廩生江
蘇知縣

田德霖 生員雲
南巡檢

毛安邦 都司
花翎

牟開春 都司
花翎

李大勝 都司
花翎

封贈

明

王仁美以曾孫軾貴贈吏部尚書

王原道以孫軾貴贈尚書

王 讓以子軾貴贈尚書

鄒仕閔以曾孫文盛貴贈戶部尚書

閔云諱改閔

鄒 渙以孫文盛貴贈戶部尚書

鄒廷濟

以曾孫之有貴贈太子太保

鄒 鑣以子文盛貴贈尚書

鄒 珠以子得魯貴贈中憲大夫

王貴華以子恂貴贈國子司業

何 皞知縣以子珊貴贈刑部尚書

龔如鑿以子大器貴贈布政

蔡仲雲以子吉貴封主事

曹 敏以子吉貴贈都督府經歷

從舊志

王 蘊以子格貴贈知府

袁士瑜以子宗道宏道中道貴封翰林院編修晉封禮

部主事吏部郎中

蕭九疇以子毅中貴贈監察御史

熊萬彙以子膏貴贈巡撫

龔仲元明經通判以子世瀚貴贈文林郎

毛宗孟以孫羽健貴贈監察御史

毛薦以子羽健貴贈監察御史

侯璧生員以子一定貴贈知縣

侯一定知縣以子偉時貴贈吏部文選司

清朝

尚重望舉人以子正儀貴 封推官

尚正儀以子鵬南貴 贈武略騎尉

侯諫臣以子執信貴 贈文林郎

杜必先以子志瑛
贈文林郎

羅國甯生員以孫宏漳貴 賜贈朝議大夫

羅啓慕監生以子宏漳貴 贈朝議大夫

袁士信以孫廷翹貴 賜贈文林郎

袁志化以子廷翹貴 贈文林郎

陳伯凱以子鼎中貴 贈文林郎

毛騰先以子業溥貴 贈文林郎

毛作先以嗣子業溥貴 贈文林郎

毛荃以子炳文貴 贈文林郎

毛業沆以子家槐貴 贈儒林郎

田一州以子國文貴 贈修職郎

司馬訓以子茂魁貴 誥封武略騎尉

司馬聰以姪茂魁貴 賜封武略騎尉

例封

劉 廉縣學生以子世第 贈宣德郎

侯士組以孫家璋 賜贈宣德郎

侯 封監生以子家璋 贈宣德郎

附 貢鄒詣中以子崇澍 誥封四品

劉承遇附貢報捐布政司經歷 誥封奉政大夫

蔭襲

鄒廷澤以父文盛蔭任銅仁知府

鄒廷濟以父文盛蔭襲錦衣衛百戶

鄒之有以高祖文盛蔭襲有傳

袁恭壽以嗣祖宗道蔭國子監

公安縣志卷之六

人物志上

萬物皆生於土而人爲最靈自古賢豪誕降川嶽之氣
鍾焉傳曰惟楚有材公邑之於楚亦甚渺末已然而龍
變蝶化屈宋騷雅之流風餘韻未有替也况乎襟洞庭
帶長江肥仁毓其道德浩瀚發爲文章千數百年來固
有功在廟廊名埒歐蘇者矣至或愚夫而孝愚婦而節
儉父逸老潛德可風皆不可謂非地里之光也

列傳

事近則覈人習則信夫以邑人傳道舊事宜無不詳且

盡者然兵燹之餘舊志淪失耆老凋落邑中先賢問之
後生至有不能舉其姓字者况其他乎夫前有賢而莫
爲之彰使閭里無所矜式國史無所借手此後起者之
責也豈可使芳烈之久而愈湮乎

明

王恂字伯宣祖邦直宋侍郎明宣德庚戌舉進士初名振
以同中官名改焉選入館號二十八宿爲英宗皇帝侍
讀嗣兼大理丞以巡撫征黔凱旋有白雀數千飛輿前
數十日不離偶止一處往視之則白骨也焚而瘞之餘
一雀隨至家園三年而後去歸所攜者書劍藥物而已

復入翰林院轉國子監祭酒賜書賜第公謹厚誘迪諸生循循不倦卒後遣禮部侍郎薩琦諭祭諭葬有詩行世名宦則居黔之首鄉賢則居孱陵之首

王格祭酒公曾孫嘉靖乙卯舉人初授山東高唐州輕徭緩賦除奸剪強民幼不能育者育之士貧不能娶者娶之老終不能葬者葬之繕治城池調停馬役無不曲盡其善祈禱輒應迄今勒石如新陞江西南康府同知考居合省清官第一復轉貴州黎平知府三處俱入名宦子承先登壬午賢書著有豔雪齋集次子輅鳳翔通判次子嗣美辛酉舉人承先子彥之丙子舉人皆清德所

貽也

王軾字用敬號三湖髫齡時嘗遇呂仙奇其風骨預爲記授十六歲入鄉校天順壬午舉孝廉癸未會試場屋火次年舉進士授大理寺評事遷右寺丞錄囚四川平反百餘人值蜀中兵警卽陞兵備道歲凶請官銀十萬兩爲糴費以案嘉定同知盛崇仁贓罪被訐下吏事白還職改陝西宏治擢四川按察使三年遷南京右僉都御史提督操江八年進右副都御史總理南京糧儲旋命巡撫貴州明年以程敏政鬻題事廷推入爲大理卿公執法無所徇時稱爲椎頭御史詔與刑部裁定條例頒

行天下授節鉞開府山海關陞戶部左侍郎一時宿弊
釐剔殆盡十三年拜南京戶部尙書尋遷兵部尙書兼
左副都御史督貴州軍務討普安賊婦米魯亂米魯者
普安土知州妻夫亡殺其庶子欲自襲鎮巡官不許欲
正其罪遂反時鎮守中官楊友總兵官曹愷巡撫錢鉞
共發兵討魯大敗於河馬坡都指揮吳遠被執普安幾
陷友等請濟師乃以命軾軾未至友等遣人招賊賊揚
言欲降益擁衆攻圍普安安南衛城斷盤江道勢愈熾
又乘間劫執友右布政使閻鉦按察使劉福都指揮李
宗武郭仁史韜李雄吳達等死焉先是廷議進兵久不

得人上曰欲紓朕南顧憂非王軾不克是任閣臣奏軾
非本兵上不悅曰才能如王軾奚必本兵快寫敕與之
軾至以便宜調廣西湖廣雲南四川官軍土兵八萬人
合貴州兵分入道進使致仕都督王通將一軍十五年
正月參將趙晟破六隊砦賊遁過盤江都指揮張泰等
渡江追擊指揮劉懷等遂進解安南衛圍而愷通及都
指揮李政亦各破賊砦賊還攻平夷衛及大河扼勒諸
堡都御史陳金以雲南兵禦之賊遁歸馬尾龍寨官軍
聚攻益急土官鳳英等格殺米魯餘黨遂平取還鎮守
太監斬首一萬九千級收回掠去男婦子女四千有奇

燒燬儲糧房舍七百楹獲牛馬猪隻六千有奇五月蕩
平凱旋獻俘上深嘉悅賜晉伯爵軾以權宦劉瑾索賂
固辭不受賜麟袍玉帶世廕錦衣衛一員因深入賊穴
冒山瘴正德丙寅乞休屢疏不允賜醫藥調治疏七上
始命馳驛還鄉有司歲給月米人夫有差及還里復加
存問既卒遣湖廣左布政華嵩等諭祭七壇工部主事
姜桂諭葬贈太保謚襄簡襄謂辟地有德簡謂平易不
訾也蓋公出使司臬則讞獄明允入事司農則國用儲
備委任留都則機務練達奉命南征則蕩寇凱旋林下
存問供給身後贈謚祭葬生榮死哀可謂備至爾矣王

弇州云我朝南兼北衙惟公安之王襄簡乎楚詞錄云
德業功勳赫赫一時歷官四十年功成身退人無訾議
者惟公安之王軾華容之劉大夏乎信不失爲一代名

臣云

參明史校正

王貢字獻明襄簡公長子襄簡年二十四卽通籍是時貢
方七歲未嘗入官舍居家侍母童子有成人之風偶太
夫人患病醫罔效貢水漿不入口面體癯羸母病愈始
復初及成人率諸弟講學攻苦一如寒素弟贊年十七
舉宏治乙卯孝廉貢亦舉宏治戊午與贊皆年少多才
足以一第襄簡因程篁墩鬻題事執法太峻不乏飲忿

者故不令二子上公車貢就選授四川江津知縣政聲
大著有一乳三子麥穗兩歧之瑞

何暉字太古明開科甲子鄉試何永壽孫也由景泰癸酉
舉人筮仕睢甯縣睢巖邑也久旱不雨江南一帶饑饉
載道公披髮徒跣齋宿於城隍廟飲水殮果誓不雨不
火食晝夜以身禱七日後果大雨三日麥多一莖三穗
時人競傳其事曰麥秀三歧藹張堪而過之矣臺使者
陳公瀾特疏奏薦縉紳士民詣闕哀請復任六年戒殺
淫勤教誨其於決訟徵賦一如家人課計鹽米事不爲
赫赫名而民安之歷任九載百姓識其懿行有三異政

集詩傳百餘篇立祠紀石屢爲循良最留戶部辦事尋告歸以壽終於家子瑤成化丙午舉人珊宏治癸丑進士

何珊號梅莊宏治壬子舉人癸丑進士曠次子也童時就塾道經社神廟每過則揖祝其護佑塾師忽夢一皓首老人言何布政每過我必揖我不敢當願因先生致之師覺往覘以爲侮神呼而撲之公復潛詣廟中以菽爲校加社神之項曰望汝說福乃反說禍耶是夜師復夢前老人荷校而訴曰望先生善言於何布政何故相責以致相累若此師益驚視之果然遂語公父太古公曰

此子異日方伯也公益自喜十九歲成進士由郎署陞
四川敘瀘道所至有聲禦災捍患削平僭亂不廢詩書
而成功晏如鄴大監二兩賊者猖獗敘州實與蕭養趙
風子標表相應者也當時全蜀騷動西北漢中東南荆
襄皆有震鄰之憂公毅然以爲己任由是撫按兩臺使
合奏推公委以專征公膺命提兵深入探穴取子以衝
突埋伏致勝用唐將薛仁貴浪戰法也不三月生擒鄴
藍二賊首繫之闕下西蜀底定論功陞廣東左布政加
正二品服俸時年甫四旬公念當年社神語卽致政歸
當途名卿賢相無不咨嗟贊異及歸里以詩酒著述自

娛者又四十年子怡石埭知縣凱沈邱知縣

鄒文盛字時鳴號黃山性端凝器量宏遠爲諸生時謁太保王襄簡公軾襄簡奇之面相慶曰異日登吾座者非此子不可成化丙午舉於鄉宏治癸丑成進士授吏科給事中命覈兩廣兵儲戊午清甯宮災上災異十事奉敕按事遼東巡撫韓重効鎮守中官廖玘公偕郎中楊茂仁勘實其罪謫長陵司香朵顏福餘泰甯三衛數擾邊公還奏制馭六策尙書劉忠宣公大夏深善之下之邊吏尋出覈兩廣軍儲釐奸剔弊嶺表肅然中歷刑兵二垣疏陳崇節儉省課稅裁撫治飭邊備廣儲蓄嚴督

捕理番舶俱鑿鑿切治體資望當得京堂以忤逆瑾出
守保定府瑾誅擢山東布政使司左參政會劇賊劉齊
等破州縣公撫民餉軍均有成績遷福建右布政使轉
雲南左布政時內臣緣方貢恣索無厭公抗不從內臣
銜之至借端訐奏公持益力竟亦無他先是貴州青平
衛車枕等寨苗反其酋阿旁阿階阿革叛青平興隆偏
橋平越新添龍里諸衛咸被其毒至截殺救僭稱王據
香爐山爲巢穴滇楚交震巡撫曹祥以玩寇劾罷朝廷
就近擢公副都御史巡撫貴州親往傾賊喜曰彼狃常
勝驕而不備可急戰也刻期進勦屢戰皆捷擒阿革賊

退保香爐山山壁立數百尋四隅峭仄惟鳥道柵次如
鱗仰攻不能克乃製戰櫓與崖齊乘雨夜緣登拔其前
柵賊奔後山絕頂官軍梯藤蟻附而上斬關入縱火焚
巢擒阿旁遂移師討龍頭都黎都蘭都蓬密西大支馬
羅諸寨黑苗斬賊渠阿茲先後降獲無算寨破之日焚
香告天誓不妄殺一人時正德十一年也捷聞帝大喜
璽書嘉勞錄功增俸一等芒部陳聰等作亂討破之四
川重安土酋舍馮倫與凱里楊宏子相讐殺侵軼貴州
公督播州宣慰使楊斌撫定之進右副都御史掌留臺
力振風紀世宗卽位召爲戶部侍郎遷南京都察院右

都御史改南京戶部尙書嘉靖六年特旨轉北戶部尙書首疏鹽政錢法十一事凡四方水旱奏請蠲租卹賑悉中時宜未幾以老病乞休優詔免留御醫診視疏十餘上始得旨賜敕乘傳歲給廩隸如制朝士賦詩餞別者莫不高其行歸治白蓮莊構倦還亭與方伯何梅莊公珊詩酒唱和又八年年七十有八卒訃聞帝震悼輟朝賜祭葬贈太子少保諡莊簡所著有瑣闡奏議香爐山事蹟默庵存稿黃山遺稿若干卷初朝廷嘉公平寇績增奉一級廕子錦衣世襲百戶辭免萬歷間江陵當國念公功言之朝還其廕長子廷澤官至銅仁府知府

次子廷濟以孫貴歷贈太子太保後軍都督府左都督
人以爲不多殺一念致之云

參明史校正

鄒之有號懷白莊簡公五世孫萬歷末襲錦衣廕陞指揮
僉事自幼練習典章曉暢時務崇禎初擢東司房掌衛
事時上綜核名實以伺察詎探爲明舊例司禮監日發
小封二紙付錦衣詎外陰事夕則刺闥以入謂之事件
公掌印時事益繁至加十紙威權赫然公一處以平恕
受事兩年如出總兵郭正奇死請釋撫賞一案重辟四
十八人糾參北鎮撫司冤獄文選李彬職方鄒毓祚同
日下獄上震怒必欲致之死疏數上不允彬祚知聖怒

難回亦願以一死塞責公爲抗疏竟得謫戍臺臣詹爾
選科臣陳德彈烏程相皆下獄德母擊體仁於朝門上
大怒欲卽致之法法司力持不能得公上疏申救得釋
爲民時論多之崇禎初公安城圯於江已遷椒園公因
議遷時偶不與恚焉且以仍近江請遷祝家岡卽舊縣
治也後乞休恩加太子太保後軍都督府左都督致仕
歸十一年以疾終於家

李臺字星伯號午溪父大本正德癸酉舉人仕江西新城
縣令縣署中連夜火起楹柱欲焚越數日有鐵艘載白
銀數萬從地湧出新城公命掩之設香案冠帶拜辭曰

願得賢子孫恪守吾意而已若富不願也及一夕夢空中懸一榜列其名次註以臺座一人從旁語曰前子所應有子不受今所應有子亦不受耶唯唯而寤寤而異之中郎邑乘詳其事公其伯子也以是年生於署感夢中所見因名臺嘉靖乙酉舉於鄉辛丑成進士初授戶部主事出守成都矯然以清節自勵病劇強起檢囊儲書史圖籍而外存俸入百金出坐堂上命吏盡貯庫捐修郡城曰吾家世清操不欲留以違吾性辱吾先也退而卒於寢蜀人歌思紀其事蜀志中越數十年家孫學元仕蜀讀其遺碑泫然泣下蜀父老咸嗟嘆戴學元益

親公與新城俱以西年舉於鄉與姪守約俱以丑年捷南宮與孫學元俱舉第六人天榜之祥驗於是矣

李學元字存齋少與中郎小修爲六人社咸先後得售萬歷庚子舉人授晉州知州丁艱服除補高唐知州蓮妖煽亂曹濮間洶洶不甯公申嚴守禦方略捕治卒擒賊渠當事以爲能會魏璫私人爲御史按晉以楊公大洪故惡楚人遂逐公璫敗補惠州府推官海寇起撫軍王公尊德知公幹力檄公往撫公單車入賊壘委曲開諭賊皆解去查勘潮肇兩郡活死罪二十八人著矜情錄上官擬薦會公以目疾乞歸歸數年有異人以針治其

疾日復明學導引術謂長生可得也卒年七十餘公深
中多數斤斤禮度不逾尺寸諸子皆謹飭語云見穉恭
知元規非假於公亦然

高校字育英生有異稟日記萬言家貧誦歌不輟一日讀
書山齋天大雷電有三尺鯉從齋中躍出縱之壑中俄
頃雷電復作遙見有向空騰蹕者人以爲此飛騰之祥
也果以宏治戊午登鄉薦時年十九先是公安詩文風
會尙未大闡公弱冠時卽力爲古文辭有黃鶴樓賦又
諷在位者無取賧人以自封殖作蚊蚤嘲以寓意中耶
常言安公詩文自高氏肇起焉邑人欽其德重其文采

子文光亦登鄉書孫邦永合吳川咸能以文世其家載
中郎高氏家繩集敘號爲三高

文光號懷谷校遺腹子也嘉靖戊子舉人簡重雅飭好學
強記旁羅百代母成氏有苦節載楚志中公事母孝養
備至初授四川巴縣令勤慎慈惠視民若傷推鞠以情
幾至無訟賦役與民期會不事鞭笞民亦無後時興利
除害皆以實心行之四民仰其廉平比入覲相率繪像
私祀無不願其復任者然素不樂仕進懇乞休致銓司
爲改廣之遂溪至任甫七日慨然思隱遂三和淵明歸
去來辭以歸當道莫能挽居家二十餘年絕跡公庭時

或困於衣食有司爲餽粟帛皆不受清介之操終始不渝生平學陶評者與謂潛後先無忝云所著有擬陶詩及自祭銘傳等篇並北觀稿燕翼錄懷谷詩文若干篇邦永號又谷爲袁玉蟠先生師經史淹貫詩文閱肆由明經授吳川令以抗直著聲逾年亦解組耽吟咏風雨不輟荆郡守熊元明先生性嗜古欽其博淹駐旌下訪叩以牡丹故實熊公得九十公日摘一百五十有奇孝廉袁田祖聞而驚異往叩之則云某某出何書計帙數行一一不爽人以是奇之中郎先生比之安平崔汝南應皆家有文集者也名位不甚赫赫幾於掩抑不彰然其

子孫皆篤謹能文

高文美號二峯校弟之子也長身美髯亮聲如鐘家貧教授爲業常服一布衣門徒見公一日不館則相謂曰此先生留浣布衣也素不信鬼神事里有迎木神祈禳者遇諸塗公中道正色立不動木神爲迴轅避之邑瀕江多水患族衆有逋賦者自鬻腴產代輸人以是歸其義數奇不售以明經任溧陽教諭溧故濱江公率諸生講求屯田水利治民算數等書倣宋胡瑗教授蘇湖遺意務課以有用之學士稱良師有子十人孫重望崇禎壬午舉人曾孫正儀順治戊戌進士人謂德報

龔大器字容卿號春所龔氏世耕谷昇里至公始讀書稱
儒爲諸生時卽拓落有大度人稀見其有喜愠之色家
酷貧舌耕猶不給環堵蕭然公于于然略無幾微倖僚
性舒緩善詼諧雖至絕糧斷炊猶晏然笑語其發奇中
令人絕倒或橫逆之來人大不堪者公受之怡然旋卽
忘之不復省憶也爲諸生屢試皆高等而連曠場屋凡
應試者多先榜歸公獨徐徐候榜出閱罷徐徐看新孝
廉赴晏買賢書數冊然後束裝失意者或藏匿避人公
獨與得意人無異歲以爲常至四十餘嘉靖乙卯始舉
於鄉赴公車同事者以年老慢易之曰公卽當謁廣文

選遷一老別駕足矣何得同我輩上春官乎公笑而謝之如此者數四竟無忤也然公卽以明年丙辰成進士授刑部主事嗣後佐廣西江西浙江直隸藩臬爲河南布政使皆平易近民所之號爲龔佛始若汶汶久多去後之思公不爲苛清矯激之行又素儉所得祿入自營產業之外分給族人居家時聞政有不便民者公卽入告邑長令語甚激切長令素重其人悉聽之邑俗悍即鄉之貴者或名之於公獨否是時公仲子久舉於鄉公季子舉進士爲行人拜監察御史公之外孫袁宗道會試第一爲太史袁宏道成進士偶皆集於里公以藩長

致政歸年七十餘矣每至四節之會簪袍爛然人以此榮之公能詩與諸子諸甥唱和推爲南平社長一日孝廉御史偕同社及諸甥遊石洲以公老難於往來弗約已至洲拾石子俄見雪浪中有小船迅疾而下中有一老翁踞胡床指麾江山旁若無人互相猜疑逼視則公也舟已近公於舟中大呼曰何爲遂棄老子也登洲卽於洲上舞拳數道以示勇諸人皆大笑極歡至夜深乃歸各分韻紀游公歸詩已成卽於燈下作繩頭細字書之明日黎明遣使持詩徧示諸人俱以遊倦晏起不得一字皆大笑八十三以無疾而化次子仲敏字惟學性

愷悌溫良聞人緩急若己有之少有俊才博覽羣書萬
歷癸酉舉於鄉所爲文規秦藻漢邑人風氣爲之一變
自後邑中始有文章起家者皆公發其端旣謁選得山
東之嘉祥令期年大治訟庭寂然下簾焚香課士子經
術以憂去起補太原當事者以嵐縣獷不可治特薦公
爲之二爲令皆鬻產以供官費家遂貧其平易近民如
其父廉乃次骨所之百姓愛之眞如父母去則祠竟卒
於嵐卒之日百姓數千人皆痛哭於堂下呼聲震地堂
欲爲崩公未卒之前數日預知死期自作書以貽弟及
甥去來坦然若有得者公好學仙喜爲黃白術竟不就

於天文地理醫卜百家之書靡不通曉所著嘉祥縣志
詳贍典則爲通人焦太史諸公所賞仲慶字惟長萬歷
己卯魁於鄉明年成進士授行人司取御史以建言謫
磁州判終兵部郎竟淹抑不獲大用愷悌愛人如其父
兄生平不喜言人之短見人言人隱事則頻頰曰爾親
見之耶其渾厚蓋天性也爲人沈靜獨喜蓄書至數萬
卷躬自校讐司理汝南時無所事事惟遣善書吏數十
人錄陳文耀所藏古今書數百部中年絕意仕進日以
讀書爲事大愛種花所植異花草數百種曾於河北見
垂柳婆婆委地即遣人取一枝種之其好事如此晚年

斷暈血好布施亦以無疾卒有遯菴集外史氏曰甚矣
龔氏之多長厚也有石慶劉寬之風焉卒享壽考子孫
昌熾有以也生死之際可以觀人嵐縣公之卒也通邑
之人皆狂走曰惜哉善人死矣及駕部卒人悼惜之多
有泣下者可不爲仁人乎古人所爲嘆不言之蹊於桃
李也

周良臣字相季嘉靖乙丑進士四十五年知長洲邑政紛
雜釐剔有條一切裁以法諸豪滑素侵蝕悉核令自實
以償夙弊頓清冊籍環案主者盈庭一一勾校無敢搖
其手夜分猶聽覽諸泛役浮費減節殆盡津路一無餽

遺人亦憚不敢索以憂去

蘇州府志

袁宗道字伯修號石浦曾祖暎以任俠聞祖大化彬彬爲
退讓君子性慷慨周人之急每得糶直擇其贖金擲之
秤金於人昂則喜嘉靖中邑大饑公出母粟二千石金
千兩以貸盡焚其券家遂落明年封公士瑜生娶龔方
伯女生伯修中郎小修三先生初先生生之夜祖母余
夢一美人頭自天飛來若今所畫天人菩薩之飾寶髻
交垂以襟承之甫覺而伯修生時嘉靖庚申二月十六
日也先生生而慧甚十歲能詩十二列鄉校見鄉先達
祠曰吾終當俎豆其間二十舉於鄉下第歸益喜讀先

秦兩漢之書是時濟南瑯琊之集盛行先生一閱悉能
熟誦甫一操觚卽肖其語然已疑詩文之道不盡於是
矣弱冠已有集自謂此生以文章名世也性耽賞適文
酒之會夜以繼日踰年抱奇病病幾死有道人教以數
息靜坐之法有效閉門鼻觀棄去文字障遍閱養生家
言是時海內有譚冲舉之事者先生欣然信之謂神仙
可坐而得也移家長安里中栽花蒔藥不問世事癸未
父強之赴試行至黃河而返還至荆門舍於逆旅夜半
夢有神人語之曰公何不起吾老人爲公特來何得不
見念也微以杖敲其足足隱隱痛擁被大呼而出甫出

屋崩床碎爲塵人以此識先生非常人然先生亦翻然
若有所悟曰吾其以幾死之身修不死之道也歸而妻
死不復娶父強之娶則娶田家女曰吾求可與偕隱者
耳先生習靜久體氣愈充父謂之曰昔淨名依於忠孝
自古之冲舉者豈盡枯槁耶先生曰諾時復拈筆爲制
舉義窮工極變丙戌遂舉會試第一年甫二十七官翰
林求道愈切時同年汪儀部可受同館王公圖蕭公雲
舉吳公用賓皆有志於養生之學得三教林君良背行
庭之旨先生勤而行焉己丑焦公宏首制科瞿公汝稷
官京師先生就之問學共引以頓悟之旨而僧深有爲

龍潭高足數以見性之說啟先生乃遍閱大慧中峯諸錄得參求之訣久之稍有所豁於是研精性命不復談長生事矣是年以冊書歸里中郎與小修皆知向學先生語以心性之說亦各有省互相商証先生精勤甚或終夕不寐逾年偶於張子韶與大慧論格物處有所入急呼中郎與語甫擬開口中郎卽躍然曰不必言相與大笑而罷至是始復讀孔孟諸書乃知至寶原在家內何必向外尋求吾試以禪銓儒使知兩家合一之旨著海蠡篇旣報命旋即乞歸七八年間屢悟屢疑癸巳走黃州龍潭問學歸而復自研求戊戌再入燕先生官京

師中郎亦改官至小修入太學乃於城西崇國寺蒲桃
林結社論學往來者爲潘尙寶士藻劉尙寶日升黃太
史輝陶太史望齡顧太史天峻李太史騰芳吳儀部用
先蘇中舍惟霖諸公先生見地愈明大有開發當是時
海內談妙悟之學者日衆多不修行先生深惡圓頓之
學爲無忌憚之所託宿益泯解爲修同學者矯枉之過
至食素持珠先生以爲不可曰二教聖人根本雖同至
於名相設施決不可相濫於是益悟陽明先生不肯徑
漏之旨其學方漫漫乎如川之方至而先生卒矣先生
素切歸山之志以東宮講官不獲補僅得三人先生曰

當此危疑之際而拂衣去吾不忍也是時東宮未立中外每有言先生聞之私泣於室自丁酉充東宮講官庚子秋以病卒先生爲人修潔生平不妄取人一錢居官十五年不以一字干有司讀書中秘貧甚時鄉人有主銓者謂所知曰我知伯修貧幸主銓可爲地千金無害也所知以語先生先生笑而謝之某邑令以三百金交期爲汲引竟不發遂急還其人弟小修偶見問何令先生秘之竟不知爲何如人也生平却百金者累累或餽遺至十金則惶愧不受卒於官棺木皆門生斂金成之檢囊中僅得數金及妻孥歸不能具裝乃盡賣生平書

畫几硯之類始得歸歸尚無宅可居其清如此然先生
爲人平恕亦不以此望人且自多也興致甚高慕白樂
天蘇子瞻爲人所之以白蘇名齋居官省交遊簡酬應
蕭然栽花種竹掃地焚香而已每有月則邀同學諸公
步至射堂看月率以爲常耽嗜山水燕中山刹及城內
外精藍無不到遠至小方小西天之屬皆窮其勝詩清
潤和雅文尤婉妙然性懶不多作著有白蘇齋集若干
卷先生與同學友黃公輝交若兄弟先生死黃公哭之
甚慟及葬黃公請告迂道登隴哭之爲誌其墓逾年先
生舊社友董公其昌視學政因諸生之請祠於學宮卒

如素志云萬歷丁酉戊戌間有東倭關白之警時議封
貢先生嘆曰石尚書其不免乎李卓吾刻藏書成先生
曰禍在是矣已而皆驗如此者不可枚舉大都量與識
皆全者也天不假以年未得盡抒其用世之略惜哉書
法適媚畫山水人物有遠致作小詞樂府依稀辛稼軒
柳七郎風味舊有傳奇二種置之笥中爲鼠子嚼壞鳳
毛龍甲竟不存於世可爲永嘆光廟御極以東宮講讀
晉詹事贈禮部右侍郎予祭葬廕一子

袁宏道字中郎號石公先生之生也母夢月入懷故小字
月少時卽具倍年之覺母卒先生不數哭一哭卽痛絕

人以是知其有隱慧焉總角工爲時藝塾師大奇之入
鄉校年方十五六卽結文社於城南自爲社長社友年
三十以下者皆師之奉其約束不敢犯時於舉業外爲
聲歌古文辭已有集成帙矣戊子舉於鄉主試者爲馮
卓菴太史見其後場出入周秦閒急拔之明年上春官
時伯修方爲太史初與聞性命之學以啟先生先生深
信之下第歸伯修亦以使事返里相與朝夕商確索之
華梵諸典轉覺茫然後乃於文字中言意識不行處極
力參究時有所解終不欲恃燭火微明以爲究竟如此
者屢年一日見張子韶論格物處忽然大豁以證之太

史太史喜曰弟見出羣信非吾所及也然後以質之古人微言無不妙合且洞見前輩機用一一提唱聊示鞭影命名曰金屑時聞龍湖李老冥會教外之旨走西陵質之李老大相契合贈以詩中有云誦君金屑句執鞭亦欣慕早得從君言不當有老苦蓋龍湖以老年無朋作書曰老苦故也仍爲之序以傳留三月餘殷殷不捨送之武昌而別壬辰舉進士不仕復與太史還里居石浦之上偕外祖春所龔公及舅惟學惟長輩終日以論學爲樂當是時太史與公雖於千古不傳之秘符同水乳而於應世之跡微有不同太史則謂居人閒當斂其

鋒鏑與世抑揚萬石周慎爲安親保身之道公則謂鳳凰不與凡鳥同巢麒麟不與凡馬伏櫪大丈夫當獨往獨來自舒其逸耳豈可逐世啼笑聽人穿鼻絡首意見各不同如此已復同太史與小修遊楚中諸勝再至龍湖晤李老李老謂伯也穩實仲也英特皆天下名士也然至於入微一路則諄諄望之公蓋謂其識力膽力皆迴絕於世眞英靈男子可以擔荷此一事耳乙未謁選爲吳縣令始以其學試之政人皆謂吳縣繁劇而公超脫或足以困之乃公灑然澹然不言而物自綜事自集吳賦甲於天下猾胥朱紫其籍莫可致詰飛灑民間溢

於額而不知公一目了然摘其影射之條若干呼猾胥曰此何爲者胥不敢欺皆俯首曰弊公俱置之法而清額外之征凡巨萬吳民大悅又不折徵收之封惟苛兌者許民告白以其所贏代輸者爲傾瀉費上官聞而便之下其例諸邑悉如吳縣機神朗徹遇一切物態如鏡取影卽巧幻莫如吳而終不得遁故遁詞恆片語而折咄嗟獄具吳人謂之升米公事自非重情無所罰贖杖之示懲而已以故署門酒家蕭條皆移去縣胥隸之類或三四爲曹共一役不食縣官惟借公事漁獵里閭公揀其宜用者食之無所差遣終日兀坐不能銜口皆逃

去歸農有屢投匿名牘者公出見縣前占星人覺黠甚
念必此人也呼來占星一紙視手跡與匿名牘無二訊
之立伏其妙於得情皆此類公爲令清次骨才敏捷甚
一縣大治宰相申公時行聞而嘆曰二百年來無此令
矣居常不發私書塵覆函數寸期年而政已成會吳中
有天池山之訟公意見與當路相左居恆不樂遂閉門
有拂衣之志當事知其不可強姑令予告俟病痊補職
公旣得請走吳越訪故人陶周望諸公同覽西湖天目
之勝觀五泄瀑布登黃山齊雲巒巒烟嵐如飢渴之於
飲食時與石簣諸公商証遞相取益而閒發爲詩文俱

從真源中溢，出別開手眼。一掃王李雲霧，天下才人文士始知疏瀹。心靈搜剔，慧性以蕩滌摹擬塗飾之病。其功偉矣。戊戌太史字趨公入都，始復就選得京兆校官。時太史官春坊小修，亦入太學，復相聚論學。結城西之崇國寺，名曰蒲桃社。庚子補禮部儀制司主事，數月即請告歸。歸未幾，太史下世。公感念絕輦血者累年，無復宦情。時於城南得下窪地，可三百畝，絡以重堤，種柳萬株。號曰柳浪潛心道。妙閒適之餘，時有揮灑，皆從慧業流出。新綺絕倫，而遊屐所及，如匡廬、太和、桃花源，皆窮極幽遐，人所不至者，無不到。發於詩文，烟嵐溢毫楮間。

蓋自花源後詩字字鮮活語語生動新而老奇而正又
進一格矣丙午入都補儀曹主事曹務清簡蕭然無事
乃以存問蒲圻謝公之便歸里戊申春暮入都補驗封
司主事攝選曹事猾吏多舞文屬當急選之期故事掣
籤時凡瑣屑事皆曹郎躬爲之吏無敢近者一老吏忽
排闥而入曰每次大選例與都吏一二美缺今有某驛
缺已予都吏百金矣幸以見與公目攝之叱之出私念
曰銓事一至此乎誓爲國家除此大蠹少宰橋公喬曰
吾輩身爲大臣受制胥吏切齒久矣會猾吏私一姻戚
已罷官而仍留之刻報至公廉得其故大憤曰如此則

銓柄盡歸此輩矣時冢宰擬以疏文而後逮治之公曰此胥吏也但寘之於法以一知會疏上則疾雷不及掩耳雖有奧援將安用之遂如言具疏而猾吏未知也公令兩隸持之曰去送汝入刑部卽繩之以往疏下竟以欺罔坐重辟銓曹設刑具自公始冢宰孫公知公爲大用器甚重之己酉公主試秦中試官以避嫌不過搜求公通場皆自取閱所取士大半得之落卷中及出榜多名士試錄爲天下第一公典試後與左轄汪公可受密以道相証遍遊秦中諸勝歷中嶽嵩山登華山絕頂而還著華嵩遊記居吏曹二年會考事竣遂給假南歸定

居沙市中治一樓名曰硯北取段成式杯瀝之餘常居
硯北意也庚戌卒年四十三海內知己謂其識如王文
成膽如張江陵而不逮下壽以歿天下惜之所著詩文
有敝篋集錦帆集解脫集廣陵瓶花齋瀟碧堂破硯齋
華嵩遊草若干卷行世吳縣祀名宦公邑祀鄉賢

袁中道字小修伯修中郎同母弟也萬歷癸卯魁北闈丙
辰成進士改蘇州府教授遷國子博士乞南得禮部儀
制歷南吏部文選司郎中旋乞休晚深於禪理卒時鼻
垂玉筋人以爲禪定云所著詩文有珂雪齋二十卷遊
居柿錄二十卷

毛苞號小坡宗孟公少子昆季五人各以文顯苞由明經授善化教諭明季士畏東林之禍不敢談忠孝二字獨起而教之士氣大振

袁祈年字未央吏部中道之子爲太史宗道嗣事生母嗣母及諸庶母孝行純篤內外無閒十五入鄉校詩文疎快可喜爲人朗齋軒翥遇人皆作歡顏好語各得其意稱袁氏佳子弟也留心禪宗尤有意於檀度嘗遇一人以母衣典穀價中途遺失召還家如所需予之蜀尉舟中遇盜失憑沿江泣訴憐而資之又於府縣起文并寄書蜀當道相知者具道其情邑治近江每夏漲積屍漂

流見之輒捐棺葬瘞又嘗載米百石往南嶽供僧舟過
洞庭遇賊刦掠躍水中如有託其兩足者賊退浮水出
仍載米至山飯僧而還南省儀曹公舟次吉祥寺禱定
光佛願生一弟以慰親心有千里陸機親拜禱阿雲何
日始驚姜之句光宗即位爲太史請祭葬廕邱以是入
監讀書天啟甲子中順天鄉試辛未會試以犯御諱幾
獲而復失之甲戌復以闈文犯七夫不錄作七夫詩時
人傳之旣久困公車又羣從中有先售者大不得意遂
挫情進取讀大慧碧巖諸書皈依般若發願文尋卒
友人節其生平謚曰文孝先生所著有梅花奧集南遊

草二冬草篤蓐草續花源遊草若干卷

侯一定字豫亭少有文藻師事邑進士劉珠中萬歷乙酉
舉人性清介登賢書廿餘年絕不事干謁丙午爲應城
廣文陞粵新甯令丁內艱服闋起蜀之羅江令每讞獄
手削刑書多平反杖人至十五則撫案流涕而起猾吏
相目笑公自若蓋其天性也寒月不能具服則葛衣視
事久之事洽民安遠近信之直指使巡部過邑侯之江
干久不至因遽返而直指已及岸矣一時舟楫不具迎
侯之儀寂然使者大怒先是出都時邑紳在京者皆盛
稱羅江長者篤厚可善視之及公謁見詞氣恂恂不吳

不悚知公果廉吏無他遂勸公歸公亦厭吏事即日解
綬歸里訓其子侄一如村塾老儒卒之日四子析產無
絲粟遺但各分私債三十金令償而已吏部異度先生
公季子也壬午典蜀試蜀士之受知於公猶有存者道
邑人思公久而愈篤既躋祀名宦又別立廟祀乞異度
爲碑紀之異度學問淵源皆公自指授清風大節照灼
古今其所紹衣居然可見矣

李守約號道宇萬歷丁丑進士授行人累官刑部主事安
慶知府南太常寺少卿生平一介不取予居鄉服官始
終一節守皖尙清嚴治吏胥行一錢之法有張乖崖風

人皆憚之在刑曹值江陵秉國鄒公元標以論奪情廷杖創甚時畏江陵之怒無敢近者公獨負鄒公出邸或勸鄒公服膽汁者鄒公語公吾尚無子服膽汁恐艱於嗣公然之遂不服所以周旋經理醫藥之具甚至及鄒公出都門公獨送之郊外執手殷勤而別是時江陵詞事者交錯公與江陵固同郡又其子榜眼同年也行之不少挫其不附權要峻嶒特立如此卒後數十年壬午邑人毛壽登言之督學彙旃高公曰李公高風峻節宜祀於鄉若復循舊例往返查覆則其子孫衰落必不能達失此盛舉矣高公特檄入祠亦異數也

熊膏字雨亭家世業農至公始奮志讀書每試輒冠軍邑子弟穎異者多就公學焉鄉居僅一白布禪衣每詣縣則挾之近郭數里方著以入及貴鄉人戲指此地爲更衣亭云萬歷丙午舉於鄉癸丑成進士授行人戶部主事參議河南布政使權河西稅舊多逋課膏清介無苛索賦入反足遷蘇松憲副念二郡田賦甲海內而凋殘逋欠特甚乃酌便請蠲貸改折所省民力不貲吳人至今思焉遷山東右藩天啟丙寅春兵譁膏開城撫諭之乃定晉山西藩入覲舉卓異以副都御史撫南贛未及任而卒賜祭葬公居官勤厲所至不言而辦稱爲練達

有知人鑑侍御毛公羽健方爲諸生時公一覽其文大稱異即延至其家許以國器令其子楚蘭同讀書每奏一文出輒賞譽不置後毛公果以辛酉壬戌聯捷蓋先輩知人之明固不可學而拔掖後進好善如渴視今之齷齪細人兩眼如眯且妒忌生心惟恐後輩之有聞焉者何啻霄壤語云蔽賢者宜無後則好賢者之克昌其後可知矣遭世大亂子孫衰替不振是可嘆也

龔世法字竹山號蒼嶼四歲失怙事母至孝文名日著萬曆丙午舉孝廉癸丑成進士授行人初封藩次封福藩苦節自甘皆人所難堪者二藩特疏奏聞擢吏部稽勳

司主事轉文選司秉銓五載凜冽冰霜銓曹例有堂饌
皆胥吏供頓極豐腆公盡揮去飯脫粟下物止醬薑一
味而已以爲常門絕私謁凡書疏往來者率不發封於
函面大書龔某頓首還之其清峻絕物如此崇禎己巳
起補銓司未至京道返爲忌者所糾謫戍常德終於家
公多鬚髯儀貌甚莊見人不爲慙懃亦未嘗見其笑家
居時冬則一敝布袍夏一綻補紗衣久而不易無事則
獨立門前閒呼過者與語人畏其清嚴皆趨而避之常
夏日徒步遊二聖寺一縵縷小奚張雨蓋行烈日中不
知者不識爲吏部也起補時至中途適武陵楊公嗣昌

備兵中州與公同年遣餽金四十貂帽一具囑其使曰
龔公必不受可言公過吾境未有不相問者吾無事擾
銓政也公堅辭所親苦勸始受貂帽寒甚著以卽路人
或聚而觀之公大悔曰凡觀者爲此物也卽封識令所
過縣令於遞上致還武陵深以此爲憾然知其素性若
此後楚撫方公孔炤疏請賜環會公卒公生平狷介類
不近人情然品行介介實爲時所推服也

李清字滄浪生七月而父卒時父年僅十九母田同祖母
劉苦節共甘從襁褓中撫孤兒以至成立初族黠者穉
視兒一切徭役督促迫遽至入繫其饋婢以去兩母脫

簪珥應未已乃鬻其室而移外家田氏莊以居久之公與兄俱補邑校兩母始挈兒歸舊里會祖母劉卒母田拮据荼蓼支撐內外邑先達侍御龔公爲文以頌之公生而明敏力學嗜古所閱書史百家率三四點定崇濂洛之學敦尚實踐小節必謹以貢授龍陽訓導教士以開明心術變化氣質爲先龍士化之龍政有不便於民者必請於令蠲飭乃已不以權予自己出而有所靳不畏人之我忌而有所徇三年卒於官性孝友每言及父母事涕泣至老不衰伯兄長一歲事之如嚴父終身歡然無間少與兄就督學試已列名輒走匿諸舅知其意

不欲先兄也遂以推兄及兄覆試訖乃歸而公次年亦
補弟子員伯兄出應漕役久未歸一日昧爽聞剝啄聲
不暇屏去染鬚囊披衣起徑前啟戶抱兄而舞藥污狼
藉唇頰間僕婢皆笑喪子惟一孫友松兄亦無子兩人
共一孫同室而居垂白相娛嬉如嬰兒也婦侯氏少寡
矢節語在列女傳中蓋一門節孝云臨終訣兄云孫可
教必以侯某爲師侯某卽令邱先生友松舅氏也友松
順治甲午舉於鄉

蕭毅中字元恆萬歷丁未進士啟榜夕夢關帝賜之佩刀
諭以珍惜授江西安福知縣考授監察御史疏上值神

宗倦勤八年始報可是時官班寥寥公爲御史與垣中
官公暘谷俱楚人皆當時翹楚也魏璫猖獗時應山楊
公大洪特疏糾發其奸璫黨銜楚人如血仇以公楚人
與楊公交好因此獲罪放歸公畏禍杜門不敢預黨事
崇禎初璫敗起廢頗懲前事有所避就由大理寺丞陞
南贛巡撫未幾卒於任子煜都公安初亂率壯士勦邑
賊之勾鬪者有膽力鼎都奉母避難麻寮所爲賊所獲
毋考斃欲殺鼎都而掠其妻妻羅厲聲大罵賊汝殺吾
姑吾夫婦豈更生耶我何人肯受賊辱何不先殺我使
吾夫見之遂俱遇害

毛羽健字芝田幼英異有器局讀書日數行下赴童子試
受知於大司馬王公三善有神童之目天啟辛酉舉於
鄉壬戌成進士授四川萬縣知縣萬當孔道邑小而疲
公撫孤貧鋤豪猾摘發如神不少貸重慶巴縣值奢酋
變後邑里凋敝奸譎百出撫按迹公治狀以爲巴非公
不可遂移巴縣時天啟五六年間邑紳王應熊三案小
人也歸里氣燄甚盛公一以法裁之王以危言怵公公
不爲動公治民廉明惠愛多異政凡有積案不得申者
皆泣訴當道願付毛公死不憾公爲讞決立斷人自以
不冤蜀人至今祀爲神明焉生平不名一錢任滿去至

不能具裝丁卯以治績奏最崇禎改元擢雲南道御史
首劾鎬黨楊維垣八大罪及阮大鍼反覆變幻狀二人
遂被斥去王師討安邦彥久無功公上疏言賊巢在大
方黔其前門蜀遵義其後戶由黔進兵必渡陸廣奇險
七晝夜抵大方一夫當關千人自廢王三善蔡復一所
以屢敗也遵義距大方三日程而畢節止百餘里平行
從此進兵何患不克因畫上足兵措餉方略並薦舊總
督朱燮元閔夢得等帝即議行後監軍劉百訓總兵侯
良柱果由蜀進兵安奢積年逋寇一舉殲焉黔蜀由此
底定朝議以是服公知兵已陳驛遞之害兵部勘合有

發出無繳入士紳遞相假一紙洗補數四差役之威如
虎小民之命如絲帝卽飭所司嚴加釐革積困爲蘇當
是時閹黨旣敗東林大盛朝端王永光陰陽閃爍溫體
仁猾賊周延儒回佞言路新進標直之徒尤競掎擊以
爲名高體仁之訐錢謙益也以科場舊事延儒助之惡
且目攻己者爲結黨欺君帝怒而爲之罷會推矣公憤
其以朋黨二字傾陷君子非國家之福遂上先伏斧鑕
一疏力救會議諸臣其略曰彼附逆諸奸旣不可用勢
不得不用諸奸擯斥之人如以今之連袂登進者爲朋
黨而來抑將以昔之鱗次削奪者爲朋黨而去乎陛下

不識在廷諸臣與諸奸之孰正孰邪不睹天啟七年前
與崇禎元年後之天下乎孰安孰危今日語太平則不
足語剔弊則有餘諸臣亦何負國家哉一夫高張輒疑
舉朝皆黨則株連蔓引不且一網盡哉上責其疑揣而
以公素忠直免之初上疏時相知多阻之謂禍且不測
公陽對衆焚稿而陰辭家廟期以死爭至是獲免在廷
無不感上之知而服公之勇太常少卿謝陞求撫於永
光永光長吏部陞當推薊鎮而以薊地比歲孔棘遂置
謝而以王元雅當之公上疏劾永光庇私人誤封疆且
言元雅必不勝任後薊果失守元雅死焉永光召對文

華殿力詆公並究主使之者大學士韓爌曰究言官非體也帝不從已而宥之蔡奕琛者體仁私人甫入京補選郎公卽劾其奸斥去公儀貌玉立音吐琅琅每奏對上爲注目久之閒賜茶菓以示優異節省庫者京商支領系焉先是典此者咸以贓敗有二八三七瓜分之弊商人困敝公奉差巡視差分久近按次給與猾胥無所售奸差竣之日羣商焚香拜送盈衢塞巷頌聲沸然上詢知狀稱爲好御史親書其名於御座一日帝御文華殿獨召延儒語良久事秘舉朝疑駭公上疏曰召見不以盈廷而以獨侍清問不以朝參而以燕閒更漏已沈

閣門猶啟所言公公言之所言私則巧言陰中讒害善類何所不至不當疑羣臣而偏信一夫之譟譟也語多切直不報凡公所論奏皆一時渠魁而此數人者後先當國斥戮正士援引僉邪尤與崇禎相終始卒誤國家者也溫周積憾益深伺公監北闈鄉試體仁嗾所親疏誣公而從中下其事公在闈中難申白臺省皆懼禍但扼腕竊歎而已遂謫嶺表公處之泰然日遊放山水間暇則讀書凡當事餽問皆不受方被謫時黃公道周倪公元璐劉公宗周咸稱爲鐵漢卽宜興亦語人曰毛芝田只是性氣偏脚根甚是乾淨蓋溫周合謀羅織公事

無毫髮疵故也會流寇張甚廷臣交章薦公上思公忠直擢授總督中州專辦勦事公歸自戍所道卒於贛子壽登扶櫬走閩越吳楚間幾死數矣卒致反葬贈兵部右侍郎著有西臺奏議十卷和兒詩一卷委羽集一卷夫人袁氏名門女明識達禮能斷大事有古列女風操太史文公安之評曰毛公居臺諫三年疏無慮百餘上其大旨在審官方別流品剔積弊而尤髮指於諸奸之連結所糾彈如烏程德州桐城皆奸人之雄也不懲前不怵後固剛腸哉余考史李林甫得君當開元二十五年識者以二十五年前不早彈射爲遺憾王安石惡稔

於熙甯而禍胎於嘉祐雖涑水氏尙猶失之當御史之
論列蔡奔琛時方補文選郎耳暨後烏程蔓引遂以掌
銓躡政府幸諸君子封弧羣射而去稱焦頭爛額功抑
知曲突徙薪芝田於二十年前早已痛識其奸乎是又
呂獻可所把臂稱快者也聞其道病時惟以國賊未滅
燕京將危爲憾若公者可謂明達慷慨之死不回者矣

參明史校正

龐瑜字堅白天啟明經初任京山縣學博臺使者疏薦有
識有謨有學有品不特風高絳帳兼且才優花封癸酉
陞陝西平涼府崇信縣知縣甲戌正月至任是時關輔

久旱人民相食公多方撫恤捐俸粥路齋戒祈禱精誠
有孚甘霖大霑饑饉之衆稍有起色矣值流寇猖獗山
陝尤甚公誓死殉城與邑紳朱宏道堅守甲戌九月初
五日城陷公冠帶坐堂及賊刃交身罵不絕口而死陝
撫以死事入告朝廷悼惜贈固原州知州廕一子入監
讀書邑人欽公大節公舉鄉賢崇祀

野史氏曰龐公恂恂篤老語言如不出諸口予猶及見
之長者也猶憶其之崇信也不能具冠帶先侍御解所
服帶贈之未幾變聞其臨難慷慨有古烈士風仁者必
有勇信夫

侯偉時字令邱又字異度豫亭公第四子也豫亭公羅江
歸貧甚卒之日分諸子各以債三十金令償公於家事
一無所問一意讀書凡一切公賦私責俱諸兄代任之
其兄弟友愛如此生平考試未嘗居第二崇禎庚午以
恩貢赴京鄉先達毛公羽健見其文遍稱於諸公間許
以聯捷是歲果舉於鄉辛未成進士選授廣東陽江縣
知縣奏最召入應授臺諫是時上於奏對多取便給者
公訥於言廷對不稱旨授工部主事壬午典蜀闈所取
多名士復命改吏部文選司主事北都破公變服得脫
已挈家走閩粵還隱湖湘閒轉返畏途備極辛苦永明

王在武岡往從之授太常寺卿仍掌銓事未幾定南王以

大兵至永明倉猝奔靖州偉時從行失馬不能前土人昇致城中王已錄致其家公挺立不屈命之坐不肯席地王問一無所答惟曰吏部久應死矣如是者三止一子章華甚愛之是日被以華服擁泣膝前勸公降公叱曰吾視汝猶一塊土耳蹙仆階下語益厲左右捽其頰血流被面刃交於脛僵仆地上竟不屈從容就義行道莫不掩涕王嘉其節以禮葬之所在立祠與司馬傅作霖寶慶同知劉平并饗額曰三忠劉陝西人傅常德人也公

爲諸生時介然自異詎於辭辯然丰姿標舉義所不可
輒勃發不可遏口不言人過人有言及默然微哂而已
臨難賦詩剛毅猛烈洵仁人哉久之章華亦死

袁彭年字述之號特邱中郎先生長子十歲隨中郎過廬
山見其和詩喜曰此子律度似將來知詩者中郎兒可
不科第可不詩乎後作詩多令屬和中郎晚年移居荆
之沙市卒沙市故佳麗地公少不羈好狹斜遊常拉酒
人服繡衣闌入青樓酒肆頗有小杜之風會小修先生
成進士歸聞而弗善也語江陵令撲責之公大憾乃發
憤下帷甲子舉於鄉數上公車不第益復閉戶柳浪湖

中究心經史遇古人勝事儁句必手錄張壁上玩誦久之四壁皆滿若魚鱗然足不出閩者數年喀血如縷不少息作爲文章深確有根據而韻度瀟遠非區區舉子逐時高下博一第者也甲戌成進士授淮安府推官公門第高華而文章能自豎立東南人士皆嚮慕之諸臺使監司咸重其才地名聲大起治獄恪謹無意外縱舍亦不隨人軒輊勘河工釐清宿弊以勞優敘陞禮部主事纂修會典公外吏五年砥礪樹聲譽自負當入詞林否則亦省垣臺諫耳儀曹閒秩冷署悒悒不得意請假家居則益讀書作詩與友人毛壽登唱和有宦語詩細

數卷假滿赴補上召對公面陳欲於大河以南建立藩鎮如唐故事使便宜置吏各自爲守上首肯之改授禮科給事當改垣宜興相頗相聞未幾宜興事敗下廷議公疏其罪狀並給其黨二十許人政府擬嚴旨上手書付閣改票旋奉命催糴江北北都陷南中適有金華許都之變忌者欲轉金華守以困之太宰掌垣持不可乃已是時馬士英當國外結高劉等三鎮以挾制朝廷欲援引三案小人變亂朝政深忌南昌相姜公曰廣持正不能有所爲江西宗室統纘首入士英幕極詆姜相公據祖制駁之云中尉有奏當先令長史司具啟親王參

詳可否然後給批賫奏若候考吏部則與外吏等從通
政司封進今何徑何竇直達御前微刺顯攻捕風捉影
宜加禁戢語多切直又疏陳三案始末分別邪正較若
白黑以逆折士英之謀時論譴之士英黨阮大鍼等銜
公特甚因諫廠衛疏降級調外後避難播遷由海道入
閩爲時鈎致入粵雖屢受事任然念世難未夷每退署
輒袒衣露頂坐風露中莫以病死及端州每以振紀綱
覈名實重名器尊主權爲言引繩削墨無稍假貸倖者
憾之公好學深思讀書務爲精鑿雖兵戈搶攘中手不
釋卷晚年詩益進指事言情博於故實不爲浮談一條

王李叫囂蹈襲與近時幽冷佻小之音而中郎瀟灑俊逸之風亦少減矣嘗謂公詩工於用事而波瀾未濶故長於近體而躋於古然當其得意新異精穩卓有雅人深致亦近所未有也爲人高簡意忌不樂與俗人語意所不合寒溫外但張髯傲睨而已嘗有所屬於楚學使使者抑之後竟以他事中焉雖羣從兄弟未嘗輕以口頰借惠也以是人多不喜而獨與毛廓庵及族弟荃子善荃子名俊年以己卯第四舉於鄉有奇氣亮節不爲柴棘猥瑣稍忤意立勃發見顏色交友有氣誼可信不背者亦袁氏俊傑人也後挈家兼左右公家人避亂至

吳公是時方以禮垣僑閩門餽四金外無他伙助其不知人痛癢亦天性也年六十四終於家著有史脣土風堂遺稿省垣奏議掌憲奏議詩細宦語草閒詩若干卷李開美字秋實年二十以文聞於鄉薰染於玉蟠中郎伯仲間習於詩及出遊所至多玩其名勝交其賢士大夫以爲名後詣宣城謁睡庵湯公見其文大加稱賞入國學舉北闈辛酉鄉試選郟縣令五載如力解劉生之難拯湯民之危皆可紀朝視事夕課詩雖簿書叢雜而吟嘯未嘗替陞壽州知州吟曰五年作吏腰千折萬里歸來鶴一雙其自况也年七十六卒著有治略詩文諸稿

子百齡字子壽邑諸生癸卯闖賊渡江與宗室子士鶴
雲門邑生田昌等倡義頗勝獲賊駿馬次日乘之以戰
馬馳被殺

張問明字惟遠號陶庵起家單寒生有出羣之姿作文簡
練高削不可攀躋其爲人則丰骨淹遠世俗齷齪量
曾不當其一笑也庚午舉於鄉闈文首藝塗乙數四幾
於稿紙盡墨無字可辨日晡始成章主者異其峭勁置
高第屢上公車不第或勸以家貧就仕者笑而不屑也
偶得疾畏雷電乃留心出世法閉戶閱藏者數年其於
五燈宗旨性相權實卓然知其指要高逸喜諧笑讀諸

內典益增其曠然至性篤摯其尊人常督以瑣屑市井事不敢置對唯唯而已雖加以不堪必婉曲承順晚益讀書爲詩有奇句筆益老文益奇崛其染毫措思惜字如金半幅之間雲烟縈繚要皆非世人所尋味者粵東黃公景昉其師也特相知契嘗移書勸以體用兼備之學蓋先生之氣度卓越自謂非幹濟才而實未嘗以世故屑意也嘗謂先生狎侮流輩嘲謔滑稽達士也精研宗旨解脫超邁逸士也然而孝親篤友內行懇摯刻勵文藝鏗心搢賢又世法中人也數者皆不足以定之嗣宗之誕也而以爲慎元章之顛也而以爲眞摩詰之苦

吟也而以爲禪東野之寒闌仙之瘦也而或以爲龍或以爲佛先生則何容心哉亂後避兵卒於土司之青山隘曾有馬頭青山之讖自作誌銘號尹月子蓋先知死日云容美土官欽其名憾不得見賻致其喪歸葬於邑之陶溪湖族弟正乾字南一始祖德遠江西吉水人元至正間由鄉舉授大理評事任中興路□□使卽荊州也世亂因占籍公安洪武初以平瞿塘衛功改授四川按察司僉事賜金帶致仕至孫斌中永樂丁酉舉人授吳錫縣知縣擢福建道御史監軍北平著能聲賜敕褒諭今其墓在邑之西辛里號爲御史岡正乾其裔孫也

少穎秀喜讀書能文家故饒於財父篤好形家言以千金買石首之麓湖山葬焉語諸子曰吾家中落自茲以後庶幾復振正乾果以己卯魁楚闈壬申之亂挈家隨邑侍御毛公避亂於閩廣吳越閒每以知慮深細性情怡婉爲衆所推南都考知縣日擊阮馬弄權正人斥退知其必敗遂不就選舉其家歸卒首遂邱可謂明哲士已

李芳天順進士成化初由縣令擢御史臺首疏十事上嘉納之時妖僧繼曉內監梁芳與內閣劉吉萬安黨附爲奸科道舉劾多受杖謫會星變求直言公上疏言天象

示警咎在闡豎乞除元惡以快人心召收忠良以回天
意疏入不報旋出知湖州府湖當震澤下流歲苦水患
而適又旱蝗公至卽發粟平價出糶復勸富民以粟出
貸約年收償之故民雖飢不至轉徙失業亦復敏於決
事臺使者行部至湖嘆服其明允先是上怒言事激烈
沽名者疏列前後六十餘人於屏以故公在湖雖稱良
二千石竟不得調致仕歸老焉

鄒得魯大司徒文盛之孫也生於富貴而自幼嗜讀書性
鈍益自刻勵日夜以豆爲籌每文一首讀百餘過覆百
餘過則終身不忘舉孝廉初仕巢縣令迎養其父寢食

皆親侍奉忽病噎諸藥罔效公憂惶無措每夜焚香飲
泣籲天願以身代忽夜夢神人告之曰汝父病非吾醫
不可但用蒸曬九次大黃爲丸公卽起浣沐衣冠叩謝
如法製丸不數服而飲食如平時嘗考校童子首拔單
姓名世德者謂是大科之才及來謁貌寢而家酷貧尙
未求凰公食之教之助之求婚於詩禮家不數年果聯
捷南宮公以廉能陞邵武太守善政甚多郡人立有祠
廟尸而祝之

胡詩由明經教諭麻城遷祁門知縣縣獨窪下有堤名萬
城者水湍悍難治公捐俸倡修之海賊汪直導倭入寇

公受命督撫胡公募鄉勇甫集而賊至公令急清野入保賊無所得食當自去賊攻城再晝夜城中禦之甚周公料賊必夜遁潛緹精銳伏於路賊果退猝遇猝遇伏發城中鼓譟乘之盡獲其所掠子女散之督撫奇其才後倭入歙復從御史曹邦輔大敗賊於吳會倭自是不敢深入會胡宗憲以不能於華亭被逮去公亦罷歸于祖墓傍築堤至今傳爲青龍堤

陝茂字一清少有奇童之日年二十二公車北上日者謂當于申年發甲時癸未會試衆訝其妄及春闈火改次年公成進士殿試二甲三名初姓查上問閣臣以陝對

上命卽用陝字茂家遂有天朝賜姓額授戶部主事出知漢中府廉潔愛人內召士民請借寇留任四年陞布政司參議分守漢中道卒於官櫬歸哭送者不絕後邑孝廉龔世瀚宰南鄭寄書公元孫御史嗣宗言漢人士久爲公請祀名宦遺愛可知矣

陝嗣宗字亢之號穎湛於三袁爲中表兄弟共筆硯家貧而才氣傲睨一世志不屑雕蟲小技舉於鄉凡七上公車謁選得西蜀之洪雅縣山邑從無科第公課得三士收教之同年俱登賢書一時稱爲神奇擢御史巡視中城數日卽上疏言懷廟有三不可及五不自知內云恐

其予聖而不自知又云惑之中於中庸者可破中於英
明者難解又云太陽之照夜藏其輝雷霆之怒冬斂其
聲未見皇上之能藏輝斂聲也上大怒然謂其新進沽
名置不問又以公安疲苦吏胥肆虐奏旨下撫按卽與
嚴禁又上疏明郡守熊秉鑑參降非罪卽起補荆西道
疏參周延儒冒認內戚有愧枚卜遂革職延儒罷公卽
起補南兵部車駕司員外轉武庫司郎中陞山西督糧
道調陝西按察司未到任卒於金陵性雖傲物而正直
不苟

故至今父
老能言之

陳鼎中字素君別號蘇湄自少穎敏英發童子試受知於

武進趙公繼鼎壬午登賢書屢上公車得除保昌令前
令馬以印墜地缺壞自盡公詳請另鑄代補虧空數百
金禮其子歸其櫬會有大盜案十一人獄已具公每閱
監見內有五人涕泣感傷不勝因疑其枉及覆訊果得
其酒肆羣飲爲捕役混拏不能致賄非刑拷服之狀彼
六人亦具爲之白公乃盡翻其案請釋之五人共爲尸
祝焉迄於臥轍時送至百里外慟哭而去地故多癩疾
且易傳染每疾發則送入痲瘋院中內有無人顧管者
公捐俸爲湯藥全活甚衆保民至今稱道不絕公才氣
兼人而性剛烈將大有爲以內艱歸里遂不仕子十皆

青衿孫曾問安惟點頭而已

高重望字仲達別號拙菴幼有至性事父母以孝稱處異母兄弟極其友愛十八補弟子員讀書攻苦學使者王澄川公亟賞其文以斗湖練白黃山遠青爲之評崇禎壬午登賢書旋避難至江南甯國爲母孫太君稀齡壽得諸名士題詠軸可牛腰有夫婦投身償責却之焚其券及鴻集故土出粟以濟凶歲倡義修建

學宮教其長子正儀以戊戌成進士司李南陽封如子職性最坦易喜獎善類鄉人皆化之有鮑生齷者命放之河龜數迴旋起伏觀者比之毛氏白龜焉所著詩文有

致遠齋遠青閣等集年七十五大書元神獨旺四字而卒康熙乙酉與長子同祀鄉賢次子端儀司鐸齊安孫八人明經國學子衿一登進士真可謂忠厚垂裕者矣曹子徽字士美正統三年貢入監授中軍都督府經歷清廉守正擢漢中知府深獲士民心以憂歸父老赴闕留之不報

謝鑽景泰癸酉領鄉薦知宿松縣豈弟廉慎政務寬明每剖訟嶽必推誠以求其情未始見疾言遽色民愛戴之文魁世居大光里因號大光明景泰癸酉舉於鄉授蜀郡同知蜀地多山巉巖險阻爲羣盜藪公謂盜之嘯聚也

飢寒使然請於守檄部屬薄稅斂緩徵求俾之各遂其
生境內遂靖秩滿遷青州知府青治近海濱當下流之
衝公於河流所經堙者疏之壅者導之溢者防之由是
水行故道民賴以蘇中丞嘉其廉能未幾解組其殆急
流勇退者歟

毛志忠號黃溪生而穎異強記絕倫十二歲入鄉校十六
中正德癸酉舉人赴省試時與書賈同舟取其書閱隨
擲江中賈客訝之則曰吾已默記矣遂盡誦之客疑爲
夙讀者抽他新書以試一覽後背誦不遺乃驚服後任
江西安遠縣知縣

李璋號杏橋下帷攻苦寒暑無間錄科遺其名取青衿詣文廟焚之再拜而出妻劉預買舸備糗強令赴大收得入闈試出以文示同舍生生日售矣顧後予大怒唾之已而果然中嘉靖乙酉舉人仕蜀彭山令蠲煩去苛興行布愷蜀人稱焉未幾卒於官

袁致道字雪里有文名萬歷庚子舉人就荆門教職遷登封知縣卒於官蕭然無以歸士民及上官斂金助之其在荆門時治一梟衿誘以重賂怵以危言不爲動卒暴其罪狀論死繫獄比令登封其人逸獄出更名王象乾入魏璫幕濫竽錦衣害朝紳璫敗與田爾耕同戮西市

清朝

鄒養赤字幼心由進士出知壽光縣先是直指聶公觀風得公文拍案大叫曰此董賈業也一時競傳紙貴江陵李共人先生爲之傳曰公之文固足以楷模一世而往往窺其眉宇閒隱然有不忍生民道濟天下之意及其膺壽邑也下車即訪民間疾苦是時爲壽民害者有二一爲逃人一爲鹽政邑當京畿往來之衝逃人不時見告凡值發覺之時必圖維萬端不惜自解其囊壽人之得保聚生業而不知有逃人害者皆公委曲之苦衷有以覆庇之也壽邑三面邊海鹽課比之東南十不及一

然鹽之所行不過數縣地隘而壅則有時課不敷且相率而散而課愈不能敷公多方招集於其中之力不克完者捐俸代之償以故刁殘之地不踰年而爲仁厚庶富歌頌之聲至今不衰 大府以最奏而公竟解組賦歸來已公之足以楷模一世者又不獨以其文而以其行也

高正儀號敬崑順治戊戌進士仕南陽府推官才智敏捷讞決如流奉 裁轉知廣甯塞外苦寒撫循有方卒於官民哭送之南陽有高公橋人比之峴首云

龍之繩字孝公順治戊子舉人好善嫉惡憐恤孤寡邑中

利弊每剴切指陳康熙甲辰授新會知縣時甫定邊界民疲道路公力爲撫恤却餽遺革加耗一意與民休息有構訟者以理開諭往往懷牒去甫三月以疾致仕百姓送之哭失聲後入新會名宦祠

李友松字木公別號薇園生歲餘而孤母侯故羅江令一定公之女畫教而教之及就外傳則有志古學年十三應童子試福清朱公賞其文置壓卷遂補弟子員順治甲午舉於鄉再試春官不第遂無意功名先是潛江令柯公昭糾於辛卯秋闈爭薦公解頭不得竟置副車至是柯官儀部以斧資留之公決計歸教授後學多所成

就生平酷嗜左傳所傳鄉墨選家有左氏軼篇之評蓋得盲史之神而行之者也所著有制藝存稿微園集其曾孫照煦亦工文字有祖風

周克友字來公順治乙未選拔教習愆什潛山知縣歲旱矢誠步禱操文告城隍神三日大雨蝗起鄰邑亦操文祭之境上蝗竟不入文俱載潛志其勤慎細密每夜分略就息與雞俱興有爭田一坵者兩造皆稱明萬歷閒冊在可據皆欺其多年難於檢查也專搜數旬得之有黠無賴豫埋棺木於所仇水田下俟其種植以毀墳告鄰比皆不直其說公往勘不似葬所及驗棺又非葬法

而木且甚新遂啟棺棺內止有兩髑髏公思太平多年髑髏安所得憶初任堤所破土得兩髑髏曾給錢命役某埋以木桶意必此也驗之果然一訊而服兵吏程姓以低色易所發工料餉銀驛丞來告苦程故置丞於宅門外使得隙窺而自持銀封來稟給發出則以他語誑丞公思驛站工料甚急二日前發出何至今日始稟發耶亟入丞詰之丞囁嚅取銀開視得其奸狀公設坐大門外欲與衆殺之衆以程有母老遂杖繫十餘年公一清如水六廉有聲其門下皆世胄多列津要爭爲公地公不應俸滿陞戶部主事潛人赴

闕請留至十六年潛人立有祠後遷河州牧卒於官邊人至今思之

毛壽登字恭則號廓庵侍御芝田公之長子也生而穎異弱冠卽遊泮刻志墳典去家居二聖寺每夜分時略就寢雞鳴復挑燈朗誦博通古今聲色貨利之好淡如也明崇禎間詔天下學拔取貢士次第選用公獲中選旋授兵部車駕司及癸未流賊大亂公挈家避亂江西而侍御公卒於贛公買舟扶櫬歸葬經洞庭遇盜公端立柩前曰吾非客商乃窮官歸葬者及衆登舟備述公家况謂舟中物胥聽將去但無以刀劍叱咤驚我先靈衆

感其言而戢復叩首謝罪咸稱父爲忠臣子爲孝子嘆息而去別令一舟導之出湖得遂首邱焉公歸後仍力學不倦隱居田園

清朝康熙癸卯歲蒙將軍督撫交薦其才擢授天津衛道職內畿道卽臬司也公視事之日閱河閒縣七十餘家造船入海一案時奉嚴禁寸板入海者斬妻子流徙前司讞者已照例定擬發公覆勘公愀然曰吾何由救此生靈因詳鞫之得其以荆條爲船外紙加油糊沿海濱捕魚之狀公大喜曰若輩有生機矣卽檄河閒縣官驗其船詳請上憲並非犯寸板入海之禁者

題准開釋俱得全活畿輔饑發帑二十萬賑濟吏稟以常例當得二萬金公正色曰爾欲使吾子孫爲饑民耶吏復稟以無損於饑民止須多造戶口以開銷爾公復拒之曰是欺君自利也罪更甚矣竟發河間府窮簷均沾實惠稱頌不衰

聖駕巡行天津清問下民疾苦公對答如流試以安民之道何者爲先之策就

御前給筆硯以廉能二義立對稱

旨旋發審旗民爭訟二案公卽讞擬奏

聞欽允其慈愛廉決類如此後解組歸里行李蕭然天津民

老幼遮道呼籲更有數百人遠送百里外啼泣而不忍去一時榮比二疏焉著有廓園詩集四卷行世邑乘六卷今之編次者皆宗其遺稿也行年六十有五卒長男廩膳生仁軌博學強記著有詩文次仁傑又次仁開孫翼泰獻謔皆入庠序克繼書香易曰積善餘慶詩曰貽謀燕翼其公之謂乎

陳信中字任公順治六年以明經貢於

朝先銓道州司訓改湘鄉轉諭綏甯俸滿陞山東青城縣先是道州綏甯糧餉半衿士由學徵收而積年重徵爲累公誓不入羨金縣正從之及宰青城逋賦至八九年

帶徵多人經役囊橐公摘其尤者斃之杖下親叩兩院
口陳疾苦詳求題蠲竟得請士民如慶更生又邑四門
爲市陋規入官歲可七百餘金公嘆曰此皆得之於負
販小人者也亟除之自少精於舉業所至識拔士多掇
科名童子試前茅學使者鮮棄置且循序略見參差而
已在青兩載以日遠邱墓不樂欲賦歸來邑人謀爲借
寇公大署其門曰紛紛士民一片熱心留我落落仙吏
半開冷眼笑人此畫灰老人所謂急流勇退者也林下
數年手不釋卷所著古文詞有新遠集一經之遺子若
孫皆能出頭地焉

關以華字竹堅漢壽亭侯五十代孫順治戊戌進士除寶
坻知縣天資忠厚在官清慎既歸奉母孝孫朝柱字襄
鑾雍正癸丑進士入江陵籍

馬芝號紫崖崇禎壬午舉人 清朝順治己亥 恩科進
士陝西整屋知縣縣有車稅最爲民害公下車詳請革
除整民感頌不已又夫婦睽絕事涉幽隱斷復合逾年
而生子邑詫爲神致仕歸所著有時文長短篇及紫崖
詩集

馬龍騾字如周饒陽知縣才氣高邁文字雅贍每試必得
雋以康熙庚午高魁捷南宮著有時藝稿擬續父芝長

短篇爲合刻

陳文燦字含輝康熙丁丑進士除西華知縣著有勞績性樂易與物無競好學工文有實齋詩文略若干卷年七十卒

何又新康熙己卯優貢授武昌通城縣訓導興孝勸學以孝廉方正陞通城教諭修櫺星門捐修報慈寺山門繼母王病刲股以進學憲繆賜有纒算舍肉額

鄒敬謨字贊后酷嗜其曾祖養赤會萬軒文稿所作四子藝味淡致永有古作者風康熙丁酉舉於鄉乾隆丁巳會試登明通榜授雲南大理府順邊井鹽課大使代騰

越州篆下車剔弊興利布置周詳鹽課之數遐邇稱便
又因地屬僻壤詳請分里役編保甲頒條例鑿鑿切治
體有蠶苗楊節得等聚衆開墾釀成大案經年累月前
官不能直公奉撫檄嚴審查誌係大石壁灶丁原隸麗
江羅士舍憫其生長裸裸諭以漢文漢語未刑一人而
威服其他善政甚多要皆息事惠人者也

侯執信字方來雍正甲辰舉湖廣鄉試第一授白水知縣
在官以清勤致理尋改江夏教諭預修湖廣通志又主
江漢書院講席一時成就者甚衆捐俸倡修學宮門牆
通泮池溝洫爲地渠以達之約里許蠶舍一新乾隆十

三年遷永州教授卒

杜志瑛字渭仁號松巖雍正己酉舉於鄉歷任順天棗強
豐潤知縣初下車自書清慎勤三字裝潢座右振拔士
林詰鋤強暴有豪姓佔貧民地欲廣其宅立斷還一切
訟事計道里遠近限期訊決臚列証佐僅摘傳一二人
不事株連故所至皆有案無留牘之頌尋遷越支廠鹽
務同知以剔積弊掣肘遂致仕善畫竹名冲霄圖建一
室曰漪竹軒日與父老子弟嘯傲其中一日疾呼其子
若孫囑曰吾家雖世居城市讀與耕本業也惟不可爲
人役言畢端坐而逝

鄒毅煦字滄曉祖養元縣學生父莊倬生十有二歲而孤
卓然自樹立始事其母與大母及撫小弱弟以孝友聞
後弟卒弟之子亦卒又以子嗣則固能生死存亡續絕
者也少肆力詩古文詞所爲舉子業奇而有法書撫宋
坊閒體乾隆甲子挾其藝戰於北闈比填榜卷遺不果
中癸未例授廣西永福縣丞任歸順州知州補向武州
州屬粵西邊鄙多獍狺號稱難治以武則忿以憾以恩
則橫而肆撫御非人往往滋事公至寬猛相濟設誠致
行因其土俗爲之教禁州人順賴稱有柳柳州遺風大
中丞某知公爲非常人以軍功題陞同知不及見用而

卒其子按察司經歷敬敕奉柩歸葬先人兆側粵還橋
其遺蹟也

羅宏漳號中峯乾隆庚辰 恩科舉人丙戌大挑補湘潭
知縣遷茶陵桂陽知州陞永順長沙知府充己亥庚子
科內監試改雲南楚雄澂江知府署迤東兵備道旋任
糧儲道所至皆有政聲致仕歸置學田數十畝以訓族
中子弟貧不能讀者故至今書香不絕著有崇本堂文
稿任湘潭時斷立公安碼頭界石尙存

毛業溥字際雲號鑑菴乾隆庚辰登賢書辛巳聯捷二甲
第一人時年三十散館授編修公生而岐嶷幼時與弟

業沉均有異姿其堂伯母太夫人甚鍾愛之因已無出
遂以公嗣焉少從族芝亭先生遊芝亭固名士知公必
貴盡心導之嘗曰是子詩賦文詞獨出冠時將來必掩
吾名庚辰赴鄉試大主考爲蔡公得卷擊節嘆賞曰此
館閣才也亟拔之明年禮闈獲雋以傳臚入選是科榜
首爲韓城王修撰惺齋杰與公同出劉文正公統勳門
下而文正公愛公殊甚視猶己子凡教習館課卷必爲
刪改又令與其子劉文成公塘就其第私課互相切劘
散館授職後假旋生子一女二以疾不樂仕進會羅公
宏漳授湘潭令延請主講書院與湖南諸名下游覽山

川唱酬甚富惜已散佚無存既又主講本邑書院與邑侯張芳桂詩酒往來無閒朝夕公健談善飲工楷書尤善行草大有董思白筆意未幾卒夫以公遇名賢知顧之深使肯出山其官階固不可量乃部文屢促而公終不起其真有得於己者乎

袁廷翹號梧林邑廩生乾隆乙酉舉於鄉丁未選山東知縣署曹州府通判接署曲阜甯陽縣篆庚戌實授曲阜縣公少鈍父使就田閒操作公不敢違晝耕夜讀誦聲達旦父嘉其志使復讀公益自奮遂獲售計偕凡五次期以祿養未仕而父沒每以爲憾公之改調甯陽也以

爭修輦道道濶而費侈忤大府幾落職後大府以修道
過濶被譴始回曲阜任公自奉儉約食無兼味四時裘
葛不具丁巳會河決單縣東撫奏開引河檄諸縣分疏
公與役以經費不足捐俸助修工竣而囊空笑語人曰
今而後可以清白遺子孫矣以治河得脾溼病遂致仕
歸又九年而卒著有竹嶼堂文稿若干卷

毛家槐字晉三號竹軒邑庠業沆之季子增生家椿之弟
編修業溥之猶子幼多疾身孱弱母夫人百計調治始
稍健入塾聰慧特異家甚貧父兄課徒所入不足以供
食指公朝齋暮鹽拊擋家事暇則苦讀吟哦之聲徹戶

外年十七補弟子員十八食餼屢列前茅苦不售前學
使初亟賞公文後以巡撫道過公安猶問守土官毛家
槐中否蓋皆具法眼知於未遇時者辛酉始得選拔丙
子登賢書丁丑連捷入詞垣初未遇時夢人持冊示以
科名次第至國子監助教而止館選後疑夢或舛及補
宜昌教授官階適符始悟皆前定也宜郡本山地乏科
目自公陶鎔後遂有連登甲第者嘗與太守紀樹馨東
湖令林小巖登絳雪之樓瞰三游之洞樽酒歡會分題
校韻郡人士望而慕之以爲玉堂仙吏也旋告歸未逾
年而卒公著作甚富惜士辰水泛半爲馮夷攫去具存

公生集卷之六 三十一
者人比之崑山片玉云

田國文字翰章號荆陽始祖自襄徙荆明初以賢良起家
祖汝潢有隱德父一州乾隆丙戌生公幼讀書日數行
下辛亥補弟子員聯登壬子賢書四上公車不第益發
憤下帷主講南平書院及家塾課士獲雋者不下百餘
人若江陵之太史胡兆蘭石首之進士高家泰皆其門
下士也性恬靜不耐繁劇道光丙戌任孝感教諭本蘇
湖遺意以立教方伯屠公之申稚重之致仕歸足跡未
嘗履城市著有荆陽七藝訓世編等集行世年七十一
卒子家瑞孫逢春皆列庠序

鄒崇漢字雲章號星溪廩生鄒美中次子性穎悟從其兄
泗授書十歲學爲文出筆卽超俊不凡作善人教民一
節題開講云今天下望太平久矣選拔李春溪翁見之
謂髫齡有此吐矚邑偉人也十九冠童軍越三年以第
一食餼又三年遂領解文有奇氣語多寄託人知其能
文不知其尤長於詩喜讀屈子離騷庾子山哀江南賦
及古今詩之悲涼感慨者諷誦至流涕不輟也兩上公
車不第復值粵匪跳梁其感事愴懷見諸咏吟者忠憤
之心悲壯之氣浮於紙上咸豐甲寅感憤詩云如此江
山賊蔓延四郊何日靖烽烟男兒不具封侯骨枉住人

閒三十年岳州宜昌相繼失守石首華容賊黨又復相
持彌月里人議徙他所詩以慨之上通三峽下三湘鎖
鑰東南半壁強隼翼虎威憑假借風聲鶴唳頓倉皇兵
戈颯沓湖山表羽檄飛馳道路傍滄海橫流何日靖不
堪翹首望江鄉震鄰烽火澈天紅指日分飛信轉蓬黃
鶴落帆波上下青螺振策路西東亂離兒女翻成累落
拓文章那見功安得衝烽一長劍稜稜霜鏑倚崆峒邑
團練成句云呂蒙營壘左公城戰伐飛騰古有名廿載
蛟龍爭出沒一朝豺虎忽縱橫東南殺氣迷荆楚西北
祥雲擁帝京決策運籌唯奮武拚將戮賊仗書生冬夜

書懷句云落葉下庭柯驚風撼撼過一年又容易萬事
忽蹉跎歲晚心仍壯憂深鬢早皤擁爐看長劍竟夕幾
摩挲嗚呼具此胸襟倘天假以年日覩 中興景象
其和聲以鳴 國家之盛者當復何如乃多愁善病復
不樂損年未及強仕遽爾物化斯人之不幸不獨斯人
之不幸也

張澤銑字倬雲邑之吳達河人先世元超公以四川按察
司占籍公安後有斌公官福建道監察御史君生而穎
悟讀書有大志不欲碌碌居人下道光壬辰避水患從
邑庠王君至江陵沙市就婚馬姓孟子所謂動心忍性

增益其所不能者實始於此弱冠卽受知邑尊昇階平冠童軍辛亥舉於鄉公車北上者再吏部揀選以知縣用時粵匪滋擾東南半壁罹烽煙隱居不與外事教子自娛工書法文名重一時設帳數年諄諄以尙氣節嚴取與相勸勉經師人師兩有不愧云年四十六卒有玉燕堂文集十六卷待梓子一坤誠拔貢生

侯家璋字灋南號雲嶺耽吟咏未遇時每晨起左挾布右執卷嘯歌道上旁若無人路人竊竊然相與目笑之已而隸身漕伍頻年北上後援例爲丞筮仕山左未幾署范縣實授鉅野令加同知銜入
覲京師以詩質石

邑張劍潭翁劍潭序其詩曰其風雅本乎性其感喟深於閱歷其雄直悲涼之氣則大有得於江山之助非虛語也又謂其胸襟濶達世故歷練及爲今判決如流寬猛相濟有得其片語隻字者皆寶而重之曰此吾使君之蹟也而政績著矣而詩傳矣雲嶺因以不朽矣

補錄羅宏漳政績

宰湘潭時有彭氏奴瞰其主弱潛出冒捐職官主知之與邑士赴明倫堂列單出首奴敢以結黨哄堂訴於學使學使入其言竟褫諸生爲首者並落學官職一邑大譁羅至廉知其實申請上臺盡復除名與官論奴如律昭潭書院舊無膏火獎賞富人某犯博賄金數千兩却之飭令置田供給膏火又捐廉置田爲獎賞資於是潭士咸奮所拔取者多擢巍科迄守雲南調劑銅鉛各廠清釐鹽驛重務並爲孤貧增給衣糧甲辰歲大饑米升錢貳百文設法振濟民賴以安初市法大壞郡民爲

大小斗斛凶歲更甚乃爲角斗甬正權概至今猶稱爲
羅斛羅斗云卒之日貴州桂西兵備道張繼辛銘曰學
究體用心秉塞淵發爲政事無黨無偏恩敷南楚澤被
古滇志在初服引疾歸田銘茲片石永終譽焉

忠義

舊志載明末流賊陷荊州公邑士民倡義拒賊畫江而守或結團拒敵或截渡邀擊大者數千小者數百故當時偏撫題請有大江南北盡沒於賊獨公安義士如林合邑死守之語及

清朝定鼎而吳逆犯順粵匪跳梁慷慨赴敵毀家捐軀者正復不少足見公安之人心猶有古道也

元

普元禮

高昌人徙公安

元至正壬辰進士任御史出爲嶺南參知

政事時所至郡邑皆沒於寇元禮詣湘憲假分司印徵

兵蜀郡未幾遇賊兵潰一門被殺過半元禮挺然不屈

死

按舊志元禮墓在科堤舊縣東門外堤側今圯入江

明

朱輔字翼公成化丁未進士初任南陽同知有異政擢御

史轉嘉湖道禦倭失援爲所獲弗屈死倭酋憐其忠以屍還民爲營斂子棟正德中舉人扶柩歸里入告賜祭

贈官

龐瑜字望白事見列傳貌魁梧有勞力家貧躬耕自給夏轉水灌田執書從牛後朗誦喜讀易崇禎七年擢陝西崇信知縣筮易得姤之革驚曰吾其死於西乎且有兵

警崇信舊無城兵荒貧民止百餘戶瑜知賊必至言於
監司陸夢龍以無兵辭瑜集士民築土垣以守流涕誓
死職閏八月天大雨土垣盡圯賊掩至瑜急解印遣家
人齎送上官端坐堂上以待賊至捽令跪瑜罵曰賊奴
敢辱官長拔刀脅之罵益厲賊掠城中無所有執至野
外剖心裂屍而去贈固原知州

舊縣志明史
忠義傳合纂

侯偉時事見列傳其臨難詩曰天乎人事苦難留眉鎖滄
江水不流鍊石有心嗟一木臨湘無計慰三洲河山滿
眼風悲角冠冕懷人雨溢秋盡瘁不成身已逝年年鵲
血染皇州塔孟某江陵人收者欲鎖其項手格之大罵

而死塾師譚希侯亦死

袁喬年字天目登封令致道四子也壬午闖賊破荊邑人
大去獨率敢死士陳兵於長安里中邑西村土賊勾闖
渡江與諸生王韶之蕭煜都牟光世等襲破之闖謀遂
沮會澧州陷前後受敵與賊首王老府戰自晨及午兵
敗被殺族子袁貽則等皆死華容孫公穀聞而傷之有
詩紀其事

田朝儲字藍田以布衣拒賊於馬長港挺身奮擊殲賊數
人賊攢刃來戰遂遇害家人收葬失其首見夢於邑人
魏銀匠曰我田藍田也吾首在附近田中煩送至我家

次曰魏果于田中獲之乃得合葬

俱舊志

田昌字百泉邑諸生生而負奇詩文俊逸所著有吳越草
爵茲館綠映軒微尙亭等集行於世顧其制舉藝務矯
時尚力追先輩益佳而益不售其才乃弗獲展以爲憾
崇禎李年寇浸震鄰則投策當事行保甲嚴關津鬚鬣
第五營里中仗以安堵數載亡何寇大至土賊蜂起公
破產結義勇與王孫九皋躬親戎馬擒斬無虛日寇乃
悉衆以應不支被執卽授僞銜加蟒帶其身昌厲聲叱
之罵不絕口延十餘日終不屈遂遇害華容嚴首升爲
之傳曰古今惟才與節並馳天壤子雲安仁以才故失

節睢陽平原以節故掩才若百泉者履平見才臨危抗
節事無兩成百泉乃兼之也哉霜雪之後春芳可期田
氏之克延以世有由也

陳我備邑諸生明末與兄信中俱爲賊得賊縱一人還取
金以贖我備度家無金因與訣促之逸無爲俱死已而
賊殺我備信中以

清朝順治中由明經仕至青城知縣撫其子焉

甘召循明儒士甘榮吾次子築茅菴于龍溪山讀書其中
會闖賊破荆土賊四起召循毀家募勇士團練以挫其
鋒順治乙酉冬戰於河濱中流矢墮水死

鄭昌烈魯陂里人咸豐四年粵匪犯境爲所執脅之去弗
從賊刺以矛至死罵不絕口

易秉漢特邱里生員精數學咸豐五年粵匪蹂躪江北漢
從江陵道銜林向榮勦賊至潛江李雲口陣亡

蕭孝瑞長安里人性豪邁咸豐甲寅五月紅巾賊犯村遇
諸塗賊脅之去大罵不從刺之剖腹取肝而去妻陳氏
生遺腹子貞靜苦守

魏成忠魯陂里人粵匪犯村賊脅之不屈投水死其妻知
之亦抱其女赴水死

龍天澤_兵李志英 秦照雲 田 貴 毛占先

陳開俊 馬勝祖 王家純 羅盛祥

以上九人入祀省城昭忠祠

孝義

林守威早喪父事繼母曹甚謹曹卒未葬鄰家火急守威升屋呼天風返無恙時人稱為孝感

湖廣通志

李景字葵日道宇先生孫也縣學生居科堤舊縣時邑中大火景親柩在堂莫知所為乃扶柩哀號火及門而返得無虞

于三以孝稱事闕紀載至今傳其住處為孝子岡有碑在

魯陂里

湖廣通志

田垣字近薇父寅山充鄉飲賓年九十六母夏氏偕老垣

孝事兩闈父老脫二齒禱於神齒復生其子孫五世同居號曰義門子孝謨孝友敦行檢里黨稱爲長者

馬寅功谷昇里農人家貧母洪氏老善病功每獲備值或從人貸升米必市肉以歸人以其貧而饜多責數之功不置辨蓋恆以供母也母卒無棺質身鄰人易棺以殮鄰人欲得其弟功曰弟幼葬母非其責也與妻同質以葬母已歲大旱獨功田不次驟雨秋成如常身乃贖

劉美公父病淋醫云是石淋其便塞有物必用人口吮而吸之方得通利美公欲吮父不許越二日小腹脹痛難忍始命吮之每吮則呼號欲絕最後醫令努力一吮便

溺衝喉吐血果如豆者二病遂愈嗟乎庾公嘗糞所
憂甜滑漢太子吮瘡遂有難色劉以匹夫之愚爲人之
所難爲如此

魏家祥魯陂里人僞陷公安時家祥隨父往探寡妹覓徑
於陸遜湖灌莽中虎突出啣其父而去祥哀號求釋虎
不顧隨之深入里許虎置人於地坐守之祥徑前奪父
負之走虎且哮且追然不甚迫遂得渡河完屍以殮又
西辛里朱姓者駕牛車於江堤外河灘捆載新麥爲虎
啣去時僕子建兒牽牛解車上木棍奮往擊虎奪之歸
而死建兒字得卿

袁鈔縣學生年十七喪父哀毀骨立偶大盜至家人倉皇走呼鈔出鈔謂諸弟曰汝輩第去吾長也父柩在安之手一劍出迎賊怒以刃擊之折其二齒刃入唇爲破鈔不爲動從容謂盜曰諸人第取貨則伏藏皆子有若驚先子靈吾且刎子亦無從摸索也盜然之夜深嚴寒諸盜煮酒豪飲鈔曰能以一杯見煖乎盜不可鈔前奪魁盜手中巨觥自飲盜壯之爲酌數行徹明盜去血淋漓滿衣矣鈔爲人方正有雅量平恕率物爲里閭所稱楚

文獻錄

侯章華父偉時殉節章華僅十歲賊帥撫爲已子持肉以

食華淚下曰既殺吾父吾忍食殺父人手中食乎賊帥
遂逐之尋以哀毀卒

鄒養唯明推官在澧州遷祖母柩回舟至牛浪湖風大作
伴舟皆覆養唯恐祖棺難保躍入水中願以身代風陡
息得保無恙

侯諫臣字資若少失恃事祖母唯謹父愛異母弟諫臣曲
體其志悉以遺產授之族子某少孤有利其產者力庇
之歲疫比閭闔室傳染諫臣躬饋粥調藥餌以保全之
遇後進諄諄勉以孝弟子孫遵其訓三世同居不析箸
云

王嘉善八歲割股事母以孝稱年少游泮時上憲屢加旌
獎

高軾母病割股以療

汪士修母余氏年五十病革士修號泣割臂爲丸湯以啖
之病愈越十日士修死妻毛氏值姑病復如士修所爲
以進病亦愈後毛氏病篤子瓌鼎亦然嫂張氏子琨鼎
事母以孝著復如其伯士修所爲一門四孝遠近稱之
周希旦縣學生母毛氏病眩暈旦割臂爲丸以進立愈越
十餘日病復作妻馬氏弟縣學生希召均效旦之所爲
召妻龔氏身已抱疾復效之皆不令其母知由是母病

不復作

陳岳子邑城人母甘氏病刲臂爲湯進之立愈後數年城中火近岳子居火遂熄歲大疫城內外多死獨岳子家無恙

以上參縣府省舊志

易象演特邱里人性至孝少時赴院試發案演已錄取聞母病篤學師諭令覆試歸演曰吾母與名孰重急治裝歸招覆不至學憲嘉其孝之篤而深嘆其遇之阨云

吳鏡涵刀環里生員儒士吳承榮之遺腹子初生胎髮皆白長以未及事父爲憾遂繼志苦讀欲顯揚以慰父靈

家貧事孀母凡所需必百計以供及母沒恆至墳所哭泣三年無間墓草爲之不殖

王家琇西辛里人善體親心父成榜母宋氏年老多病每有所召琇雖匆忙中聞聲輒至故其父母恆以孝順兒呼之今猶嘖嘖人口孫槐亭邑庠生曾孫偉卿邑增生田一成候選訓導家崧之祖也性至孝有盜賣公田者憾其父汝璜據理直斥結黨毆其父成憤往護身被重創昇歸氣息奄奄幾不可救忽夜夢神人噴以水遍身摩娑之既醒則蹶然起矣

徐文相板橋里人少孤母苦節撫之相力耕供子職年五

十母艱於步履冬負諸暄夏負諸涼及病衣褥不潔相
日洗滌再三侍疾凡十有九月無惰容

牟作貴邑城人少孤事母杜極孝嘉慶時從道憲崔征苗
著績保舉縣丞以母老不就職事親先意承志雖瑣屑
事必躬親之更有山谷滌溺風至老彌篤同治四年
撫憲鄭題請建坊子丕振次孫治策俱監生長孫治瀛
生員

彭先瀛市鎮里人父述行年九十八衰憊甚出入起居瀛
必扶持家苦貧人有以旨甘遺者悉供父冬寒不能具
服常減己衣衣之

王士富平樂里監生父國臣早逝母陳氏守節定省七十年如一日父葬於江陵八井莊去家百餘里每歲佳節雖甚風雨必往祭時母年九十六卒士富年過古稀猶哀毀不能已子化隆孫植森俱生員

陳善長邑城人事親至孝天寒著父母衣俟煖然後請父母起解而衣之一日其父攜籃趨市錢實被人攫取去歸色不懌善詢得故照原錢式密藏牀褥下故令家人搜得之以示未嘗攜錢住父心始暢凡曲意承歡類如此父故母愈老善長寢必溫席久而不衰其長子盛英亦以孝著季子澤霈生員

陳毓深增生邑歲貢士壩次子出繼江陵監生鏞度爲嗣
以孝事嗣母後迎養生母侍疾無惰容兄增生毓江目
疾毓深撫姪若已出並却嗣產充公撫憲胡 題請給
額

黃德祖農家子事親朝夕必問安否母年八十餘卒每言
及輒淚下如注殆至性過人者歟

趙斗珏幼業儒其父患疽藥不能愈珏乃以口吮之出血
數碗而痊

魏順斌魯陂里武生割股救繼母

田家昆平樂里人割股救祖母

周道全王業煒廖解里人張居喜東村里人雷振清市鎮
里人譚業欽刁環里人楊學詩赴陂里人陳申太板橋
里人余傳先西辛里人皆割股救母

沈美發廖解里優生妻崔氏故誓不再娶母沒廬墓百日
父病侍湯藥匝月不解帶乾隆壬辰學憲 邊賜額

陳紹相西辛里七灣人父早逝母王氏道光壬辰染疾相
割股籲天祈減已算益母疾遂後瘳十年母病痢卒腥
血糝糊不忍以巾拭口吮之且泣且吮室中忽現祥光
照母尸若玉色帛者驚異

袁立朝父谷昇里人就婚長樂生朝旋沒遺命歸葬及朝

長先奉母歸復之長樂負父骨植途值暴漲浮沉數四
不釋手達岸投逆旅不納露宿崖下時山多虎患卒免
人謂孝感神佑云

袁立榮邑增生父師遽久病瘵一日榮往購藥未及市而
訃者至榮聞顛踣再四號哭入擗踊無算勺水不入口
及殯日惟一粥席藁殯側三年不入寢門哀毀骨立及
母卒居喪亦如之曾祖塋旁隙地爲他姓所侵堂弟清
往爭之得復歸過榮舍有衿色榮訶之曰子孫爲先人
料理塋地職耳何自伐爲體素羸卒以兩居憂時毀瘠
甚致不壽

司馬志誠以祖父衛千總德普病篤禱神願減已算以延
祖壽病獲愈邑侯張給金篋並美額

田鳳昂候選訓導家崧仲子弱冠補弟子員篤志於學事
親孝母病甚禱於神請以身代侍疾逾月未嘗就寢體
至骨立母愈乃復初其父館沙市隨之肄業後自病二
十餘日猶彊起爲其父布衾席病篤輿歸已昏瞽矣其
母手藥進不知服聞母聲乃飲未幾卒

張孔修廖解里人事親先意承志年三旬餘始入泮一日
歸稍遲父令跪道旁衆請宥弗許或速之去修曰吾歸
遲而傷父心去則罪益大矣修子求代乃免

耆德

袁士瑜號七澤年十五卽冠童子試爲諸生食廩糶場屋
屢躓未嘗有沮色丙戌長子宗道會試第一人公年纔
及強仕諸年家子謂當願養天和含飴自娛公拍案起
舞曰雲程頗裕何甘兒曹先鞭黑頭封公適足有家聲
愧已丑以宗道封翰林院編修次子宏道成進士官儀
曹晉封禮部儀制司主事三子中道成進士官南京吏
曹晉封吏部文選司郎中綸章豐錫金紫燦爛鄉里榮
之公益優遊自得究心慧業時方伯龔公乞休林下爲
南平社長偕公及子侍御外孫三袁先生論學於二聖

蘭若日輪一人具伊蒲之供互相商證叩擊所得或靜
坐禪榻覽貝葉或游東壁河邊觀澄瀾或彼此角詩至
日暮始歸一種清閒快適之樂夙因攸鍾如世俗豔稱
簪笏侈夸門閥在他人則爲希有盛事在公止作尋常
觀耳卒年七十著有四書解義行世季子安道字方平
號南浦凜凜父兄家學清修雅飭以伯兄官史局次兄
官儀曹肄業成均兩兄念久歷宦途不可無膝下阿奴
以慰懸盼大涯之憂趣其歸侍封公及大母以是伏處
邱園同封公諸社友搜尋無生置身於律度而响人以
春和絕無烏衣子弟習氣敦善弗忘喜聞人吉祥事無

一切驕矜色宗黨嘉其德量焉孫祈年甲子舉人彭年
甲戌進士嵩年己卯舉人前學使者徐公人龍詳覈公
行實題云讀三袁先生之書豈可溯其流而忘其源哉
崇祀鄉賢

毛宗憲號麓濱邑刀環里人敦尚義概喜施予捐義田以
贍族之貧者俾冠婚喪祭取助焉邑令聞而嘉之榜其
居以風里人子荃以高材食餼於庠先卒妻鄒氏莊簡
公孫女守志三十餘年教五子皆成炳繡炳文先後舉
於鄉

毛薦字明字毛氏自宋元來戶口繁多每族衆中推素所

服者一人爲之長凡戶事皆就決焉剖曲直均勞逸是以少長敦睦無輒訟公庭者公魁碩耆艾以公直爲衆所推族人有不直雖素所親愛及衆所憚者皆立召致祠中免冠詰責或加笞必取平而後已用是衆益敬服務爲自愛邑令廉知賜以竹刑使并督里衆焉生六子咸以學業矯矯邑校中羽宸中甲子舉人季子羽健即芝田公也嘗手植小桂數株指謂人曰桂長可折吾子當有貴者其在少子乎時芝田公尙幼公甚愛之然析室獨無所予人以爲請笑而不答卒不予後芝田公果貴雨誥贈如其官焉至今族人恪守高曾之規無敢踰

越邑中推治族有義者首毛氏

高邦久字楚蘭文美第九子也長身美髯性孝友父有十子教讀甚嚴不如指輒加叱扑諸昆仲皆走惟公含淚不忍去故於諸子愛最篤下帷好學遭世不偶無所成盡心於古其于通鑑大全皇極經世等書咸所究悉後爲禮部儒士縣令重其行誼皆歲時致禮其爲學以誠正爲宗嘗曰人非狂惑鮮有不惜名者然或浮慕聲名冥冥墮行清夜設阱暗記乘危此夫爲盜不操矢鏃者也惡莫甚焉教子深謹一經外訓以歐陽文忠公尊人治獄事曰此所謂哀矜勿喜者也我子孫如出仕治獄

幸無殺人以媚人有世胄之後某某家計零落或詢公
曰門風未忝世澤依然何今昔盛衰之頓異公曰子未
觀燈光之燦乎前膏將盡後炬壘續故達旦累月而不
熄又不觀崔巍之木乎崇柯層蔭歷巖霜而不隕其節
非邀天者厚亦其託根者固焉耳子欲燈之燦而莫思
所以續之喜蔭之茂而莫思所以培之徒深今昔之感
抑末矣其持論如此子重望恪守先訓壬午舉於鄉嘗
有燈膏因續永木本借培長之句勒爲堂聯蓋述公平
素語也孫正儀成進士司李南陽每讞決憶公平日哀
矜之言不敢忘歐陽治獄遺意則知公之教思深遠矣

年十八四卒崇祀鄉賢

陳捷字伯凱大光里人生而穎悟力學於書罔不涉獵每童子試輒冠軍以淹博爲邑諸生師平生謹律度遵禮法雖布衣而儼然具縉紳先生之度燕居無袒裸盛夏不脫冠箕踞訓子弟以坊表平情接物樂爲人排解里有鬪爭以談言釋之故鄉人莫不高其誼性坦平無城府與人不少計怨每歲時伏臘雖社會里燕必躬至醵金爲倡子弟輩或有以鄙俚無自往答曰獵較雖鄙從俗可也有兄弟三人友愛最篤其季弟少瞽父啟巖公憐之而屬於公撫愛倍至卒能成立父病侍藥餌經年不

離寢榻適家有不得已之役父病中嚴切遣董其事不
辭宵旦竣事以告父異之病中爲一破顏父卒遺命必
葬我先人墓側族豪者不可遵命婉曲致請卒成先志
既啟墓得其曾大父前峯公志銘其文爲鄉先達方壺
龔公所撰龔公實以前壬午舉於鄉公大喜曰吾先人
抱志不售食報在後壬午之云或其左券乎長子鼎中
果以壬午舉於楚鼎中字蘇湄初雋邑俗新貴類多誇
詡出入公痛戒之買臧獲稍狡黠輒斥去曰吾先人忠
厚傳家安用此輩歲甲申冬闖逆餘孽焚劫其鄉屠戮
殆盡蘇湄幾不能脫公時抱病動履頗艱獨攜其家人

幼稚舟載入湖卒獲元吉固天佑善人亦其禦變有方也未幾蘇湄脫歸父子相對如重生曰吾家荷天之福大難不蹶從此當加益敦培無忘巾車耳運際鼎革其時邑尙未入新版公病欣然祈死丙戌冠帶終於正寢其生平節概如此配陳氏公安有兩陳皆著姓也長歸於伯凱是時陳氏合鬢蒼頭咸盡力稼穡家無閒人諸婦不免親操井臼母上事尊嫜孝養備至世亂旣平蘇湄擬北上爲母邀一命榮母不可言吾願以忘養不願以祿養也蘇湄因不赴公車者二十年旣檄催赴選得粵東保昌令日思歸養而母卒年八十五母皈依淨土

臨終沐浴隱几端坐而逝中外子孫數十人皆彬彬文雅蓋德報云

袁辰字彤獻袁氏爲邑名族凡爲子弟陽慕先人類以曠達自喜其於敦本務農或不屑焉公居鄉治生產獨不爲虛聲誇詡是以始拙而後裕儉於持身而豐於延師其於村里中所謂詩文讌會事雖爲之而非其所樂也當中秋友人治盤餐歌呼達曰獨率其子姪嚴切誨戒以糲米作粥啜之飽而散時人以此笑其樸而識者服其裁制有方足以回頽俗而還醇風矣子世紹少能文昭平縣令世經粵西宣化教諭世維辛丑 恩貢

周右文原名國昌以字行世居邑之板橋里少讀書言動不苟及長燕居必正衣冠矢志爲善數奇不售某觀察使辟爲刑曹掾自思所經手多大案得以陰行其善每事力贊平反當事信其誠多所全活其人不知也會有知之者遭於路跪而泣謝公如無所容亟去之且曰是上人之仁同事之轉移我無與也嘗中夜太息予以純問之謂是死獄爲求生道而不得不覺愴然耳或公退色喜則必其救拔多遂也如此者數十年益用孳孳案在分臬讞決皆各郡邑遠地公固不言故至今子若孫皆不能悉數之所可傳者公安有詞連馬杜二姓三生

論褫衣頂公力持之免越歲訊其實謝以日久忘之又
繡斧衙門訪犯營救得釋袖十金爲壽公却之至作色
其人退具粗葛一端始受之生平所行多如此其在鄉
里排難解紛嘗謂陰德如耳鳴但可自知遠近皆稱善
人而狷介嚴正佻達少年多所忌憚子以純字在位年
十二遊泮能先意承志雖蒙養僅足饘粥而堂上融融
祇緣膝下有孝子耳執喪三載宿靈側斷葷酒卜兆十
數里外非甚風雨必朝往而暮歸歲時薦食往往號泣
不能起其存心仁恕固有所受而書香自此起矣孫二
應運與昭俱能世其德事生以色養居喪如古禮不愧

孝廉應運出宰襄城水蘖自矢甫期月劇驂道上盛稱少年操守花落訟庭清可知也能清則慎且勤又可知也

外史氏曰蔡敬夫先生曾祖彝舒爲永春縣吏有法如是而令牽于他請欲上下其文者公度爭之不得徑投筆去令感其誠慰止之請如掾吏旨鍾伯敬先生爲之傳有曰世猶知庶人在官有能用去就存法者自公始且引史記馮唐自可傳不必其爲子傳也予于周右文公亦云

以上舊志

易鍾秀儒士象演之孫存心坦白戚友有急輒助之臧獲

效力者復其身且給以基產有備某服役久秀出穀百
餘石令泛舟糶於漢沔去十載無音耗蓋已將其貲娶
婦生子矣後妻子死無以爲生忽一日入跪伏涕泣曰
僕乃今而知有天道也雖悔何及願負荆受主人責秀
曳之起復給錢數貫俾置生計而去

牟光世字旭若明時人直隸通判後官總戎生平好義同
寅趙名揚能官去夫人卒於署無所歸光世帶柩回葬
年饑賑穀數百石知縣趙公繼鼎贈澤溥桑梓額

王成九茅穗新店人家頗饒嗜施與乾隆戊戌歲大饑近
地售男女者盡典之男女異處日給湯粥至冬授以棉

衣明年麥熟遣歸還券不索原值每歲除輒於夜靜時
驀予貧者錢米馭家僕以恩有願出者輒予以貲產施
義塚地數處義渡田數十畝載於碑縣學生瑞芝瑞麟
皆其裔也

袁前昂廖解里庠生乾隆庚申歲歉昂糶粟減價並廓常
量梓里德之知縣張公統緒獎以善行可師額郡伯張
公亦賜義敦桑梓額

袁士信字義先號復亭行五於昆季以孝友稱初其父魁
念從弟惺無子善病命信往侍往則家壁立信力奉甘
旨醫藥無虧惺獲痊信以離家遠於所生久違定省家

中諸人分析乃奉懼返僦屋而居視兩處晨昏偕妻喻氏胼胝拮据漸有蓄積置田五畝力耕自給魁愨信孝勤苦會有疾命已所置田二十畝諸子所未分者以五畝給之以五畝易信所置田餘田十畝命信備價券付之魁旋沒母與諸兄皆不欲事中止母病復與喻同侍疾革泣謂信曰諸子婦中獨汝兩人善視我一無所分夙負爾矣諸兄皆大感悟始給田契居家性不屑逐末有載其穀之他邑販者貨鹽歸鬻不售強歸信未幾湧貴或謂急鬻可得厚息不答悉以鹽假人價平始收其值乾隆中孫廷翹由孝廉爲曲阜令 貶贈文林郎

鄒美中字聖贊號華亭別號西林山人試用訓導振讓之
子家於西林山之陽因自署山人云山人甫成童而孤
能讀父書弱冠試第一補弟子員久乃食餼年三十即
謝棘闈槌戶課子時藝外壹肆力詩古文詞兼擅考證
之學訓二子崇泗崇漢亦皆以第一食餼漢後首列鄉
薦山人性耽書儲十三經二十二史下逮脞說叢談不
下數萬卷日坐二分竹屋中丹黃不去手嘗有句曰聚
書三十年讀書二萬卷有如蠹簡蟲形骸幾時變積沫
不成篆食字不成仙生死於文字永結未了緣山人可
謂樂此不疲者矣讀書事事求是不以人之說蔽己尤

不以已自蔽於經義有八家同井辨袷禘辨韻學尤深
所撰古韻今韻表判時代以定音啞啞以出切凡舊韻
乖關瓜臻莊替之附二等者改列一等責字之隸熙母
者改隸精母楚字策字之隸穿母者改隸清母衰字所
字刪字生字改隸心母雖字改隸審母其一出一入具
有心得之妙味者觀之茫如也于鳥獸蟲魚辨核無遺
力鶉鳩鴟笑本草之不分蛄蝻蚰蜒詆字通之誤合
鸚鵡爲鵲巢之鳩證以古今註而益信桑扈爲竊脂之
鳥得諸目驗而疑始決更因淮南蜚蜚而悟周本紀飛
鴻滿野卽今之蝗蝻實前人所未剖者也易司訓湘巖

言里有白犬夜輒入人家逐之卽隱山人曰是名獠子能攝人精氣者見於浮山外史通雅檢之不謬安邑李上舍鳴盛言邑之後湖有物牛首昂出水上目炯炯然市人噪而觀之三日始去山人曰此埤雅所載龍有九似而首如牛者蓋蛟螭之類水祥也其貪奇多識如此旁通天官家言製有中星儀星漢平儀辨古今之垣宿攷中西之異同每暑月露坐指某星某部分歷歷不爽云著述凡十餘種載藝文志書目中自時藝盛而古學荒漢唐箋疏相棄若士苴山人獨能旁搜遠紹非眞讀書人不及此故終歲所入悉購異書有餘則散之親故

無慮三千緡其弟璧中歲歎輒舉粟百餘石予之築淤
泥垵墊八百金立社約以訓化鄉里使相友愛扶持胥
由天性醇厚復從書籍醞釀而出非豪俠者可比也卒
之日邑人士輒云訓俗型方一鄉善士著書立說尙友
古人嗚呼盡之矣

易斗光字北有號碧峯歲貢居邑之橋梓溪世習儒業六
世祖象演院試已錄取因母病遽歸報能見孝義父顯
棟邑諸生衣冠古處庠序有聲公其冢嗣也生有異稟
童時就塾卓然不羣師嘗言曰若宗興文教者其此子
乎長遊安鄉孝廉席惺齋先生之門旣得師求爲根柢

之學自周秦兩漢唐宋各家文外授以先儒性理語錄
循習體驗必蘄至於有得而後已童試貴筑劉公廷謨
南皮張公開雲皆其所受知者丁丑入縣學戊子領袖
諸生食餼時年已四十矣毅然輟舉子業猶肆力於古
文手錄春秋左氏杜林合編悉心批點題籤曰讀左日
抄實能抒其獨得別標新義帙成授仲君秉璋讀後與
仲君同貢明經就司訓人咸惜其功名蹭蹬而公恬如
也生平孝友性成類能先意承志兄弟析居因新宅地
處繁劇且距老宅遠乃請於堂上願新宅自任之以老
宅授其兩弟一爲公府伴官廳光煦一爲直隸州判

道卿跡其優游林下足不履城市者三十餘年諄諄然
訓子弟培本根蒐輯家乘籌辦祭產學田不遺餘力而
胸懷坦白飲人以和道光庚寅來歲屢禱叩門乞假者
踵相接出糶私粟於橐綻囊澀及筐篋傾欹者尤加厚
莫不大喜過望而去配陳孺人年俱八十餘白首相莊
先後數日終壽子姓十餘人率能讀其先世遺書蓋其
德量深遠平情恕物久爲里黨矜式而衿佩且駸七然
跼麗而起已

晏大士號錫三世籍江右臨川其先子俯公起甲科爲令
嘗宰江夏後遂僑居於嘉魚縣之南塘官莊復徙江陵

其大父曰宗選始遷公安父悅善生子三士於次爲長少好經史所居近市別構樓誦習其中學使按臨納卷已入賞矣省墓未返覆試期誤竟除名乃入都納監肄業成均數奇歸治賈人業得子錢殖產暇猶探篋中書哦不絕口其寓都門時某孝廉客死厚賻之得返其櫬同邑士人或小試闕資斧或公車乏芻秣貸之不少恪尊禮塾師出於誠敬人爲之賦緇衣里社招飲率罕至惟試而得雋置酒招客者則往應蓋心以儒術爲重云創建宗祠獨力仔肩又購置學田新舊接卸所以激勵後人嚮學不倦者備至輯家乘搜採網羅手自繕寫成

帙好排解鄰人胡甲與江南李乙以却相陷禍不測力
爲譬曉皆大悟事遂已劉姓夜遇劫盜號於衆操从助
之盜乃走嘗至沙津有所購買人誤持其直昂者授之
約贏數百金已上舟行數里從者言之命急返還其物
賈人請分半以酬不可悉舉而還之其介如此刑部主
事王柏心曰公之孫承烈語余謂年甫五齡公卽授以
綱目提要時時講說則知公之識力得於史者深矣雖
未獲脫穎名場然子若孫皆擢華掞藻聲震膠庠間且
控扶搖而上昔朗陵太邱未登貴仕子孫並繼起爲名
公卿以公方之食報固未有艾矣

義士

林守成成化初麻寮商人以漆一器寄之而去宏治中商始來適守成遠出商告之官守成歸致漆縣庭封識如故啟視漆乾結惟中一滴濡耳令嗟嘆良久杖其商賜守成肉米以旌其義

毛貴章讀書知大義明宣德閒山東饑輸粟千二百石助賑事聞勅建坊旌曰義民毛原名文章上御宸翰改爲貴章特錫嘉名亦曠典也

馬良明正統四年山東饑詔天下輸粟得補爵良輸粟三千石不受賜職乃勞以羊酒勅旌馬氏善良之門良築

樓於池奉之爲流賊所燬明史記其事

高重望字仲達崇禎壬午舉於鄉幼有至性事父母以孝稱敦睦族人貧不能婚葬者傾囊助之學宮頽敗捐貲倡修其輕財好義類如此

張宏綱慷慨好施予從弟克恢兄弟以腴田三十畝售人宏綱出厚值贖回及克恢兄弟家益落以原田畀之批繳文約不取值並戒子若孫無得藉口其子卜年廩生內行修潔亦善繼其志云

廖鬚子以貌名未有知其字仁甫者在谷昇里之沉璧河鬻渡度日可給則不受值以故數十年家酷貧邑中多

蒲圻梓匠春來冬歸適有十數輩暮投廖宿室固隘連
蓐而寢雞鳴噪起急謀渡東去比曉廖妻楊氏得裹金
於薦下知爲匆忙中所遺夫婦秘之不以語其子午後
一人飛奔望渡哭廖慰之歸以完璧其人欲以少許酬
堅却之貧而不取幾與披裘翁似至今稱爲還金渡邑
有曹姓字調臣者亦嘗還金於路然而其家裕視廖則
有閒矣

以上舊志

王厚寬西辛里居士也好施與鄉里有急者助之無食者
食之有糧湖三每年蓄魚可獲二百金嘉慶丙辰歲大
饑不取漁者金不能漁者給以穀得免流徙者數百家

沈朝獻廖里監生家非素封遇鄉鄰有急者輒助貲嘉慶
壬戌大旱出谷百餘石爲粥分給全活甚衆僉生孝嗣
其孫也才氣超邁敦品力學士林推重焉

鄒授讓衛千總字君佐按察司經歷敬敕季子身玉立修
髯目炯炯射人望之如對高山深林氣爲之肅負經濟
才邑有大興廢未嘗不與計生平嚴義利之辨經理堤
局凡十載潔已奉公不名一錢邑袁某以訟事爲幕客
詐白金二百爲責取還某某奉其半以酬峻却之陶甲
女爲熊童養媳迫飢寒迎歸改字得錢十緡招而諭以
禍福如其數償之俾完前婚從兄孤且貧爲之立嗣捐

田二十餘畝人至今思之

宋國寶茅穗里監生生平好義道光時有貴州舉人某北上貧病不能前國寶邀至家延醫調治明年病痊厚贈之年七十餘卒先期創捐本邑賓興田百畝在觀音寺鄒勝中平里貢生世有隱德慷慨樂施鄰王某者素勤苦家貧無偶勝憐之爲娶婦飲食衣褥俱助之王由此生子成家

楊士義平里人其兄士哲與鄰爭田誤斃一人官吏索之急義出以身代罪死於獄

雷鳴運字景芳都司喜施予建邑橋梁數處助修邑城隍

廟兩廊建光孝寺山門又捐義田以濟屯務屯下至今
賴之子都司紹峯復助貲創舊考棚綽有父風

鄒毅遇縣學生世居薦祖溪溪屬南北要津石邑張姓以
河主據渡勒索行旅遇憤與姪縣丞敬軾舉張所爲鳴
之官設義渡捐田四石五斗廩生崇緒軾孫也

袁廷翰監生一日自外歸途見彩輿哭聲殊異訶止之命
人啟視則婦人縛置輿中得其逼嫁狀急遣人於四十
里外覓其親鄰至歸之婦節獲全

雷魁字景陽武生性慷慨喜施予妻沈氏亦巾幗中君子
也道光壬辰己酉歲大饑助其夫活性命者五全婚姻

者二學師王序其事

郭哭德號乾占西辛里貢生家稍裕道光庚寅後歲頻侵貸不能償者舉券焚之生貢開誠開照其子也

崔以恪字立庭歲貢生候選訓導敦行誼與人不欺臨財不苟居家孝友一門百口同爨有江州陳氏風拾百金於途訪其人還之

劉明振廖解里監生謹厚喜施港關義渡振獨造大船捐田三石餘爲舟子衣食西岸有塘房捐鋪舍二十餘間助塘兵資斧又常製丸藥以給貧病無德色

牟丕振邑城監生道光壬辰歲荒湖南周姓售女爲婢丕

厚待之後周壽套女去不詰知其實即遣歸助奩婚配
又有吳姓鬻子者爲說於雷姓收爲養子吳童媳父因
其易姓悔婚欲興訟丕力阻之乃止遂完配

公安縣志卷之七

人物志下

逸士

成己字仁卿號七洲少有奇氣家貧力學工詩神宗朝入燕京以詩賦自命少所屈七洲先與江陵交是時江陵秉鈞七洲貽書猶兄之久之江陵亦不堪會坐閒七洲踞上座不少讓當事者怒付遞解還先生性傲岸不羈每有所適興至輒附便舟去不聞之家人或數年始歸所遊則鬼國蠻鄉靡不到所交則緇衣羽流靡不狎所學則琅函瓊笈靡不窺著有七洲詩集若干卷中郎先

生舊有傳今軼

王輅字以明黎平知府格次子十歲能屬文甫二十卽知法要頗契無生之旨中郎小修兩先生少肄業門下一時如李卓老陶石簣袁伯修諸先生俱爲性命交年四十以貢授陝西鳳翔別駕六月卽棄官歸茂林著書以高逸自處崇禎初遣子上萬言書上嘉納之著有法華若諸經解小竹林集詩文若干卷崇禎五年督學蔡

題祠鄉賢

王從龍字卜卿貧苦力學以徭賦爲里胥鎖之空舍中薪讀書達旦不輟邑中文士稱爲社長異母弟因訟事

縣令欲扑之苦求身代以慰繼母人稱爲孝

鄒國能字弼臣號石菴明執金吾鄒公之有長子大司徒
莊簡公文盛之六世孫也以莊簡公武功得蔭世襲錦
衣衛千戶公少而偉岸喜讀書父沒後禮部題授蔭職
旋罹大亂濱於死者數次至於太平乃掃除刼灰於故
宅之傍構數椽外治小圃顏曰淡園終日徜徉其間美
髭髯善談論灑灑有出塵之致初以家中落而身復不
求仕進黠饕輩間有謀訂之者公一以含忍委曲處之
無不立化久之則人且敬而愛之遠近皆知名邑宰於
公每加禮焉地當孔道過客多來相見挹其風度莫不

醉心而去故所得名翰品藻甚富其弟國英亦甘隱遯
與之同心焉

以上舊志

李向春字方實增生活淡寡營弱冠與伯仲二兄析爨家
人持籌進春愀然曰某素不習會計長子世樸早歿聘
室張貞女年十四矢志悉以家計委之次子世極成童
能文邑令張因公造訪見其文嘉之謂當冠一邑之首
春恐遭物議竟不令極入場家不戒於火族里環集惟
誦柳宗元賀王進士失火書其坦懷如此年九十六歲
卒

侯宗旨字八解爲文耽奇聲大著有五經訓解

舊志

蕭知德字果育號南池幼穎悟其族祖虞封公器之目爲
千里駒授時藝即喜讀金陳文才思宏軼嘗道過樹下
見樹皮剝落作卑污受辱之文寄慨時事年逾弱冠縣
府院試皆列首選生平尤以孝著先孺人終柩停中堂
夜半火起下廳風大作跪地號哭誓與母柩同焚風乃
反性嫉惡縣役被斥者甚夥其後差卒誣以折票逼溺
案情身罹法網事白後紳士撫武令劣蹟上控卒罷職
公嘆曰予以戇直招禍令以貪酷喪敗皆足爲鑒子三
長信謨次信誥庚子領鄉薦季信詔邑諸生

田國芳字世傳號經畚祖遇磻縣學生父希康以謹厚聞

子三公其仲也弱冠列諸生六赴鄉闈不售遂輟舉子
業務實行顏其齋曰尊道專宗考亭居敬窮理於德性
問學無偏廢晚尤喜陸稼書集謂其言與考亭合服膺
不少倦於星象形家醫卜諸書靡不精卒年七十二

袁清字秩三別號西軒平生重氣節篤孝友終日危坐觀
書插架萬卷披覽無遺由歲貢就職訓導少時庭訓嚴
按日課經史非成誦卽夜分不令就寢稍長至其祖梧
林公曲阜任所從丹圃喬孝廉讀甫執筆爲文卽蒙嘉
賞采芹後復從白淦劉先生遊益教以先秦兩漢並韓
柳歐蘇之文先生得所師承遂愈肆力於古一以古文

爲時文四旬外以父年高家務倥傯任軍民一切差徭
鹽車絆驥從此風塵碌歷寓巴陵登岳陽樓覽洞庭波
光與侯雲嶺倪磁圃諸人賦詩唱和未嘗一日廢筆墨
也丁內外艱哀毀過甚課其弟立敬極嚴而親愛彌篤
往來鄂渚漢皋閒不欲偶相離其天性友于如此授生
徒使爲有根柢之學非能誠心求益者莫敢以藝呈年
六十有五卒

李澤濤號春溪生員祖德之伯子也弱冠冠童子軍力學
篤行文學王柳潭詩宗白太傅字法白雪齋道光乙酉
選拔旋丁外艱教授生徒一以文行是勸師事者多所

成就好爲詩有蓉鏡堂集嗣因馮夷肆虐家無擔石晏
然自樂性活潑時特立獨行自賦云憾煞天公生傲骨
斯須不肯受人憐生平概可見已同治丙寅前任知縣
袁聘修縣志去取維嚴未幾卒長子楚材生員季楚鳳
辛酉拔貢孫家榮生員

陳鐘璜邑諸生號旭齋一號葵園父輔公亦諸生邃於易
數尤精天官書乾隆閒緬西構逆王師征討輔公暑月
納涼仰視星斗忽訝曰西南當折一大將後二日果得
明將軍凶耗生三子旭齋其季也始入塾輔公謂之曰
汝髫齡穎異一經當能繼我但福薄不必覬覦科名旭

齋謹識之故終身不與棘闈旭齋力學工詩尤精音律
每同人讌集強之彈唱曼聲低度雖老樂工亦嘆弗如
先居邑之東里頗足自給後因頻被水患家中落遷居
谷里誅茆於南湖之濱自號對湖居士所著有對湖草
堂詩集其性情瀟灑如此道光己酉奇荒石米入金歲
除日食藜藿典衣換酒且飲且歌易曰或鼓或罷或泣
或歌慨無常也而先生獨能自樂如此其諸古之拾穗
行歌善於自寬者與

嚴壽春字靜菴號伯仁新店市人也事親孝交友信生平
尚任俠於人有急難則出死力排之家貧不能具饘粥

然性廉潔不苟合有憐而周卹者必卻之嘗作詩云亦
有嗟爾來食者丈夫志不受人憐其風骨概可見矣所
著有竹秋集蠹魚編懷北草暮林草壬子年拾遺記海
棠山院錄隨筆續筆諸集行世曾孫莖廩生江蘇知縣

僑寓

人足以重地而地勝亦足以致人公邑僻處江干古賢之寓焉者恆少又地當孔道舟車輻輳故富麗不似渚宮鄂渚使佳客留連幽靜不及鹿門雁峯使逸士遁迹今記子美以上及元明不數人使先賢遺跡不至泯沒無考用備一邑故實云爾

漢

韓 暨南陽名士漢末避袁術之命徙居不出劉表復辟之遂遁居孱陵

劉 璋先主取蜀居璋於公安並其貲財遷焉

公年三十一
年二十一

梁

陳起祖梁散騎常侍封益陽公智者禪師之父也

唐

杜甫避安史之亂入蜀依嚴武醉後戲謔為隙卜居瀼

西大歷三年秋至公安憇息數月有留別公安諸詩見

藝文以上舊志

宋

毛仲材江西吉水進士理宗時諫議大夫以使事過公安

樂刀環山水之勝遂卜居焉至今子孫繁盛代有聞人所居號曰官莊

元

杜 敏漢嘉人其祖避亂自蜀至公安因家焉兄弟六人

俱以儒業顯敏仕元爲著作郎

湖廣通志

何廷蘭其先鳳翔人徙居公安

仕元踐登臺省二十餘年納忠陳善秉節不阿

杜淑賢其先蘄水人元總兵復一孫復一官荊州父奇秀

愛公安土地平衍人民樸實卜斗湖堤家焉元季大亂

邑城瀕江賊往來無虛日淑賢善騎射足智勇募衆與

賊拒明東平侯韓政宣甯侯曹良臣皆危之淑賢散貲

財以固衆心旦夕籌畫水陸交防卒保無慮洪武初以

功授總鎮將軍世襲百戶

李 黼江陵人統兵元帥元末守義不屈死明太祖憐其

義厚葬焉子八真官評事因黃羊墳罹禍偕妻牟氏率
長子原誠徙公安遂命以牟爲姓

明

張得遠吉水人由鄉舉授大理寺評事時蜀地紛擾奉命

討平洪武閒致仕遊公安因家焉

舊志

夏 端穎州別駕解組遷鄱陽縣隨父彪由進士任公安

知縣遂家焉明洪武四年分居黃岡復分居黃安

李 洪以父明初隨湘王調補荊州衛洪襲父職籍公安

舊縣西門外有官衙西湖廟有官田洪沒子廷鳳承襲

高文貴字天爵才略過人任淮海兵備道解組遊公安至

長安村覽其山川秀麗人民誠樸心竊賞之遂去江陵而家焉

張嗣祖江西南昌縣人永樂閒進士任寶慶知府後遊公安遂家焉其子克恭置平里王姓產因里版難易易姓王今訓導王受福其裔也

附鄉官外籍

牟志夔四川重慶府人萬歷甲辰進士官行人陞山西巡撫提督雁門等關都察院右副都御史轉戶部尙書原公安牟回之裔乙卯歲來省故里留連者旬餘

牟敬祖歲貢洪武三年任山東棲霞縣主簿因家焉其裔

昌裕乾隆丁酉舉人工部員外郎因門人任公郾佑授
公安知縣獻水木興思額於邑牟姓祠並製楹聯云閱
元明以成序別派分支已歷二十一世合齊蜀而同宗
敦詩說禮至今五百餘年殆亦不忘其所自歟

牟瑋宗廖解里歲貢任盧龍知縣十餘年先是流賊大亂
有友龔姓約辟地湖南牟以鄒姓曾託藏白金大錠未
還恐後彼此不知存亡爲難龔義之卽令家人相伴覓
得鄒還其金方同去後僑寓梓潼縣孫子巨室

袁貽則長安里人流寓京都由例監知慈利縣事初到任
歲荒斗米千錢里民來辦軍供者盡放歸代民捐出七

百餘金慈愛得民解任時爲立去思碑羅拜泣下

蔣其昌流寓浙江蕭山任晉州訓導

李 洞流寓西山投誠授部劄守備

以上四人俱舊志

崔 宋原姓毛入江陵籍嘉靖甲子舉人員外郎

府志
撰舉

全安県志

卷之十

十

仙釋

孫錫蕃曰邑中氣節則有毛芝田蕭元恆諸公經濟則有王襄簡鄒莊簡諸公死節則有龐堅白侯令邱諸公清操則有李道宇龔蒼嶼侯豫亭諸公循良則有何太古王麓田諸公文章則有三袁兄弟皆所謂長生不死之藥也然而仙佛異迹往往不絕三世諸佛不過血性男子耳

大二聖大聖青葉髻王二聖樓至德芬陀利經爾時大師召第五童子娑羅浮殊與純金澡罐而告之曰汝可持此供養寶藏如來如來卽與娑羅浮殊童子授菩提記

當名青葉髻王如來於賢劫千二牟尼日出現後成佛
持大力童子告佛發願如來即與授記呼爲無垢明藥
王於賢劫千四如來青葉髻王成佛後當成阿耨多羅
三藐三菩提號曰樓至德如來按芬陀利經樓至如來
無德字

黃衣使者卽杭商史清娑伽羅龍王化身舊有宋封敕書
今失今永順保靖山中呼爲公安三聖黃衣使者求禱
必應

道安禪師卽寶印手菩薩

慧遠禪師舊志大二聖寺初名安遠寺係道安慧遠二師

建今按智者傳有敕修報本崇禮安遠三寺之語則安遠寺當爲智者重修耳今茅穗里有報本寺當亦智者大師建所謂上鄉壤以達生地思者也舊謂宋建非是隋智者禪師傳燈錄名謁姓陳氏公安茅穗里人七歲入果願寺聞僧誦法華經隨念之卽記憶宛如宿昔十年誓志出家依僧法緒於果願寺陳天嘉元年謁光州大蘇山慧思禪師師一見乃謂曰昔靈鷲同聽法華經今復來矣後辭思往金陵闡化七年謝遣徒衆隱天台山隋晉王廣迎師維揚執弟子禮旣克金陵師因西上止於玉泉山廣奏請立寺尋還天台一日忽顧侍者曰觀

音來迎不久去命筆作觀心偈唱諸法門綱要訖跏趺坐而逝指月錄

陳 鍼音鉗智者之兄仕梁爲晉安王中兵參軍年四十遇仙人張果謂之曰吾觀汝相陽算已盡當死在暮月鍼以白大師師令行方等懺法授以童蒙止觀咨受修習夙夜不怠未及一載復見果果大驚異曰服何藥而致此鍼曰但修耳非藥也果聞之以手加額曰奇哉道力易短壽爲長齡而卒能越死超生誠然乎鍼常於禪定中升天宮見金殿榜曰陳鍼之堂後十五年當生於此越十五載徧謁親知言別端坐而化

圓悟克勤禪師臨濟宗十一代在公安天甯禪寺

祖珠遜菴禪師南平人臨濟十四代住公安天甯萬壽寺

卽二聖寺也

虎溪錫禪師臨濟十六代住公安天甯寺

寶方戒律精嚴爲二聖曰過堂開山祖中郎小修兄弟及

龔惟長蘇雲浦曾長石黃平倩諸公皆稱之

顯宗江南人幼授戒操行清苦邑長者剏青蓮庵居之袁

小修先生有碑載其事

回道人即呂洞賓河東人兩舉進士不第遊廬山得異人

長生訣多往來湘鄂中滕守宗諒常遇之岳陽樓自稱

華陽道士宗諒密令畫工圖其像賦詩贈之大笑而別
公安有濯足池在舊縣斗湖中湖水雖漲而清秀傑出
時有白鶴翔集其上

佚大中號損齋通儒術元大定初應召建醮授師號而歸
未逾年靈芝二莖產於堂七朶色如青玉有詩集學士

元明善爲之記

府志

建文遺事宣德七年壬子正月師入楚

或稱帝或稱建文按程濟從亡隨筆自壬午

六月以後若臣皆以師弟稱遵君命也

至公安宿蕭寺二道士同宿不相識夜

漏將三鼓微聞兩人泣聲既去觀遺紙知爲郭良梁中

節

皆定海人同爲中書舍人壬午六月師作蕭寺黃冠夜泣詩見月與聞出亡之事並棄官爲道士

藝文

醉叟不知何許人亦不言其姓字以其常醉呼曰醉叟歲一遊荆澧閒冠七梁冠衣繡衣高顴濶輔修髯便腹望之如悍將軍年可五十餘無伴侶子弟手提一竹籃盡日酣沉白晝如寐百步之外糟風逆鼻偏巷陌索酒頃刻飲十餘家醉態如初不穀食唯啖蜈蚣蜘蛛癩蝦蟆及一切蟲蟻之類市兒驚駭爭握諸毒以供每遊行時隨而觀者常百餘人人有侮之者漫作數語多中其陰事其人駭而反走籃中嘗畜乾蜈蚣數十條問之則曰天寒酒可得此物不可得也伯修予告時初聞以爲傳

言者過召而飲之童子覓毒蟲十餘種進皆生敵之諸小蟲浸漬杯中如雞在醢與酒俱進蜈蚣長五六寸者夾以柏葉去鉗生置口中赤爪獰獰屈伸唇髭閒見者肌慄叟方得意大嚼如食熊白豚乳也問諸味孰佳叟曰蝎味大佳惜南中不可得蜈蚣次之蜘蛛小者勝獨蟻不可多食多食則悶問食則何益曰無益直戲耳後與予往來漸熟每來踞坐砌閒呼酒痛飲或以客禮禮之卽不樂信口浪談事多怪誕每數十語必有一二語入微者詰之不答再詰之卽佯以他辭對叟踪跡怪異居止無所晚宿古廟或闌闌簷下口中常提萬法歸一

一歸何處凡行住坐眠及對談之時皆呼此二語有詢其故者終不對往余赴部時猶見之沙市今不知在何所矣石公曰余於市肆閒每見異人憾不得其踪跡固嘆山林巖壑異人之所窟宅見於市肆者十一耳至於史冊所記稗官所書又不過市肆之十一其人既無自見之心所與遊又皆屠沽市販遊僧乞食之輩賢士大夫知而傳之者幾何余往聞澧州有荀仙姑及一瓢道人近日武漢閒有數人行事亦怪有一人類知道者噫豈所謂龍德而隱者哉

中郎集

句曲子曰人無諸毒乃能茹毒螂蛆蚍蜉其小者也世

有蛇虺其心蜂蠆其口者請與醉叟啖之醉叟隱者也亦仙者也醉而隱邱壑皆杯勺醉而仙天地盡糟醅與

鄧書

司馬頭陀不知何許人或云姓劉名潛卽形家著水法者觀其語似非一人所在見佳山水輒留秘記遊公安最久留記數十亦異僧而隱於方術者也

德成字雲空漢中人少時遇異僧攜入終南石室中教之禪定草衣木食者十餘年後出乃祝髮遍遊名山上於公安新店菴居數歲齋不粘席每入定竟日乃出一日忽詣其師端告之曰弟子明日午時當歸端云向何處

成云願出三界外

朱顛者不知何許人萬歷末往來荆楚閒衣百結寒暑不變不乞食有予之食者始食嘗臥叢蘭寺殿角下風雪累日弗起咸以爲死視之酣睡如故也性嗜酒每出必醉醉則裸而舞口喃喃歌如云海外玉皇披象皮不知何謂羣以顛目之袁小修嘗遇之於燈市見其醉中自語云且混且混因問燈佳否曰燈甚明路不平燈甚明眼不靈袁嘆爲異人焉有謀以酒困之者笑曰神仙醉不死費乃甕頭矣一日肩短榔挂不借之朽者十餘兩別所知入山去好事者從而踪跡之行甚緩而衆奔馳

莫及移時不知所向或曰朱乃中州諸王孫殆亦謫仙
玩世之流歟

鄂書

湛然本公安李氏子住玉泉新關廟通內典兼曉聖賢經
義遠近耳其名爭來就質隨問隨答無難之者或曰少
補弟子員中年披剃玉泉問之亦不答但微笑而已

釋巨鋒別號韻蒼南郡公安人少落髮二聖寺長而瓶盃
遍天下往來江浙大叢林凡迎鑿盛典及諸水陸道
場皆禮請掌經讚書疏旣而退老江陵東山寺性益傲
岸不與人往來後歸骨峨嵋生平工吟咏著有韻蒼詩
稿若干卷江陵拔貢劉士璋爲之序

癩花子者不知所自來遍體臭爛嘗病臥廣德觀側有道
士汪姓者見而憐之昇置側室中調治之月餘不懈忽
一日張目呼汪曰吾累汝無以爲報盍持一盃來道士
將一巨盃至因大吐痰涎滿中迫令汪服之汪頗嫌穢
俟其旁睨潑之條起青烟道士驚詫亟以手承之而花
子遽杳矣後汪道手持方響一擊輒有風雷起於掌中
邑令聞其異值旱甚召令祈雨頃刻甘霖傾注蓋拾其
遺唾故也

附耆壽

明

周

軺百歲
有碑

袁敬松

九十八歲

周正冕

九十七歲

胡美之

九十七歲

清朝

高天庚

九十七歲
子孫俱昌

田寅山

充鄉飲賓
九十六歲

陳美璠

九十一歲

朱尊桂

魯波里從九少極貧年五十餘貨殖起
家創修南極橋壽九十三孫雲燦州同

列女

劉氏高懋妻年二十二夫卒撫遺孤文昌由貢生入監肄業諸名士甚推重焉守節三十年有司廉其實表其門陳氏高校妻校舉於鄉卒氏年二十一守節三十餘年訓遺腹子文光亦舉於鄉嘉靖中事聞旌表

沈氏適同里熊姓姑鄒苦足瘡痛劇呻吟不絕聲沈晝夜侍左右無難色家貧每至農時爲里人代鎰受雇獲所鎰或食物不宜於瘡者卽與同侶易他物歸忍饑以獻姑瘡需茶洗不能得見有棄地殘葉燂湯敷貼患處姑安始就榻否則通夕不寐一日姑手扶壁爲洞一竇沈

問故姑曰汝孝通天吾臥病久暗室不覩白日今開一
隙庶幾天監汝孝賜汝貴子耳沈尋生子膏後與姑俱
以遐齡終膏即中丞也

參府志

胡氏太史袁宗道側室太史卒於燕氏年十六誓守節長
齋繡佛侍袁氏諸子姪如己出家無閒言上臺聞而旌
之

劉氏金陵人吏部主事侯偉時側室崇禎癸未隨偉時之
京師逆闖犯闕偉時知事急陰以氏送某所實贈之氏
拒絕歸謂君早自匿勉圖報國第封置我一室中勿以
爲念偉時如言脫身去氏自領至履俱以線密縫然後

自縊賊平針匠康德甫黃岡人買棺葬之

侯氏吏部侯偉時有三女一適田生值流賊至舅姑驚惶
莫措女曰無憂兒就掠一室可免晚當尋兒於紀湖之
淵語竟賊挈之去翼日尋之不得後五日復涕泣往尋
屍乃冒水出面如生血自鼻流如泉適王生者避賊湖
中復蹈水死爲諸生孟兆泰之妻者亦烈婦時兆泰被
賊執不屈死侯氏聞之竟以身殉

侯氏侯偉時之姊李萬年之妻萬年性豪邁能文章未壯
而沒氏年二十七事姑孝子友松親課之稍長延弟令
邱課於家知縣高欲爲請旌力辭曰守節婦人恆事何

旌爲卒後松以順治甲午舉於鄉

張氏年十四適毛璣三月璣亡誓守節操持嚴謹家人子
姪罕得見其面女婢不通外語袁中郎言於邑宰錢允
選詳請上臺旌獎免其丁糧年七十餘卒明萬歷時旌

府志作
貞女

龔氏諸生鄭名世母崇禎癸未爲賊所執使誘其子降許
以富貴氏罵賊死賊焚其屍

王氏袁中郎側室揚州人中郎卒時生子岳年未一月氏
年十七守節撫孤三十餘年教子讀書成立後遭難隨
子辟地江陵龍灣市賊忽大至時家人已登舟不及待

倉卒趨鄰舟拒不受爲賊所及欲掠以去氏詈罵不肯
行遂遇害年五十歲

按中郎卒後有妾王李韓皆江南人俱以少年守節李隨養於嫡子彭年慈愛端靜年六十餘卒於粵東彭年爲發喪持服雖忘者以此譽議弗顧韓亦備歷艱苦年七十餘始卒李韓無子皆善終而王氏獨慘死亦可哀已

毛氏監生鄉賓田學謨妻無子妾王氏生子三撫之如己
出乙酉冬爲流賊所執罵賊不屈死長子知府鍾雨每
言及遇害事輒淚注不能已

龍氏毛士登妻夫生而瘖氏力持家政夫亡年未三十無
子遭世大亂有勸以改適者又有非義相干者皆怒罵
以死拒之六十年貞操益勵

孫氏江陵沙市人高邦久妾嫡李氏嚴馭之邦久憐其劬勞遣歸且令他適氏斷髮自誓越五年嫡卒欲擇繼室有言氏自矢狀者遂迎歸偕老焉性慈甚見有負戴者必詢其飢渴而飲食之皈依大士茹淡多年嗣流賊搶攘佩珠念佛不動賊敬之釋又去後寓宛陵年七十吳中士大夫賦詩贈頌子重望舉人孫正儀進士

毛氏刀環里縣學生陳用中妻年二十九夫亡家貧三子皆幼茹苦撫之次子士璉康熙癸卯舉於鄉

毛氏侍御毛羽建女適邑庠袁汝成年三十成卒無子矢志守節薙髮長齋以壽終

羅氏諸生蕭鼎都妻舉人羅遇曰女夫妻至孝奉姑袁避
難九谿山中袁即蕭公中丞嫡配也爲賊所執賊欲掠
羅去不從先殺其姑以恐之羅大罵曰賊奴殺吾姑吾
夫妻豈復從汝求活耶何不先殺我令吾夫見之遂俱
遇害

曹氏明漢中太守曹公子微之女孫邑庠沈逢盛妻事舅
姑復事繼姑俱以孝稱明末流賊殺擄所過如洗沈生
舉家避兵東鄉訛傳賊已退返其室晨炊未熟賊忽至
氏揮其夫挈三子亟去自誓一死遂罵賊遇害賊退收
其屍見其袒服襦襪皆縫紉始知其蓄志久已

龍氏貢生龔家齊妻年二十九夫亡撫遺孤事翁姑極孝
龔故方伯世家忽中奇禍而家落氏令僕婢皆習操作
延師教子及孫曾多遊泮者龔氏之業賴以復振年八
十卒

張氏名淑嬋華容貢生張希价女歸縣學生周應嵩翁遠
宦河州卒於官時嵩病訃至慟哭而絕淑嬋年二十五
矢志養姑教其子女會流賊劫其姑嬋冒刃脫之燈火
下賊不之覺兩子及孫皆縣學生長子用霖早卒妻馬
氏妾劉氏皆守節女適陳亦甘心爲未亡人次子操南
斷絃不續兩女婢亦義不再匹

袁氏總戎牟光世妻崇禎癸未兵變遇賊與妾王氏俱抗節不屈死

曹氏崔蜀觀妻明末流賊寇公安欲犯之罵不絕口賊怒支解之

陳氏杜光先妻年二十八夫亡奉姑孝教子詩食餼後考貢苦節四十六年康熙乙未知縣沈寅表其門尋建坊

李氏儒士龔學遇妻周氏遇弟學述妻李氏年二十三周氏年二十一皆寡先是李有子二周子其一未幾俱殤兩氏相依益厲初志時翁爲濟南郡佐姑在家疾革兩

氏齋戒拜斗求以身代夫弟學代幼撫而教之食餼康
熙五十七年學憲李 賜冰雪雙清額

鄒氏魯陂里石有章妻年二十五夫故當賦役繁興瀆逆
鼎沸之時氏矢志守節閉戶操作奉堂上盡禮次子羽
噪聲庠序夫兄夫婦早逝撫其子女如己出

王氏魯陂里魏家璧妻年二十三夫病侍湯藥唯謹夫囑
其父母謂氏年少無子可令他適氏聞之慟哭不已許
以一死從地下及沒絕飲食舅姑百計勸慰氏曰侍奉
有兩叔不須我也遲之二十七日防守稍疎赴水死

杜氏余曰昊妻年二十而寡子在襁褓姑年邁夫遺命不

可以死當善視老幼氏泣受命備歷艱辛卒成夫志

張氏東村里王潔妻姑病氏割臂肉以啖姑久臥病是日忽起未幾姑又病其夫效之弟婦潘氏亦效之署縣張賜一門三孝額

周氏谷昇里陳家祚妻年二十祚亡父兄以其家貧無出令改適氏死拒之以節終

龔氏邑庠司馬寬妻年二十四寡氏讀書明理時大亂將作奉翁姑率其屬遠避武陵雖在流離孝養備至子應運年十六游泮

萬氏廖解里袁又閨妻閨祖雄於皆亂後蕩佚及完娶一

意下帷二十游泮二十八病革囑氏以必靖家難比沒
氏風雨漂搖卒完巢卯子惇典惇仁縣學生孫敘兩敘
品國學生茹素三十載卒年七十六先是家有箭樓一
座改造雙樓以示恢張其亦不愧所囑矣雍正癸丑學
政蔣題請建坊

文氏縣學生袁惇稔妻年十八寡無出父母欲爲改適氏
覺毀面慟哭誓不求生乃命以夫兄貢生惇稔之子敘
緹嗣之以節終

馬氏縣學生龔家讓妻龔故世家內外都不事事後翁爲
無賴所搆家且破又值西山用兵軍供繁難氏雅習勤

苦故業少復年二十九夫故延師教子伯仲俱監生孫
曾十餘人

涂氏長安里郝碧廷妾年十九廷沒一女在襁褓以柏舟
自矢初碧廷繼室妒廷疾革時分給產業房屋令氏母
女相依後繼室以碧廷孫女許字伊前夫之孫奪氏所
有而予之氏無以自存控諸邑照囑斷給並憫其苦節
以燕樓媲美四字獎焉

馬氏縣學生李漸妻公姑早逝事祖姑極孝遭流賊劫火
之後家人散盡氏親操井臼俾夫一意舉業未幾夫沒
時氏年二十八撫兩孤子長子與孫嘉兆俱入泮苦節

四十餘年終

鄒氏縣學生陳士恭妻保昌知縣陳鼎中冢婦壽光知縣
進士鄒養赤女舉一子早殤年二十三夫故以夫弟之
子嗣教之入監夫弟沒遺弱女撫而教之如己出三孫
皆能成立以節終

萬氏縣學生李之楨妾生一子嘉德甫五歲楨沒氏矢志
孀守教子游泮孫男十二每夜讀書聲琅琅不輟年七

十餘卒

以上舊志

李氏季燦之妻年二十三夫亡姑年七十子未週歲夫目
不瞑氏泣曰養老撫幼妾俱任之乃瞑氏卒踐其言雍

正八年 旌

李氏監生劉文訓妻年十七于歸五載夫故撫二歲子光前入監初其翁爲盜所迫氏毀粧垢面冒刃救翁得免
雍正三年建坊

陳氏饒商六妻年二十八夫亡撫遺腹子姑疾不能飯氏朝夕哺之年餘疾愈苦節二十三年乾隆二年建坊

劉氏雷自聲妻年二十六夫亡值吳逆倡亂氏攜子避難流離轉徙不忘教讀守節三十年乾隆三年 旌

李氏孫文炳妻炳幼失怙恃依叔父母以長旣沒氏奉之一如舅姑守節三十餘年乾隆四年建坊

劉氏高司南妻年二十一夫亡撫繼嗣姑老多病以哭子
失明氏朝夕祈禱越二載目有見氏年六十二卒乾隆
七年建坊

劉氏長安里高郢城妻年二十三夫亡無子以姪琦嗣後
入監乾隆七年建坊

劉氏毛廷璫妻年二十八夫亡奉公姑育孤子承上就職
州同乾隆十三年建坊其媳彭氏亦早寡依姑苦守建
有雙節 誥封祠

袁氏朱士林妻年二十八夫亡乾隆四年鄰不戒於火時
嫡姑殯於堂氏號泣曰姑柩若焚我當同死俄風反火

滅事繼姑盡孝撫嗣子成立守節二十餘年乾隆十七年旌

王氏司馬應騏妻年十六歸騏六月夫亡舅姑連喪哀慟幾死終身茹素娣姒皆憐而敬之雍正三年旌

冉氏張世貴妻年二十誓死守節孝事公姑教子成立雍正五年旌

黃氏張韜之妻年二十八夫亡姑年逾七十子甫四月氏奉姑鞠子茹苦完貞乾隆三年旌

王氏陳開萊妻年二十三夫亡無子氏奉事舅姑撫育繼嗣後三十年嗣子又沒遺孫甫二歲氏復同媳王氏鞠

之乾隆三年 旌

唐氏李士敏妻年二十九夫亡姑喪明氏扶持惟謹教子成立守節二十六年卒乾隆五年建坊東港

王氏劉毓珍妻年二十九夫亡氏奉事翁姑鞠育孤子乾隆四年 旌

朱氏郭士麟妻年二十九夫亡氏奉姑育子矢守不渝乾隆四年 旌

毛氏縣學生范文元妻年二十八夫亡無子氏孝事舅姑長齋奉佛乾隆四年 旌

饒氏袁夢松妻年二十七夫亡奉事孀姑教子成名年八

十無疾端坐而逝乾隆四年 旌

張氏譚佑我妻年二十七夫亡無子撫育繼嗣後嗣子又

亡遺孫僅二月氏復辛苦鞠育乾隆六年 旌

謝氏縣學生曹三省妻年二十五夫亡僅一子九歲而天

乃撫繼嗣同姑孀處乾隆六年 旌

周氏陳家璧妻年二十八夫亡孝事公姑未幾公沒與姑

相依教三子俱成名乾隆七年建坊

陳氏楊僑文妻年十八夫亡家貧子幼氏勤紡績以守乾

隆七年 旌

汪氏游大連妻年二十三夫亡無子奉事公姑撫育繼嗣

乾隆七年 旌

程氏劉青遠妻年二十七夫亡奉事舅姑育子成立乾隆
七年 旌

張氏嚴世亨妻年二十八夫亡未幾公亦沒氏竭力奉姑
撫子乾隆八年 旌

龔氏唐彩嶼妻年十九夫亡無子立嗣以主夫祀乾隆十
年 旌

趙氏樊國棟妻年二十六夫亡奉養翁姑課子成立乾隆
十三年 旌

劉氏戴世傑妻年十八夫亡無子繼嗣連天備極苦辛矢

志壽終乾隆十六年 旌

高氏鄧振鷺妻年二十五夫亡撫三子成立守節五十六年卒

王氏鄧傳忠妻年二十四夫亡孝事舅姑嚴課孤子守節五十九年卒

許氏黃家裴妻年二十九夫亡遺二子撫之成立長子維烈娶桑氏五載維烈亡氏復同媳撫幼孫守節四十九年卒

張氏李之宏妻年二十五夫亡奉舅姑撫孤子守節三十五年卒

陝氏邑庠生陳家煥妻年二十五夫亡孝事孀姑課子勤學守節四十六年卒

周氏陳家祺妻河州知州克友之孫女年十六歸陳二十
六夫亡事姑撫子歷節四十七年卒

張氏楊懋煊妻年二十四夫亡遺一子娶婦後子復夭乃
立繼嗣與媳同守苦節二十九年卒

鞠氏周中烈妻年二十四夫亡奉翁姑撫遺腹子守節二
十五年卒

周氏鄒莊勛妻年二十六夫亡孝事公姑撫孤成立守節
二十九年卒

周氏李開連妻年二十八夫亡守節四十三年卒

王氏蘭逢谷妻年二十四夫亡守節四十四年卒

雷氏陳柱國妻年二十夫亡守節三十五年卒

許氏鄒養成妻年二十四夫亡守節四十一年卒

張氏粟月安妻年二十六夫亡守節三十八年卒

陳氏監生王順德妻年二十九夫亡守節三十四年卒

李氏龔傳紳妻年二十五夫亡守節三十八年卒

樊氏范如山妻年二十六夫亡守節三十七年卒

沈氏鄒莊勉妻年三十夫亡守節三十一年卒

周氏陳楨國妻年二十七夫亡守節三十五年卒

趙氏龔經鎬妻年二十四夫亡守節三十八年卒

李氏熊彬玉妻年二十六夫亡守節三十五年卒

鄒氏李四岳妻年二十三夫亡守節三十七年卒

鄒氏陶承安妻年二十二夫亡守節三十七年卒

龔氏監生馬維容妻年二十四夫亡守節三十四年卒

雷氏陳炳國妻年二十二夫亡守節三十五年卒

馬氏鄒莊容妻年二十夫亡守節三十五年卒有司給額

獎之

薛氏竺志仁妻年二十六夫亡守節二十一年卒

蕭氏劉毓英妻年二十七夫亡守節二十九年卒

桑氏黃維烈妻年二十二夫亡守節二十二年卒

鄧氏杜志秩妻年二十四夫亡守節三十一年卒乾隆時

建坊

在舊城
考極右

孟氏袁敘政妻年三十夫亡守節二十三年卒

蔣氏朱之岳妻年二十三夫亡守節三十一年卒

楊氏趙完璧妻年二十九夫亡守節二十四年卒

鄒氏袁敘教妻年三十夫亡守節二十二年卒

高氏監生李嘉祿妻年二十夫亡守節三十一年卒

陳氏田遇世妻年二十七夫亡守節二十五年卒

高氏生員鄒莊楚妻年二十五夫亡守節二十六年卒

係府志

辛氏大同守備冉祚瑞之母繼姑有風痺疾氏扶持勤至
既而姑患他疾將死復嘗糞以驗差劇奉事七年如一

日康熙閒 誥封宜人

黃妙金妙銀天啓閒鄉民黃柏之女因父無嗣矢志不嫁
紡績養親皆年逾七十卒

龔氏高岱望妻崇禎末賊至欲犯之抗志不屈死子庠生
修儀媳劉氏見姑殞命抱持痛哭且大罵亦死於姑傍
賊嘆息而去

蔡氏鄧楚賢妻年二十四而寡子四歲越十六年子亡撫

幼孤備歷艱辛崇禎末氏遭賊掠自縊康熙初有司 賜
以額

李氏府學生伍蕞妻年二十八夫亡守節三十年牛里伍
家廠坊表尙存

毛氏州同高履直妻年二十八夫故子甫五月姑逾六旬
奉姑教子循分守節嘉慶六年建坊

王氏貢生龍學澄妻年二十八夫故撫幼子濬後就職州
同亦中年沒源楷納言兩孫俱幼復與孀媳張氏熊氏
撫之成立楷就職從九言縣學生氏樂施予武侯坑堤
潰衆無力修復氏捐數百緡堵築知縣盛濂卸任宦囊

空虛氏以父母官命子出五百金贈之梓里貧乏者周
卹甚衆卒年八十六道光二年學憲楊賜額同治四年
撫憲嚴 咨請建坊

陳氏魯陂里朱儒楹妻年二十一夫故遺子雲照僅八月
氏撫子完貞嘉慶九年建坊 誥封安人孫初埰理
問廳曾孫薰縣學生

吳氏監生彭世祿妻年二十一夫亡子光元幼氏督責頗
嚴守節二十九年後光元入監孫先庚入泮遂光八年
學憲王 賜額

余氏儒士朱有年妻年二十夫故以夫兄鳳年次子兆烜

嗣氏於嫂楊氏常敬愛之嫂曰娣何愛吾之甚余曰嫂止一子兆烜所鍾愛者而割愛以母吾吾敢忘嫂之德後烜就職訓導咸豐六年學使馮 獎以柏舟貽訓額咸豐十一年 旌七十八歲卒

龍氏廩生龍調元女監生譚世熊妻年二十四熊故無出撫夫兄庠生世勳子爲嗣時歲饑家貧父兄欲令他適氏對天誓志終身不歸省幼讀書能詩著有雪窗吟藁沒於水其警句云茶葉連根苦梅花透骨清積善終能大門戶安貧便是好兒孫二孫曾孫四長光斗辛亥鄉薦咸豐十一年詳請 旌表

羅氏儒士杜興烈妻訓導宜詩之母年二十七夫故時長
子詩三齡次子章甫六月人咸爲氏危卒能撫詩成名
章克家詩屢欲表揚以慰苦節氏曰守節分內事也何
名爲尋以同學呈請學使馮 獎以貞孝女宗中丞胡

獎以巾幗完人咸豐十年入告獲邀

旌典邑舉人譚光斗贈句九天丹詔輝彤管卅載幽光
透紫垣蓋不勝慶辛也並向其師枝江知縣朱錫綬詳
述其事朱公賦五古寄贈

牛湖清且漣麝山馨未已中有百丈松巖霜詎爲靡峨
峨昭諫家禮法備姆氏來歸浣花堂思振鳴珂里何圖

別鵠彈空嗟溟鷗徙身託慈竹生心隨井波死文犀掩
鏡奩金翠捐塵笥淚痕枯晝菽燈影柔爰倚繫卜王翰
鄰俾成杜華子壘篋雅曲調蜚序英聲起茹蘖卅年甘
松筠四時美喪祭哀且誠酒漿淡彌旨况復卹孤寒庶
幾恭桑梓麥舟古所難巾幗乃如此

璇題綽楔光閩德雲初紀小言綴家乘獨行補詩史褒揚
無溢辭請視荆江水

樊氏謝金華之室年十八于歸三載夫故子威泰甫五月
稍長訓之最嚴每至夫忌日必泣諭曰此而父與我永
訣日也汝克有成庶幾可對而父子後入監旋沒撫孫

性孝成立氏身歷多故中年失明至八旬頓炯然如少年時復自笑曰天開此老眼以見吾夫於地下也越三年卒曾孫龍光呈請建坊同治三年 旌

潘氏張家棟妻年二十五夫故甘貧撫子守節二十三年卒同治六年 旌

劉氏儒士高荆南妻年二十二夫故守節四十年建坊
葉氏沈宏緒妾年廿七守節八十餘卒前憲季 賜額

樊氏范文章妻青年矢志子國璽縣學生乾隆十八年府

憲張 旌表

王氏儒士晏明良妻良豪於貲沒時氏年二十四遺二女

遭家不造歷二十餘載始以夫從弟明椿子啟濤嗣咸
豐九年 題請建坊七十六歲卒邑選拔李澤濤贊曰
天胡爲而柱折地胡爲而維缺天荒地老有摧殘只未
亡人心似鐵

張氏邑城儒生蕭前珏妻年二十五夫故僅一女珏臨訣
時以家貧無子令氏自爲計氏泣指懷中女曰若非君
之門楣乎脫得佳壻君祀延妾志遂矣他何慮後贅業
緒就職縣丞同治二年 題請建坊

沈氏邑城儒士李盛源妻年二十七夫故家貧養老字孤
迄今年逾六旬笑言不苟咸豐十一年撫憲胡 題請

建坊

王氏儒士鄒敬典妻于歸四年夫故越十七日氏自刎方其垂歿也喘息囑夫弟簡堂曰余於乃兄義不獨生祖宗之祀乃兄之嗣惟叔是賴邑大史毛業溥聞而贊之曰此巾幗中烈士也使彼不爲婦人天下豈復有奇男子哉乃死計已決猶遲以十餘日慷慨之中仍有從容之致至不惜其身之死而獨念其夫之祀非所謂能見其大者歟乾隆閒建坊載省志嗣子振讓廩貢選黃梅訓導孫美中廩生曾孫崇泗廩貢生崇漢丙午解元易氏特邱里易秉恆女甘鍾仁妻年十九于歸翁病氏刲

股療愈嗣以不得於繼姑見棄秉恆憐其無罪擬再醮
氏聞之投河遇救旋於夜分自縊邑訓導杜宜詩等據
情稟請前知縣徐步雲批云條不干乎七出緣忍斷於
三生自知若翁卽吾翁菽水何妨嚙臂弗因不慈而不
孝糟糠尙願承顏天還待補並非謂夫也不良月可重
圓豈敢望父兮生我是以柔情欲斷語未聞姑惡之聲
血淚旣枯身竟化女貞之木其心愈苦其死彌甘氏志
節已昭著矣旋經撫憲胡採訪題 旌

趙氏儒士趙璧之女增生陳善之媳翁沒其夫蕩盡家貲
逼氏再醮氏旣慟翁姑之不祀又懼弱質之難全於是

棄二幼女服毒死時年纔二十有三同治四年詳請建坊教諭王慰看語云節取乎直直以曲致婦取乎順順以逆成當生若死雖死猶生節而兼烈巾幗畸人

龐氏儒士鄒崇瀛妻年二十一而寡以夫從弟舉人崇漢之子高煒嗣守節三十五年其娣牟氏崇濂妻十七而寡以夫從弟崇洲子高垣嗣守節三十年一門之內冰霜共勵二氏皆監生積中媳也積性仁厚而子皆蚤喪有媳若此積日暝矣龐氏同治十年咨

部建坊高煒食餼高垣貢生

汪氏陳緯國妻年二十五夫故守節五十年乾隆二十九

年建坊

司馬氏牟芹來妻年二十八寡子作玠甫二歲作琳纔週歲家貧苦守督兒誦讀紡聲不輟書聲不敢住後作玠補郡增生氏七十八歲卒乾隆二十四年學憲戴 賜以歐菽柳丸額

陳氏廖解里司馬光海妻無出妾舉一子名盛學年二十餘姑與妾繼逝撫子成立未幾子亦沒無孫與媳袁氏相依苦守乾隆三十七年學憲邊 賜額

王氏監生梅正茂妻年十七守節乾隆時 旌

易氏按察使照磨甘鳴岐妻年三十夫沒氏屢歷艱險終

始一節夫弟監生鳴先後數年亦沒與娣婦易氏兩寡
相依撫子受和成附貢兼承二祧七十四歲卒娣婦現
年七十餘同治十一年 旌

雷氏沈永貴妻年二十一守節七十四卒前憲李 賜額

韓氏李應綺妻年二十于歸逾年綺亡以姪世棟嗣弱冠
爲縣學生嘉慶七年學憲茹 賜額

陳氏東村里周汝明妻年二十八夫故矢志守貞卒年六
十七歲嘉慶十三年學憲涂 賜額次子仕燮入庠

關氏彭修業祖母少寡而貧撫子娶媳方抱孫而子亡媳
爲母家奪志遺孫修業哺乳無人氏割豕肉爲片曝乾

熟嚼而食之孫善病氏日夕呼天迄就外傳憑縫襪以
供束修嘗雪夜讀偶倦氏泣曰汝少孤祖若父四目炯
炯從泉下望且訶且泣且縫達旦矣修業後爲府學生
嘉慶十六年學憲鮑 獎以貞壽慈徽 額

陳氏章正禮妻年二十守節嘉慶二十二年學憲沈 賜
額

程氏高傳瑛妻年二十守節六十餘歲卒嘉慶二十二年
學憲沈 賜額

甘氏縣學生陝身仁妻仁隨父尙舉鄉試沒於省氏年二
十七養老字孤甘心苦節嘉慶時學憲 賜額

鄧氏西辛里貢生羅才標妻年二十一標沒守節三十七年嘉慶廿二年學憲沈 賜額監生光先其子也

鄧氏歐陽家和妻年二十一夫亡守節嘉慶二十五年學

憲楊 賜額

高氏陳士智妻年二十四夫亡苦節四十六年卒道光二
年學憲李 賜額家進祠祀焉

吳氏儒士易鴻範妻年十八于歸三十夫故撫七歲子顯
槐後入監孫德光國光珩光俱入監楚光把總曾孫秉
仁元孫體元俱縣學生年七十八卒道光二年學憲李

賜額

劉氏千總晏光珏妻年二十九夫沒守節道光八年學憲

王許均 獎以額卒年九十一子明鎮監生承烈訓導孫

曙鑾訓導曙奎廩生曙泉庠生

陳氏王國臣妻年二十七夫故國臣原江陵人遷邑之平

樂里內外無強近親氏艱貞自矢教子士富入監孫化

隆曾孫植森俱入泮九十三歲卒道光時學憲王 賜

額咸豐十年 旌

沈氏監生雷開子妻年二十九夫故氏撫二子獻莘獻荃

國學生荃娶龔氏未數月荃卒龔年甫十八沈以莘長

子洪勳次洪煦爲之嗣當是時沈視龔若子龔倚沈爲

命姑娘完貞厥後勳爲附貢煦入國子監則姑娘守貞
之報也道光丙戌 旌學憲王 賜以兩世清操額

陳氏監生楊澤浩妻年二十八夫故矢志不渝撫長子曰
嵩孫維學俱入監曾孫西序貢生國棟國楨俱武生道
光丙戌學憲王 賜額

傅氏特邱里高傅沅妻年二十六夫故家貧無子撫夫弟
爲娶婦生子炳忠嗣之守節五十五年道光丙辰學憲
王 賜額

張氏高同級妻年二十八夫亡以姪監生履興嗣守節四
十七年道光戊子學憲王 賜額監生泰璧邑庠訓典

其孫也

趙氏大光里杜宜俊妻年二十夫故子幼姑瞽家貧恆忍
飢以奉姑撫子苦節三十年卒道光戊子學憲王 賜
額

鄒氏儒士沈獻璧妻年二十一夫故子廷秀甫數月姑年
近八旬奉姑鞠子守節六十年道光丙戌學憲王 賜
額

崔氏蘇澤齊妻夫沒氏年二十二侍祖姑及姑病刲臂以
救守節六十一年道光丙戌學憲王 賜額

張氏汪世勳妻勳沒氏方二十餘矢志孀守姑病刲臂啖

之愈次媳陳氏遠輝妻亦以節著姑張氏病亦刲臂啖

之學憲王 賜額

羅氏甘誠中之妻年二十九夫沒氏守節八十三歲卒學

憲王 賜額

成氏甘開揚妻年二十六夫故後其子弱冠亦亡氏守節

數十年卒學憲王 賜額

洪氏高同亮妻年二十七夫故家貧子幼矢志以終學憲

王 賜額

張氏鄒宣讓妻年廿八守節六十九歲卒學憲王 給額

劉氏毛業遂妻年三十夫亡守節二十六年卒學憲王

給額

嚴氏朱克聖妻年二十守節以節終學憲王 給額

王氏陳代任妻年二十二夫故撫遺腹子昌友友生子長

忠德次忠饋監生饋子潤章增生道光八年學憲王

賜額年八十三卒

鄒氏朱初垣妻年二十二守節以節終學憲王 給額

楊氏許正顯妻年二十三守節以節終學憲王 給額

朱氏龔家輝妻年二十五守節以節終學憲王 給額

易氏薛敏學妻年二十六夫亡撫遺腹子成泰苦節四十

三年道光六年學憲王 賜額

張氏蘇夢誥妻年二十七守節同媳田氏俱以節終學憲

王 給額

林氏劉宗典妻年二十九守節以節終學憲王 給額

徐氏汪相鼎妻年二十八生一子佐峻三十孀守撫孤成

立學憲王 賜額

何氏袁遵進妻年十八守節以節終道光十年學憲許

賜額

田氏儒士袁前璠妻年二十五夫故撫子憲儀娶媳田氏

子復故時媳年二十四姑守節四十七年媳守節三十

三年同治五年前縣袁詳請雙 旌

何氏蕭禮達妻年二十而寡子智性甫週歲氏撫子完娶
二載子沒媳杜氏寡姑撫子信誠成貢生道光十二年
學憲吳 賜額

鄒氏易顯德妻監生易光連母年二十夫沒連甫六歲忍
死撫孤年五十卒道光十二年學憲吳 賜額

鄭氏武昌人訓導鄒振讓側室侍振時年十九三年振沒
閱二載其兄迎至家微諷之氏急買舟回指漢江曰吾
不復渡此矣與兄絕者二十年道光十六年學憲朱
給額

王氏張卓行妻年二十九守節七十六歲卒道二十年學

憲朱 賜額

毛氏監生陳昌極妻極病刲股進之愈越二載極沒氏年

二十八守節年七十六卒學憲朱 賜額

鄧氏黃光天妻年二十二夫故矢志撫嗣子事公姑並祖

公姑年七十七無疾而終道光己酉學憲龍 賜額

徐氏

牟振芳妻年廿四守節撫子治志治怒成立 學憲王賜以砥節懷清額

雷氏熊先貴妻年十九夫故誓守翁年九十病危刲臂進

之愈咸豐九年學憲俞 賜額

李氏司馬維定妻年二十八夫故守節三十六年卒邑侯

賜額

李氏州同劉雲衢妻守節四十載卒逾七十道光二十五年學憲王 賜額

王氏白湖里陳家鰲妻年二十夫亡子盛楚甫二歲氏矢志撫之少不率教未嘗寬貸由是克守先業就職衛守備同治四年學憲孫 賜額現年六十有二

邱氏州司馬鄒敬恭之妻姑陳氏患目疾而眇氏辦香潛禱未卽痊乃刲臂勸餐立愈姑歿事乃著緘默數十年不忍一言以傷姑心學憲邊奏請 旌入省志卒年八十有二

羅氏陝以明妻年三十夫故姑疾氏刲臂和羹以進以草

根貼治臂痕姑娘媳俱安邑侯 賜額

鄒氏縣學生司馬登甲妻祖翁千總盛桂病篤割股救愈

咸豐七年學憲馮 給至孝難能額

張氏州同朱克平妻割股救姑府憲張 賜額

彭氏劉文煥妻割股救翁學憲馮 賜額

鄭氏監生高壯勳妻勳就外傅氏侍姑疾不懈割股和藥

進之愈學憲王 賜額

甘氏袁前桓妻年十八于歸性至孝繼姑病臥月餘不起

氏割股和藥以進愈學憲王 獎以天鑒誠孝額

劉氏樂平里田能剛妻夫亡守節以終道光戊午學憲

王 獎額

蕭氏龍學珍妻年二十夫亡子淵煜幼家極貧紡績奉舅
姑道光年間 旌

魏氏陳寅厚妻寅故氏年二十二矢志守節道光年間學
憲朱 賜額現年六十有五

司馬氏侯補齋奏廳易盛光妻年二十九守節五十四歲
卒子秉基貢生次秉堅監生三秉型同治十一年 旌
袁氏楊乘標妻年二十八守節現年六十三歲同治五年
旌

胡氏貢生羅才柱妻學憲王 獎以儒門淑節額

席氏國學生羅才珩母學憲王 獎以節孝可風額

毛貞女司馬有泰聘室未婚泰沒女年二十二親製素服
往臨憑棺慟極誓以身殉後立姪爲子五十年如一日
前知縣鳳 賜苦心守貞額知縣張 賜松筠冰霜額
知縣施詳入省志嘉慶十四年建坊

鄒貞女舉人鄒敬謨女字湖南安鄉縣羅山親迎有日羅
疾革女聞悲悼母詰之則云願往侍疾詣羅甫二日羅
沒女曰予未亡人也何生爲但以有兩白首在他日謀
所以嗣之可報夫子於九原矣柏舟自誓事兩幃數十
年如一日安鄉士民建烈女橋故址尙存

張貞女江陵舉人張之曙季女女讀書明大義許字邑庠
生李向春長子世樸年十四墮溺於江時女父已故母
與兄將另議婚女恚曰兒李氏人也止知守父之前言
不敢從母之後命母知其志不可奪擇日歸李氏後以
叔世極子爲嗣子慧甚四五歲時氏口授詩句悉能背
誦無何以疾殤痛極與子偕亡卒年二十世極就墓後
立祠祀之道光癸未學憲李 獎以蘭閨蘊璞額邑人
士爭爲之誄知縣太史陞炯賦詩贈之

一摘葵葉落再摘葵葉稀
葵葉泣朝露清淚夾沾衣
雙鸞未成羽一鸞已孤飛
江北望江南東流不復西
堅

心逾金石不使慈幃知阿兄窺其意勸母託微詞上堂
啟阿母父書熟兒時此身已許人
生死以爲期有志難
相強嫁娶不須提古鏡歸半面半面知不知是日三月
初江豚隨風吹素衣及冰泮天色慘悽悽風息波如掌
精氣足感之居然修婦禮見者雜喜悲二十有餘載井
臼苦操持轡軒採軼事蘊璞錫蘭閨撫姪爲己子揚烏
忽又摧嗟哉命不辰九原得依歸吾來學製錦見聞悔
已遲聊爲貞女吟起立增歎歎諸生紛歌詠貞珉勒崇
祠寒泉薦秋菊再拜仰芳徽

楊貞女監生楊德恕女許字舉人袁潤長子未婚而袁沒

訃至女往弔慟不欲生父母憐其少欲諭解之相見必
涕泣不能開口長齋五十一年卒後學憲 賜額獎之

陳貞女白湖里劉漢斌聘室未成禮而斌亡女泣求往弔
遂不歸奉公姑撫從子卒年四十乾隆間 賜額

毛貞女縣學生毛承祐女舉人毛維煥孫女幼許字松滋
監生伍翼權子燧後翁捐館燧且天女未于歸訃至女
聞號泣蒙頭臥氣絕母救之甦詰其志泣曰求往伍宅
一弔及往誓奉姑以終姑憐愛之相依五載姑又病且
革遺季子纔六歲以付氏曰伍氏祇此一綫幸汝植之
我當告之忠襄祖公於地下氏泣受命撫之成立嗟乎

衣冠僞道學往往改顏事仇至於幽閨少寡若毛貞女者無一日之伉儷矢百年之艱貞以不忍成其堅忍發世人無限惻愴羞惡之心不可以懸日月而泣鬼神也

哉舊志

汪貞女年五歲許字陳士溼將嫁溼沒女聞悲號因請於父母之夫家行服遂不歸越五載父母憐其無依潛許配秦氏子女聞翦髮毀面誓不生事乃寢後立夫從子爲嗣茹荼飲泣三十餘載如一日

王貞女許字張應選未婚應選入蜀貿易三十餘年無音問女矢志依母以居與舅姑比鄰凡舅姑生養死葬女

皆肩之行三年服無笑容

王貞女乾隆時人葬板橋西塋地約畝許縣學生杜必清爲之立石至今稱其地爲老女碑

馬貞女馬有鼎之女許字汪姓汪遷鄖陽縣頻年催其回籍未果母欲奪志不允守貞至三十七歲卒葬馬家橋建有烈女碑記

彭貞女彭文龍女許字陳顯廷廷十歲而殞女泣求往視殮畢曰此我家也父母迫之歸有議婚者則向隅哭憤鬱而病沒時囑其父母合葬壻墓弗聽一夕陳父母夢女請歸葬明日彭人至夢亦如之遂合葬焉

陳貞女郭明善繼聘未婚而善沒女至郭家事公姑撫前
子篤志守貞有微諷之者女正色曰女子不再字斯言
胡至於我哉卒不渝

蕭貞女西辛里廩生蕭銘炎女許字王崇鑿鑿沒塾中女
誓不再字素服三載而亡

蕭貞女魯陂里蕭知原女許字王姓及請期女忽病羣醫
均云不起王遂婚他姓後病愈聞之憾曰渠何忍遽死
我乎立焚奩資誓依母家以終年七十二卒

李烈女兄嫂偶外出獨浴室中鄰人葉某至其室欲犯之
女大聲詈罵乃逸後兄歸女訴知其事遂自縊有司捕

葉置於法乾隆十九年 旌

沈烈女邑庠生沈宏謨孫女許字張姓有戚楊某欺女父
仰占懦驀受某聘貲嘉慶丙寅張親迎有日矣楊乃嗾
某誣仰占悔婚控於邑並率衆刦女女匿得免忿恚不
食或勸之女曰吾父在家猶啞啞一經庭訊胡能自明
且吾以深閨處子蹀躞公堂千人共覩辱莫甚遂投水
死時知縣任鄙佑審得實寘楊於法餘黨論如律題其
碣曰烈女沈五姑之墓

司馬烈女監生司馬尙德女幼與陳氏訂盟及于歸有亡
賴子劉突以先聘爭乘夜執火入室女辟匿刦母與兄

去女悲憤絕食三日自縊鳴諸邑寘劉於法

蘇烈女西幸里蘇裕德女許字陳懋榮兩姓操舟爲業年已及笄同泊涂郭巷數日榮沒女設位哭奠寢食俱廢父母憐之侵晨視女已作蟻磯就義矣因葬榮墓側前知縣李棟誌其碣曰蘇烈女之墓

熊氏監生雷文進妻進沒子哲獻甫二歲氏撫成立僅一孫洪潤甫一歲而哲亦沒與媳王氏相依孀守咸豐七年學憲賈 賜額

陳氏薛純學妻年二十九夫沒氏撫子苦守年九十四
司馬氏牟士鐘妻年二十七夫故守節五十年子縣學生

有倫妻袁氏年二十六倫故守節五十一年倫子昭來妻雷氏年二十四昭故守節四十八年

鄒氏文承偉妻年二十夫亡姑患廢疾喪明氏扶持四十餘年不少懈事庶姑以孝聞教子成立年七十九歲卒姚氏鄒諫毅妻年二十一生一女夫亡家貧翁姑卒無力殯葬鄰族助焉夫弟尙幼殷勤撫之後夫弟亦卒依壻以節終年五十四

伍氏鄒莊琴妻年二十一夫亡事翁姑撫繼嗣翁姑相繼喪辛苦營葬以哭泣過哀羸卒苦節二十四年

羅氏縣學生鄒毅暹妻年二十一夫亡奉翁姑撫孤子沒

遺孫二復同媳鄭氏撫之守節四十年卒

李氏文前武妻年二十五守節以節終

李氏侯宗士妻年十九夫亡無子守制三年有諷以再醮者氏遂自縊

毛氏鄭登鰲妻年二十二夫亡守節四十四年卒

張氏田汝榮妻年二十七夫亡守節四十二年卒

祝氏邱生赤妻年二十八夫亡守節三十六年卒

涂氏文昌緒妻年二十五夫亡守節三十五年卒

沈氏侯學敏妻夫故時氏年二十七守節三十一年道光

五年學憲李旌

張氏朱衍宗妻年二十二夫亡守節三十一年沒

易氏楊先明妻年十九夫亡守節三十年沒

曹氏王文鳳妻年二十夫亡守節五十三年沒

田氏楊大陽妻年二十六夫亡守節四十六年沒

袁氏田燕妻年二十四夫亡守節四十五年沒

羅氏馬恆紘妻年二十夫亡守節四十二年沒

馬氏鄒莊勅妻年二十五夫亡守節三十年沒

王氏監生薛文紀妻年二十四夫亡守節三十八年沒

張氏冉惠士妻年二十七夫亡守節三十二年沒

張氏楊俊儒妻年二十八夫亡守節三十年沒

成氏毆陽正邦妻年二十六夫亡守節三十一年沒

王氏馬維堦妻年二十一夫亡守節三十年沒

許氏唐官爵妻年二十五夫亡守節二十五年沒

田氏龔經人妻年二十二夫亡守節二十八年沒

彭氏陳國語妻年二十一夫亡守節二十九年沒

金氏呂宏釗妻年二十九夫亡守節二十一年沒

袁氏李學恕妻年十八夫亡守節二十年沒

徐氏監生文偉明妻年二十三夫亡守節二十六年沒

張氏刀環里林日窳妻年十六于歸後八載忽墻屋傾圮

翁姑夫俱斃氏苦撫子家計稍紓諸孫林立卒年八十

有四

劉氏張貽槐妻年二十六夫亡矢志六十餘載季子訓溥
府學生孫敦恆敦曄歲貢曾孫德瑜縣學生

何氏平樂里田昭曠妻年二十九夫故孀守喜讀向太史
文集善諷詠號所居曰晚翠軒長子汝偉遊泮志喜云
乞取幽蘭手自栽王凝有子采芹回廣寒宮裏丹枝好
勉襲天香入卷來咏梅云映水枝橫孤月影當窗雪牘
一天寒他警句甚多其曾孫生員國熾往往誦之

吳氏平樂里王承珏妻年二十二夫亡家貧乞米奉姑撫
子守節七十七歲卒

李氏司馬德璋妻舉人李也白之曾孫女姑韋氏病三年
餘氏侍牀褥日濯穢污姑謂曰汝事我如此願汝媳皆
似汝則余死瞑目矣後媳李氏果相肖焉

馬氏熊永泰妻年十六于歸匝月夫外出積年無著有議
以改適者歸母家自縊而亡

喻氏喻遠鵬季女年十七適張姓道光己酉奇荒訛傳其
夫有更嫁事氏聞之投水死

楊氏邑城李祥炳妻咸豐辛亥奇荒隨夫至斛湖堤告貸
無出炳欲自盡令氏再醮謀生氏曰君死妾何忍獨生
遂俱投江死

司馬氏儒士鄒友讓妻于歸甫一載夫沒撫嗣子兌中生
一孫亦不育苦節以終

劉氏魯陂里魏順綱妻年二十九夫亡家貧止一女以姪
成孝嗣未幾子沒曰此身已矣飲憾而卒

司馬氏袁廷樞妻年二十四守節六十歲卒

甘氏鄒鋤中妻年十九鋤亡撫遺腹子崇璋並撫夫所囑
嗣子崇續無異己出翁早世事姑極孝五十五歲卒

胡氏丁光綸妻年二十守節五十二歲卒

喻氏沈田玉妻年十八于歸二十二夫故生二子一女其
一子遺腹生道光壬辰奇荒兩叔逃亡氏每得少許米

以奉瞽翁及子女已則專啖菜根後二叔歸翁就叔養
常以拂意恆悒悒氏復迎歸翁卒殯葬皆如禮

陳氏監生易馥光妻年三十夫亡守節禮法自持子女婚
嫁籌畫無遺策現年八十猶健長子秉經從九

吳氏袁大彥妻年二十五夫亡守節七十七歲卒

鄒氏易光泗妻年二十一夫亡撫二子未幾天以姪秉鈔
嗣鈔復亡撫孫成立六十八歲卒

李氏袁大明妻年二十九夫亡守節二十年卒

張氏袁大昭妻年二十四夫亡止一女復天以姪嗣五十
三歲卒

李氏王應連妻年十七于歸生子一女二連卒家壁立得
母家經營始成葬後遇堤潰氏抱兒立水中時有鄰船
呼與暫避氏曰我寡婦也而上若船乎其清潔如此苦
節三十載卒

熊氏雷獻穎妻年二十四守節三十九年卒

吳氏易秉匯妻年二十夫亡無子以姪繩忠嗣繩復亡撫
孫元善爲經理焉現年五十餘歲

羅氏安鄉舉人羅才銳女邑陝仁鎧妻年二十九夫沒翁
姑繼逝撫子炳南入邑庠道光壬辰病疫氏死二日復
甦言冥吏相迎延壽二紀至咸豐乙卯卒其言驗

司馬氏袁立錦妻年二十八夫亡無子親支兩房各立一子爲嗣六十八歲卒

張氏儒士談宏椿妻年二十夫亡守志孝養公姑教育孤子現年五十餘

楊氏袁立初妻年三十守節七十八歲卒

陳氏安鄉人赴陂里文宏琳妻琳少孤而瘖氏年十九夫亡祖母李氏以節孝蒙旌氏撫子恢章成立卒年七十二兩世著節人咸稱之

杜氏賀多志妻夫沒時氏年二十四矢志苦守現年六十歲

李氏廖解里袁時惕妻年二十五夫沒無子以夫衣一襲懸於牀頭朝夕對之流涕有慰以節哀者氏泣曰吾爲夫守靈二年後吾自有以處吾身者及服闋時一夕暴卒

毛氏陳毓源妻年二十八夫故矢志苦守六十八歲卒

李氏宗異李永寬妻廿九守節七十一歲卒子培榮

王氏司馬德蘭妻年三十夫亡貧甚依母家紡績撫三子立成六十二歲卒

田氏袁憲祖妻年十九于歸時祖病甚扶以合卷越三日沒氏母家令改適厲志守節終身不歸省

李氏袁立章妻陳氏立恆妻陳氏立貞妻皆曲阜知縣袁
廷翹孫媳章沒李年二十四撫嗣子守節十五年卒兩
陳氏俱二十九而寡恆妻守節四十六年卒貞妻守節
現已四十八年貞次子文蔚妻侯氏年二十四守節今
已三十五年蔚子映東生員

羅氏陳毓川妻年三十守節七十三歲卒

王氏程正官妻年二十三守節以節終

汪氏州同王遠詔妾年二十六夫沒嫡室黃氏生子紹珏
而黃卒汪撫之爲娶鄭氏生子述濤甫五月而鄭卒珏
妾陳氏年二十四珏卒與汪苦守濤子瑞芝瑞麟均生

員汪守節三十八年卒陳守節十七年卒

李氏邱于純妻年二十八夫亡無子幼叔甫八歲撫之成立卒年五十九

嚴氏王鉞國妻年二十二夫亡守節三十二年卒

李氏龍著明妻年二十一夫亡守節現年七十九

熊氏伍化久妻伍入贅數載沒氏年二十二歸伍家僅一女而殤乃立伍姓子承嗣後子死媳醮復撫八月孤孫迄於完娶年八十五卒

鄒氏龐良連妻年二十三夫亡撫子才賢成立守節七十二歲卒

徐氏毆陽正文妻年二十五夫故撫子傳貴守節六十七歲卒

陳氏趙先發妻年二十七發疾革執氏手詰之曰家貧子幼汝將若何氏曰守而已守而子得成立妾職盡萬一不虞將從君於地下耳貧何害矢志四十九年卒孫枝林立

胡氏長安里人字吳文貴長子吳子病背偻恐誤女力退婚女不許及于歸吳子病革扶以合香未一月而吳沒翁姑令改適氏以死誓乃爲立嗣六十餘歲卒

侯氏楊先肇妻年二十八夫亡遺一子苦撫成立年七十

九卒

鄒氏陳仁厚妻年二十五守節六十一歲卒

鄒氏楊學乾妻生員開謙之母年二十四守節七十有六卒

胡氏喻遠岫妻年十九夫亡撫嗣子光揚娶媳馬氏甫三年揚亦亡僅生一女同房謀產者逼姑媳改節戶長喻鶴松力阻之爲氏立嗣孫氏現年六十六馬氏亦四十年有九姑媳苦守人共憐之

龔氏袁時育妻年二十八而寡高氏時祥妻年二十而寡蕭氏時瑞妻年二十六而寡皆袁憲武媳也俱以節終

龔生一子名勤貴高與蕭無出俱以夫兄子爲嗣

朱氏蕭忠清妻年二十一守節七十歲卒

聶氏袁文榜妻年二十七夫亡無子以姪爲嗣六十九歲卒

趙氏范植璜妻年十九夫亡無子以夫兄子承嗣七十一歲卒

沈氏王纘典妻年三十夫故孀姑臥病數年牀第污穢氏日滌之無難色六十三歲卒其子受福訓導長孫銓生員

高氏武生彭昌俊妻年二十六夫故生三子僅存季子中

典後入監年八十五卒孫先甲郡庠生照南武生曾孫
祖海監生

王氏李同方妻年二十五夫故以節終孫郡庠生懋信爲
建坊於廣濟橋東

盛氏李世標妻年二十五守節八十歲卒

胡氏陳英安妻年二十七夫亡氏撫弱子娶後復亡育孤
孫以成媳節七十七歲卒

陳氏李文熾妻年二十七守節六十七歲卒

張氏王後寬妻年廿六夫亡氏無子撫弟三妾子嗣美如
已出年五十卒嗣美監生

毛氏羅良貴妻年二十九守節現年六十

鞠氏穆紹祖妻年二十六夫亡撫子先炳矢志不移六十
歲卒

司馬氏牟作恭妻年二十七夫亡事孀姑孝矢志撫孤孤
沒又撫遺孫成立姑與氏俱年七十卒

潘氏陳宗良妻年二十五守節三十五歲卒

朱氏李名之妻年二十一守節八十歲卒進士洪鐘贊云
幼嫻母訓長習婦工年甫十八于歸李門廿有一歲生
子楚莊是年夫故自稱未亡母欲奪志日夜號哭諸姪
競強伯叔妒嫉家窮績麻杜門不出壽享耄齡并渡同

沒

鄧氏李經武妻年二十六夫亡撫子濟遠守節七十一歲

卒

杜氏

李祥壽妻年廿六夫志撫孤現年五十六

陳氏蘇傳雲妻年二十三夫亡以姪家鼎爲嗣事叔公姑

孝現年七十

魏氏夏國榮妻年二十七守節現年七十一

劉氏監生蘇作春妻性慈祥鄰有困乏者常勸夫卹之雷

井口募建橋需數百緡勸夫獨任踰年生子因名橋生

夫沒氏年二十九守志四十五年卒

林氏鄒紹昆妻年二十夫亡子幼家貧旣而子喪歲大侵

有勸之改適者氏曰失節而生不如守節而死竟以餓卒

雷氏袁立定妻年二十六守節五十五歲卒

劉氏李文煜妻年二十五守節現年八十八

袁氏朱初垣妻舉人袁潤之女年二十于歸夫亡以夫兄

子祈鑄爲嗣七十六歲卒

陳氏王學海妻年二十八守節現年八十六

游氏王世威妻年二十夫沒止一子家窘甚後子沒以憂

慮卒守節三十九年

朱氏唐光宗妻年十六于歸生一子夫沒氏年二十二家

貧又屢值歲饑辛苦萬狀而志終不屈守節五十九歲
卒

黃氏黃盛文妻年十七矢志以節終

陳氏武舉張傳甲妻年二十七守志以節終

曹氏楊學浦妻年二十七夫亡撫孤成家八十二歲卒

黃氏監生歐陽鳴岐妻年二十一夫故撫二子成立七十

四歲卒次子正霖武生

許氏李克鳳妻年二十二夫故家貧無子依母家守節現
年六十六

侯氏儒士甘斯懋妻年二十六夫故無子以夫兄子爲嗣

撫育完娶見三孫焉現年七十二

鄒氏儒士蕭孝梧妻年二十八而寡子文甲甫三歲守志
十餘載病革泣告其姑曰請無令文甲廢讀以承父志
子甲後入庠

張氏王祖光妻生員荆川之母年廿七夫故守節六十七
歲卒

何氏姚官品妻年十七守節四十八歲卒

蔣氏王後學妻二十四夫亡僅一女守節七十歲卒

雷氏龐聲容妻年二十守節六十餘歲卒

馬氏蕭信誠妻年二十夫亡撫遺腹子忠興完娶守節七

十三歲卒

龔氏牟曰朗妻年二十四守節六十餘歲卒

尙氏吳士學妻年二十三夫亡撫一子一女成人守志四

十二年沒

李氏熊永桂妻年二十七守節七十五歲卒

毛氏李試譽妻年二十一夫故以姪必立爲嗣守節七十

歲卒

蕭氏祝家炳妻年二十守節現年五十四

高氏廖嗣榜妻年二十八守節現年六十四

王氏聶夢龍妻年二十八守節無子以姪嗣現年六十有

六

謝氏周世倫妻年二十守節現年六十四

譚氏喻光輝妻年二十八夫沒撫孤子成立現年八十二

曾孫繁衍

何氏桑國風妻年二十三守節現年六十三

張氏雷兆瑜妻夫沒遺孤琢儀甫一齡撫之成立生員聲

遠其孫也

雷氏朱士學妻年十七適朱甫七月夫亡以姪上蘭嗣後

入泮諸孫林立矢志二十餘年沒

毛氏熊家瑛妻年二十二守志以節終

聶氏陳宗元妻年二十七守節七十歲卒

袁氏廖萬選妻年二十守節現年八十三子辛甲孫焜望
俱生員

何氏高文太妻年二十八守節六十八歲卒

陳氏李試培妻年十九生一女夫亡年逾四十女復亡氏
赴水死

鄒氏楊學友妻年二十六守節現年七十六

張氏陳興遠妻年二十八夫亡無子守節現年六十餘

徐氏朱士衡妻年二十守節現年六十餘

徐氏高玉泰妻年二十一夫故家貧撫子成人現年五十

歲

李氏章德禮妻年二十九守節現年六十三

劉氏范純厚妻事繼姑以孝聞夫亡七月生遺腹子又天

時氏年二十叔祖監生培棟爲之立嗣以節終

邱氏陳松厚妻夫病氏割股進之及沒氏年二十餘止三

女事孀姑鄒以孝聞後依長女以終

鄒氏司馬道盛妻年二十九守節八十七歲卒

袁氏司馬惕德妻年二十九守節六十三歲卒

雷氏鄒德高妻年二十夫亡撫孤子祖祜成立苦節二十

四年

賀氏蕭銘昭妻年二十二守節四十餘歲卒

司馬氏牟有紀妻年廿八夫亡教子甚嚴守節七十歲卒

鄒氏邑庠生羅才甲妻年二十六守節六十四歲卒

曾氏楊昭煥妻年二十六守節六十五歲卒

范氏李義陞妻年二十三夫故與孀姑田氏俱以柏舟自

矢氏現年六十餘

賀氏袁勤益妻年十八夫亡撫遺孤日夜紡績以食其子

叔翁令再醮正言拒之現年五十三

陳氏易顯芳妻年二十六夫故撫孤守節年七十餘

劉氏龔家彥妻年十九生一子夫逝攜子歸母家與孀母

孀嫂同居子成立後始返故廬

孟氏陳福忠妻生員陳易霖母年二十六夫故守志三十

二年卒

鄭氏張兆鑑妻年二十九夫故苦節二十八載卒

樂氏王裕禪妻年二十九守節六十三歲卒

侯氏陳祖齋妻年二十八守節五十八歲卒

胡氏李必聞妻年二十六夫亡撫兩子成立守節六十歲

卒

彭氏蕭夏玉妻年二十守節八十餘歲卒

鄒氏周之典妻年二十八夫亡遺一子甫七月外侮迭來

獨肩重任苦節五十沒

李氏劉世舉妻年二十六守節現年七十四

賀氏謝永昌一作安妻年二十四守節現年七十

劉氏儒士甘諭訓妻年二十五夫故撫孤子成人今諸孫

林立卒年六十八

劉氏熊緒振妻年二十九守節五十八歲卒

藍氏李鑼妻年二十二守節五十餘歲卒

何氏馮志光妻年二十九守節七十歲卒

唐氏杜盛烈妻年二十八夫故遺一子明年子亦殤氏遵

翁姑命以姪宜章嗣守節二十六年卒

曾氏王守親妻年十九守節現年六十三

秦氏羅輝誥妻年二十四守節現年九十四

郭氏劉光廷妻年十九夫故撫遺腹子明紀後入監卒年七十

盧氏江悅堂妻年二十一生一女夫故越年女殤有微諷者斷左食指以明志五十三歲卒

蘇氏熊嗣綏妻年十八守節二十七歲卒

夏氏熊振先妻年二十守節四十九歲卒

胡氏熊緒琳妻年二十夫故撫子家璽成立入監三十五年卒

曹氏毛傑先妻年二十三夫故子幼家貧乞食撫之至抱

孫後子與孫俱沒苦節五十二年卒

曹氏田國璽妻年二十三守節八十四歲卒

胡氏毛業柱妻年二十四守節三十四歲卒

徐氏毛進先妻年二十九夫故遺二子俱幼氏持家教子

守節五十八歲卒

熊氏劉遠遵妻年三十守節現年五十六

晏氏儒士鄒炳讓妻年二十九守節現年六十一

王氏竺明誠妻年二十二夫亡無出撫嗣子成立現年六

十六歲

張氏趙維熊妻年三十五守節五十七歲卒

辛氏監生楊光祿妻年二十六守節八十二歲卒

司馬氏儒士牟祧來妻年二十八夫亡撫二幼子成立守節六十九歲卒

趙氏秦輔錦妻年二十八夫亡無子撫姪鴻樟嗣六十七歲卒

羅氏袁立椿妻年二十七守節現年六十四

何氏袁立極妻年二十九守節現年六十八

鄒氏廖解里牟治濂妻年二十六夫亡守節僅一女適沈門亦早寡氏常以苦節勵之現年六十一

徐氏儒士鄒崇溶繼室年二十七夫亡撫子高銓成立現
年五十一

黃氏易光鎧妻年二十五夫故撫子秉乾成立五十八歲
卒

戴氏徐德光妻年二十夫亡苦節六十年卒

雷氏袁文進妻年二十八守節現年六十四

侯氏袁棟立繼室年二十一守節現年七十七

涂氏馬北海母年二十九守節現年八十三

黃氏湛志時妻年十九夫故子女俱無苦節四十一年

沈氏龔芳輝妻年二十六守節現年五十八

蔣氏雷世琇妻年二十八夫亡守節止一女招贅趙姓子
女旋故復爲壻娶劉氏生二子一復趙宗一奉雷祀現
年七十六

高氏謝明魁妻年二十七守節現年七十三

胡氏儒士雷洪丁妻年十八夫亡逾三月始生遺腹子業
泰茹苦撫之迄今二十餘載望子成名甚切現年五十
二歲

藍氏張宗貴妻年二十一夫亡以節終

王氏談廷建妻年二十八夫亡撫五歲子成立守節十年
卒

田氏趙從頰妻年二十二守節五十餘歲卒

向氏儒士車昌範妻年二十夫沒撫遺腹子大有成立現
年六十五

龍氏羅澤葵妻年二十六夫亡夫家逼再醮氏誓死不從
其弟迎之大歸得完節焉現年五十七

周氏儒士鄒珉中妻年二十夫亡守節以夫徒弟子崇寬
嗣現年七十五

汪氏毛家燦妻年二十七夫亡撫子成立守節四十八年
卒

王氏司馬盛照妻年二十七守節八十五歲卒

李氏儒士胡體全妻年二十夫故撫孤子光紳苦節三十

六年

高氏趙維著妻年二十六守節現年七十四歲

司馬氏高壯榮妻年三十守節現年六十七歲

熊氏毛貞先妻年二十四守節現年六十四歲

鄒氏高肇厚妻年二十四厚病刲股以療不愈撫遺腹子

家皓成立現年五十五歲

李氏郭光炳母年二十守節四十年莫覩笑容

袁氏謝友棟妻年二十于歸夫故撫遺腹子成立現年六

十六歲

劉氏王家連妻年二十六夫故撫五歲子貴成立現年七十一歲長毓椿生員

劉氏平樂里田家祥妻祥家貧成婚劉宅生子奉義甫一歲祥沒時氏年二十四茹苦撫孤稍長不率教則懸其夫像撻而誨之奉義因爲克家子今抱孫焉現年六十二歲

鄒氏王祖訓妻年二十九守節六十七歲卒

陳氏鄧家琳妻年二十一守節現年五十三歲

崔氏戴鴻文妻年二十五守節現年六十餘歲

陳氏劉明顯妻年二十生一子夫亡與孀姑陳撫其子入

監姑年九十卒氏現年八十三眼觀五代

梁氏郭之玉妻年十九夫亡家貧無子伯兄諷令再適氏
不回現六十三歲

桑氏張敦銓年二十九守節六十三歲卒

劉氏鄒中溥妻年二十一守節現年六十六歲

高氏歐陽傳榜妻年二十四守節現年六十一歲

程氏監生陳鳳昌妻年二十夫沒撫七歲子入武庠子沒
又撫孫現年七十六歲

龍氏廖祖淵妻年二十九夫亡撫二孤長德俊早逝媳王
氏年三十姑娘同厲節王現年五十八歲

陳氏儒士易繩忠妻年二十八夫亡守節十五年卒

易氏徐宏銘妻年二十二守節現年四十七歲

毛氏譚光炯妻年二十夫故撫孤子五值年荒氏售奩田

贖祖宅長子汝金從九現年六十三歲

蕭氏竺家柏妻年十九夫亡守節三十年卒

朱氏監生朱光冊女儒士龔人俊妻俊故無子守節後姑

病刲臂和羹以進

易氏徐周琥妻年二十二守節三十二歲卒

邱氏邑庠生張德瑜妻年二十一守節現年五十一歲

程氏儒士易秉信妻年二十六夫故守節三十六年卒

張氏儒士王傳詩妻年二十九夫故守節三十七年卒

汪氏張兆秀妻年二十二守節六十九歲卒

朱氏楊維炳妻年二十九夫故矢志貞守撫子西園成立
年五十三卒

王氏向武坦妻年二十九夫故守節八十一卒

譚氏貢生鄒履中妻年十八守節以節終

毛氏侯學炳妻年二十九夫沒矢志貞守撫子傳增成立
現年六十

鄒氏王賢義之母年二十四守節晚年嗜佛撫子成立卒

年七十

牟氏蕭信瑚妻

青年矢志現年六十餘

杜氏龔人樾之妻生員杜宜槐之女年二十夫故撫子成

立矢志不渝

王氏盧紹唐妻家貧事姑羅氏常忍飢寒以奉姑及王氏
沒姑哭之極慟不久亦死

謝氏何志讓妻孀姑林有四媳氏居其季獨與姑形影相
隨姑有疾不食氏亦不食侍湯藥未嘗懈年二十卒姑
自氏亡後每憶婦哀聲震鄰至沒乃止

貞女葉么姑

以下俱
通志

鞠氏王文範妻

賀氏王文敷妻

李氏胡士仁妻

劉氏徐肇文妻

毛氏林慶禧妻

陳氏杜志超妻

羅氏陳代舜妻

吳氏田昭妻

雷氏袁敘一妻

高氏田俊生妻

陳氏王國義妻

楊氏敖占魁妻

吳氏朱之猷妻

馬氏羅在清妻

王氏陳嘉謨妻

毛氏龍松妻

劉氏杜成賢妻

陳氏徐之泰妻

鄒氏羅國甯妻

陝氏徐尙品妻

沈氏鄒毅任妻

田氏陳世毀妻

李氏王世寬妻

張氏萬世道妻

陳氏沈美仁妻

王氏羅國劭妻

袁氏朱兆昌妻

熊氏陝以嵩妻

王氏周 篇妻

劉氏田世澤妻

朱氏徐相玉妻

汪氏毛祚先妻

王氏馮大任妻

毛氏王志銘妻

朱氏王宗道妻

朱氏陳家和妻

李氏饒興讓妻媳孫氏

李氏司馬升妻

吳氏陳毓連妻

袁氏陳士棻妻

劉氏袁遵宗妻

田氏袁遵清妻

席氏羅在海妻

司馬氏龔傳鎧妻

涂氏王家量妻媳李氏

毛氏龔學源妻

袁氏馬盛祖妻

劉氏羅在泮妻

朱氏陳士毅妻

沈氏牟有格妻

余氏高同致妻

陝氏陳澤寬妻

楊氏傅承翼妻

陳氏鄒秉讓妻

邱氏蔣之徽妻

陳氏杜紹伯妻

周毛氏棟先妻

袁氏田昭聲妻

鄧氏馬有定妻

牟沈氏沈為椿妻以下新

杜氏陳懋琳妻

陳氏易秉謙妻

涂氏游大敏妻

鄭氏王富連妻

司馬氏袁對均妻

潘氏王振祥妻割股救姑病愈梓里贈彤管揚輝額

鄒氏監生謝龍光妻翁病篤諸醫束手氏以夫三世單傳
翁脫不諱夫之方寸亂謝氏之祚危矣氏飲泣割股進
愈越二十餘年諸子林立長子夢巖爲邑庠生

魏氏田國瞻氏割股救姑先是兄亦割股救親邑舉人田
國文著有兄妹割股傳

高氏邑庠生朱兆蘭妻姑喪明氏割臂和藥進之愈後公
病適氏有疾不能操刀乃倩夫妹爲之割臂

喻氏劉顯祿妻母夏氏病割左臂啖之愈母嘉其志給奩
田五斗不受至今八十猶健

牟氏監生牟丕振之甥女撫為已女于歸李姓後養母病
割臂勸餐病頓已

杜氏監生王傳華妻監生杜隆烈之女其姑劉氏病篤氏
割左股救之尋愈

毛氏白里貢生劉瑞遠妻母病篤不獲歸省割股和羹遺
之一服而愈

王氏司馬馬啓漢妻以下割股救姑駱氏生員熊夢祥妻

李氏杜其蘇妻 田氏陳宗溥妻

陳氏武生張鵬舉妻 司馬氏陳顯銘妻

張氏汪漢陽妻 李氏毛業芬妻

劉氏汪廷玉妻

喻氏貢生毛業鳴妻

劉氏生員蘇楚巘妻

牟氏魯必雄妻

胡氏李蘭階妻

楊氏陳渭厚妻

周氏生員楊化遠妻

袁氏司馬有鐸妻

向氏毛學敏妻

田氏鄧道材妻

周氏生員毛業喜妻

譚氏監生劉相廷妻此夫婦割股救嗣母

附壽婦

謝學鰲之母涂氏現年百壽

增生陳光震之祖母王氏百壽

周兆明之母華氏九十六歲

田大珉之母蕭氏九十三歲

姜開燦之母牟氏九十一歲

儒士李永隆之母陳氏九十一歲

貢生袁時清之母鄒氏九十八歲

鄭昌選之母王氏九十五歲

生員宋炳燿之祖母唐氏九十七歲

竺發佚之母何氏九十一歲

杜守玉之母錢氏九十七歲

公安縣志卷之八

藝文志上

甚矣辭之不可以已也杜陵詩曰文章千古事得失寸
心知黼黻隆平務撻華而行遠知可傳者在人善鳴者
不朽至與善傳懿有裨於世道人心以及抽思弔古嘔
心咏物是皆不可磨滅者山以仙靈川以珠媚能無識
乎

贈大司徒黃山鄒公致政南歸序

明學士 李 時

嘉靖戊子冬大司徒黃山鄒公引年請老上曰邦計重
寄是毗是倚卿其勿辭公遂閉門稱疾上遣醫命中貴

賚賜酒米肉菜以示眷留公既具謝其請益堅疏三上上乃俞允錫之璽書令有司歲給輿皂月廩於是中外識與不識咸曰榮哉鄒公之歸也將行朝紳九卿而下相與醵錢之司徒儉菴梁公杏岡李公屬詞於予予惟士大夫出處之際亦大矣其始進也有簪組之華廩祿之給封錫之褒榮孰甚焉及其去也或濯於邦刑或戾於公議或忤於君上歎於其行者十常八九惟夫賢者能審於去就見幾明決不蹈三者之患故進進也退亦進也其榮無異軌焉公舉癸丑進士予進也晚未始識公公爲諫議予友蓮北魯公嘗曰吾鄉有鄒黃山者恭而廉讓而不競賢者也予竊識之公爲少司徒予表兄

桂巖邊公亦曰吾寅有鄒黃山者確而和通而不詭賢者也予又識之去年夏予以戶部起復至得侍公見其恭而廉也確而和也讓而不競通而不詭也魯邊二公之言符焉是以今日之舉明哲之義特達之識無愧於古人君寵優渥公論交與既高其節又惜其去豈不真榮矣哉且康強怡愉氣和而充茲歸也黃山之麓爲三楚之秀昔人所謂虎渡龍洲又公所釣遊之地登高舒嘯臨流賦詩徜徉山水其樂詎有窮乎雖然君子居廊廟則憂其民處江湖則憂其君聖天子勵精圖治篤意斯民公之所親見也卽今汝穎樊鄧關陝梁益道殫相望公征車所歷得於目擊之餘其能已於中耶長章短

疏必有嘉謨以慰九重南顧之憂此又諸薦紳之所望於公者公以爲何如

送陳道人宅白雲山序

洪 鐘

平河之日白雲之山野壘壘荆棘縱橫狐穴蟻國問者不就樵夫牧子日上下呼唱而雨夜風夕走燐飛螢也中有菴茅茨弗剪佛半老朽不辨面目僧之住持者未月而避八九山人陳慧通見而悅悅而往居同人力止之不從徑去戊辰春余嘗同客泛舟遊茲山矣山半有塘半爲草葺由塘而北轉得平地略畝層級而上入菴禮佛畢出菴後野壙之南短竹藤網徑道蔓塞客促返舟徑下予以手劈叢行七八十步得柏五六株梅三

樹老幹扶疏不知何代物也旁有泉沮洳未通余目賞
心會而林密雲深中聞山鬼呵聲噫此地景物豈有神
護者乎入林里許越岡遇一老翁貌古而韻致不減偕
二小童咏曰攜手來春林林深失去處仙犬雲外吠
吠入桃源渡予傾耳久前叩其姓字翁俯不答飄飄自
前蹊去予悵然返舟則已夕陽在山矣今陳山人往居
書此送之不識庵前淒涼景色其改觀焉否庵後古柏
其改柯焉否梅之拳曲虬盤噴其幽香者尙如昨焉否
昔之詠歌而自得者能復遇焉否

東門護城堤記

袁宏道

公安治倚江江水齧岸者百有餘年至近歲遂割城之

半以予水議者畫爲三說以上一曰避勿與爭道也將盡撤其堂皇間井以就高而公私困竭不與者十常七也二曰築堤於江之上流以殺水堤虹偃而出水勢北走迤南一帶庶免衝激而勢湍速投之石未必膠委千金於洪流途之人知不可也三曰疏二聖洲之故道以分江勢夫江身在南水去原而就洪疏之不勝淤也策乃下會直指使者應公行部至邑愀然嘆曰江患逼矣而江議迄無定畫居者危七若簣下之火愚則處堂抑豈無智者也江防使者徐公進曰適有薦紳大夫言未竟而邑三面負堤而缺其東孟公堤垂右臂下楊合增其支爲前障往年江決東門邑居漂盡者左臂虛故也

邇來江患少定幸萬一之復而峻其左可以墨守此百世之計也應公曰善是邦也詘匕又不可以需則爲邑出錢若干監司郡大夫而下捐貲各有差閱月而堤成邑士民相與歌舞於市皆曰微直指使者重念災國不及此子輿日以佚道使民則不怨况其不使且爲出貲以貸命也一時善形家者皆言邑形勢自西北來後豐而前削截之以堤則氣留留則能爲諸祥且於邑爲左左屬龍也地宜豐形勢之所資也是役之興盈庭之議頓止自忠襄公以來未之有也

儒學梁公生祠記

袁宏道

天之大也無所不有而非挾其有以角也聖人亦然使

天曉曉然與春爭華與秋爭實與萬物爭洪纖大小天亦物耳故聖人之大以受不以勝天下之爲道者歧真其道皆竊吾近似者也吾僕役之則吾用而角之必且外吾而求張故以宣尼之聖而識小師老聃問道不以是貶大暨於後儒挾吾之所有以求勝而吾之道一變而儒始名再變而儒退然居九流之列三變而儒乃有爲異道用者是則角之而張者也且夫諸子百家固未有能出吾範者也琴而爲名法比而爲楊墨遁而爲老釋唯其竊吾似而甚焉則指之曰異學而實不出吾之所有夫聽所言觀所行譽所試是聖人未嘗不名家也春秋之斧鉞雖隱必誅是聖人未嘗不法家也吾蔬食

而愉快其樂我席不溫轍不解其愛兼是聖人未嘗廢
楊墨也寢有經食有戒是聖人未嘗廢攝生也幾研於
未發道竟於無聲臭是聖人未嘗廢虛無也唯其無所
不有而出之以平淡故其大至於不可名異學者竊其
一以求耑其譽故迹詭而言放以爲不如是不足以自
宗其道而不知千變萬化皆不出吾儒之固有吾取其
精以供吾用而汰其甚告之以所蔽彼亦且樂爲吾用
吾覆之以天臨之以君庇之以父母彼安敢出而爲吾
害唯吾自挾其道而與之角居然以敵名予之而彼亦
傲焉以敵自居於是異端之禍與吾儒相終始名曰尊
吾道其實薄吾藩而益賊以戈者也孟氏善衛道者其

言不過曰歸斯受曰反經而已矣反經者使天下曉然知常道之大而本之身以措天下皆綽綽然而有餘吾常有餘而彼不足又安用借質於彼天下皆知吾之不借彼所謂濯龍之宮白馬之舍其黨不得不少而道自衰此所謂不攻而破者也故今之欲廓吾道莫若遵孔孟之家法而明其書暢其旨先是中丞梁公以監司臨敝邑見學宮圯慨然捐鍰新之每至邑則進諸生徒告以聖賢之微旨其言樸直無雕飾已又出書傳若干多先儒之所未發蓋公之所以衛道者與孟氏反經之旨千古若一券也昔者昌黎氏衛吾道徒爲忿激之論而不標其本是以介冑衛也夫介冑所以攻非所以服也

今公第發明孔孟之深旨使人知道之無遺覆而諸子
百家無異載此猶禮樂盛而悍獷銷聖門之伊呂也邑
士民戴公誨爭請祠公邑錢侯聞之甚喜曰是王政之
大者竟如士民請祠成以記屬余余拜手曰公他日當
俎豆於白沙諸公之間者也然使後世知邑中有聖學
自公始公之從祀自敝邑始一時令長師儒薰其德而
快其事而不肖某得以文字濫其役是皆不朽之藉也
公名雲龍廣之瓊山人楚人戴公如羊叔子今者特祠
鬻序閒故略述其功在聖門者其他威惠不具載以俟
異日志峴首者

儒學周公生祠記

袁宏道

邑學宮舊濱江江水齧其址宮遂遷邑頻歲苦陽侯殿
材蠹過者岌岌然慮其壓則以孫木贅之又十餘年而
贅者蝕其半邑人相顧嘆惋竟不敢議興革夫邑之薦
紳大夫以至縫衣緩帶皆誦法孔氏者也積縷而緡積
塵而嶽邑之人亦能辦此獨以事重而地卑故不敢不
緩其議以俟天子之命吏夫今鄉校雖一鄉其始蓋有
所受之小至一籩一豆皆奉功令而行不敢輒增損故
學宮之重與太廟等而其興革一稟於天子外焉者遐
而不得達則稟於天子之命吏今夫佛老之舍朝而圯
焉夕而呼於市市之屠伯傭保操其興革烏合而集事
者何則其事輕也昔李師道請出私財贖魏徵舊宅白

居易論奏以爲事關激勸合出朝廷夫此名臣舊第耳
當時惜大體者慎且重若是其敢輕議數仞之宮牆與
必有所操而後議故下之人不得不緩緩於下而急於
上故體統尊而事行古之爲治者政學出於一故曰在
泮獻囚在泮獻馘後之人特以爲文章之具觀故其修
舉常後於官寺區署一有興革直付之一二章縫而其
事僅與釋老之宮等於是學宮始輕而絃誦之地鬱爲
苔蘚後生末學有經年不窺夫子之門屏者是亦爲政
之責也監司周公醕儒也修姱之節聞於天下天子超
常格拔之論者以比胡威陽道州下車未浹月威愛遂
行聞邑 大成殿敝卽與前分守梁公捐貲撤而新之

既命有所操無失體衆力遂集而邑人士數十年嘆惋而不敢議者一旦如釋重負宮既成邑錢侯率諸薦紳士落之皆曰非公余等何顏復見先聖洵七然如唐子之久亡而忽見其鄉也則又曰邑公之畏壘也將世世子孫俎豆公舍學宮其安之遂並梁公兩祠於宮之左公名應中浙之會稽人夫非謂學宮之能重公而學宮待公而重將使後之作者知其重以時加修飾而後生末學望宮牆而肅然是祠之所以作也

白蘇齋記

袁宏道

伯修賦性整潔所之必葺一室掃地焚香宴坐而所居之室必以白蘇名去年買一宅長安堦上竹柏森疏香

藤怪石大有幽意乃於抱甕亭後潔治靜室室雖易而其名不改其尚友樂天子瞻之意固有不能一刻忘者詩云維其有之是以似之予謂維其似之是以好之也夫不能似之而好之則其好之也爲浮蓋予少而侍伯修山中長而依於宦邸歷求其生平與兩公眞有大同焉者吾觀樂天子瞻爲人大約皆眞實淳篤不立城府而伯修亦溫良重厚胸中無半毫鱗甲是其心同也樂天典大郡所攜不過天齋石華亭鶴折腰菱晚年買履道里宅至鬻駝馬子瞻雖處顛沛不輕規取絲毫無田可歸竟至流落而伯修賦性梗介泊然自守雖居官十餘年無異寒士終不以隻字干人是其操同也若夫醉

墨淋漓於湖山閒情寄託於花月借聲歌以寫心取文
酒以自適則樂天子瞻蕭然皆塵外人而伯修少有逸
興愛念光景耽情水石塵鞅之暇招攜二三雋人或高
齋聽雨或射堂看月城內外刹菴遠自西山以至上方
小西天諸處鼓舞同侶徧往登臨是其趣同也樂天子
瞻其文詞皆爲一代宗匠而伯修少時操筆便有新意
予遊天下多矣若詩律之脫而當文字之簡而有致亦
未能有勝伯修者過此以往又焉可量是其才同也樂
天子瞻雖現宰官之身皆契無生之理而伯修參訪既
久塵心久絕是其學同也其不同者兩公矯矯諫諍覺
風節外見耳然是時樂天身爲諫官子瞻起家制科皆

有議論之責今伯修方侍春宮育養元良曰暮陶鑄天下養其身以大有所用豈出位而言效制科人之習氣以爲極則乎假使伯修爲諫官其又肯默然耶是亦未嘗不同也昔子瞻亦自以爲出處老少同於樂天蓋庶幾此翁晚年間適之樂而老爲逐人卒飄泊於蜚塢獠洞之中竟不得與樂天同樂蓋有故矣樂天當朋黨甫動時即奉身而退爲散官爲分司而子瞻自元祐以來徘徊公卿閒如食蔗然曾不爲引決之計故宜未幾而禍生也樂天懷知足之情子瞻多幹世之意然禍福之幾亦可畏矣今伯修官漸高祿漸厚然每見必屈子謂予曰吾數年內歸矣嗟乎伯修近日所欲同而吾輩亦

必欲其同之者其尤在白乎其尤在白乎

遊荷葉山房記

袁宗道

予別邱墓三年矣今年夏予與二弟至里中拜於松楸而憇於先居先居傍有荷葉山喬木千章今日諸叔偶不見召日暮無事乃與二弟步於山中擇高阜處藉草而坐因思兒時常騎羊來此每一至不啻如四五十里外而今視之數步耳山之蒼蒼水之晶晶樹之森々自少至長習而安之不見有異今偶遊焉而覺其幽靜蒨鬱愛頑不能舍去久矣夫子之在城市也俄而月色上衣樹影滿地紛紛參差或織而簾又寫而規至於密樹深林迥不受月陰陰昏昏望之若千里萬里皆不可測

劃然放歌山應谷答宿鳥皆騰噫嘻予生於斯長於斯
遊戲於斯二十餘年而猶有不盡之景乎徘徊欲去而
有聲自東南來慷慨悲怨如嘆如哭卽而聽之雜以轆
轤之響予乃謂二弟曰此憂旱之聲也夫人心有感於
中而發於外喜則其聲愉哀則其聲悽女試聽夫酸以
楚者憂禾稼也沉以下者勞苦極也忽而疾者勸以力
也其詞俚其音亂然與旱旣太甚之詩不同文而同聲
不同聲而同氣眞詩其果在民間乎語終而天風夜起
歌聲漸近二弟無言余亦嘿嘿聲之悲怨有加於初響
之歡適者化爲悽愴矣遂相與踏月而去

柳浪湖記

袁中道

郭外西南柳湖與斗湖一湖也長堤間之爲大道達於南門其內爲柳浪柳浪匯通國之水穿橋入於斗湖柳浪實湖也田之然常浩浩焉獨其中高阜者幾四十畝可田絡以堤堤內外皆種柳及楓帶以渠渠樹之內始爲田田之內地較阜復爲堤周之堤上復種柳堤之內前爲放生池種白蓮亭臨之後漸阜爲臺臺之上則柳瀆館在焉爲室三楹環以梁臺上爲渠內外皆種柳凡堤之襲者三渠之襲者二樹之襲者六若笋蕉若陣若城翠碧醞釀不知紀極放生池堤外右有窪地不可田築橫堤與田隔中種紅蓮水中有洲爲室三楹以待名僧及過客也右爲小堤以出是爲門徑左爲小堤達於

柳浪館欲泛舟則繞臺下從右出橋下達於放生池盤旋亭前折而右穿橋至紅蓮池繞僧舍而西穿於後渠後渠西可達斗湖水最闊返棹仍從後渠達於左左既則前望見臺上朱欄畫梁隱隱繞而右後還後渠遇僧舍從紅蓮池舊路歸焉可二里許日午梁內無曦暘濃樹遮樾參差見碎天水清徹底此柳浪大略也暑中中郎與予坐臥其中辰起偕數僧塵譚倦則泛舟月夜尤佳常有一客苦熱夜來避暑忘攜襪夜半凍欲絕樹凡萬株種楓柳者宜水也楚中柳色止一月黃落入秋楓葉紅酣如錦土人云後有篔簹前有柳浪篔簹爲予居柳浪爲中郎別業也

錦石灘記

袁宗道

余家江上江心湧出一洲長可五七里滿洲皆五色石子或潔白如玉或紅黃透明如瑪瑙如今時所重六合石子千錢一枚者不可勝計余屢同友人泛舟登焉淨練外繞花繡內攢列坐其上似在瑤島中余嘗拾取數枚歸一類雀卵中分元黃二色一類圭正青色紅紋數道如秋天晚霞又一枚黑地布金彩文約如小李將軍山水人物東坡怪石供所述殊覺平常藏篋中數日不知何人取去亦易得不重之耳一日偕諸舅及兩弟遊洲中忽小艇飛來一老翁向余戟手至則外大父方伯龔公也登舟大笑若等謔我取樂次日送遊錦石洲詩

一首用蠅頭字跋詩尾曰老懷衰颯不知所云若爲我塗抹雖一字不留亦可嗟夫此番歸去欲再覩色笑不可得矣

二聖寺遊記

袁宗道

甲午清明諸舅率余兄弟出東門踏青行二里許至二聖寺息焉寺僧具茶菓仍出余少時題壁詩每清蟲蛀似觀古人墨蹟不復知爲少時筆也寺有辟支佛牙方長寸許凹凸處如古篆又有宋黃衣使者敕絹墨若新僧爲言往有趙松雪羅漢卷已入故相家今存其贗者其松雪本覽畢出禪房倚門外叢樹問僧二聖因緣一老僧答曰二聖寺載芬陀利經中其顯異則始於唐此

中老宿相傳唐某年邑令與沿江居民一夕同夢神人
來告明日當候我江干次早官民相驚候江上有沉香
二根逆水而上相率牽挽而至岸忽行者自西來云此
木奇甚然非我等莫能雕飾乃令官民移至安遠寺殿
中闔扉七日煙霧迷空朝昏莫辨七日以後忽露光明
啓扉視之則二像宛然夾佛而立大約如世所塑金剛
威猛異常而杭州有商人某者舟出楊子二童子求附
舟至暮謂商曰今夕當爲汝牽舟但莫行卽速也至夜
舟行若飛耳惟聞風濤聲商穴蓬窺之惟見二金剛挾
舟而翔懼甚不敢復窺比曉舟已達寺傍問知爲南郡
公安蓋一夜行三千里矣商大驚起視寺中佛邊所立

二像卽昨日挾舟人也商愈駭方欲瞻禮亦立化像前衆僧聞之競來瞻禮商顯頰忽長眼突而頰儼若龍形食頃復活告衆僧曰吾二聖護法龍也二聖一爲青葉髻如來一爲盧至德如來皆過去恆沙劫前寶藏佛授記五百童子之二歷百年後吾肉身當有難然不敢加害更三百年香像肉身方歸劫火言已復瞑衆僧爲漆其軀祀二聖傍卽敕所謂黃衣使者也黃巢之亂賊見像抽矢欲射像忽汗出若雨賊大懼引兵去一邑獲全至宋某年寺果火年月一如所記余因嘆佛法在周末時芬陀經之人在六朝時而青葉盧決之跡顯於唐者與經所說若合符券嘻何其奇也同游俱攜有酒肴布

席門外樹下各賦詩一而歸歸憶此古佛獨顯異於吾
邑而他處招提卽未見有供二聖像者亦法苑中一僻
事也遂篝燈記之使局士觀此知佛法者廣大不可思
議

培風書院記

夏策謙

書院之設所以宏文教育英才講學肄業養成材器爲
國家用自昔楚有嶽麓與嵩陽應天白鹿四立爲大而
各州邑因其名地爲遊息所者不一總以作育人才亦
綦重矣公安自宋端平間孟忠襄公爲竹林書院以處
一時流寓之士而後莫有踵其事者卽明之中葉袁氏
三珠樹起主盟騷壇遂有公安亦止各適其適而已今

日者

聖天子崇重儒術薄海內外家絃歌而戶誦讀而我邑侯楊公尤加意作人甫下車首葺

學宮於茂草中復修諸葛公寇萊公兩祠堂並新鄉賢之宇薦楚三閭大夫神主捐修邑志凡此皆關教化之大體然而邑荒多故俸薄割截亦已甚已曩者諸生通名以摺公令倣江南例慨以刺鄉會二試贖錢有加禮所以崇斯文養士氣正所以勵廉恥鼓藏修也至於館穀義學在新建之寇公祠而公以地無專屬非所以居靜業嘗言得城市山林之處規而恢之庶乎暴無寒至於古教之之義始稱於時紳士父老咸相與謀曰楊公六

年來一舉一動必爲我田疇子弟計真父母也善事父母者先意而承志盍以我衆擊之舉慰公難汲之深衆稱善適居人以所居求售其地爽塏其屋廠廡在北城內前臨街街南面後暨右有園園有水有竹有樹想春風鳴禽秋月飾影諸生以時習禮講課吟咏其間亦公安新邑之大觀也啓公閱視公喜顏之曰培風就遷義學師弟子而學焉予以首蓓一席親炙盛事樂爲之言今公且以

內召去異日者卽以俎豆公爲去也思者不第爲去也思豈不與召棠狄樹並垂遺愛也哉始購得基宅七十五金修理續費約百金捐金人多不能記

重修武侯祠記

李也白

邑名公安因漢昭烈也而當日之以仁易暴諸葛公輔相之力居多故邑之祀名宦首武鄉乃孱陵街大道之北又有專祠襟河流而帶湖澤南面對黃山不知始於何時或謂先是以祀呂蒙明季進士劉珠醜呂之昧於擇主詩以謂之祠一夕火因改祀焉今祠前門石柱屹立有漢業鼎新二表見出師之意蒙城廟食千年愧僭賊之心之句爲劉所題聯考古祀典五而諸葛公兼有之能致其主翻然翱翔於蹈虎涉冰之餘而猶能以德施民尸而祝之雖日人心不死然非君子之不可喧不及此祠之廢興不知凡幾自明末流寇一炬七十年來

赤棘黃蘆徙增過客感慨歲己亥夏仙田楊公卽其舊址捐俸修之爲正殿三楹奉安神主傍作兩廂房週以墻前至舊石柱而止爲門門內亦三楹且購得曠近之士課其毛以食廟祝一時父老相與流嘆曰茲役之繼寇公祠而起世道人心之大幸也 楊公之誨我子弟計深且遠固非不學無術者所敢知也 楊公之德其又可忘也哉祠之成閱兩載約費百二十金是不可無以記之

竹林萊公祠堂記

元劉坦

忠愍萊國寇公障蔽於讒謫死瘴鄉喪歸次於公安野祭插竹旣乃茅茁竟成修林後人卽其所祠之今餘三

百年西洛薛君友諒來令茲邑伏謁祠下顧瞻遺像與家藏本不相似命工改作並神宇更新焉垂成而代至乃屬邑士徐森成之既成將伐石爲記伾圖授簡則相與言曰竹植物也於人爲君子當其雪霜寒擊萬物盡凋獨挺然不改其操春雷發榮遍地而出蟄焉固也今是竹出於芟夷之餘非有宿植而生意勃不可遏謂造物者表公之節非邪公出在朝無所阿附小人嚙啗必欲置之死地不知公之處死也素矣百世之下聞風興起凜七猶有生氣彼丁謂王欽若輩雖衣冠廣庭視之若泉下人終與草木俱腐而已薛君景行先哲竭虔而妥靈恐其貌弗克肖其德必有與之肖者矣夫貌表於

外者也德蘊於內者也臨大節而奪遇外患而怵朝夕
身親炙如隔宇宙尸而祝焉其顙顙不有此哉祠成之
後甲午四月竹生於楹一本兩歧瑞應圖牒夫是竹也
植萌於肇祀之先駢產於新廟之變請以是表公之節
千萬世不易吾言矣其在後之人善封殖之庶無愧於
公亦無負於人之望云

重建學宮記

趙申橋

公安爲三國用兵地其在於今則荆南屬邑也邑舊有
學屢燹於兵歲久不治許縣尹磐慨然念之偕魏教諭
士俊楊訓導兆儒因紳士僉議捐修請之魏郡守勳報
可而後庀材鳩工尅期告竣煥然可觀又新鄉賢名宦

之祠於櫺星門之旁增祀有功德斯邑者以桐鄉遺愛之故論先大夫治績久而益定升進几筵事在壬午冬十月之望主已薦矣越匝月會余奉

簡命察審鎮草紅苗之案輶車過焉肅謁祠下煮蒿悽愴感念音容屈指先大夫去官之日與茲瞻拜之期相合事會適逢夫豈偶爾因歎甘棠舊澤已閱六十年往矣而三代直道猶在斯民孰謂今人之心必不逮古哉學博率其庠之弟子乞言於予予方戴星復

命東下迎

鑿匆匆未果爲未幾由浙調撫楚南所駐長沙距公安不越數百里追思先德靈爽式憑爰爲之說以勗多士曰

古昔盛時立學造士自成均逮間黨皆有師也是以上
無私師下無私學周末王道寢湮士之不得位者輒相
與授受於山野觀洙泗西河鄒嶧之前事可見漢興迺
重經學歷考關西濟南瑯琊千乘生徒各不下萬人數
葉之後習其傳者必曰出自某師良亦專矣要不可謂
之非私學也若夫王道興則師道公諸天下今非其時
平多士生長同風之世遭逢

堯舜亦知

朝廷養士之意不專科舉而實望之以希賢之學乎善乎
王文成之言有云殿廡堂舍拓而葺之餼稟條教具而
察之是有司之修學也求天下之廣居安宅而修諸其

身是爲師爲弟子者之修學也公安卽彈丸乎代多聞
人科舉登進不足爲難其聞先王大同之教雅志修身
治心而深疾夫馳騫功利之寵者將必有人焉從此噓
染成俗上應

天子崇重

先聖之道蒸七向上比戶可封始信德教單

敷不於山野而於庠序公安且歸首庸焉詎不休哉先
大夫在任曾力爭公安取士之額遠不逮江陵仰七學
使者前必得所請後已嗣此士風翕變文章經濟卓犖
一時正圖拔本塞源養士於庠以期澤諸道德結竟楚
才之盛顧以輯瑞北征斯志不克終遂矣幸值闕宮之
有恤而闡幽典行多士徘徊棟宇瞻想儀型能無油然而

興起於佾舞工歌之際乎是則余之稱引弗後仰體
廟堂之良法美意以詔告多士實本先大夫設施未竟
之心殆亦不出邑紳士踴躍樂襄之志矣夫雖然甯獨
爲公安一邑言之也哉列其崖略郵畀兩學博刻詞麗
牲之石所糜白金若干錢及經始落成月日其著於籍
以非其大者不復書

重新學宮院

沈爾燦

公邑舊治濱江自明季戊辰以後城再遷學宮規撫略
具陵谷代更滄經喪亂其人士僅以自保殿廡間幾於
鞠茂余奉命來尹茲土每月吉祇謁未嘗不怒焉憂之
顧歎歲力勿遑也會富川鄧君以司訓主教事屢謀於

余併力圖其事次年春度地於學宮之左創啓聖祠三
楹厥工甫竣夏四月釃雨毀宮之後壁殿材且半蠹循
牆踖踏岌岌乎隕墜是懼亟偕鄧君悉捐俸人庀材糾
工易其甍之缺者而聖焉汰其未之腐者而斲焉五閱
月門觀旣壯繚垣漸週凡此皆體國之常經肇造新邑
以來數十季荆榛灌莽以有待於今日者也嘗論世數
之污隆與文運之顯晦相爲倚藉公邑魁梧大儒如王
襄簡鄒莊簡以高第乘時策勛譽流竹帛近代三袁先
生領袖科名主持風雅海內士大夫樂得而道之曾幾
何時而芳徽不再鼎興數十年僅以成亥間鳴其盛豈
運會之推移抑絃誦之聲少衰息耶夫上有好爵之糜

下有媵修之立舍是則維鵜貽刺矣歲周星紀景運其
昌午之秋邑之人文蔚然丕振

天子方側席求賢經明行修之選登進無少遺誠以是時端
父兄之教慎子弟之率尊聞行知以絕隱怪之趨敦詩
說禮以安雅言之訓而以歲時陳俎豆習干羽於中將
業日修而德日進彼洋洋歌鹿鳴兔罝而來者非其嚆
矢乎太史輶軒採風卽以之比美齊魯焉可也是余之
有事於新宮而不能無望於後起之士也

寇萊公祠堂記

龔三捷

皇帝御極五十有七年著雍闓茂之歲我

邑侯廬江楊公蒞治再期月政通而人和慨然念宋忠

愍萊國竹林祠堂之鞠爲茂草也曰寇公之生而爲英
役灘神感鳴鹿死而爲靈令道傍旣折之竹復生雲車
風馬在帝左右其不能忘情於茲也可知承平旣久野
火寒烟中不得一盂麥飯此都人士之羞守土者之責
也顧遺蹟在邑舊治南明季邑再遷舊治爲天吳割截
垂將盡祠址去江遠不二百步而岸又善崩衆皆疑之
侯曰噫籌之孰矣盤庚五遷云胡不國於是捐俸新卜
爽塏於新城之北亦旁大道縱橫若干步置屋上下各
三楹上爲臺高三尺許奉神主使登降可觀下爲堂以
待游息之過客兩翼爲書舍若干置館穀以處誦習之
師弟子前對湖光千頃望松滋衆山秀出雲際如笏如

圭如卓筆溪河千里曲折而來下合便河再合港口分江之水而始南週以繚垣內盡植竹間以楊柳隙者甃樹蔬爲劃粥資南截大道仍闢門與城之北門相對使靈淑之氣相貫注顏其額曰竹林寇公祠有奸雄過此能無仔細思量耶或又疑之侯又曰祠之不南面而西面者避壅蔽選形勝也昔寇公之令巴東移邑治於白鹿崖之麓諗江流之有情不忍背之飭其署北向手植雙柏後人比之甘棠焉今祠傍作南門與城之北門夾道而通行者亦將爲不忘當日鎖鑰之意也衆皆喜醮而落之則相與言曰竹子爲物虛中而高節不畏歲寒其葉似鳳毛其笋號龍孫其於人稱爲君子公安何有

於寇公其所以示靈異於此君此土原非偶然初以羽
流主祀事號竹林道院孟制置擴爲書院理宗親灑宸
翰以賜之而四方流寓之士之至者如歸後三百年西
洛薛公諱友諒者尹茲邑正其遺像新其棟宇時則有
竹生於楹一本兩歧之瑞明世廟初邑人大司徒莊簡
鄒公諱文盛者題請祀典大抵祠之由廢而興存乎其
人孟薛踵其事而鄒增其華鼎新以來蕪沒者七十五
年而有待於今日侯毅然以獨力振興之直改卜焉清
風袖裏費若干金創之功遠過於繼雖祀典未易驟復
而作廟翼七依然舊觀寇公之靈妥已侑已侯之急先
務而大有裨於人心可以不朽已太史採風而上之

聖天子必將曰吁黎民於變賴有此耳

藏書記

鄒美中

余性嗜書每試輒購數篋以歸邑業制舉者咸目笑之
余竊以之自多人事之弗知飢寒之弗恤晦明風雨手
一編不輟也漫畫之鳥蠹字之魚大都類是書舊藏西
林山房懼其散遺移於宅之西廂室數椽不能容兒輩
議改藏他所余方疾聞之謂與其藏之無甯散之率懼
貽謂是病中寢語也余招而進之曰士豔心於科名久
矣副墨之子挾兔園冊數種會逢其適亦能撥巍科負
大名以去而余也窮年兀兀妄希稽古之榮神疲力盡
究竟何裨猶憶十年前偕友人夜坐縱談酒酣耳熱悵

江河之日下迴狂瀾而無從友人曰君果欲階何科目也今之士類皆章句之外無學術帖括之外無文章應酬之外無經濟然非是而望針芥之相合難矣子顧噓秦坑之冷灰蠹漢臺之殘簡所學非所好吾惜操瑟而來者不早挾瑟以去耳縱有汲冢誰搜竹書何如百城徒擁萬卷吾子休矣吾思之吾重思之覺其言有足以警余者且夫古今猶日暮也白頭可期汗青無日一邱之貉恐終不免爲所瞰盡異時能致青蠅作弔客否耶故曰與其藏之無甯散之兒輩曰是固然然若大人言則與其散之終不如藏之之爲愈也屈指而計吾邑之業制舉者衆矣數十年來要未見一人掇巍科負大名

以去也抑又聞學古而遇知己得則俱得否則尙有一得焉其弗信矣乎予曰有是哉而乃見及此哉甫再欲有言聞剝啄聲甚厲則故人李春溪踏雪來圍爐話舊偶及之春溪因言江陵居停主人藏書甲一邑然吾聞其牙籤萬軸縹緗燦如而竟至今新若手未觸者則又何也

學田紀略

許 鑿

從來郡邑之設首隆 學宮重文教也士苟薰陶既久必能矜名節抑奔競雖操瓢與篋凜然持稼穡狩獵之志而聖君賢相惻然念之廩餼常數外復有學田典棊隆矣獨是田無定所畝無定額故儼然號名邑而敦詩

說禮輩或致難以自給雖歷奉上行以無礙官區撥充而侵漁隱占視公地爲私物者往往有之脫不加意剔釐將膏雨之沛實去而名存單寒之儒顛天而無從也公安撥充之學田止椒園一處爲田無幾歲入有限欲仰給於中者人有石田之嘆欲家分升斗不亦難哉幸賴 司士顏先生自癸酉至己卯經營六七載動費數百金 司訓楊先生丙子受事後翊贊以終其美則延袤數百畝矣有放馬官湖一區有沿江廢堤數處曰官湖則非民田也曰廢堤則非民業也而兵燹之後考核無從竟爲豪強所竊據於康熙三十一年庠生李之芬龔三捷等具控前署事吳當是時 顏先生秉鐸茲邑

已一年矣隨詳請 府憲魏公轉送 糧憲李公明鏡
高懸羣蠹盡消由是侵奪者還隱占者復通詳各 上
憲而其案始定磐承乏茲邑檢閱前案未嘗不斂容稱
嘆以數十年未有之業一旦楚得楚弓豈其不廢一財
弗勞餘力頓致羣小俯首聽命耶卒能鋤奸去弊使眵
晦釐然樹種桂以穀士子者誰之賜哉事既成 顏先
生邀余履畝踏勘爰是逐一丈量經界四至罔弗條分
縷析放馬湖一處計地四百六十七畝四分八釐廢堤
十處共地一百七十四畝所入之租據實造冊所給之
人照冊分領俾彈丸不失之豪強絲毫必給之寒儒以
廣

皇仁以資絃誦臣職也亦師道也異日諸君子相與食租衣
稅稽糶既登稽古益力爲大儒爲名臣溯所自來知學
產經理有人翊贊有人其無忘此日鮒涸之仁恩也哉

福井先生集敘

袁中道

蓋予少時誦福井先生詩而知其爲才人也巳得先生
疑菴諸集讀之而後知先生爲學問中人也先生少具
穎異之才下筆數千言立就安世默識世叔強記殆無
以過焉顧其所爲歌詩不唐不宋直據其意之所欲言
蓋無心於雕龍繡虎之名而獨一其志於學乃先生之
學不浸淫於二氏而一稟緇林爲繩尺又親見當時之
聚徒講學者徒鸚鵡其舌質之生平如縷冰畫空都非

眞實故一一具諸履踐以其身爲圭璋乃世或曰先生
晚達蓋功名富貴中人也或曰篤行君子也皆非也當
江陵相公盛時先生與爲布衣交溫護其跡而潔白其
心以先生爲介也耶則每計偕往來平津邸中爲上客
卒未嘗畏其薰轅忝逃之以爲高以先生爲通也耶則
其指日回天之勢稍暱就之功名可唾取而先生白首
乃得一第浮沉即署間竟未嘗獵取一班一級以沒彼
時與槐柳齊列者見馮子都王子方輩作刺刺可憐色
而不足以當先生之一盼春蠶腐鼠豈堪點其胸次蓋
鷗機雖忘龍性難馴不可得而親疎榮辱先生於道也
幾矣昔子瞻有言人生如國手碁末後略贏數子便是

勝局先生少時侘傺不遇人或有賈島孟郊之嘆而晚年不墮用世之志竟取青紫馬文淵所云窮且益堅老當益壯者非先生烏足當之先生著作甚富其涉於風雲月露者盡汰之獨存數種而以疑菴名其篇夫疑者悟之因也昔楊慈湖於學大悟一十八遍小悟不計其數蓋屢疑而屢悟也故儒門之學慈湖最爲光明先生以疑自居非苦心於學者烏足知之則先生於道已深矣先生之孫世臣從游中郎先兄之門最久極得其沾衣霧露之潤是不媿先生之箕裘者手持是集示予予略述其梗概歸之若先生行事之蹟具中郎邑乘中已有虎頭傳其神矣茲不復贅云

敘高氏家繩集

袁宏道

蘇子瞻酷嗜陶令詩貴其淡而適也凡物釀之得甘炙之得苦唯淡也不可造不可造是文之真性靈也濃者不復薄甘者不復辛唯淡也無不可造無不可造是文之真變態也風值水而漪生日薄山而嵐出雖有顧吳不能設色也淡之至也元亮以之東野長江欲以人力取淡刻露之極遂成寒瘦香山之率也玉局之放也而一累於理一累於學故皆望岫焉而卻其才非不至也非淡之本色也里高氏世有文譽而遂溪公尤多著述前後爲令不及數十日輒自罷去家甚貧出處志節大約似陶令而詩文之淡亦似之非似陶令也公自似也

公之出處超然世味似公之性公之性真率簡易無復
雕飾似公之文若詩故曰公自似者也今之學陶者率
如響榻其勾畫是也而韻致非故不類公以身爲陶故
信心而言皆東籬也余非謂公之才遂超東野諸人而
公實淡之本色故一往所詣古人或有至有不至耳余
束髮已知嚮慕公近者吳川公梓其家集始獲盡公及
高氏三世之藏吳川公者公仲子高才邃學先兄庶子
之師也爲令以伉直著聲閱數月亦去遵先轍也懷公
集三十年出入必俱今春始成帙遂以先王父孝廉公
二三詩賦冠首而已所著若干卷綴其後孝廉公之生甫
二十有二歲才思澎湃如川之方至吳川自出機軸氣

雋語快博於取才而藻於屬辭比之遂溪蓋由淡而造
於色態者所謂秋水芙蓉也昔陶氏五男不好紙筆而
遂溪之後雲蔚霞起豈黃頭歷齒所敢望哉王元禮論
家門集曰史稱安平崔氏及汝南應氏並累葉有文才
所以范蔚宗云崔氏雕龍父子三世然未有七葉之中
人人有集如吾門者也余邑不能文而恥言文最爲惡
習獨高氏能世擅其業噫彼安知烏衣諸郎爲史所豔
稱若此也

中郎先生全集敘

袁中道

中郎先生少時慧業弱冠成進士卽有集行世其敝篋
集爲諸生孝廉及初登第時作也錦帆集令吳門時作

也解脫集以病改吳合遊吳越諸山水時作也廣陵集去吳客真川時作也瓶花集爲京兆授爲太學博士補儀曹時作也瀟碧堂集請告歸臥柳浪湖上六年作也破硯集再補儀曹出使時作也華嵩遊集官銓部典試秦中往返作也蓋自秦中歸移病還山不數月而先生逝矣其存者仍爲續集二卷

新修錢公堤碑記

袁宏道

澤國之有江警猶西北之有虜警東南之有倭警也倭虜之患至於芟夷我赤子蹂踐我城郭而水之虐正等故捍衛之功比於折衝邑故窪澤割江身爲都每入夏後峽水暴涌雲昏天回幾撼地軸白浪躍雉堞出居民

望之搖搖然夜則萬雷殷枕甫就席輒彷徨起若此者
十餘日或五六日每歲率三四至以爲常倉皇有警則
扶白負稚走郭西之斗堤涕泣之聲聞數十里而堤故
孟公舊址前此去江遠今蠶食且半文村之水直擣其
背萬一水從後決地勢面雖高而方張之怒猝不得洩
必且爲旁齧必且爲橫激我民欲別走則四顧皆壑如
坳堂之塏急而趨芥及芥一漂不可保則固末如何也
已數十年來邑人岌岌議增護堤當事者檄縣覆按竟
中革而慈谿錢侯應選以甲辰之秋來牧芟積舉廢凡
我民之所疾如其疴不盡其蠹不止也凡我民之所急
如其家不擇怨勞險易慨然當之無邀倖無却退邑人

士知侯將大有爲遂先以堤爲請而革議者有數瘠畝
虞其壓輒欲踵故械侯陰悉之偕今丞周君陞躬自按
行見遮道者數輩侯逆問曰是故楊公堤址雖微可尋
也若何訴數輩伏曰故堤也何敢言而堤之一角塚壘
壘穿之則暴骸避之則廢工奈何侯顧丞笑曰若以余
等不習其鄉令賄者曲爲導可謾也叱騶人後去輿蓋
與丞偕步叢草間顧謂役夫曰視吾趾所及卽爲堤徑
行至關廟前率曠土無半鬣羣輩以爲神皆股慄反走
量之得若干丈分丁夫若干名丞周君督率之閱三月
告成諸父老有識者謂其子弟曰若無謂此舉易也當
江防徐公建議時首爲臺使者言狀使者而下愀然動

色至爲出緩趣具議上而一時狐鼠竟以他議奪昔出於上而難今出於下而易若謂侯何等父母也江防者舊郡守堯莘也嗟夫今江水之憑陵靖康以後之虞也邑頻徙頻却大似南渡之跼蹐幸此堤復我民倚斗堤爲長城聞侯又欲疏北江之故道以分水勢如此則中興可望也諸澤國皆有堤雖甚重而無關司命唯是堤與我民爲存亡堤與我民爲存亡故知侯與我民者命也非堤也夫閩外之寄唯命則重余之比於折衝非過也是記也固燕然之勒也

修築黃絲嶺堤碑記

毛廷申

公安古夢澤地沿江上下倚堤爲保障而里名茅穗於

邑中爲尤下江水自虎渡分流南入洞庭茅穗四里橫
當其衝所持以畋田宅者又有支堤一線舊例半請
糧夫半役烟戶人自捍患修理期以勿壞無如鄰封失
守餘波往往及我即如去年丁酉夏秋之交我稼未穡
江陵上流堤決滄沒我田廬邱墓幾盡我楊公下車未
及期月顧飢溺猶已德性自然卽往相視謂父老曰水
自他來我不得以身塞洪流爲今之計不若急築黃絲
嶺則茅穗西北尙有一隅可以託足人民幸無遠竄計
被水於闔邑八分之一我又不得爲民請 命惟約少
緩催科耳言下惻然聞者莫不嗚咽一時感激更相告
語不忍離徙且勉爲輸將然而澇荒之餘亦憊甚矣公

知之初冬檄修舊堤無食者不能前公乃割俸糴招災
民之應有役者每人日給米一升錢十五文受役者數
百二閱月我支堤遂與江堤同告成功嗟乎爲民父母
噢咻而補助之恆也然無是心則無是政無是政則亦
無是心如公以指顧救其魚於倉猝使不至流離捐囊
告糴使不可緩之役汔濟而災民且因以得食是能推
周禮荒政十二而行之以委曲者也只今愚夫愚婦感
念稱述多至泫然誠能動物有如是哉勒石以紀功非
公意也然慶更生而卽康功者不有以紀之都覺寢食
難安故略記其事以垂不朽

闔邑頌鄉宦侯公碑記

春坊庶子文安之西陵人

嘗謂今天下受朝廷股肱之託而動思遠舉以安社稷
爲心者有人矣專喉舌之司而披丹攄赤以弼直答神
明者有人矣職在樞要而賢能行其所學任在軍旅而
封疆不倦於勤或省會之一面守土之一方而保綏賴
以無虞休養得其至當比七而然矣要不過體皇上奉
天子民之德而各勉焉於其位之所當盡者試方之詩
書所稱不懈於位民之攸暨庶政惟和萬國咸甯奚以
加焉若乃身居閭巷而賓朋故舊往來雜沓也車馬僕
御靡焉相矜也以迨求田問舍耳厭日飫習尙紛如也
獨有人焉志安社稷不忘聖明惟恐井里之多事而行
所學以加惠保綏休養不殊服官任事之日則誠難哉

則誠難哉夫甯矯俗違衆要譽爲名高乎蓋必其天性
所成立身有基抑家世清廉遺子孫者厚故忠孝德業
天備之耳不佞曩以辛未之春闈分校葩經午夜焚香
默禱願得賢良士尤願得之吾楚可相切劘以報國家
爐篆縹緲之際首拔一卷乃公安侯君異度理則深厚
度則春容詞則宏博想其人必如金如玉鼎鉉可期者
及揖見之而對大廷實獲我心旋奉命治邑粵之陽江
卓異有聲已拜內召而讀禮家居更聞恬靜寡營手不
釋卷仍然寒窗風味其有心於蒼生可知矣適不佞北
上取道陪京舟泊公安之油江口亦將進而切劘之以
不違乎初念忽闔邑鄉耆糧長遠揖而告曰唯公知人

以有今日亟詢之則頌侯君德爲條其邑利弊於當路而刊行稱便者詞有之曰起我瘡痍解我倒懸匪身爲之實稱象賢其先君子令德綿延桑梓懷恩木鋟石鐫居有間子矜數十輩投刺而進語其事甚詳喜動眉宇謂其鄉先達鄒莊簡公改正南糧省民千金方伯龔春所公疏豁以塞秋稅若干真可媲美流芳公安年苦災疫荷此宏施乞公贈言以勒不朽不負初心驚而異之嗣乃偵其實不爽也至若君之文學不負科第政事不負天子德行不負前人友第不負鄉鄰總不負不佞之鑒取者也尙有進焉者昔韓魏國公每謂保初節易保晚節難真宰相語也蘇公題陽文忠公家書後曰凡人

勉強於外何所不至惟考之於其終乃見真僞此皆名臣實錄士大夫之規箴可移於官之訓誡者也侯子以此報公安歌咏之情而永終譽也庶有當乎是爲記

重修宮保懷白公故第碑

鄒美中

邑城舊瀕大江明崇禎末宮保懷白公疏遷今治其東北隅公之第在焉道光十二年江決上游水下注城不沒者二版耳瀾安後濟南焦明府今郡司馬牧銓先生奉檄飭修墉堞之頽圯者時有昭宮保公後裔以重金鬻公之基於官爲射圃且毀垣甃城獲十鎰先叔父梅軒公嘅焉題詩敗壁有王謝舊時雙燕子銜泥猶傍古牆頭之句託意深微匪第傷心於野草夕陽已也會司

馬佐郡日過此見詩駐車徘徊者久之已而仰屋歎曰
是非當年遷城以固國衛民者耶今金墉鬱其萬雉而
已顧不能享此一片土高臺曲池詎堪憑弔其以宅歸
鄒氏值勿取嗚乎武子清風惟餘片石萊公祠宇莫問
竹林每覽昔人生長之區嘯咏釣遊之所大都歌舞旣
歇荆棘生焉更數十百年欲求遺蹟之所在而碎瓦斷
甃徒髣髴於冷露荒煙間旣已蕩爲邱墟隴畝矣設有
好事如李子蘭之於漢陽園圃雖世遠年湮漠不相關
之人猶將感激欷歔而不能自己况爲吾宮保公之子
孫乎哉且夫有功利於民者皆在祀典而崇鄉賢以慰
士民之謳吟則良有司事也惟宮保爲民人捍萬世之

患而奠厥攸居惟司馬爲國家酬勤事之勞而有基勿
壞惟吾族人士念立德立功之大興肯堂肯構之思則
今之庀材鳩工因舊第而斲蠶之黜望聖之祀宮保亦
以表司馬也抑吾猶有慨焉宮保公五世祖太子少保
戶部尙書莊簡公第臨邑之白蓮湖府縣圖志所謂白
蓮莊者久爲里人所據其子孫弗能有亦更無表宅里
如司馬其人門戶之故一廢一興能無爲之悲喜交集
也哉瞻堂中之俎豆弔湖上之煙波後之覽者尙有感
於斯文

告城隍文

趙希階

維康熙三十有三年六月十三日新任湖廣荊州府公

安縣知縣趙希階謹以牲醴庶饗香帛告於公安城隍之神曰歲三月己酉廡

天子簡命蒞公安拜命之下悚慙不遑思公安據荊州扼塞地勢要區自昔聖賢豪傑歷漢唐而宋而元明史不絕書矣希階章句儒生當此重寄撫心自問其悚慙不遑者非敢爲僞蓋直道其實也今入境循往例長跪而告於神夫神治於幽者也邑令治於明者也其同處此土也神於令有兄弟之誼焉詩曰孔懷兄弟又曰將伯助予故同氣一體義所不容辭亦情所不忍愬階三十年來困頓孤危足跡半天下民間疾苦竊幸周知每至津梁歧路觸目傷心又或旅夢聞雞撫膺嘆息夫保民若

保赤子良有司之責也好惡同民樂只之父母也有其
心無其力令固不敢不勉於力以負 天子然有其
心有其力設力之所至勢有所阻遇有所窮而神且視
爲泛常泄泄然而不知助是神又以負令者負 天
子其於孔懷將伯之誼未有當也令亦何必賴有神哉
令堅白自矢見信於磨涅者已非一日想神之信令者
亦非一日繼自今伊始令之倚藉者惟神神之眷顧者
惟令惟神正直其相令以才猷惟神聰明其啓令以智
慧惟神剛毅其植令以果斷惟神寬大其牖令以容忍
令所不逮者神匡之令所不給者神助之令所危疑而
不能自己者神安全而曲成之俾令以勢無所阻遇無

所窮得勉於力以無負 天子休命與神相終始斯
固以明協幽以陰輔陽天地彌綸之大道也敢布愚誠
尙其臨鑒謹告

募修刻木觀殿文

袁中道

寺觀募疏概不敢錄獨誌此文以風錫類且以
見文士之筆端妙有微旨也

丁蘭者河內人也母歿蘭以木刻母貌祀之最靈喜愠
呈色鄰人借鋤蘭適他出妻稟之母母色不允妻辭之
鄰人知其故搯扶木人蘭歸見母貌不怡訊之妻大怒
手刃其鄰人事聞於官逮之蘭辭木人本人墮淚逮者
以聞官神而貸之遂上聞於朝竟荷朝獎天下以其孝

格鬼神相與尸而祝之至於今不絕事該三教不宜專屬之道門第以至德精誠上帝所欽諸仙所重即屬之道門可也此觀之所由起也里中舊有觀殿堂已圯先舅靜亭公施屋一所議拆去樹立而舅氏亡矣表弟晦伯等不忘父志竟如原議有丁公不沒其親之遺意焉第繕修之費尙自蕭然不能無望於孝子仁人蓋二氏之說儒者之所不譚故其不施也非慳也以衛教也今大孝蒸嘗之所爲儒門之所首重正諸儒攘臂捐財時也急相與其出金錢刀幣以廣大其室宇而恢廓其垣墉使一邑之人皆曰儒者之舉動果何如哉向爲闢邪則主慳今爲崇孝則主施慳施得宜所以爲儒者也是

疏出而觸發一邑孝子之心舉數十年鬱而未施之財
乘此可施當施不忍不施之處而盡出之此一片地當
與濯龍青羊諸處同一華整矣何幸如之

題竹林舊隱卷

太岳集

張居正

竹林者萬子榮故居也萬子生於孱陵長待詔宦者署
出爲益內史是時宗藩中益殿下最爲親賢好學而萬
子以修潔自將又聰慧穎悟以故得幸於王三年以類
奏走京師而余與萬子同鄉里既相見道故舊勞苦如
平生懽已乃向予嘆曰吾聞君子樂其所生而有情之
物思不忘本故楚客越吟莊生愛似其致一也吾少有
煙霞之想方其隱居修竹之間圖書自娛蓋自謂與此

君終焉爾竹堅貞有常性貫四時凌霜雪而不改又盤踞糾結固守其所得君子之止焉而吾輕去父母親戚遠宦他國舊業日蕪枝柯零落竹不負吾而吾負於竹多矣能無思乎張子曰若是則子之愛竹是得其形而不得其神者也夫得其形則視天下之物皆物也得其神則視天下之物皆我也故竹微物而昔之君子貴之皆意有所愜焉者也夫外直而中洞音中律呂者虛也發萌隕籜筠然葱蒨者文也嚴霜下零衆草俱萎寒色森七與貞松而並秀者節也君子取其虛以宅心可以宏翕受之德取其文以飾聽可以煥至德之光取其節以勵行可以堅獨立之操斯所謂得其神者也得神而

形可忘矣且聖人不櫻情於物而委心以任去留故以
天地爲寄跡以四海爲一區若子之言必處瀟湘之間
日與其蒼翠檀欒者居而後爲友也母亦與昔人之所
存者異乎萬子矍然曰遠哉先生之談吾乃今而得與
竹爲友也吾向者之言固旣聞至論請以終身服之

二聖寺碑誌

洪鐘

邇者

天子神聖德洽幽明瑞兆清和羣牧用命百神效職相與福
茲黎元俾克永享昇平理莫易也邑南服澤國也濱大
江白湧碧翻長堤虹帶資保障焉 朝廷之所引重當
事之所經營而境中父老子弟所不憚其勞疲修築防

護靡有定歲者也癸酉夏雨霑連月水溢勢近潰邑人大恐出死力支持幾不勝呼號震天地指青婁二如來暨黃衣使者默祈幽護須臾煙霧迷望二乞人至曰公等何坐困也言訖就潰漏所徑下築之半嚮出曰無懼矣吾前治黃河類此去六月四日事也時觀者徬徨莫措會疑信半各散歸爲避水計而近堤居者視江中水潮平趨視築處完固前之汨七噴出者似遁旋踪乞不得自是邑安堵無恐長老爲述寺二如來丙子癸丑顯靈捍水入夢遺事於是恍然曰乞者非人也其神也謀所以報之夫聖自東晉來建寺敕封靈異載邑乘諸先輩碑文詳矣而此復現身低眉伸大手段出億萬生靈

於魚腹中則於斯莊嚴其像輝煌其居在人非似獻媚
在聖抑豈爲竊奉乎顧吾思神受職於天與臣受職於
君勿異也天與君所託爲我民捍患禦災責至重也神
克盡其職不以土木享椎祭則神之忠於天也臣克盡
其職不以尸曠盜朝冕則臣之忠於君也以今二如來
觀夫亦可謂不怠於爲民無欺於天者矣况夫幽贊治
理上慰

聖天子已饑已溺之願哉是固樂得誌之以爲凡神風且俾
司牧者防江時大寺禮聖餘覽之知所勸云

附觀風示

陸炯

貢玉掄珠必在琳瑯之府規天萬地首求輪囷之材蓋

拜獻必有先資惟文章足以華國公邑地多勝蹟代有
傳人工部堂存浣花分韻靈均祠古餐鞠揚芬謚典則
兩美鑣聯科名則一門鼎峙至於蒲綴連珠穀登雙穗
凡此地靈人傑允推俗美風醇若夫士習之端攸關風
氣人文之萃首賴觀光况典索邱墳本多博物梗楠杞
梓夙裕良材

欣逢

聖天子加意藝林頻開蕊榜詔舉臨雍之典聿宏同軌之風
學海性山震今轍古本縣三魚承業五鳳濫聲芹藻蔚
蕤秋高鳴鹿蓬萊窈窕春靄翔鸞茲雖一行作吏尙祈
三物興民多士靡史枕經夙刷搏風之翮薰香摘豔宜

抽畫日之毫欲愜鄙情須觀佳作茲擇於本月二十二日躬詣書院面試多才行見筆燦生花不愧冰甌之滌聲聽食葉何須銅鉢之催窺豹見一斑固所願也吐鳳翔千仞請嘗試之

救荒奇策

袁宗道

日者天災頻仍萬口嗷嗷東南苦於天吳西北困於旱魃山陝之間食石以延須臾之命何論懸罄哉天子旰食公卿拊髀計可甦元元者不難胼手濡足圖之而二三臺諫皂囊屢上卽不能外蠲賑二議者以愚讀周禮荒政可裨今緩急莫如散利莫如薄徵散利卽今之賑薄徵卽今之蠲蠲賑二議卽令管晏持籌賈晁精算計

必出此矣然而竟未能濟元元之急者何也持其迹而
拘攣弗變獵其名而奉行尠實也拘攣弗變奉行尠實
即絲綸時下日纍載少府之金而馳之郊何益乎故愚
竊計蠲之策一善行其蠲之策三賑之策一善行其賑
之策六今海內重蓄郡邑之稅應存留者業已免徵而
起運者尙未全豁也枵腹子遺救死不暇而朝夕辦此
故起運之課宜省也流聞州邑不肖之吏黃封雖下白
紙猶催饑羸之夫腹無半菽而手足猶繫於桁楊藉當
代之曠恩爲潤篋之便計乃其姓名猶有不入撫巡之
白簡者何其貪而黠也故苛徵之察宜密也民方草食
不充而大吏猶華軒盛駟烜赫載道軒輶之使至餽遺

充斥供張豐腆此非民膏何以給之故官守之自奉宜薄也茲善行其蠲之三策矣以幽遐鄙屋悉仰內帑其勢易窮而悉舉州邑之庫藏贖鍰給州邑之窳者鮮不濟矣故從朝廷賑之則難從州邑賑之則易也一邑之中一都之內豈無豪貨財好施與者故令上賑之則難令下民自相賑則易也里之厚貲者所捐若而百則賜棹楔旌之若而千則爵之若而萬則厚爵之富民有不竭蹶以趨者乎故強之使賑則難勸之使賑則易也幽遠山民去誠百里晨起裹糧蹙蹙趁城猾胥猶持其短長非少賂之弗得徑受賑得不償失奈何宜令耆民之廉平者偕里之富好施者臨其聚落招給焉平有賞私

有罰蔑不蔬矣故趨民就食則難移食救民則易也或
量里之廣狹爲爨若干令耆民及富民之平者烹糜而
日飼之期於便近民無薪水之煩得飽食矣故散粟給
民尙難爲糜以飼民尤易也夫珠不可襦玉不可食有
米粟乏絕之處人至抱壁以殞者故卽得州邑及貲戶
之賑而操金貿易轉移尙艱故使下民貨粟則難官司
爲轉貨而給之尤易也凡此皆善行其賑之策矣語云
中流失船一壺千金小補罅隙之計大都若此豈能奇
乎善哉先儒言之也有治法無治人今法非不犁然具
而州邑之吏故紙尺一以壅滅澤可濟乎故在天子清
心節用凡內府供應一切倣諸祖制毫無所增上絕冗

費則公府有餘金而賑易私家不必濫取而蠲又易撫
巡諸臣又窺見意指誰敢不堅羔羊之節以玷官箴一
二奉行不謹之吏且解組去不爲蝨矣不然吾未知果
有奇策之可以救民也

南平獻瑞麥頌

並序

監利
舉人潘學植

牧銓先生治公之四年夏五月長里唐姓民鄧姓家田
產瑞麥數本或二歧三歧五歧交里胥獻之備述公德
政所致公謙退不以自居勞賞農人謂係耕作之勤豐
亨之兆焉邑人士感公德越數百里丐敘於植植聞
而喜弗敢辭謹按邑長里枕河之東堤亘三十餘里趙
楊孫諸坑資爲保障壬辰堤齧於水公勞心撫字堤之

廢者次第畢修而瑞麥卽由是而出植嘗讀史如張堪
守漁陽開稻田入百餘頃民歌其桑無附枝麥穗兩歧
而瑞麥一見宋皇祐二年眉州彭山縣獻瑞麥圖五歧
者一本三歧者二本二歧者十餘本上詔以束帛賜農
夫而瑞麥一見明洪武三年陝西寶雞縣麥秀三歧五
歧劉青田作頌歸美上德而瑞麥又一見夫由漢及今
幾二千年矣由漢而上夏同本異穎殷異本同秀周二
穎同秀亦不詳其爲禾爲麥遙七數千載獨於公之治
民而麥之二歧三歧五歧者始又一見豈非不可倖致
與值壬辰主講南平書院側見公請卹請賑不畏廷
議有古苗蓋風念重堤防不避風雨有古王尊風議蠲

議緩不忍催科有古元結風今果政成而瑞叶時和而
祥應善乎宋祖有言曰朕以豐年爲瑞五穀爲寶若茲
多歧之麥則又瑞之大寶之尤者也

國家久道化成河清星聚史不絕書和氣致祥固不待言
然非有愛民如子務本重農之良有司則麟遊而山陽
至再鳳集而潁川尤多豈不以秘景休徵固

聖天子遊河觀洛之希瑞而一方一隅尤足以徵善政而驗
化理者乎植以振鐸於黃不獲買舟南旋躬覩多歧異
狀然以數千年寥寥僅見之瑞得預紀載之榮斯亦禱
昧所不暇揣者謹拜手而獻頌曰

重輪抱戴徒事鋪張醴泉浪井附會荒唐朱英紫脫

懈薦當康飛走動植瑞益渺茫於惟賢宰琴鳴於堂
澄心撫字敦勸農桑一行一效鐵低炭昂爰有嘉麥
在邑之陽二歧五歧競秀連芳天人交感兆應循良
凡厥庶民口碑載揚公乃謙退辭弗肯當不自爲賢
其賢愈彰政成將去猶慎宣防挽鄧情左借寇思長
雖然此固公邑士民之私見植則願公之人

綸扉而贊化理俾太史得以偏天下而書瑞書祥

請給寇公祠祀典疏

明嘉靖七年

戶部尙書臣鄒文盛謹奏臣原籍湖廣公安縣境內有
宋臣忠愍萊國公寇準祠堂一區史誌所載故老所傳
蓋謂準自雷州喪還道出公安邑民插竹迎祭後復生

筍成林卽立廟祭祀以羽流主祭事號竹林道院宋南渡後孟珙制置荆襄於道院東南築書院以處四方流寓之士祀准於內因名竹林書院理宗親灑宸翰書額賜之本朝改書院爲儒學而道院仍舊數百年來邑人歲時致祭率以爲常臣按宋史本傳準事太宗眞宗朝爲相忘身殉國如壽王之立澶淵之議是其功之大者餘不能悉數也及遭讒而死感民弔祭能使旣斬之竹含生出筍蓋其忠誠義氣有以動天地孚草木非偶然之故也今祠宇雖存而儀文不備伏望陛下追念忠賢祭需等項定立品式每歲春秋縣官舉行祀事永爲定制實天下爲臣子者之大勸也

部覆如議行後
有司遵行之

祠自楊公之駢改遷北關外復又遷於城內道光己酉祠圯復遷南平畫院之西

舊縣遷城疏

明崇禎七年二月初七日

欽差提督西司房官旗辦事錦衣衛管衛事都督同知
臣鄒之有謹奏為流賊勢逼荆襄土城濱水非地懇乞
聖明俯允輿情擇基遷建以安保障以垂永久事竊照
流賊不突鄖襄則荆州有剝膚之勢臣籍公安正當要
害雖蕞爾小邑實荆州之襟帶江漢之門戶洞庭之咽
喉七省之孔道也寇至惟憑城守以無恐若臣邑則有
不可恃者矣臣參禁衛痛切時艱桑梓利害不容不及
時為我皇上陳之而有所請也臣邑地勢下流滄桑靡

定二百年來自柴林街遷至二聖洲復自二聖洲遷至
油江口至崇禎元年又以江圯請遷蒙皇上鑒允下臣
鄉撫按估費欲動錢糧一萬八千兩卜遷地名椒園計
土址初成四門學宮建立並現存磚料等項僅費七千
金其餘將次第經營矣不期江水奔潰異常亡何遷基
復近大江之澤家鄰蛟室民切魚心人情俱趨起而不
前城工亦蹉跎以漸緩迄今七年仍成曠壤空立泥垣
此何城也而可爲要地保障耶茲皇威震赫羣賊旦夕
就殄或可無慮但創建之初正欲爲久安長治之計避
江而遷則近江之地終不可卜迄今雉堞未底厥成錢
糧尙餘多半不宜另擇安土以立不拔之基乎臣 邑中

父老子弟僉擇本縣西南四十里曰祝家岡前有峯巒
後依岡阜左右岫壑環繞層叢凝結世世保無水患蓋
與其近而就窪不若遠以依高且地與新遷舟楫相通
可以運載移此造彼朝發夕至遷果得地一勞永逸矣
况暫成之而復淪於江朝廷金錢豈不可惜若遷祝家
岡不惟永免波濤之害卽未動之一萬一千用於實地
並已費之七千亦歸實際矣臣思錢糧仍本舊估基址
可爲長業且時正切保障而專又下屬人心上關國計
用是疏陳上請伏乞我皇上俯憐一方魚鱉之可悲洞
鑒百里河江之所繫敕令臣鄉撫按道府縣諸臣速給
未發錢糧早遷催竣庶金湯永固帶礪長存萬民享樂

利以無驚千載共乾坤而並久臣與合邑同戴皇恩於

不朽

臣不勝激切
待命之至

再疏崇禎九年

欽差提督東司房官旗辦事太子太保錦衣衛掌衛事
後軍都督左都督臣鄒之有謹疏為遷城奉旨已久流
氛橫突宜伏乞聖明嚴敕速竣城工以固保障事臣邑
公安濱江水噬城圯又罹火災臣於崇禎七年二月內
具有流賊勢逼荆襄等事一疎奉聖旨遷城避水依高
有裨保障但事關合邑動貴萬全着彼處撫按官會議
具奏該部知道欽此欽遵迄今三年矣時流賊遍滿臣
鄉官民憑何守禦誠有足為寒心者蓋因改遷以來縣

官凡經五易掌篆有如傳舍是以朝方受事夕忽輟工
倘非久任責成難就金湯鞏固茲賴撫臣余應桂爲按
臣時加意地方苦心設處捐貲助費錢糧陸續接濟今
有新按臣徐之垣激揚振作刻期可竣兼之府道竭力
贊襄縣官張大韶精敏練達諸務綜覈并督工驛丞袁
之彥等分任催趲羣力畢舉工程正有頭緒但恐轉盼
瓜期銓陞忽至經手之人倏而卸事將垂成之績爲半
途之墮矣公安一邑不足惜其如皇上封疆何伏敕吏
部暫停陞轉俟其工完優敘示酬庶責任專而城工可
計日俟矣臣不勝激切待命之至

六瑞說

李應鷺

語有之和氣致祥和之義大矣哉今夫動植之物何地
蔑有乃公安一隅居者相與嗟嘆於野行者相與傳說
於路遠近奔走驗視狀其物之異而爲瑞者凡六以歸
之

邑侯楊公公卻其詞謙讓不居且禁以必毋上達竟不
能止嗟乎物之異非物爲之也造物者爲之也而民之
效此媚茲非民爲之也宜民者爲之也民之言曰楊公
之守茲土也汔五年所士安於讀農安於耕工安於市
廛旣寬惠以柔民復明慎而折獄事事出於至誠是以
惟德動天所謂政通而人和非耶人和而天休至自然
之理也

穀穗兩歧

葑田穠穫

龍升城內

牛犢雙產

蒲綴連珠

枯木復生

跋

志者史之一體自漢儒撰地理風俗諸篇郡邑始皆有
志要皆昉小史外史之義以裨益吏治考鏡得失賈誼
曰移風易俗使蒸蒸庶回心而嚮道類非俗吏所能爲
在昔朱文公守鄱陽首問郡志識者謂其知大體我
邑侯楊公之所爲豈復異是捷以稀年衰老召應鈔寫
之役竊窺公之苦心其所以扶植世道黼黻泰平儒
術卓有本源而附驥之蠅遂得因之以千里抑何幸歟

聊識數言於簡末

八
二
系
五

卷
之
一

藝
文

疏

四
二

沙市新新代印

公安縣志卷之七

藝文志下

書目

宋

張最 洪範解一卷 集十卷

明

王恂 誠齋集

王軾 平蠻錄二卷 明史本傳稱軾於宏治十三

年人貴州軍務討普安賊婦米魯用兵五月破賊砦

千餘盡平其他是編所錄即其奏捷之疏也

王輅 師卦解一卷 輅以鳳翔府通判歸隱平樂

村竹林蔡復一撫黔過而問學輅著師卦解一卷報
之皆折衷至理

鄒文盛 瑣闥奏議 默葺奏議

袁士瑜 海螽編二卷 此書大旨以儒釋二家同源

異派或援釋疏孔或證孔於釋謂濂洛諸儒於聖人
之書詮釋妙暢如樽海是編如螽注海故名海螽編

龔世薦 方湖講學集

袁宗道 尚書纂註四卷 白蘇齋類稿二十四卷

袁宏道 瓶花齋雜錄一卷 此書多記聞雜事及經

驗良方閒及書傳 觴政一卷 是書記觴政凡十

六則前有宏道引語採古科之簡正者附以新條爲

醉鄉甲令朱國楨湧幢小品曰袁中郎不善飲而好
談飲著觴政一篇卽此書也

宗鏡錄十二卷 明文雋八卷 錦帆集

敝篋集 廣陵集 破硯齋集 華嵩遊草

瀟碧堂集 中郎集四十卷 公安縣志

袁中道 珂雪齋集二十四卷 禪宗正統一卷

遊居柿錄二十卷

袁彭年 省垣奏議 掌憲奏議 土風遺稿

詩細 史屑

袁祈年 梅花奧集 南遊草 三冬草 寫蓐草續

花源遊草

高 校 高氏家繩集

高文光 擬陶詩 懷谷詩文集 北觀稿

燕翼錄

高重望 致遠齋集 遠青閣集

毛羽健 西臺奏議十卷 和兒詩十卷

委羽集一卷

劉 珠 疑庵集

成 巳 七洲集

王 格 少泉集三十三卷

田 昌 吳越草 爵茲館 綠映軒 微尙亭

王承先 豔雪齋

龔仲慶 遯庵集

馬芝 紫崖詩集

房陵 公安縣志正統時修

梁善 公安縣志成化時取房志增修

清朝

孫錫蕃 公安縣志 舉人高拙庵袁夢溪諸生何粹

中同事纂修

何國棟 公安縣志三卷

楊之駢 公安縣志六卷

馬龍騾 時藝彙

陳文燦 實齋詩文略

毛壽登 廊園集四卷

龔家仁 雙田詩文集四卷

陳信中 新遠集

沈光斗 性理五聲 躍亭文集

洪鐘 嘯谷集

嚴文謨 宦閩紀事

羅宏漳 崇本堂文稿

田鍾雨 海浦遺愛編

袁廷翹 竹嶼堂集

羅才標 平苗紀略

田國文 荆陽七藝 廿二史提要 少陵詩選

鄒美中 燕石藏橐 西林雜著 左傳約編

左傳分紀 古詩選 語策編年 唐詩中聲集

試律約箋 華亭韻通 切韻表 音韻支析

田家崧 人鑑

袁憲健 小箕管谷詩集

侯家璋 守默齋詩集

侯家光 偃蓋山房賦草

李廷璧 跨鶴樓詩集

詩

古今雜體

公安懷古

唐杜甫

野曠呂蒙營江深劉備城
寒天催日短風浪與雲平
灑落君臣契飛騰戰伐名
維舟倚前浦長嘯一含情

官亭夕坐戲簡顏十少府

少府公安尉

南國調寒杵西江浸日車
客愁連蟋蟀亭古帶蒹葭
不返青絲鞵虛燒夜燭花
老翁須地主細細酌流霞

公安送李二十九弟晉肅入蜀余下鄂沔

正解柴桑纜仍看蜀道行
檣烏相背發塞雁一行鳴
南紀連銅柱西江接錦城
憑將百錢卜漂汨問君平

移居公安敬贈衛大郎

公安縣志 卷之八
三十一
衛侯不易得余病汝知之雅量涵高遠清襟照等夷生
平感意氣少小愛文詞江海由來合風雲若有期形容
勞宇宙質樸謝軒墀自古幽人泣流連壯士悲水煙通
徑草秋露接園葵入邑豺狼鬪傷弓鳥雀飢白頭共宴
語烏几侍棲遲交態遭輕薄今朝豁所思

公安送韋二少府匡贊

一作建贊

逍遙公後世多賢送爾維舟惜別筵念我能書數字至
將詩不必萬人傳時危兵甲黃塵裏日短江湖白髮前
古往今來皆涕淚斷腸分手各風煙

留別公安大易沙門

隱居欲就廬山遠麗藻初逢休上人數問舟航留制作

長開篋笥擬心神沙村白雪仍含凍江縣紅梅欲放春
先踏鱸峯置蘭若徐飛錫杖出風塵

曉發公安

北城擊析復欲罷東方明星亦不遲鄰雞野吠如昨日
物色生態能幾時舟楫渺然自此去江湖遠適無前期
出門轉盼已陳跡藥餌扶吾隨所之

醉歌行贈公安顏十少府請顧八題壁

神仙中人不易得顏氏之子才孤標天馬長鳴待駕馭
秋鷹整翮當雲霄君不見東吳顧文學君不見西漢杜
陵老詩家筆勢君不嫌詞翰升堂爲君掃是日風霜動
七澤烏鬢落照銜赤壁酒酣耳熱忘白頭感君意氣無

所惜一爲歌行歌主客

公安安遠寺水亭見展公題壁愴然流淚因書四

韻安遠寺卽
二聖寺

元正

碧澗去年會與師
兩三人今來見題壁
師已是前身
芝葉迎僧夏
楊花度俗春
空將數行淚
灑遍塔中塵

留別公安賈明府

戎昱

葉落門前江水深
淺於羈客報恩心
把君詩卷西歸去
一度相思一度吟

贈宗人前公安縣令君

鄭谷

喧卑從宦出喧卑
別畫能琴又解棋
海上春耕因亂廢
年來冬薦得官遲
風中夜犬驚槐巷
月下寒驢噬槿籬

孤散憾無推唱路耿懷吟得贈君詩

公安

宋陸游

地曠江天接沙濱市井移避風留半日買米待多時
冷停菰葉鶴馴傍鱗枝昔人勲業地搔首嘆吾衰

泊公安縣

秦關蜀道何遼哉公安渡頭今始回無窮江水與天接
不斷海風吹月來船牕簾捲螢火鬧沙渚露下蘋花開
少年許國忽衰老心折船樓聞笛哀

孫黃渡

范成大

捨舟從陸更閒關徑仄仍荒亦未乾棘刺近人牢閉眼
泥塗兀馬緊扶鞍茶山盜藪路程惡麥隴人家懷抱寬

公上集卷之八 卷之八 五二
擔僕輿夫盡劬瘁病翁那得更加餐

發襄陽後却寄公安故人

包佶

揮淚送故人將書報所親晚年多疾病中路有風塵王
粲頻徵楚君恩許入秦還同星火去馬上別江春

竹林祠

王十朋

油水江頭寇相祠凜然如坐廟堂時一點精忠不負國
枯竹知公人不知

過公安

趙抃

劉郎浦上公安渡我過高吟老杜詩煙浪幾重江幾曲
算應風物似當時

公安縣

陶商翁

門沿大堤入路傍淺沙行樹短天根起山窮地勢傾孤
舟難泊岸遠水欲沉城夜半尋津濟煙中菰火明

蕭寺黃冠夜泣

明建文帝

王子春正十三日寺遇黃冠不相識結蒲拄杖坐西偏
低頭不語意自閒亡何一人復冠釋髮黃面縐多愁顏
撫掌遽驚還嘆息漏分但聞聲唧唧似裏萬斛愁難傾
哀猿夜嗽寒鴉泣余腸縈結詎堪言布衾溼透皆淚痕
晨興往探訊其苦兩公踪跡雲無根空餘蟬斷字數箇
依稀恍是亡臣名我欲把毫悉胸臆冰凍筆花寫不得

出程濟從
亡隨筆記

送荆南帥戶侯移鎮公安

浦源

悠悠旌旆碧雲端遠去孤城入亂山淮月上樓人奏角
海天低樹雁臨關幾家白髮遺民在千里青絲獵騎還
舊日荆南多勝概別來惟見畫圖閒

寇公祠餞江編修還蜀

王恂

仙舟西去溯流遲江上登臨弔古時錦纜纒牽巴子國
椒園先拜寇公祠綠楊烟鎖連芳徑修竹雲高長茂枝
千載忠腸遺憾在天涯此日動君思

前題

王軾

大事當頭只自知誰能協力濟艱危君王不肯爲孤注
宗社將應到色絲也有通天犀作帶更無插地竹生枝
尋幽坐徹風篁裏山鳥山花總寄思

前題

鄒文威

名在當時虜亦知北門鎖鑰寄安危
摧鋒聊試千鈞弩補袞應須五色絲
奸骨已消炎海瘴忠魂猶託渭川枝
崖州咫尺還相遇天道分明可再思

前題

成己

江上遺來寇相祠旋將舊竹插新枝
北門鎖鑰偏遺憾南國蘋蘩重所思
自昔樓臺無地起於今梁棟有人支
春回精爽荒烟裏爲借鄒陽玉律吹

懷友人

懷君不見苦低垂漫倚瑤琴寄所思
天遠幾時靈劍合月明無那洞簫吹
孤村壁樹劉郎浦淡日蒼雲寇老祠

追憶同袍舊游地雞鳴僧榻夢回時

江中凱旋爲伍松月賦

鄒文盛

中丞執法統江防文武才兼孰短長石浦昔曾占宅相

松滋今已破天荒

石浦公外祖所居松滋甲科自公始

勤王事業真轟烈報

主忠誠正激昂考最不須離信地殊勳多日紀旂常

送熊太守致仕還澧陽

咫尺孱陵接澧城無因杯酒餞君行洞庭船下風仍健
霄漢雲遮月自明宦績真堪青史載閒情直與白鷗盟
回看九子池頭水會有靈雛向日鳴

鄒大司徒致政歸里

何珊

輔國功成便乞身錫歸尤荷聖皇仁崇階要秩鄰三少

全節完名更幾人宦海其如專盛美周行誰不望清塵
居閒且作者英會載酒尋幽莫厭頻

前題

上海祭酒陸深

長江西來灣更灣瀟湘洞庭波潏潏大司徒公孕其秀
兩疏萬石伯仲閒余昔抱疴臥空谷聞公慕公不可攀
接公巖廊擁紳珮所憾向晚隨清班一朝抗疏辭天子
但道老臣宜投閒古人肝膽貴真意向來出處乃大閑
卽從當代數名碩前有東山後黃山我公福履尤過之
今日方成畫錦還綠野自應娛宰相南陽况是帝鄉關
長江蒼水雲密端可起懦兼廉頑此風此道詎可少
吾儕小人空厚顏吾儕小人空厚顏

前題

分宜嚴嵩
侍郎

力捲風塵屢乞身都門冠蓋送歸人
病來國計關心在老去鄉山入夢頻
沙上鷺鷥堪避俗山中薇蕨正逢春
亦知感激君恩重夜夜滄洲望北辰

前題

餘姚孫堪
指揮

心安皆雅適道在有餘光歸試黃山
屐春深萬木長

畫錦堂

劉珠

丹青運盡精神巧山水移來畫錦堂
透石笋根穿地窟探花蛺蝶惹天香
蛙鳴宿雨催春老魚躍東風引浪長
自是化工真發育昆蟲無處不悠揚

外大父方伯公

袁宗道

風神只似壯齡時鶴髮丹顏古接羅此日南平白社長
當年中土紫薇司燈前歷歷蠅頭字篋內翩翩近體詩
江月江花時共賞非仙非隱使人疑

孝廉舅惟學

少年經術兼詞學中歲空門又道家服藥前身應許遜
博聞夙世定張華懷中明月珠堪售望裏神仙路不賒
只恐鳳池須綵筆難得勾漏問丹砂

侍御舅惟長

懶慢人閒惟叔夜閒居膝下似安仁雲霄調外沉冥客
花月尊前感慨身圃學東陵瓜欲結家通北渚蕙堪紉
長卿此日游將倦醉月吟風幸託鄰

中郎弟進士

前年羽獵獻長楊歸去三湘問鴈行作賦麗如袁彥伯
通經精似蔡中郎角巾領袖高陽侶麈尾憑陵俠少場
夢草真堪對小謝種花無那去河陽

小修弟文學

卻憐射虎人難偶祇覺雕蟲技益工白日悲歌燕市筑
青春失意楚人弓隴西不媿稱金友僕射從今避火攻
如此無官窮亦得高名誰復杜欽同

以上五人與石浦先生舊爲南平社六人

行部公安袁進士中郎過訪

參政

陸懋龍

雙旌初到部片刺忽臨門冷榻塵誰掃新茶火正溫望

君收白眼屏從接清言待浙官廚米留燈坐日昏

送王以明先生赴南都試

袁宏道

把酒初聽百舌鳴蒼烟盡處看君行梨花雨漲春流疾
柳絮風飄畫槩輕寶劍危冠真國士高牙大纛盡門生
秋來怒翻天池老不怕垂天化不成

別龔散木

梅雨濯江干江風細吐寒紅亭一杯酒慘無主賓歡天
風吹子墮倏忽送子還遊蹟如電影閃爍太無端子曰
爲官苦予嗟行路難各自相慰勞言言沁心肝與子如
林鳥升沉各羽翰別子如湍水東西異波瀾何如一合
併白首臭春蘭萍散有時聚雲老終還山江頭風日雨

容易凋朱顏

過藕花莊

深院竹編牆叢梢若箇長入門溪雨濺滿路麥風香好
夢因涼得閒愁到水忘因循二十載未到藕花莊

柳浪館同龔散木小修賦得雪中新柳

纈青縈白幾千條胡粉聊將贈舞腰當日輞川無此景
強於雪裏寫芭蕉

書館

鄒得魯

孤館蕭蕭燒短檠蛩聲斷處蟋聲聞侍兒不解忘眠趣
報道譙樓已四更

讀錦帆集寄卓老

袁宗道

世事玲瓏說不周，慧心人遠碧湘流。都將舌上青蓮子

摘與公安袁六休

六休袁宗道子

贈龔散木舅謝諸生歸隱

黃雞唱罷慘無歡，萬事勞人轉覺難。君自愛看高士傳，
予今欲溺腐儒冠。朝耕西嶺雲千畝，夜釣南月一灘身。
似閒鷗心似水，纔離火宅便輕安。

元宵

同雲急雨暗亭臺，幾有瑤華照酒杯。佳節風光雖不似，
歡場懷抱也宜開。時移入眼無塵物，老嬾隨君作散材。
歲歲願如燈上影，兒童拍手說重來。

草堂

龔仲元

聊且戢烏羽如何捋虎鬚
誰能妨性命醉不計頭顱
閱歷成今古幽尋盡有無
油江千尺水夜七明月孤

送初月弟還公安

黃彭年

久與流離習鄉情漸漸灰
一聲吾弟去萬感片時來
友戚今俱盡音書何處裁
若逢兒在沔但說我將回

哭侯公異度殉節衡湘

王調甫

漢臣殉節亦頻書義烈惟君倍凜如
膝骨搥殘尤奮迅
舌鋒泉湧舊迂疎
屢銓多士歸冰鑑誰贖孤兒載輶車
痛哭荒村風雨夜常瞻精爽夢魂餘

館中寄友人

賈生
羅遇奇

坐成枯寂勝蒲團月滿風清首藉盤
飽足黃山一片色

攜歸分寄共君餐

清朝詩

酬贈田二伯珩見和移居石坪

毛壽登

親老思偕隱兵凶倚降祥每嗟魚饌薄但覺馬通香草
樹林邊認笙歌火裏忙餘生惟爾我且喜各能康

寇退寄毛恭則

華容貢生嚴首升

兩年憐墨突今日尙吾廬雨歇林無雀春歸食有魚漸
收旣去僕喜看不全書念子猶行野言旋幸莫徐

送周來公之任

馬芝

文氣日凋敝吾子特強鳴因茲濂洛後暗室一炬明懷
道不自私君子尙其貞勉莫爲仕貧冰雪甯錚七

天王堤

諸生 毛仁軌

暗裏天王效指揮周堤蜿蜒象輪圍世塵迴隔應難到
惟放鐘聲出翠微

明月池

堂前忽現琉璃地流潤還滋功德林最憶昔賢詩句好
清池皓月照禪心

築堤吟

知縣 何國棟

岷山萬派赴荆門三月桃花怒漲翻但使安流還禹貢
敢言真勇是王尊千家鼙鼓連波沸百里虹霓載浪屯
汗雨鋪雲民力普污邪禾黍勝高原

文勘二聖洲蘆政

知縣 沈爾燦

弭櫂容城秋水清
荒州履勘又催程
無邊野色連雲暮
不斷征帆隔浦明
少府金錢仍歲入
漢京湯沐問遺民
寒潮夜落蒹葭冷
故國蒼涼幾變更

泛舟柳浪湖

訓導 孫錫蕃

柳浪千年綠
中郎故里墟
雙星懸夕永
孤月掛林疎
棹泛銀河遠
風高脫葉徐
瓶花何處是
隔岸冷紅蕖

行宮應制賦得佳氣滿山川

陳文燦

康熙癸未
豫州命試有司

聖祖仁皇帝巡幸
欽定第一

洛道東巡 玉輦來出關
紫氣望中開
恩高嵩嶽雙峯
靄澤滿黃河
巨浪催是處
網緼縈綵仗
無邊景色接
僊臺
休徵自應昇
平象遙聽歡
呼徧草萊

中州藝
文志

賀荆南新任副憲孔東玉隨車雨後卽晴七月二

十日

乘驄巡楚喜遙臨膏澤隨霑潤已深禾實四郊秋有粒
風清二郡境聞琴家傳時雨作霖雨身慰民心動帝心
旬日遠同朞月意相看何處不謳吟

武侯祠落成

知縣楊之駢

幼讀三國志師相倍生欽喜讀出師表愛誦梁父吟江
南無專祀惆悵罔登臨出宰南平日入境首相尋人指
三橋裏野曠樹蕭森昔建武侯祠祠荒榛棘深尙存雙
石柱居民不敢侵未幾來事事黃鸝空好音停輿覽舊
址忠魂曷忍沈垣楹難猝就三載捐俸金鳩工賴文子

邑庠文 廟貌煥幽岑雖乏參天柏翠柳自成陰行人肅
瞻拜勝蹟留古今舉墜爲予職悠哉愜素心

舊縣感懷

菽葦蕭蕭一望迷當年曾此建城池殘碑猶識三袁里
斷岸空存二聖祠柳浪名亭波浩七孱陵舊道草離離
堤邊憑弔堪惆悵最是風清月照時

閱堤至民安驛遇雨口占

勞心修築堵狂瀾宵晝無分次第看細雨沾衣防淺滑
微風撲面耐輕寒旁觀只道居官好局內方知作宰難
但得崇墉開百室此行差不愧民安

楊公堤

全楚皆澤國南平素苦水大堤臨江渚綿亘百餘里下
車正值興工時策馬閱視任奔馳在在雖可堵狂瀾堅
厚無過楊公堤楊公邑乘載其詳學問經濟誰能比當
昔舊邑繁華日便識滄桑更變理遙憶數十餘年後城
郭盡付波心裏預築此堤廿里餘廬舍田園無傾圮至
今俎豆崇祀典千秋萬世樂歌只吁嗟噫嘻四世三公
吾家舊如君無愧關西後前有召父後杜母未識余能
繼公否

縣歸晚舟

鄒養赤

山慵城市怯日落獨歸船遠火如浮水懸星不在天依
稀記草樹浩蕩傍葑田岸泊防飢虎呼童笑語還

油江懷古

諸生 田藍玉

丞相濟吳師艱難此地支一枝鳩借蹙半壁虎爭危周
陸遺踪杳孫劉霸業隳但憑天塹在控扼重當時

檄公梔

用恆將置韻

諸生 杜顯傑

郡城之東檄公梔鬼護神守倚雲隈一代精忠原不死
淒風苦雨長蒼苔歲在丁丑菊花秋將軍閒眺望楚樓
憐才提唱發浩歌表忠健筆貫斗牛過客一覽紀之詳
立亭泐石爛成章滿漢瑤篇連雲錦孤梔屹立彌精光
當年闖賊寇荆關司訓將才腰箭環挺身力距戰且守
氣節巋然成斗山可憐力盡遭毒射身縛長竿三晝夜
穿胸斷臂雲路坊長軀修髯梔上化熱血飲梔梔不摧

紀南弔古何勝悲雲鶴歸來棲難穩想君掀髯更張眉
英風凜凜賊城上竿竿頭有淚落吟壇滔七東下長江
水嗚咽萬古走波瀾公之巔末錄郢志名教綱常匪細
事我欲爲君賦招魂腸枯髮禿難爲序君不見城頭隍
池水光白桅影臨潭揖過客舟前說與雙飛燕莫將輕
橈打靈魄

白燕

毛業溥

色比梨花花減神素心一片傲風塵高飛黃閣金鑲玉
低舞青池雪打蘋皓鶴行中呼小友烏衣國裏號山人
如今正好凌雲去不作尋常人幕賓

渡荆江至夔陵驛

南雁編修吳省欽

劉備營何在川原極望疎秋生梧桐下雨近荳花初折
戟埋終古迴帆切太虛吹燈有山鬼卽次委琴書

輓蔡孝廉輝琳

知縣任郇祐

灼灼春月花離離秋日草春盡花翻飛秋深草枯槁人
生非金石豈能長壽考君死亦何悲七君死太早兒女
未成行雙親復衰老家無顏氏田經史苦探討獻策阻
金門一第徒自好胡天詔斯文令人生煩惱我雖吏風
塵愛才如愛寶去歲事棘闈爲君文傾倒契合磁引針
神洽覓在藻譬彼灌園人相期在合抱一朝失所珍無
處堪祈禱簡編不忍開恐見君遺稿

雅愛杜愛竹秀才

大號賦此藉以相勸

知縣劉廷謨

君能愛竹解堅貞我愛虛心氣節清他日操持今日裕
鼎鐘事業本書生

同孫紫溪茂才余次卿侍御長湖晚泊

毛家槐

維舟湖畔暮雲深近水遙山客正臨無限風煙迷古渡
幾多意緒觸寒砧紅圍村落楓林晚碧點溪礪柳色侵
吟罷奇文方載橐雕蟲偏惹壯夫心

暮春登東門城樓

易斗光

岌業危樓俯治東登臨搔首夕陽紅征帆峭落關河水
牧笛橫吹驛道風臺宅漫尋車武子祠堂猶說寇萊公
春城多少前朝事都在青苔碧草中

柳浪懷古

侯家光

柳浪湖上柳如烟柳浪湖下浪接天浪花柳絮交春色
沿湖多泊釣魚船可憐湖岸釣魚翁去來打槳浪花中
豈知浩渺煙波裏當年會此住袁公我聞昔日油江口
三袁兄弟耽詩酒湖邊構起水心亭陶潛門外多種柳
伯修小修擅文詞中郎更是開天手天馬行空不可羈
遊戲騷壇世罕有三百年來景物非人去亭空水四圍
柳不垂絲湖無主碧波千頃鷺鷗飛白鷺沙鷗紛起落
九原才子不可作東風吹浪碧參差畫棟雕梁成蕭索
君不見湖柳不是舊時腰年年風雨傍野橋惟有三更
湖上月曾照先生貯詩瓢

過公安

松陵謝元淮
觀察

青山如故人遙見心已悅前峯迎我歸後峯送我別迎
者喜低昂送者愁噦薄暮望公安孤城遠凹凸咫尺
辨家園翹首歸思結思欲閒道歸躊躇那可說有家不
如無既近轉騷屑是日天氣清微雨戢炎熱城北啼鷓
鴒城南叫鷓鴣感茲禽鳥情助我離懷切長嘆語舊山
曷由回我轍

走馬堤

諸生
嚴壽春

何年帝子卸金鞍零落遺蹤馬上
看萬樹梨花春雨溼
千門楊柳晚風寒紅塵有夢從來
幻白骨無情只自酸
莫問長堤興廢事錦官陵寢舊凋殘

題袁中郎先生集後

侯家璋

巨眼空千古縱橫止一人步兵爲益友坡老是前身氣
烈聞聲壯才奇出語新滔七江漢水浩渺放游鱗

留別詩八首

錄四首

知縣 焦家麟

上接三巴下澧陽交馳水陸織棱忙逢迎我本安於拙
調劑君應別有方村舍月明彪易吠庭除花落蠹宜防
劇憐階下胥徒輩撫馭猶需解澀囊

衣冠從古邁羣倫名教維持戒笑頰不守楷模終敗類
况稱刀筆誤齊民風雲變幻貧兼富雨露滋培義及仁
此別應須各努力懷刑懷德冀書紳

論文漫詡品題眞我是芸窗悟後身口耳詞章徒涉獵

性靈杼柚總滿清新分來鶴俸知心苦探得驪珠即掌
珍濟七前程頻拭目皋比已定愛蓮人

黃童白叟莫聲吞不入公門記至言鄰里有情消雀鼠
吏胥無計擾雞豚能勤畚鍤堤防固著意耕耘稼穡蕃
舊政定輸新政好臨歧何事又攀轅

留別詩六首

餞四首

知縣 李 楨

頻年星月未神疲肯遣鋒車聽唱驪薄宦渾忘鳧寫幻

輕裝不用鶴琴隨悟來圓澤三生石

用李源與僧圓澤在荆故事見甘澤

載得中郎一卷詩

袁公安詩出於性情絕無摹擬塗飾之跡余深愛之

惆悵頻行當道

臥有何治績繫人思

金堤千里重防川禹跡茫茫數未全

荆江有九穴十三口今只存虎渡調弦兩口餘俱

漚沒不可考

書有河渠誰委壑志詳溝洫奈填淵淒涼水國

餘孤艇零落村墟認斷烟唵到東坡窮命句

竊取東坡罷徐州往南京

馬上作舉鞭謝父老只坐使君窮窮人命分惡所向招災凶水來非吾過去亦非吾功云云意

幾番沉玉訴蒼

天

接士猶深翰墨緣一回小別一悽然新陰桃李期時彥

空谷芝蘭望夙賢砥節宜存孝先志

王沂公字孝先

登程好著祖

生鞭臨歧莫忘殷勤意留取心香証謫仙

指點長堤去住頻條條疎柳繫江濱漫因風雨懷前令

自有循良在替人鄭渾桑麻慚四載汪倫情緒溯三春

何時再泛荆南棹好盃壺漿認部民

斛湖堤工次

四首之一

知縣

徐步雲

曲陽薄宦又南平
戴月餐風曉夜行
夾岸芳塏添秀色
沿堤茅屋聽書聲
瘡痍滿眼息難徧
飢溺關心夢不成
庸吏愛民無妙策
瓣香先祝一春晴

道光壬辰大兵南下道經公安

鄒美中

妖星睽七射天狼
羽檄飛來自鬼方
萬馬奔騰塵不斷
將軍昨夜發襄陽

城狐社鼠寄餘生
敢向潢池盜弄兵
釜底游魂終授首
天南時雨逐軍行

大將旌旗逼斗寒
前驅戰士後材官
一聲鼓角齊回首
箇七爭從壁上觀

春風指日賀平蠻
銅柱何須界漢關
從此南人不復反

銘功直上九疑山

寄西林山人

李澤濤

西林山上一片雪
西林山下人踪滅
我爲訪戴乘興來
今宵霏七談玉屑
歐陽六一稱醉翁
山水之樂樂無窮
得諸心而寓諸酒
豈真蒼顏頹乎中
問君何事先白頭
一生爲替別人愁
豈知多愁即多病
胡不遣興酣高樓
亦覺春色共流水
世事變幻長如此
請君爲我一駐顏
四顧茫茫誰知己

城外晚眺

諸生
李文清

小立荒城外
蕭蕭夜氣涼
山峯瞞塔影
月色淡燈光
富貴邯鄲夢
姻緣熱惱場
何如一樽酒
小醉任滄桑

客舍烹茶憶鄒星溪

火爐新煮茗小飲當金甌
水涵溪毛現月高樹影收敲
砧千里夢擊柝一聲秋
遙憶沙津客舉杯正未休

禾田岡觀耕者偶成

荆榛滿地少人行累日窮陰偶放晴
且喜荒城爲賊棄長留片土與民耕
水光渺渺揚帆遠木葉飄飄落地輕
舉目不須悲寂寞三湘士女盡南征

節孝祠月夜獨坐

水國波平夜氣清客情無那漏三更
金風故故催殘夢揉碎芭蕉作雨聲

邑侯周壽農司馬徙治新城並志書刻期告竣

長句紀實三月十五日

易秉璋

仙吏風裁迥出塵雙鳧飛下宰官身趙衰日趁三冬暖

城工始潘岳花開滿縣春擬築崇墉興雉堞好從原隰認

客歲冬龍鱗一年治績千年仰膏雨隨車迓部民

瑤函纂次幾經年成帙公然費俸錢讀史初添循吏傳

當官不忝 侍臣賢先侍御公乙未典試楚北河山滿目收新治蒼

赤關心託舊編自是文章崇政事一封手敕落花天

贊

王襄簡贊

明學士 廖道南

遙羽詞林綴班鑿坡有美一人秉性清和典教成均文
行忠信委心文定不失其正

公任巡撫祭酒深為
楊文定博所推許

鄒莊簡贊

德厚無疆業廣有常節堅不渝烈永彌光肇擢諫垣排
闖飛章乃忤逆瑾出守畿邦繼司藩臬惠播甘棠乃戡
叛裔勳紀旂常入握臺紀丕振大綱薦典國計贊亮朝
堂懇疏歸老黃山高岡

題畫書松石贈侍御毛芝田年兄 倪元璐

石既峻嶒松亦傲岸有人如此豈非鐵漢

銘

張景銘

宋學士 宋 企

蠲才華兮懿孝至
撫仕兮難老
蹇皇七兮晚獲
伸發吾懷兮露珍
茫七兮安究
尚立言兮不朽

鄒莊簡銘

明大學士 顧鼎臣

九澤七川地靈
瀦殷鍾賢毓秀
乘會昌辰忠言
直節為國蓋
臣盤錯屢試器
利如新樹勳巖
廓正笏垂紳明
良都俞一德有
鄰惟德濟時惟
德潤身功成身
退人稱哲人

侯偉時銘

鄒養赤

生不必其不朽
死不必其不壽
孰重孰輕孰先
孰後苟

不愧晶白之心而患乎悠遊之口公之死與日月爭光
山河同久

田鍾雨銘

嚴首昇

其質醞兮其氣清文在中兮澤在民近其光者如有獲
而嘗親聞其風者若或起而自欽以克永世令而昌而
甯

灰如禪師塔銘

並叙

師諱亮字灰如萍鄉王氏子自薙髮受戒後足跡半天
下終老於公安報慈寺其於彼道求之綦切得之綦深
而守之綦固其舉以示人也引而不發直而不徇易人
而難窮生於萬歷壬寅告寂於康熙辛酉從其教火浴

之得舍利數十齒牙念珠大半不壞斯亦奇矣前後語
錄若干卷叢林重之其徒樹可雪幹建塔藏其蛻餘予
爲之銘曰

雙樹談寂五葉燈傳教網乍裂真輪恆圓後五百年疇
悉解脫盲龍跛象牛尾鱗角孰振其靡孰匯其宗熊熊
太白蠹七三峯亦越海門播聲吳楚白雲高塞流作甘
雨有老古錐繼出江西披襟承流一笑全提佩以法印
辭之不得試一展演天歡魔懾報慈之刹嶼公所創風
火劫更金地榛莽爰卓我錫有衆雲翔開田說義莖草
爲坊荆東澧西湘南潭北細白顙七瞻此佛國載陟神
山浮乳之源掃塔邦象太陽破顏凡我傳法爲拔迷情

迷不自迷明卽無明云何諸方江河日下濫膺謬錫煩
師唾罵十方無住心爲道場秘藏無遮身作金湯津梁
匪疲機緣有息代我敷宣水光山色道影寂寂烈燄騰
騰晉諸不壞再轉法輪湖畔窳堵真身永我作詩銘百
靈同護

賦

囊螢讀書賦

並叙

龔三捷

明府廬江楊公具淵雲之才思裕冉季之猷爲撫民則
燭照逃亡造士則斗輝衿履慨夏日之旣去喜秋風之
徐來於是鶴立一足琴弛七弦進諸生而告之曰貧者
士之當焚膏繼晷底事皇七爾南平舊境車武子讀書
之鄉也警心午夜苦志縹緗感流螢之有耀故撮之以
一囊卒成大器致身廟堂茲儒林之所樂道抑爲之前
而美彰子曷爲我賦之捷曰唯唯
塊洪爐之大造兮化無情爲有情悲何草之不黃兮置
之死地而後生具兩翼而六足兮託形體於螾蠅羗渺

細而騫舉兮散入夜之微明竊夜光之大號兮曾何有
於照乘顧收之以處囊中兮雅有裨於橫經聞之螢之
爲物也載在月令鶉火之次腐草斯競當其郁郁河上
共此春暘遭薙氏之蘊崇致零落於道傍薰灼兮趙宣
之日酷烈浸淫乎魯僖之雨沲滂一燥一溼負陰負陽
初蠕匕而蠢動漸熠匕而生光豈老蚌之含水而登陸
兮倘燭龍之多子而光芒過目發鑽燧之燄屬耳無擊
石之鏘羽翼粗成翩然而起水瀨山巔荒陬錦里月下
風前競兒喧女道阻結行子之淒簾疎窺坐人之綺弄
輝匕之花蕊奄乍明而乍滅添個個於井欄似倡予而
和女乃有篋瓢書客志吞萬卷感鑿壁之無鄰闌墨墨

而浩嘆忽爾觸目憬然而會用不在大妙用以萃詎聚
蚊之成響兮而集螢之不彗爾乃徵敝絺命刀尺線無
取乎折襪製彷彿勿密繫裁成之大如斗諒照夜之赤
如日居然括囊以无咎吾何畏乎暗室陳書數篋簡鍊
揣摩白魚急而走死三豕安得渡河藏錦繡才於肝膈
戛金石聲以吟哦想其處置或有縱擒顧草木之若在
抱豈昆蟲之傷不禁賴卜夜之輝煌當計日而踐更時
或出入妙有增減亦聚集而稠密亦離羣踈散出返月
露之場八張風雲之氣減壯大略之觀增辨魯魚之細
稠密途天祿之藜火踈散擘金蓮之流麗二酉窮三篋
做牙籤剞墨莊既萬卷樓空富文閣閉慨黔首之愚徒

邱索之終祕斷秦漢而上之捧文武於未墜彼光遠而
自他有耀何惜乎委曲而益人神智在昔南平之南嗜
學據子之鄉乞靈宵燭餘足晝長留芳名於車渚發澧
蘭之幽香固非止風度矜宣武之座崇高發冢宰之堂
而已也吁嗟乎暮讀書今朝大廷御長檠兮歌短檠依
日月兮上星辰竊獨念此流螢

公安縣志卷之八

雜記

雜記之名本於戴禮故邦國志創立體例簡末綜舉古今故實取其信而有徵者都爲一帙所以示典則昭法戒也分援古補遺二門瑣屑攬拾使各以類相從要在約而不漏該而不雜其無關實事者無容沿襲編入以眩耳目

援古

志者史之餘也傳疑襲謬世間不少不一辨析道益沿爲誕妄爰博採旁搜隨筆登記以完志之不得不止匪敢曰六經註我要當使我註六經耳

南國考

路史曰江陵古南國妣姓號有南氏又云殷盤庚妃姜氏夢赤龍入懷生子手握南字世長荊州則子姓之代妣者也呂覽云禹巡南土塗山之女作歌曰候人兮猗此南音之始周文受命化行江漢二南之篇遂為四詩冠後雖騷賦迭更咸本屈宋風雅先聲舍南奚歸哉舊志

南之為言懶也故其變也流為懶音懶與溺同公安屬在南國以下新增

沱水攷

禹貢岷山導江東別為沱七之名梁與荆皆有之酈道元桑欽未確指其地以沱為水之公名也雖然梁與荆要有辨考岷江之源出於黃河之西漢書所謂岷山在

西徼外江水所出是也而禹貢導江之處在今四川黃勝關外之乃褚山古人謂江源與河源相近禹貢岷山導江乃其流非其源也自黃勝關流至灌縣都江堰分流而下其東北去者曰沱陶文毅公澍蜀輶記程嘉定之大渡河江之別派源出西南徼外中國後過郡三行二千餘里其源本與江同而復會即禹貢梁州之沱自敘州府與金沙江合流出三峽入湖北界又東過巴東縣北則有萬戶沱又東南過歸州則有屈原三沱此彝陵以上之沱也不具論自歸州流逕枝江羊角洲江汜支分東入大江王叔晦曰枝江縣百里洲夾江沱二水之間其與江分處謂之上沱與江合處謂之下沱是沱

在北江也按此卽詩所云江有沱者是其後北江漸盛
南江漸微反以北爲江南爲沱矣或以今江水未嘗至
澧遂疑禹貢又東至于澧之文爲不可解不知江水逕
江陵縣南枚迺洲俗名窖洲金分爲南北江其南一枝入虎渡
口禹貢錐指云南江爲古岷江之經流逕公安縣西又
東南流合涔水入澧州界爲泗水口歷州之東北又東
南合澧水逕安鄉入洞庭湖下合北江正與經文東至
于澧相符袁中道澧遊記南江卽江水由澧入洞庭故
道自北江獨專其大而南江之迹稍七湮滅今虎渡南
流之水實卽東別爲沱雷思霈曰昔以長江入九江故
殺而緩今以九江入長江故扼而溢勢使然也蜀輶記

程江自虎渡而下經柳市彌陀市至公安縣之黃金口
又南經港口關賽口楊家蕩泗水鋪入湖南澧州界所
謂沱也總之江水入虎渡南流至縣境爲禹貢之沱水
確不可易或又謂水之出於江而復合者爲沱邑沱市
何以名曰三國吳孫亮時廖解里有靈鼉鳴正其地也
舊志鼉穴作鼉空讀去聲空又譌爲孔茲謹据地理志
參以諸名家集說俾知夫鼉之爲沱沿里有祥異之徵
空之爲孔由音有假借之異而傳聞異辭並誌之補酈
道元桑欽水經之所未注

油水考

自左公領荊州牧立營油口改曰公安邑之有油水舊

已顧或稱油江或稱油河歷世既遠疑以傳疑如楚北水利堤防紀要謂黃金口即油河口不愈滋後人之大惑乎考油水在舊縣斗堤西舊由此入江由古作繇後人因智者化水爲油事於偏旁增水故曰油水漢書地理志南郡高成縣今松滋繇水南至華容入江過郡二行五百里按漢時孱陵亦云華容包石首監利之地非今之華容也桑欽水經江水逕南平郡孱陵之樂鄉北油水從西南來注之又東右合油口又東逕公安縣北注武陵白石山油水所出東逕其縣西與涇水合涇水出高成縣涇山逕公安縣西又北流注於大江雷思霈荊州方輿書孱陵城背油向澤其油水流公安縣西又北乃入江又云

江水由虎渡支流逕縣之三穴橋油水從西北來注之
江水衍溢入於油河三十里會虎渡口水入洞庭舊志
三穴橋渡注上卽江瀆堤是爲油河據此則知油水自
松滋流入縣境實卽會虎渡之水流入油河以達於北
江所謂油江者從其外而言之也所謂油河者從其內
而言之也二說似歧而實一也今雖滄桑屢易油河遺
跡具在舊通五里三橋諸水達江斗堤油河工其明徵
也則油江口之在斗湖堤無疑前此江水入油口西流
里許一港灣環而出板橋由邱家營過周家庵至桑檀
鋪而派復分一由白石碑走馬堤燒榨湖會板橋港水
而出小橋一逕武侯祠出三穴橋而歸西河行五里至

黃金口則黃金口之非油河口又無疑自孟珙興江防
厥後口之在大江者既築於官在西河者又塞於民油
河兩岸父老所指畫者猶歷歷可觀近斗湖楊公堤潰
下流淤高桑檀鋪燒榨湖一帶水涸時猶匯數十里為
一壑油河故迹遂不可復識爰歷誌以諗來者

雲夢解

舊尚書雲夢土作父宋太宗時得古本尚書作雲土夢
作父詔改禹貢從古本孔安國注雲夢之澤在江南非
也按左傳吳人入郢楚子涉睢濟江入於雲中王寢盜
攻之以戈擊王王奔郢楚子自郢西走涉睢則當于江
南其後涉江入于雲中遂奔郢則今之安陸州涉江

而後至雲入雲然後至郢則雲在江北也左傳曰鄭伯如楚王以田江南之夢曰江南之夢則雲在江北明甚沈括夢溪筆談元豐中予自隨州道安陸有竟陵主簿郭思者能言漢沔閒地理亦以江南爲夢江北爲雲以左傳驗之思之說信然江南則今之公安石首建甯等縣江北則玉沙監利竟陵等縣乃水之所委其地最下江南二折水出稍高方土而夢已作久此古本之爲允也

附櫺星門說

按廟制自正殿而南有戟門有櫺星門戟門宋建隆年間準儀立戟按釋文云櫺者楣門總格也班孟堅西都

賦拾櫺檻而卻倚文選詩曲櫺激鮮鱗韓昌黎詩暑夕
 眠風櫺蘇東坡詩皎如明月照窗櫺是也其名星何陸
 放翁老學庵記窗格縱橫相間名星眼合之戟門古為
 楣門制用櫺窗格撤去障板取闕門求賢之意其兼取
 星者同於王制尊之至也周禮有臯門有應門有闕門
 巍然中國上懸治象謂之象魏自漢以來天子正門曰
 端門後世用天子禮尊先聖為櫺星門即今所云宸居
 法宮是也

二條錄晏承
 烈舊志刊誤

上荆南道王璩報慈大佛殿募疏

康熙九年後
 二月廿一日

孱陵之在荆州名公巨卿文章事業往往甲於三楚稱
 名邑又二聖智者大士則皆邑產也故又稱佛里邑有

報慈名利創自藏嶼禪師嶼公得法龍牙糸出洞山自
唐歷宋宗風蔚然至元延祐中奉刺重建佛像莊嚴殿
宇洪麗明季鼎革燼於兵火獨圓通一殿古刹蒼然雖
屢經興廢孑然獨存然僅支梁柱耳其他廓廡僧舍牆
垣皆蕩然無有昔人謂禪宮亦消歇塵世總堪哀信然
哉邑紳延請灰如大和尚住錫興復灰師乃三峯嫡孫
白雲問公之嫡子也白雲沒後潛踪夾山神鼎匡廬間
十有五年精進操履不通塵世蓋其心深慨法末俗學
理行不侔故絕肥意遯若此靈巖和尚白雲法兄弟也
遣使勸之曰公以堅忍之操韜光鑿彩不肯自欺當思
畢命利生以報從上詞意堅切師徘徊數日方應報慈

之請住寺說法者六年然其門風高峻又負性孤介嚴冷有契嵩善嘖慈明善罵之風及門者多望崖而退寺中如法堂禪關香積俱次第建立布茅獨大殿工力浩繁尙未敢輕舉修砌癸卯春予解組入山問道報慈者半載故親近和尚最深又與其法嗣樹可雪幹倡和者最久回憶萬歷中三袁先生深禪理崇佛教與先大司徒公同譜籍故予以年家子與袁氏昆仲稱世兄弟又予曾待罪荆南尚鄒毛馬陳諸公皆世交夙好予請曰人情無常善惡從境以善境誘之則善心生以惡境薰炙則惡意起昔佛經行俄指曰此處可建一梵刹時賢于長者信手拈一莖草插已曰建梵刹竟倘於此處會

得使衆生磕著觸處善境冥移其習密化其惡不
亦可乎請從此殺殿始縉紳諸先生聞予言皆踴躍歡
喜高拙菴封翁尤夙有此願力乃各施若干金而年內
湖邑苦旱澇苦賦役猶未敢輕動工和尚又同樹可應
神山之請興復祖庭獨雪幹獨力在寺支撐諸紳士與
大衆皆請及時修砌以了灰和尚夙願予適還蜀道經
沙頭雪幹復徵予疏予不佞謂博施濟衆堯舜猶病佛
教必以此勸人者欲人自發其感福之心也儒曰福者
備也無所不順之謂備伏願見者聞者於此因緣發大
歡喜生大感激量力喜捨培植善因可以資冥福謂報
慈親可也將此身心奉塵殺謂報佛慈可也可以作今

生之福田可以種來世之因果則報慈之瓦礫荆榛湖光山色皆諸君廣長舌相也以故代爲十方白云

附袁小修當陽柴紫菴贖復香火田記節錄

當陽柴紫菴明萬曆甲寅禮部郎中袁小修建也先是玉泉寺僧無跡以請藏入京晤袁伯修小修昆季暨南充黃平倩等草疏捐俸得金錢巨萬歸營玉泉極壯麗柴紫菴在玉泉石掖祀諸護法居士中維摩詰左

關聖右庶子袁宗道吏部袁宏道庶子黃輝太史雷思霽諸神主復置田計八分每分田二石五斗共二十石又旱田一分三石三斗付度門寺僧無跡後裔執管

泊今祠宇空存神主久廢香火田八分僅存一分在
度門寺餘者典賣殆盡事到極處別有奇緣同治十
年邑訓導易祥光署理當陽縣學遊玉泉是庵寂寞
蒼涼憮然念里中先達創建苦心田產蕩棄徘徊不
忍遽去有老僧狀龍鍾名明心者卒然問曰遊樂乎
公曰快甚賣曰何居公曰此庵吾邑前輩袁小修所
建置田若干畝供奉香火今無存者奚樂爲僧具道
田地典賣承售主人姓名俱係玉泉各廟住持僧開列清冊付公
蓋變賣田產者卽是僧也湘崖將柴紫庵田畝興廢
始末備文附摺牒請邑侯戴晴初查復并飭繕祠主
當傳獲原主度門今大通寺住持僧明心並傳玉泉

寺僧大智等究出明心私賣田地三分度門寺僧尙存一分共計四分惟此僧老朽萬難贖復議歸玉泉寺公堂備價取贖另派妥僧照管度門寺所存水田一分二石五斗旱田三石二斗明心當堂立約交玉泉公堂掌管其從前承售三分之二五飭令各住持僧當堂吐退公堂備價每分備錢三十五串分別立約計已贖田畝三分七石五斗度門寺先存一分三石五斗合計四分大共水田十石又旱田一分三石三斗永作柴紫菴香火並僧人日用之資田畝復則香火俱香火供則柴紫存且神靈之祀存而小修建立之功經營之跡得以永存事已諧不可不爲之記

車允辨

車允字武子南平人曾祖浚爲吳會稽太守公清有政績值郡旱饑表求賑貸吳主孫皓以爲收私恩遣使梟首父育郡主簿太守王胡之名知人見允童幼謂育曰此兒當大興卿門允恭勤不倦博學多通家貧不常得油囊螢火以照書比長美丰姿機警敏悟與吳隱之俱以寒素知名桓溫辟爲從事遷別駕征西長史謝安亦厚待允每公卿有宴允或不與皆云坐無車公不樂甯康中以允爲中書侍郎關內侯帝嘗講孝經謝安侍坐陸納侍講卞耽執讀謝石袁宏執經允與王混摘句時論榮之累遷侍中孝武太元十二年領國子監博士會

議郊廟明堂事尤以明堂之制難詳且樂主於和禮主於敬故質文不同音器亦殊茅茨廣廈各一其度固當宏本順時不必守其形範也請俟九服咸甯四野無塵然後具修時從其議遷驃騎長史太常進爵臨湘侯以疾去職安帝隆安四年允起為護國將軍尋為會稽世子元顯陷害卒朝廷傷之按武子自其父為郡主簿因家焉今西辛里有武子臺武子宅讀書應在此乃澧州安鄉爭志以為榮與巢縣爭塗山會稽爭禹穴前後一轍豈以晉時南平治作唐故彼地車姓附會之若澧之囊螢臺武子宅基新州城門石額之車城自古名賢多如此後之人可以興矣

參澧志舉要

謝祠辨

邑東南六十里黃山相傳劉宋刺史謝晦葬其巔有神
異邑人建屋祀之宋徽宗政和二年大旱荆澧之禱雨
者應如響二州軍儲獨不乏奏封惠應侯賜額忠濟廟
按晦陳郡陽夏人元嘉元年使持節撫軍將軍都督七
州任兼領南蠻校尉三年反兵敗伏誅澧志舉要以晦
為反誅之賊非死於是地亦必不葬於此山元安鄉知
縣酈因碑稱為西晉謝遷通志稱謝鱗其非晦可知古未

有逆臣而得為明神者忠
濟二字更非晦所得受也

補遺

一邑之中閱人成世有關於懲勸或聞之昔而舊所不

載或見之今而事體奇零書之亦所以教也况天地間
不乏奇異姬經山海廣不逢不若之意魯史宋鷓想祥
桑枯死之難夫不有大制作取象於鳥獸草木人情感
起於昆蟲者乎

諸葛瑾字子瑜瑯琊陽都人漢建安二十四年以綏南將
軍代呂蒙爲南郡太守住公安劉先主東伐吳或疑別
遣親人與相問權曰孤與子瑜有死生不易之誓子瑜
之不負孤猶孤之不負子瑜也吳黃武元年遷左將軍

督公安

府志

繆士通劉宋永初中爲江安令卒官時江陵令甄法崇在
任嚴整至其年末法崇在聽事士通前見法崇知其已

愕然未言坐定云卿縣人宋雅見負米千餘石不還令
兒窮敝不自存故訴法崇命口授爲辭因遜謝下席而
去法崇爲問宋家狼狽輸送太守王華聞而嘆美之

南

史本傳

韓望南平郡處士風塵脫落孝友深純梁天監七年荊州
刺史安成王秀辟之與南郡庾承先及河東韓懷郭麻
其下教有曰椽飯菁羹惟日不足葭牆艾席樂在其中

潛志舉要

解潛紹興初荆南鎮撫使奏辟宗綱樊實措置屯田荊州
軍食仰給省縣官之半建炎間諸州鎮撫使或戰死或
降僞齊惟餘潛在丕主和議時論稱之

文獻
通考

向友正淳熙八年攝公安令有善政癰發於胸臆閒嘗委頓而臥似夢非夢見一偉丈夫傳藥方與之曰用沒藥瓜萸乳香二味以酒煎服友正敬謝不終劑而痊後詣玉泉禱雨瞻關帝像蓋所感夢者

何皞令睢甯時有三異政麥秀二穗螟蝗不入境牛多產雙犢九載召入爲戶部郎尋告歸世宗御題賜犢歸莊圖以榮之

楚紀

王襄簡軾髫齡時常遇呂仙奇其風骨預爲記授後科名次第及宦迹所至無不符和公自有傳此其軼事也

劉珠故與張江陵相公同爲諸生相厚善及辛未江陵主會試劉始登第則年已及稀齡矣又三年江陵滿五旬

劉在郎署爲詩以壽中一聯云欲知座主山齊壽但看

門生雪滿簪江陵爲一啓齒

徹帚常齋

毛羽健天啟壬戌進士嘗畫夢關帝持墨瀋一器強飲之
及覺餘瀋猶漬衿席自此文思大進少慷慨好施急人
之急嘗破產贖亂兵所掠婦女數百人悉送還家後自
戍所歸值寇陷荆郡猶與其門人偏撫李乾德同守岳
常斬賊甚衆已而道病尋卒歸葬

袁儀部中道十歲著黃山雪三賦五千餘言長而通輕俠
以豪傑自命窮覽燕齊魯吳越之地歸學於李龍湖有
志出世久困瑣闥萬歷丙辰始成進士授蘇州教授遷
國子博士乞南得禮部主事歷郎中旋乞休以疾卒年

五十四錢謙益謂其詩文有才多之患朱彝尊謂其才
不逮中郎而過於伯氏皆定評云

府志
文苑

蕭都堂毅中天啟癸亥任南京江南提學甲子授大理寺
時魏璫披猖應山楊公疏璫獲罪舉朝色沮公抗疏直
諫有三十年泡影之功名轉眼殆盡五百載帶來之良
心至死不昧從古無不郊不禘之天子而陛下爲創見
創聞之奇事等語觸璫放歸崇禎初璫敗起公由太僕
少卿陞南贛巡撫忠義之名相傳

不朽

毛羽宸爲文根極理要崇禎丁丑會試已取中折卷日主
試係溫周黨知爲侍御芝田公兄也遂不錄是後有毛
羽儀者孝感人中進士亦疑爲侍御族嗾番校緝其家

屬致之獄竟革戍奸黨之忌公如此

袁致道與從兄履道師李再白萬歷庚子同舉於鄉三公
同學又同寓時以爲盛致道萬歷末授荆門州學正敦
勵名節振興文教所舉優劣悉服士心學使葛屺瞻甚
褒之一時科目慕盛公之力也陞河南登封知縣去人

多思之

荆門州志

陳忠國字升揆公安諸生曾中四川鄉試副榜以冒籍黜
壬午來京師其鬚長過於腹行則自兩肩搭於背每行
過市人競隨觀之

香祖筆記

鄒操富文學任澧州教諭感澧久乏科第力移學宮時六

月落成有露如霜凝結一魁字於

大成殿上後遂科第不絕事載碑石

田垣由歲貢任河南獲嘉訓導歸所乘馬產麒麟獨角鱗
甲有光生即能食金鐵聞於官一時異之傳爲龍馬田

氏云

舊志本傳

王從貴孱陵村人有妹未嫁常持誦金剛經貞元中暴病
卒埋已三日其家覆墓聞塚中呻吟遂發視之果有氣
昇歸數日能言云初至冥間冥吏以持經功德放還王
從貴能治木嘗於公安靈化寺起造其寺僧曙中嘗見

從貴說云

西陽雜俎

毛太涵生員家甚饒背父早僮僕百餘至莫能辨一日理
家政僕有負嶠松滋者拘之不獲獲其婦歸拷掠數日

經死夫遂夥親隨僕子約五十人白晝入劫破主腸而
脂出毛妾劉故娼也力以身捍毛被創者數俄欲斷毛
頭時六月初十日赤日當空無雲而雷震者三羣兇股
栗中止良久擁婦屍還松滋挾毛護行至十五里外一
寺中稍息毛有友王光國擁身入兇黨視之曰吾汝無
讐來何爲王曰惟無讐故來毛吾友也彼遭難吾視之
情也與毛隈坐故不去無何塵起持鋒刃疾呼而至者
幾數百人羣兇懼王曰汝但舍毛速走我爲政羣兇唯
唯王乃督數百人追之至一港羣兇不得渡於是死及
下者十數人溺水者四五人脫走者半蓋王方挺身救
友時已陰促數僕檄衆來援又遣人將港船盡移匿蘆

葦中故耳王拚死救友倉卒謀略周匝勇而有智如此
乃劉妾亦烈女子哉湧幢小品

彌宗和尚滇南武進士也康熙初自京師歸道過公安泣
與同侶別作書寄家人曰是嶺白雲吾當老死白雲鄉
矣乃剃度披緇入塔岡梵刹爲僧或叩其故不對固詰
之則曰僧雖武夫頗諳天文邇瞻故鄉其氛甚惡不數
年當有兵起故託功名北上謀一安樂窩耳頃從帝京
南旋襄樊一路皆非吉土惟是地風俗醇厚雖有小劫
可無大禍欲藉諸子福澤保此頭顱夫豈真如癡猷漢
妄云舍身出世可證佛果哉又問果爾何不挈家以來
彌宗長號曰是有數在乃以眼淚洗面亡何三藩反滇

南萬里無噍類彌宗南望悲痛剪紙招魂自是或哭或笑不看經不念佛唯日飲醇醪數斗禿坐蒲團若世所畫布袋和尚狀及入涅槃時謂其徒曰吾死即葬山門前題石曰彌宗和尚之墓存日繪小像一軸徒衆謹藏

之

偃蓋山房雜著

牟冕字周服年九十鬚長過臍瀟灑出塵適一道人來吐囑元妙牟朝夕供禮之一日約與遊名山則以子女之局未終對道人笑曰君猶知有子女耶取大紙塗墨於手印之命藏匣中遂別去取視乃張真人三字也遍覓不獲又一道人來寓數日偶適昇明臺過本境社神前足忽傾道人漫語曰好好送汝艷都去牟是夜夢一白

髮翁求救醒以問道人道人道曰信有是且與伊他族遂命一無子僕移於港口期年僕生子因名土地保

鄒授讓精於卜筮役有逸其囚者卜匿於縣治之西南十五里市廛閒雞鳴時急捕勿失也遲則遠遁矣如言獲之又某妻逃卜曰盍索諸東南敗屋中已變少女爲長男矣削爾頤鑿爾眉黔且頤兮是所私兮迹其言於叢祠積薪下搜得之則服男子衣冠與所私者偕其人瘦削而長眉閒黑子隆起繫七然如刻畫云

徐二者不知何許人也口操吳音多幻術乾隆閒至邑以符咒治病僑寄于侯氏祖祠時有邑庠侯國楨往延徐家人烹伏以待謾罵曰賊奴久不來鼎中肉已化淮備

備雞骨刺喉矣時徐方與楨喃喃絮談忽笑曰君家詬
詈予現作何語予弗去矣強邀之則曰病已可瘥無往
公盍歸如不驗來未晚也楨無奈踉蹌歸詰之一如徐
言始知徐非常人村中詫其異每過從必具酒食以款
一日至某家適男子出力田婦婢不識徐未之理俄聞
廚脊上有物震擺牆屋俱動出視則一巨蟒盤欲下相
與大譁奔田閒某心疑爲徐追及之邀杯酌謝過徐來
攘臂招蟒則朽索數尺而已又某家一日耨草應傭者
無幾而田畝甚多度工不能竣頗愁悶適徐至飲之酒
告以故徐曰此易耳翦圓紙如盤大取碓撐壁閒臨行
囑曰伺田功畢可急取也家人如其說傭者歸則新月

已上矣蓋當在田時惟怪日色平西胡遲七久不落而不知在天者之已爲月也事既過幻人口嘖嘖徐亦不自安一夕不辭而去

彭某蒲家湖人母苦節撫子成立時鄉俗插秧皆食粥彭怒其母以乾飯餉田工大罵且傾飯甑於地母呼天疾雷震死衆以孤諭其母哀求忽霹靂一聲而甦其人終身口瘖時崇禎十年事也 是年饑黃金口人家畜一豕販者以贖銀九錢誑其妻易之去夫回大恚罵其妻妻憤甚自縊死次晨雷擊一人跪其門外視之則買猪人也妻亦旋甦

翟某西辛里車公橋康熙三十六年貸穀富室時春雨初

晴自驅驢駝其父肩擔失足穀傾鬻怒罵父即呼天雷震於路而死

牛頭里人明末大亂後自容美司歸省時里中人相食有數人驚喜謂何處來此肥人欲搶而屠之其人聞言飛奔衆不能追而免

舊志

文子銳板橋里人明末爲土賊所仇必索而殺之繫其僕名從學者極刑拷訊終不告主所在賊縛之樹碎磔其肉而死子銳得以逃避子孫尸而祝之

舊志

楊某城內南門人康熙十八年春滇賊敗走城內虛無人楊獨自居守夜爲人所殺屍橫室地家所畜犬守之時城中餓犬靡靡成羣楊犬見則噬之不令入門汜三日

後方得收殮而犬以傷力不食死

文士芳大光里諸生素長厚家畜一犬高二尺許黑毛修尾呼以獅卽至士芳沒殯於堂犬晝夜臥柩下驅之不
去飼之不食覩出隨至墓哀嗥而死

咸豐十一年夏各鄉村晨起放雞翼毛皆翦去人行道上
或坐室中羊角風起辮髮卽失初皆疑畏然卒無他異
白教諭妻死吳訓導倡言姦學吏婦其妻有言遂勒令縊
死事聞撫院林二山欲黜其官守道陳良謨力辯之乃
免後白教諭陞國子監助教二山遇於京師問故白乃
備述係吳訓導造誣陷故二山曰若非陳公急辯幾誤
公矣後吳訓導升萍鄉教諭未逾年亦受同僚飛語過

鄱陽湖舟覆以死

紀文達公
如是我聞

北門觀音閣嘉慶閒後牆偶有雲頭鬼脚若人若馬轟動
城內外男女老少蜂擁雜觀知縣任公郟祐作畫圖說
令瓦工塗之乃止

赴陂里保裕岡有圓臺可畝許四面皆水若葩詩所圖類
壁然相傳係明都堂熊公膏憇涼之所按府志明嘉靖
時有龍解體鱗爪畢現土人建醮起四旁土瘞之鎮以
巨石其堆突兀畝餘謂之龍堆

邑中有竹如箭叢生四季出笋冬春笋在外以蔽母寒夏

秋笋在內母得取涼竹譜名爲孝竹人家多栽植之

舊志

赴陂里馬鞍山麓同治初張姓園內生楮樹連理

跋

是書之成也九閱寒暑矣自乙丑丙寅歲前邑侯袁公
金和創議設局勸捐訪邑人士之翹楚者任管城採輯
新聞網羅散失固已略有端緒以頻厄於水時修時輟
迄未成功兼之經費不敷而嗣是邑宰屢經更代大都
不暇計此越歲癸酉周公壽農明府蒞任奇災迭遇首
議遷城而更諱七於修志一事力催脫稿速付剞劂并
爲請命於府縣倪公慨然捐貲百緡公亦分鶴俸相俛
助不數月而工竣厥功爲甚偉也余司諭是邑歷年最
久人情風土頗不疎於見聞局中諸君子謬以主纂屬
余然余實不過董其成而已時協修者李君寬夫鄒君

魯溪杜君丙軒而始終其事則惟易君琢堂之力居多
云昔同治甲戌春二月吉日安陸王慰跋
公安縣志卷之八 終

乙三馬子

...